



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>



Over dit boek

Dit is een digitale kopie van een boek dat al generaties lang op bibliotheekplanken heeft gestaan, maar nu zorgvuldig is gescand door Google. Dat doen we omdat we alle boeken ter wereld online beschikbaar willen maken.

Dit boek is zo oud dat het auteursrecht erop is verlopen, zodat het boek nu deel uitmaakt van het publieke domein. Een boek dat tot het publieke domein behoort, is een boek dat nooit onder het auteursrecht is gevallen, of waarvan de wettelijke auteursrechttermijn is verlopen. Het kan per land verschillen of een boek tot het publieke domein behoort. Boeken in het publieke domein zijn een stem uit het verleden. Ze vormen een bron van geschiedenis, cultuur en kennis die anders moeilijk te verkrijgen zou zijn.

Aantekeningen, opmerkingen en andere kanttekeningen die in het origineel stonden, worden weergegeven in dit bestand, als herinnering aan de lange reis die het boek heeft gemaakt van uitgever naar bibliotheek, en uiteindelijk naar u.

Richtlijnen voor gebruik

Google werkt samen met bibliotheken om materiaal uit het publieke domein te digitaliseren, zodat het voor iedereen beschikbaar wordt. Boeken uit het publieke domein behoren toe aan het publiek; wij bewaren ze alleen. Dit is echter een kostbaar proces. Om deze dienst te kunnen blijven leveren, hebben we maatregelen genomen om misbruik door commerciële partijen te voorkomen, zoals het plaatsen van technische beperkingen op automatisch zoeken.

Verder vragen we u het volgende:

- + *Gebruik de bestanden alleen voor niet-commerciële doeleinden* We hebben Zoeken naar boeken met Google ontworpen voor gebruik door individuen. We vragen u deze bestanden alleen te gebruiken voor persoonlijke en niet-commerciële doeleinden.
- + *Voer geen geautomatiseerde zoekopdrachten uit* Stuur geen geautomatiseerde zoekopdrachten naar het systeem van Google. Als u onderzoek doet naar computervertalingen, optische tekenherkenning of andere wetenschapsgebieden waarbij u toegang nodig heeft tot grote hoeveelheden tekst, kunt u contact met ons opnemen. We raden u aan hiervoor materiaal uit het publieke domein te gebruiken, en kunnen u misschien hiermee van dienst zijn.
- + *Laat de eigendomsverklaring staan* Het “watermerk” van Google dat u onder aan elk bestand ziet, dient om mensen informatie over het project te geven, en ze te helpen extra materiaal te vinden met Zoeken naar boeken met Google. Verwijder dit watermerk niet.
- + *Houd u aan de wet* Wat u ook doet, houd er rekening mee dat u er zelf verantwoordelijk voor bent dat alles wat u doet legaal is. U kunt er niet van uitgaan dat wanneer een werk beschikbaar lijkt te zijn voor het publieke domein in de Verenigde Staten, het ook publiek domein is voor gebruikers in andere landen. Of er nog auteursrecht op een boek rust, verschilt per land. We kunnen u niet vertellen wat u in uw geval met een bepaald boek mag doen. Neem niet zomaar aan dat u een boek overal ter wereld op allerlei manieren kunt gebruiken, wanneer het eenmaal in Zoeken naar boeken met Google staat. De wettelijke aansprakelijkheid voor auteursrechten is behoorlijk streng.

Informatie over Zoeken naar boeken met Google

Het doel van Google is om alle informatie wereldwijd toegankelijk en bruikbaar te maken. Zoeken naar boeken met Google helpt lezers boeken uit allerlei landen te ontdekken, en helpt auteurs en uitgevers om een nieuw leespubliek te bereiken. U kunt de volledige tekst van dit boek doorzoeken op het web via <http://books.google.com>

B

795,587








TONTEMBOANSCHÉ TEKSTEN

UITGEGEVEN DOOR

J. ALB. T. SCHWARZ,
Oud-Hulpprediker van Sondër c.a.



BOEKHANDEL EN DRUKKERIJ

VOORHEEN

E. J. BRILL

LEIDEN 1907.



TONTEMBOANSCHÉ TEKSTEN.

TONTEMBOANSCHÉ TEKSTEN

UITGEGEVEN DOOR

J. ALB. T. SCHWARZ,
Oud-Hulp prediker van Sondër c.a.



BOEKHANDEL EN DRUKKERIJ

VOORHEEN

E. J. BRILL

LEIDEN 1907.

PL
5424
167x
12-11
1.

1. 5. 1.

GL
SOUTH ASIA
JWE TS
2-6-77
1247420-834

VOORREDE.

De hier volgende teksten zijn door mij verzameld gedurende het tijdperk mijner werkzaamheid, eerst als Zendeling-Leeraar van het Nederlandsche Zendelinggenootschap, daarna als Hulp-prediker, van 1861 tot 1903.

Grootendeels zijn zij door mij uit den mond der vertellers opgeteekend; sommige zijn ook door de vertellers zelf te boek gesteld, of door ontwikkelde Minahassers uit den mond hunner stamgenooten opgeschreven, nadat ik hun daartoe het verzoek had gedaan.

Oorspronkelijk heeft het niet in mijne bedoeling gelegen deze teksten uit te geven. Ik heb ze verzameld om vertrouw-bare hulpmiddelen voor de studie der taal te hebben en om kennis te krijgen van de letterkunde van het volk, onder het-welk ik als Evangeliedienaar werkzaam was, en daardoor mede van zijnen godsdienst, zijne gebruiken en denkbeelden en zijne geschiedenis. En eindelijk wilde ik goede voorbeelden hebben om mij te oefenen in den verhalenden stijl. Mijn hoofddoel bij dit alles was: de Evangelieprediking in de landstaal door nauwgezette studie te bevorderen en in het goede spoor te leiden.

Toen van lieverlede mijne verzameling zich uitbreidde en ik ook kennis kreeg van hetgeen uit andere deelen van het Indonesisch taalgebied van de letterkunde der met het Tontemboansch verwante talen werd uitgegeven, begreep ik zeer wel, dat het uitgeven mijner Tontemboansche teksten met eene Nederlandsche vertaling en Aanteekeningen, voor de studie der taal en der land- en volkenkunde van Nederlandsch-

Indië van groot belang zou zijn. De Minahassa, die tot in al hare hoeken en gaten, zelfs voor Europeesche toeristen toegankelijk is, behoort linguistisch en ethnographisch nog tot de minst bekende deelen van onzen Archipel. Toch weet men van het Tombulu'sch genoeg, om te kunnen vaststellen, dat het gebied der Minahassische talen een der belangrijkste van het gansche Maleisch-Polynesische taalgebied is. De uitgave mijner teksten zou dien ongewenschten toestand veel kunnen verbeteren. Maar mijne afnemende krachten lieten mij niet toe, bij mijne ambtsbezigheden ook nog deze taak op mij te nemen. Ik heb daarom de hulp aanvaard van den Afgevaardigde van het Nederlandsch Bijbelgenootschap op Midden-Celebes, Dr. N. Adriani, die mij door de Nederlandsch-Indische Regeering is toegevoegd, om mij gedurende de jaren 1903 en 1904 bij te staan in het uitgeven van mijn Woordenboek der Tontemboansche taal en van de hier volgende Tontemboansche Teksten.

De vertalingen der Teksten zijn door mij te zamen met Dr. Adriani gemaakt, de Aanteekeningen zijn naar schriftelijke en mondelinge mededeelingen van mij door hem opgesteld en hier en daar uitgebreid door de vermelding van toelichtende bijzonderheden uit Midden-Celebes.

Kolongan-atas (Sondër), December 1904.

J. ALB. T. SCHWARZ.

Bij Gouvernementsbesluit van 16 Augustus 1902, N°. 9, is mij opgedragen, om den Heer Schwarz bij te staan in het gereed maken voor de uitgave van de door hem verzamelde gegevens tot beoefening der Tontemboansche taal. Nadat de Heer Schwarz mij dezen zijnen taalkundigen arbeid had overgegeven, heb ik dien op de volgende wijze kunnen verdeelen:

A. Tontemboansch-Nederlandsch Woordenboek.

B. Nederlandsch-Tontemboansche Woordenlijst.

C. Tontemboansche Teksten met vertaling.

D. Aanteekeningen van taalkundigen, ethnografischen en geografischen inhoud.

De werken, onder *A* en *B* gemeld, zijn te zamen in één deel uitgegeven, getiteld: „Tontemboansch-Nederlandsch Woordenboek met Register.” Die onder *C* en *D* genoemd, zijn de hier volgende „Tontemboansche Teksten” in drie deelen.

De onder *D* genoemde stukken waren niet van dien aard, dat zij in den korten tijd, die voor de uitgave beschikbaar was, tot één geheel konden worden gemaakt. Daar ze echter de uitgave ten volle waardig waren, zijn zij door mij verwerkt in de Inleidingen op de Groepen, waarin ik de Tontemboansche Teksten heb verdeeld, en in de Aanteekeningen, die het 3^{de} deel der „Tontemboansche Teksten” uitmaken. In die Aanteekeningen zijn de taalkundige, en een deel der geografische notities van den Heer Schwarz opgenomen, in de Inleidingen zijne ethnologische aanteekeningen. Daar er tusschen de laatste onderling niet altijd verband bestond, kon van de Inleidingen niet steeds een goed samenhangend geheel worden gemaakt; immers het hoofddoel was, aan een aantal belangrijke bijzonderheden bekendheid te geven.

Nº. 119 is, zoo goed en zoo kwaad als het ging, tot een Register van goden-, en godinnennamen gemaakt, daar de tijd ontbrak om op het geheele werk een Register te vervaardigen.

Daar de vertaling der teksten voornamelijk is ingericht als hulpmiddel, om den grondtekst te verstaan, zoo zijn niet alle in bijzondere beteekenis gebruikte vormen in het Woordenboek opgenomen, daar de vertaling en de aantekeningen die genoegzaam verklaren. Deze „Tontemboansche Teksten” vullen dus het Woordenboek aan, dat door het opnemen van te veel bijzonderheden uit de teksten te lijvig zou zijn geworden.

Ten slotte wensch ik met dankbaarheid te vermelden de zeer goede hulp, die ik van een aantal Minahassers van den Tontemboanschen stam heb mogen genieten, zoowel van kundige Ouden, die uit hunne herinnering mededeelden, als van goed ontwikkelde Jongeren, die gemakkelijk waren op te wekken tot nadenken over de rijke en fijne vormen hunner schoone Moedertaal.

Posso (Res. Menado, Afd. Midden-Celebes),
September 1905.

N. ADRIANI,
afgevaardigde van het Nederlandsch
Bijbelgenootschap op Midden-Celebes.

INHOUDSOPGAVE.

| VOORREDE | Bladz. V |
|--|-------------|
| 1. Kukua an doro' i mBila-mbilang wo. se Wolai | 1 |
| 2. Kukua an doro' i Tu'a wo si Mopow wo m Boran | 2 |
| 3. Kukua an doro' i Wolai wo si Linsën | 4 |
| 4. Kukua an doro' i Tu'a wo si Linta'. | 5 |
| 5. Kukua an doro' i Tu'a wo si Talongka' | 5 |
| 6. Kukua an doro' i Tu'a wo si Tjawok | 6 |
| 7. Kukua an doro' i Wëris wo si Wolai | 7 |
| 8. Kukua an doro' i Laku wo si Tjuse wo si Wolai | 8 |
| 9. Kukua an doro' i Tili'tjir, si Ulang wo si Talongka' | 11 |
| 10. Kukua an doro' i Tjalowatan wo si Tu'a wo si Wolai | 12 |
| 11a. Kukua an doro' i Tjuow wo si Sokopet | 15 |
| 11b. Kukua an doro' i Tjuow wo si Sokope' | 16 |
| 12a. Eëngkasën an doro' e lumelempar. i nimëkowa' sa si sei n dangka'- mange ën telewan | 17 |
| 12b. Eëngkasën an doro' in aitjatambisa wo si Uwak ra'io nimaïndo kolano e lumelempar | 18 |
| 13. Kukua an doro' i Uwak wo si Tjarokok | 19 |
| 14. Eëngkasën an doro' in tambisa ng kinamualian wo m ba'mba' i Sunga makempot | 20 |
| 15. Sisil an doro' in tjnamualian i Wolai | 20 |
| 16. Kukua an doro' i Wolai | 23 |
| 17. Sisisilën an doro' i Tumotongko' kaapa Kumëkësan | 26 |
| 18. Kukua an doro' i Toja'ang tanu Kapitu | 27 |
| 19. Kukua an doro' i Toja'ang i Malënge-lëngei wo si Lulun | 29 |
| 20. Kukua an doro' i Repi | 36 |
| 21. Sisil an doro' i Anak tuama i Tjolano a langit wo si Wawu' am bawo in tana' | 37 |
| 22. Kukua an doro' i Pokol | 41 |
| 23. Kukua an doro' i Tjekekow wo se rua Mëtuari. | 52 |
| 24. Kukua an doro' i Toja'ang toloatëkënoke wo si Sapi | 55 |
| 25. Kukua an doro' i Wulur. | 57 |
| 26. Kukua an doro' i Wutul. | 61 |
| 27. Kukua a si Rumangu wo si Rameitjau' | 66 |
| 28. Kukua an doro' i Tjërisen | 69 |
| 29. Sisil an doro' i ësa Toja'ang wo si Tumotongko' | 74 |

| | Bladz. |
|---|--------|
| 30. Kukua an doro' i Tjupang Ěsa | 76 |
| 31. Sisisilĕn an doro' i Toja'ang Kĕrok. | 78 |
| 32. Kukua an doro' e Mĕtuari Ula | 80 |
| 33. Kukua an doro' e Ambalesa wĕrupe' nimamale wo si Sawurang wo si Sopit | 81 |
| 34. Kukua an doro' i Ěsa Make'et wo si Lolok. | 84 |
| 35. Sisil an doro' i Mĕngange'et an talun wo si Lolok | 86 |
| 36. Kukua an doro' i Toja'ang wo si Sĕra'-Tow. | 89 |
| 37. Kukua an doro' i Mawĕris wo si Mengkat | 90 |
| 38. Kukua an doro' i Sĕra'-Tow | 94 |
| 39. Kukua an doro' i Sangarangan | 98 |
| 40. Kukua an doro' i Rompas wo si Rompis wo si Sangarangan. | 103 |
| 41. Sisil an doro' i Pojo' i Lĕngei wo si Mawĕris | 107 |
| 42. Kukua an doro' i Tjombangan, Verh. Bat. Gen. Dl. LVI, 3 ^e stuk. | 114 |
| 43. Sisil an doro' in ailalan i Matu'ao a se Rua Wewene Mĕtuari | 114 |
| 44. Kukua an doro' i Rorong manguma | 117 |
| 45. Sisil an doro' i Pontiana nimawinson | 120 |
| 46. Sisil an doro' e nimĕtokol wo si Pontiana | 120 |
| 47. Sisisilĕn an doro' i Piri', Sulu'un, niuwit e mu'kur | 121 |
| 48. Kukua an doro' i Songko'. | 122 |
| 49. Sisil an doro' in tinambisa se Songko' wo lina'ungo. | 123 |
| 50. Kukua an doro' i Marintĕk | 124 |
| 51. Ěĕngkasĕn an doro' im paemanĕn e rior a se Ngiung | 127 |
| 52. Sisil an doro' i Sendow wo si Sokoub, ana'na, wo si Mawĕris | 127 |
| 53. Sisil an doro' e Rua Toja'ang aitjarojong-io' a Lelema'. | 128 |
| 54. Sisil an doro' in tjinatu'uran i Mano'or api. | 129 |
| 55. Kukua an doro' i Kariso wo se Anak(ĕ)na | 129 |
| 56. Papĕli'in e Kaper an tumĕna in uma | 131 |
| 57. Sisisilĕn an doro' in tjĕtani' in do'ong in Tjapoja. | 133 |
| 58. Sisisilĕn an dumoro' e tĕlu Ro'kos in tow aitjali an tĕmbir in usĕwan si Tumotowa, karapi i lĕntu' im bara'. | 136 |
| 59. Sisil an doro' i Tumotowa, in tambisa n iitu m pinangere e rior- wo, wo itu indonera ipĕro'ong | 136 |
| 60. Sisil an doro' in tjĕtani' in do'ong in Tjiawa | 138 |
| 61. Sisil an doro' in tjinatu'uran i ngaran in Tjiawa | 140 |
| 62. Sisisilĕn an doro' in tjĕtani' in do'ong im Pinapalangkow kaapa Kalewo'an | 141 |
| 63. Kukua an doro' in tjinawalian in dojongan in Sondĕr wo patu'- ulĕn Sondĕr. | 143 |
| 64. Kukua an doro' im Pinĕwetengan im balak in Tjawangko'an wo n Sondĕr. | 143 |
| 65. Sisil an doro' im Pinĕwetengan e Sondĕr wo se Kawangko'an | 145 |
| 66. Sisil an doro' i Tow niuma' am Pinĕwetengam-bo | 147 |
| 67. Kukua an doro' i Sowa am Pinĕwetengam-bo | 148 |

| | Bladz. |
|---|--------|
| 68. Sisil an doro' i Senduk, itji'it in sisil e makasisil an Tombasian-an-Dangka' | 150 |
| 69. Sisil an doro' im Pinēwetengan | 150 |
| 70. Ēēngkasēn an dumoro' in Tjinatu'uran i ngaran in Tjaju-Uwi | 151 |
| 71. Kukua an doro' in tjētani' in do'ong in Tintjēp | 152 |
| 72. Kukua an doro' in tjētani' in do'ong in Timbukar | 153 |
| 73. Kukua an doro' in tjētani' in do'ong i Lēilēm | 154 |
| 74. Sisil an doro' in do'ong e Wuwuk | 155 |
| 75. Ēēngkasēn an dumoro' in tambisa ēng kinarēngisan in Tjinilow ja aiwoka'o-wo im pinēsowsowatan i Tji'kis wo si Tangkalio-liowan. | 156 |
| 76. Sisil an doro' i Warēso | 157 |
| 76a. Rereindengēn an doro' i Warēso kaapa i Airēsow | 158 |
| 77. Kukua an doro' i Makarende. | 160 |
| 78. Kukua an doro' i Makarende. | 161 |
| 79. Kukua an doro' i Ramopoli'i. | 163 |
| 80. Kukua an doro' i Rintēk-Wa'ang | 165 |
| 81. Sisisilēn an doro' i Uwe Randen, Anak im Pondos | 166 |
| 82. Sisil an doro' i Lumimu'ut wo se Suruna. | 175 |
| 83. Sisisilēn an doro' i Tjasuruan Kalangi' wo si Tjasuruan Manimporok | 178 |
| 84. Kukua an doro' i Manimporok | 180 |
| 85. Sisisilēn an doro' i Manimporok wo si Tjalangi' | 182 |
| 86. Kukua an doro' i Manimporok wo si Tjalangi' | 183 |
| 87. Sisil an doro' i Manimporok wo si Mololewo' | 188 |
| 88. Sisil an doro' i Manimporok wo si Mondolewo' | 195 |
| 89. Kukua an doro' i Mailēnsun | 197 |
| 90. Sisisilēn an doro' i Tjasuruan Mailēnsun. | 198 |
| 91. Kukua an doro' i Mamanua | 199 |
| 92. Kukua an doro' i Warongan | 201 |
| 93. Kukua an doro' i Se'e-Wene'. | 206 |
| 94. Sisil an doro' i Se'e-Wene' | 208 |
| 95. Kukua an doro' i Muntu-untu | 211 |
| 96. Kukua an doro' i Lintjambene'. | 213 |
| 97. Kukua an doro' i Marēndor wo si Lintjambene' | 218 |
| 98. Kukua an doro' i Soputan. | 219 |
| 99. Kukua an doro' i Mokointēmpai | 221 |
| 100. Sisisilēn an doro' im Bene' | 222 |
| 101. Kukua an doro' i Pamagian | 227 |
| 102. Kukua an doro' i tjuntung Lolombulan | 229 |
| 103. Sisil an doro' i Tengker wo si Tjawulusan | 231 |
| 104. Kukua an doro' e Rua Mēkalo | 241 |
| 105. Kukua an doro' i Maengkong | 244 |
| 106. Sisil an doro' i ngaran ipakua im Binolean i Maengkong | 244 |

| | Bladz. |
|--|--------|
| 107. Sisil a si wa'ilan Talimpongo | 245 |
| 108. Kukua an doro' i Wuwun Sewe | 245 |
| 109. Kukua an doro' i Lumimu'ut wo si To'ar. | 247 |
| 110. Sisil an doro' i Lumimu'ut | 251 |
| 111. Sisil an doro' i Lumimu'ut | 254 |
| 112. Kukua an doro' i Anak i Ĕndo kaapa Anak i Lēwa'. | 255 |
| 113. Kukua an doro' i Lumimu'ut | 257 |
| 114. Sisil an doro' i Lumimu'ut | 259 |
| 115. Kukua an doro' i Tow ailimu'ut im Batu | 261 |
| 116. Kukua an doro' i Tjarema | 262 |
| 117. Sisil an doro' in tjinamualian in tana' i Maēsa. | 263 |
| 118. Sisil an doro' e Suru i Ĕndo | 264 |
| 120. Sisil poarui kaapa poke'ke' an doro' e Rua Nimanamoi | 266 |
| 121. Kukua poarui kaapa poke'ke' an doro' e Rua Nimamēsi. | 266 |
| 122. Sisil an doro' e Rua Ninumawu'. | 267 |
| 123. Sisil an doro' e Tēlu Mēkarētuk | 268 |
| 124. Kukua an doro' e Maporapat maēnto' in tande paindon ewio'o. | 269 |
| 125. An doro' e Mamorapat | 270 |
| 126. An doro' e pira-pira Tow Longon. | 271 |
| 127. Kukua poke'ke' an doro' e Rua Nimēwētiti | 275 |
| 128. Kukua poke'ke' an doro' e rua Tare-tumow Mēkarētuk | 276 |
| 129. Kukua an doro' i Towo | 277 |
| 130a. Sisil an doro' i Wewene nimatuama wo nimaindo Kolano | 292 |
| 130b. Sisisilēn an doro' i Wewene nimatuama. | 295 |
| 131. Kukua an doro' i Tuama wērupe' nitumane nimamongkor | 296 |
| 132. Sisisilēn an doro' i Pangerapan. | 299 |
| 133. Sisil an doro' e tow rior, si Angkol wo si Wala. | 300 |
| 134. Paiapēn a si Nimate | 304 |
| 135. Weweletēn | 309 |
| 136. An doro' in tawoiēn i Walian in Uma wo si Tona'as Wangko'. | 311 |
| 137. Rereindengēn e Walian si Apo Nimema' in tana' | 316 |
| 138. Nananin e Tontemboan | 317 |
| 139. Pira-pira n Iintjo'on e Tontemboan | 319 |
| 140. Sasaunan | 335 |
| 141. An doro' in te'tek | 339 |

GROEP I.

1. Kukua an doro' i mBila-mbilang wo se Wolai, sinisil i Jan Runkat, Kapoja.

Sapaka si mBila-mbilang, ja matinanēm sa'ut. Muntio n sa'ut(ě)na wo maio i mēwowoso, ja maio ipara'nda-ra'nda e Wolai, wo pēngiru-ngirukēnera i maindo se wowos. A si ěndo makasa mangeo pailēken i mBila-mbilang, ja pakakaapuno e Wolai ěm puntina. Ituoka ng kuanao: „Tia'pe' kamu, wowo-ndasangkuoka.”

Nimaja' ěn ěndo, ja maio ka'i se Wolai. Mindoo im punti sera, ja lumeako tu'u am bowondas, milaso ěm bowondas itjawe'eo-mio' an sula si ěsa wo mate. Mangen si mBila-mbilang, pailēkenao nimateo si Wolai wo sia indonao-mai. Ěn du'i niēmbana. Ituoka mapēli'io sia wo tumowa se Wolai mai rumeindeng. Marengo se Wolai im bawa'ando, ja sera kinaalian apu aiwe'e i pinareindenganera. Tajango tojo' sera, ja rumangato-mange si mBila-mbilang, ěng kuana: „Tumēnga-tēnga'-mange in du'i i tjarapimiow.” Sumowato-mai se Wolai: „Sapa?” Kuano i mBila-mbilang: „Milē-ilēk, en tia' se toja'ang kasēpian in tjaju.” Rumangato ka'i si mBila-mbilang: „Tumēnga-tēnga'-mange in du'i i tjarapimiow.” Kuano e Wolai: „Mēnē-pēnēs!” Rumangato ka'i si mBila-mbilang: „Tumēnga-tēnga'-mange in du'i i tjarapimiow.” Kuano e Wolai: „Tanuoka makua: in du'i i tjarapimiow. O! ja isia tu'u re'e nimindo si tjarapita. Morak, angen sia!”

Ituoka mangeo se Wolai wo sera tumangka' si mBila-mbi-

lang. Ĕng kuaera: „Tia'pe' ko, itjo tu'u re'e si nimindo si tjarapiami; popoan sia wo mange ipumpun am posok.” Sumowato si mBila-mbilang: „Je! waleku sama'!” Sumowato se Wolai: „Isurip-ange an unēr in saraw sia.” Siituoka maame'o si mBila-mbilang: „I-i, hi-i!” Ja iwangkilera-mako sia, Ĕng kuanao: „E! waleku sama'!” Sumowato se Wolai: „E! indong-kē', iwali-mange an dano sia.” Maame'o sia, Ĕng kuana: „I-i, hi-i, e mēkiampong!”

Ilēpoko tu'u-mio' an dano sia, ja sia muntēp-ange am bu'mbu' im batu. Ĕng kuano e Wolai: „Ja! nimateo tu'u si mBila-mbilang e!” Palingan-ako i mBila-mbilang Ĕng kasale-sale'anera, ja ng kuana: „E! waleku tu'uman sama'!” Maleo-mio' am batu sia, Ĕng kuano e Wolai: „Ro'mbēn.” Rumo'mbo si ēsa, karetēn-ai i mBila-mbilang ēm bua'na in tjamana, wo itu isomoina-mako a litjur, wo ng kuana: „Litjope', e kalo!” Sawēlano ka'i i ēsa sia, tani'tuka ka'i. Ra'itja ipakua-kuaera in tjinareto i mBila-mbilang Ĕng kama, iaka-akar sera im baja Ĕng kinapela'an.

Ambituoka sera, lumangkoio-mai si Tu'a, Ĕng kuana: „Sapa n ipakaēna'miow wana?” Kuano e Wolai: „Tē'tēkanami tjo, e Tu'a, sē'sēpēnu si wunong anio'.” Kuano i Tu'a: „Sama', ta'an mindo-mai watu kamu wo isepē'd im pē'nar(ē)ku.” Sumē'sēpo si Tu'a, ta'an ēn dano ra'itja nimakaapu, wo si Tu'a nimawēsuo, iaka-akar sia i nimēnēndi-nēndioka, wo se Wolai nitumimboi am batu, en tinuli im batu, iaka-akar i manga-wangkil. Ituoka marengo sera, an da'itja wana kinaakoan.

2. Kukua an doro' i Tu'a wo si Mopow wo m Boran, sinisil i Natanael Rumokoi, Sondēr, wo si Jan Runkat, Kapoja.

Kaindo-indono-mai si Tu'a anio', kumi'it in sisil e matu-matu'a, ja mawaja-waja'o an unēr in talun, ja palinganao-mange si Mopow mēnenge-nenge; kua'a si Tu'a mangeo milēk si Mopow. Sapaka si Mopow ja malo'ti-lo'titj a linoindong in tjaju wangkēr. Kēilēk i Tu'a si Mopow, ja ng kuana: „E, kuangku re'e wangkēr si tjainde'engkuoka i malinga-mai mē-

ngangko-ngangko'. Tëkis re'e, tanuoka re'e rere ng keitjei; ja kumento'o ka'i re'e-mio'!" Kuano i Mopow: „Mande tani'-tuo!" Ta'an kuano i Tu'a: „Ame'e! pëkangënta si tjalat in tu'ura i tjaju anio', sa si seitja ë makawo'so." Kuano i Mopow: „Sama', itjoo-wo, e Tu'a, somoioka aku."

Ja mëkango tu'u si Tu'a, ra'itja mawo'so. Ta'an an unër i Tu'a i mëmëka-mëkang in tjalat, ja nimali'tji-li'tjir in tjalat si Mopow, wo sia mailëk-io' wo'so tëkek ri'ndiranao-mio' i lalaina in tjaju. Makëpe-mako si Tu'a ë mëmëka-mëkang, ja ng kuanao: „Itjope' ka'itje'." Mëkango-mio' si Mopow, iroro'-nao tu'u-mio' si wo'so si niri'ndirana i lalaina in tjaju, ja makauntë-untëp ëng keitjei. Itu si Tu'a wo malawi'o, akar sia i mëmënë-mënësoka. Makalawi'o si Tu'a, ja makasale'o si Mopow, wo ëng kuaña: „E, kendo'on aku in tjatëkis tare! mëtalitjuro tare kita, e Tu'a." Siituoka ja mëtalitjuro sera si Tu'a.

Mëtalitjuro sera, ja si Mopow mërajo-rajooka in owa'na, am pa'pa'an sia nimakatoko si Tu'a, wo mënenge-nengeoka: „Mopow! mopo-ow! mopow! mopo-ow!" Mëmopo-mopowoka sia, ja sumumpako-mange in ta'an, wo sia itjasere-mange im Boran; ja ng kuana: „E, Wo'ko! kua'a itu ko wo aiwa'kës ambana? Karëngan ko anio' en tow lewo'. Wona' pinangkur ko wo ko mawo'ko. Wona' ka'i siitu ëng kawalianu wo ko aiwa'kës ambana." Ituoka numuwu'o si Woran, ëng kuana: „Sapa ën ipënuwu-nuwu' i Tjento' anio'. Tani'tu in tjakento', wo mai mënero-nero' iaku? Wona' ka'i itjope' ë lewo'. Kua'a ko makento'? Wona' pinangkur ang kalewo'anu ën iana, iaka-akar ëng keitjeimu lëntu'oka." Kuano i Mopow: „Tio'o mëngëli-ngëli nuwu' ko, en tia' mangeku awësan i ma'kës. Tambisanu kendo'on aku, eng ko n aiwa'kës?" „Uli-ulit," ëng kuano i Woran, „mëtokol kita in dua, kërësëngku ko? en sa ko wo kinërës(ë)kuo, ra'io kawisa wo ko itjawëta'pe'. Sumusute'-mai tojo' wo ilëkënuoka." Sumusuto tu'u-mange si Mopow. Ra'itja ure mëtitjo-mai m Boran, niindo in ta'an si Mopow, niuma' ang kanat. Kërëpet in ta'an, ja mangko'o si Mopow,

ěng kuana: „Ampung, e Wo'ko! iwěkar aku! mateo aku! itjaupus-ai aku! o, mateo!” Sumowato si Woran, ěng kuana: „Ra'itja, itjoo tu'u si mēmopo-mopos(ě)kě' iaku. Rěpětan katu'u, e Ta'an! isiao si mēnero-nero'kě'.” Siituoka makarěpěto n ta'an, ja makataangko'o si Mopow, ěng kuana: „Mateo aku! itjaupus-ai aku! o, mateo!” Kuano ka'i i Woran: „Kaěndu! maio, maio, rumio-rior-ai katu'u, e Apo'ku! maio tu'u, indon sia!”

Karoro'angkě' i mēnuwu-nuwu', ja sumpakěno-mange i makata'an, wo indonao-mai si Mopow, ěng kuanao: „E toro! ni-mindoka re'e mopow ěn ta'an. Suměra'ka tu'u re'e mopow aku.”

Tani'tu nimamuali a si Mopow. Katarena nimakatoko si Tu'a, ta'an kinasiwakana ja kawangkuran. Niange-mai i mērajo-rajo in owak, itu sia wo aitjaulur tani'tu.

3. Kukua an doro' i Wolai wo si Linsěn, sinisil i Elisa Tengor, Sulu'un.

Kaindo-indono-mai si Wolai ja nimawaja-waja' an talun. Mawaja-waja'oka sia, ja sia mailěk in tinale'an. Mailěko in tinale'an sia, sumereo-mio', ja wea-wean ě maero-ero'. Ituoka wueiěnao-mio', ěng kuanao: „Sapa si maero-ero' ambia'i e?” Sumowato si Linsěn, ěng kuanao: „Iaku, e Wolai.” Ituoka sumero'o si Wolai: „Eka', eka'! itjo re'e si Linsěn, kare'enoka re'e! malinsě-linsěno re'e-mio'.” Ituoka sumowato si Linsěn, ěng kuanao: „Sando'o tani'tu, ja re'e ko? em burung! ja mēnero-nero'kě' endo'on, isiape' ka'i eka', eka' kawuring!”

Ituoka ja maěmbowo si Wolai, ěng kuanao: „Tio'o mēnuwu-nuwu'-mai, tia' tare ko indongku-mai, wo iwěsěk(ě)ku-mitjo a ngirung.” Ra'itja nimeman si Linsěn. Ituoka indono tu'u-mai i Wolai si Linsěn, wo iwěsěk(ě)nao-mitjo a ngirung, ěng kuanao: „Ia ko, en itjoo si mēnowa-nowat(ě)kě' iaku.” Ituoka maěmbowo ka'itje' si Linsěn. Kěwěsěk(ě)na-mitjo isia, mēla'ula'usoka mēngě'kě-ngě'kět i ngirung, aiaka-akar(ě)na ka'itje'-mange si Woloi i nimate.

Ta'an mēno-nowe' si Wolai ja sia mangilě-ngilěk ampung,

ëng kuanao: „Mëkiampung.” Mangko'o sia ja ng kuanao: „Mëngangko-ngangko'oka tu'u aku, e mateo re'e, e Linsën, mareng, mareng-ai e Linsën, më'ngëto e Linsën.” Ta'an mande sia mëngangko-ngangko' kumaapa mangilë-ngilëk ampung, ta'an da'io emanën i Linsën, akar sia nimateoka-mio' ambitu.

Ën doro'on in anio': Ja tani'tu ëm bawaer a si marangka' kaapa mawangko' in owa'na wo mapopos se walina.

4. Kukua an doro' i Tu'a wo si Linta', sinisil i Natanael Rumokoi, Sondër.

Kaindo-indono-mai si Tu'a wo si Linta' anio' nimëta'up. Ja pailëkéno i Tu'a si Linta', ëng kuanao a si Linta': „E marë'të-rë'tëngo kendo'o-mio' si Linta' anio'.” Kuano i Linta': „Sando'o tani'tu.” Kuano i Tu'a: „Ame'e! mëmangi'itanta!” Kuano i Linta': „Ame'e, mëpe'oka tu'u aku.”

Siituoka ja tumerono tu'u sera. Këitjopat-ange i Tu'a, ja tumimboi-ange an ipus i Tu'a si Linta'. Pulu'o ngarëpa ën tineronan i Tu'a, ja ng kuanao: „Linta'!” Kuano i Linta': „Koi!” Siituoka tumerono ka'i si Tu'a, wo sia mëranga-rangat si Linta'. Pënowa-nowatëngkë' i Linta', ëng kuanao: „Ambia'i aku.”

Siituoka malawi'o si Tu'a akar sia in tumeron dümëpë-rëpët. Wo sia itjakunduo-mio', am pa'pa'an sia ja katitisano in ënda' pënë'së-në'sëpën i Linta', akar(ë)na i nimateo.

5. Kukua an doro' i Tu'a wo si Talongka', sinisil i Natanael Rumokoi, Sondër.

Kaindo-indono-mai si Tu'a anio' ja lumëwëto in dojongan in dano. Ja an unëroka in dano sia, ja pailëkéna-mio' si Talongka' makakëpël am bawo im batu. Kuano i Tu'a: „Susur i langkoiëngku-mai ko ja makakëpël ambana.” Kuano i Talongka': „Sando'o tani'tu. Iitjo nimema' iaku?” Kuano i Tu'a: „Ame'e! mëmangi'itanta sumalu in dojongan in dano.” Kuano i Talongka': „Sama', ta'an da'ipe' tarepe', woondo im bawa'-ando ja ko mai.” Siitu tu'u ng kini'itan i Tu'a.

Ja mawengi tu'u-mio' ja iterewa'o i Talongka' am baja se Talongka' i sumalu in dojongan in dano, kuanao: „Sapaka aku ja tina'aran i Tu'a woondo im bawa'ando ja mēmangi'itan kami sumalu in dojongan in dano, ta'an itjuaku-mange an itjamu, sa parangatēn i Tu'a-sa, ja masowat-ange.”

Mawawa'ando-mako ja maio tu'u si Tu'a, kuanao: „Amba-naka ko, e Talongka'?” Kuano i Talongka': „Ambia'i.” Kuano i Tu'a: „Sapaka ko ja maki'ito-mai iaku, eng kita ja tumerono. Sa parangatēngku-sa ja masowat-ai.” Kuano i Talongka': „Sama'.”

Siituoka tumerono tu'u si Tu'a. Tumeron-ange pira ngarēpa si Tu'a, ja rumangat si Talongka'; pēnowa-nowatēn e Talongka' am palangkoiēna, akar si Tu'a mēnero-nerongka, wo itjakunduo-mio' am pa'pa'an in da'io wana kētēr wo akar(ē)na i nimateo-mio' ambitu.

6. Kukua an doro' i Tu'a wo si Tjawok, siuisil i Elisa Tengor, Sulu'un.

Sapaka sera ja pute nimangan an dowar. Manganoka sera, ja sera mēta'upo-mange. Mēta'upo sera, ja poposēno i Tu'a si Tjawok, kuanao: „E itjoo si Tjawok?” Sumowato si Tjawok, kuanao: „Iaku e Tu'a.” Siituoka kuano i Tu'a: „Sapa m pawaja-waja'anu?” Sumowato si Tjawok: „Ēm pawaja-waja'-angku ja mangere-ngere kanēn.” Kuanoka ka'i i Tu'a: „Itjoo si mangere-ngere kanēn, tananao ēng katēkek! iteak(ē)kukē' ēndo'on ko ja.” Sowatēno i Tjawok ēn iitu, kuanao: „E ka'itare, ore mēpēs im bērēn iaku in tēkek!” Kuano i Tu'a: „Nae uli-ulit! sa ko masale', ja mēmbataruanta.” Sumowato si Tjawok, kuanao: „Sama', mande aku in tēkek(ē)kē' wo'o.”

Ituoka ng kuano i Tu'a: „Sapaka kita ja mema' woimbon, ko ja mumung iwoimbon an iaku, o tani'tu ka'i aku mumung kaju iwoimbon an iitjo, ta'an iakuo-wo.” Kuano i Tjawok: „Sama', iakuoka an somoi.” Ituoka ēng kuano i Tjawok: „Ja kumundu wo woimbonangku.”

Woimbonano i Tjawok sia, ja ra'ipe' nimērua m boimbon maēmbung, ja tumo'oro-mai si Tu'a, nimarēngiso ē litjur. Ituoka ēng kuanao : „Ja itjope' ka'itje' e Kawok, ēm boimbonangku!” Kuano i Tjawok : „Ame'e!”

Woimbonano i Tu'a sia; ra'ipe' pinakaumung ēng kaju, sumuripo a lalaina in tjaju si Tjawok. Mēmoimbo-moimbono si Tu'a; tani'tuo ēng kakēli in tjaju aiwoimbona a si Tjawok, ra'itja si Tjawok, e mēngo'ko-ngo'kor an tana'. Lumalisi-mai ēng kaju, ja ng kuano i Tu'a : „Kio' ka'itje' si Tjawok! e masēngkitjo, ona' mapateo.”

Makaapu-mako m boimbon, ja ng kuao i Tu'a : „O Kawok, kumēsoto-mai.” Tani'tu ēng karior si Tjawok mio'o kumēsot-ai. Kēkēsot-ai si Tjawok, ja tumintjaso si Tu'a, ra'io nima-reen ē nimatintjas, pa'pa'an sia mainde'o, pa'pa'an si Tjawok ma'am bu'uk ra'itja nimarēngis.

7. Kukua an doro' i Wēris wo si Wolai, sinisil i Hendrikus Tumbol, Lēlēm.

Kaindo-indonoka-mai a si ēndo makasa, si Wēris nimaruru-ruru in dano an unēr in talun, wo mēwēra-wēra' an oli-oli'. Mawaja-waja'oka sia, ja ipēsūngkul i Wolai. Ituoka kuanao : „E Wēris! indonu-mai ēn oli-oli'mu, wo ēpe'angku.” Kuano i Wēris : „Ore itintjas(ē)mu.” Sumowato si Wolai, ēng kuanao : „Ra'itja, e Wēris.” Siituoka iwe'eo-mange i Wēris ēm bēwēra'ana a si Wolai. Kēwe'ena-mange itu, ja itu mapala'us aitintjas-ange i Wolai, wo ng kuanao : „En tu'uman!” Ja si Wolai itu lumaput-ange ang kaju, wo makaange sia, makataangko' ēng kuanao : „En tu'uman, en tu'uman! e Wēris! aiēn-ange ēn oli-oli'mu.” Tani'tu pēwēra-wēra'anoka i Wolai si Wēris. Anaitu ja si Wēris mawēnduo muli-ulit.

Mēmēndu-mēnduoka sia ē mawaja-waja' a linoindong i tjaju iitu, ja mailēko si Tili'tjir, wo ng kuana : „E Tili'tjir, tē'tēkangku ko, weangkuoka po'po'. Mangekē' indon-ai ēn oli-oli'tju a si Wolai am puru'na i tjaju anio'.” Kēpa'anakē' in iitu, ja lu-

maputo-mange sia, nimëngëti-ngëtip(ë)kë'-mange, iaka-akar in da'itja pailëkën i Wolai. Itjaambo-mange a si Wolai sia, ja kopitëna-mange rumëpë-rëpët am pë'nar(ë)na, iaka-akar si Wolai i mëngame-ngame'oka wo mëngangko-ngangko', pa'pa'an in sumakito. Mëngangko-ngangko'oka sia, itjalëpoko-mio' ën oli-oli', wo itu pitongën i Wëris. Tani'tu kinaereanao sumawël ën oli-oli'na.

8. Knkua an doro' i Laku wo si Tjuse wo si Wolai.

Kaindo-indono-mai a si makasa ja si Laku mawaja-waja' an talun. An tutuw(ë)na i mawaja-waja', ja sia mënigi-nigil in tambisa sia ën do'na makapandei si seitjë'-mange si ipësungkul(ë)naoka. Mëmaja-maja'oka tu'u-mange sia, ja sia itjasumpako-mange in tjakapojaan. Ja ambituoka sia, ja sia mëta'upo wo si Tjuse, wo ng kuana an isia: „E Kuse, sapa m pawaja-waja'anu ambia?” Sumowato si Tjuse, ëng kuana: „Sapaka aku, ja mangan i lumut.” Ja am pa'pa' in tjailë-ilëkan i Tjuse sapaka se Laku ja talos pandei-lewo', ja sia mare'eoka ë mëpa'a-pa'ar wo sumoro'o wo tumintjas a si Laku.

Siituoka ja si Laku meneto im bawaja'na. Ja mëmaja-maja'oka ka'i-mange sia, ja sia itjata'upo si Wolai. Siituoka ang karapi i masale-sale' sia ë mëpa'a-pa'ar wo si Wolai, wo ng kuana: „E Wolai, sapaka tare kita ja mëwali-wali ë maja'.” Ja aitjaki'it tu'u tani'tu. Ja mëmaja-maja'oka-mange sera, ja sera itjatëka'o-mange a si ësa wë'tës, pëngënto-ngënto'an e lamperan. Pailëkëneraoka-mange se lamperan in tjasale'enoka ë nimëli'-mur, ja mueio si Wolai a si Laku, ëng kuana: „E Laku, sapa si makapotoi am pangana in tjaju anu mange?” Sumowato si Laku ang karapi im pandeina, ëng kuana: „Sapaka ën iitu, ja momongan i Apo'ku, wo ën iitu ja aiwe'ena patei-rangku, anaitu wo aku mawaja-waja' ambia.” Numuwu'o ka'i si Wolai, ëng kuana: „Tambisa ën tengena in iitu?” Kuano i Laku: „O talos lo'or!” Siituoka ja pëwueiëno i Wolai a si Laku: „Ro'na ën iitu ë mangeku tengkoran?” Sumowato si

Laku: „O tio'o, en tia' aku itjaëmbow i Apo'." Ëng kuano i Wolai: „Ore' rake, ën tumengkor-ange wo'o ambana!" Sumowato ka'i si Laku: „Ja, sa tu'u ko maawo in tumengkor, ja ro'nakë', ta'an tumaja-tajango aku ën tumintjas-wo, oreka kaëmbowan i Apo'." Tani'tu tu'u si Laku tumintjaso, wo si Wolai mindoo-mai sangapokol ëng kaju, wo lumaputo-mange a si tjaju iitu. Ja pailëkëna-mange si Laku in tajango, ja pangkurënao tu'u-mange se lamperan. Itjaipangkur(ë)na-mange isera, ja mëngkëro tu'u wo maëgao-mai se lamperan wo tumampe-tampengo-mange a si nimangkur isera. Am pa'pa'an sia in dumë'ngëto ëm paki'tji'in, ja sia rumojoro-mio' wo matero-teron, akar(ë)na i nimange nilumëindëm an dano, mangënto-ngënto' se lamperan in tumintjas. Palingana tu'u-mako in ëngkëra e lamperan in da'io wia, ja tare sia mio'o kumësot-ai wo maja' mangere-ngere si Laku.

Sapaka si Laku, ë nitumintjas-ange, ja sia ra'itja mangekë' nimënto'-mio' tani'tu, ta'an ka'i sia ja mawaja-waja'. An tutuw(ë)-naoka i mawaja-waja', ja sia itjasumpak-angë in tu'ura i marisa in tjokoak, mërainda-raindang, kaupusënoka ëm bua'na, wo sia masëng-io' ambitu. Ambituoka sia, ja kauma'ano-mange i Wolai. Itjasere-mange i Wolai si Laku, ja ng kuanao ang karapi i maëmbow: „Ja kinaereangkuo tu'u ko, sapaka ko ja nime'eo wëndu an iaku, en aitjuamu sapa si makapotoi am pangana in tjaju, ja momongan, anaitu wo aku nimangkur in iitu." Ja sumowato si Laku: „Sapaka kua'a ko ja nimuei an iaku ja in sa lo'or(ë)ka ën tengena in iitu. Ra'itja kua'a re'e aitjuaku an iitjo i lo'or ën tengena in iitu?" An tutuweraoka i mëpa'a-pa'ar iitu, ja si Wolai itjasere-mange i marisa, wo sia muei, ëng kuana: „Sapa ën anio'?" Sumowato si Laku ëng kuana: „Sapaka ën iitu ja merang i Apo'ku, wo ën iitu ja aiwe'ena pateirangku oreka indoan i sei-mange." Mëwueio ka'i si Wolai, ëng kuana: „Tambisa ë nanama in iitu?" Sumowato si Laku: „O numanam ulit!" Siituoka ëng kuano i Wolai: „Ja wean-ai a se wua'na iana aku." Janta'an aitjuakë' i Laku: „Tio'o en tia' aku itjaëmbow i Apo'." Ja ng kuano

i Wolai: „O inde' rake, sa wo'o ro'naké' mépe' an iana!'”
Ja am pa'pa' si Wolai i maewe ulit in tjuman a se wua'na
iitu, ja ng kuano i Laku: „Ro'naké' ko éng kuman a se
wua'na iana, ta'an dirior(é)mu wo kuman, ja aku tumintjaso-
wo, wo sa ko kuman in iitu, ja karéngana pakéli-tjélin wo
papésutén tumoro-toro.”

Tani'tu tu'u tumintjaso si Laku, ja si Wolai mupu'o i ma-
risa wo pésuténa. Pakapésuténa-mako én iitu, ja iwusék(é)nao-
mange. Itjaiwusék(é)na-mange in iitu, ja sia makapéndamo in
dumara tumoro-toro, iaka-akar i mëlue-lue' ém bërén. Malue'-
oka ém bërëna, ja sia sumamo'-mange in amo wo ém bërëna,
wo tani'tu am pa'pa' in tjinémuo ka'i i marisa én amo, ja sia
makapéndamo i nimakawédu-wénduo ém paméndaména, iaka-
akar i mawile-wilei wo mërëngke-rëngkek ambitu. Ja matala-
mako én dumara iitu, ja sia mangereo ka'i si Laku.

Kaereana-mange sia ja makatékél am buna'kél a si ésa a'kél.
Numuwu'o si Wolai, éng kuana: „Sapaka ko ja sul'angkuo
ambia, en aku ja wineanuo wéndu, katäre-täre an doro' i mo-
mongan, wo nio' ka'i si tarepe'.” Janta'an kuano i Laku:
„Kua'a itu-itu re'e! Mainde' se Laku walina! Em pa'pa' aku
ja ra'itja nimatintja-tintjas ambia en énto'o makateir ang karai
i Apo'.” Siituké' ka'i ém pinalingana ja sia muevo a si Laku,
éng kuana: „Lo'or kua'a re'e é makarai in iitu?” Sumowato
si Laku, éng kuana: „Lo'or nimangakar, wo paso'.” Ja pa-
ngilé-ngilékéno tu'u i Wolai a si Laku in tjumarai in iitu, iaka-
akar in tjini'itan i Laku, wo ng kuana: „Sawo ko mëtutu'
kumarai in iitu, ja itjaraitjuoka in ésa an iitjo wo n iitu ra'itja
itjasea'.” Ja itjaien-ai i Wolai a nuwu'na ja isaput(é)nao tu'u-
mange si Wolai én iitu wo ng kamana rua an dior aisomoina-
mai a litjur, wo si Laku mēwuei: „Awo koi, ra'itja paso'?”
Sumowato si Wolai: „O, paso'!” Kuano ka'i i Laku: „Ja
talos lo'or sawo karapi in do'kos itu ja saputén.” Tani'tu ki'-
itan i Wolai. Awoja pakasaputén-ako ja ng kuano i Laku:
„O nimakapaso-paso'pe' sawo wean in api.” Sumowat si Wolai:
„Itji'it-io' ambitu.” Siituoka iindoo-mai i Laku api iritjët(é)na

ambitu. Itjairitjët(ë)na-mio' ja ng kuanao: „Awo, paso'ka?”

Ja si Wolai mërëngke-rëngkek wo məkita-kitawang si Laku, janta'an sia ja aiwajanakë'-mio' tani'tu, iaka-akar(ë)na i nima-karëngi-rëngis-io' an tu'ur i a'kël iitu.

**9. Kukua an doro' i Tili'tjir, si Ulang wo si Talongka',
sinisil i Sam Welei, Kuntung.**

Kaindo-indo-mai si Tili'tjir, si Ulang wo si Talongka' ja mēkarëtuk. A si ëndo makasa sera in tēlu nimaando, nitumumpa a si Tili'tjir. Awoja mangeo tumawoi si Ulang wo si Talongka', ja ka'itje' si Tili'tjir sumiwo in tjanënera in tēlu. Tani'tu si Tili'tjir tumu'uno in tjure', iaka-akar iitu im bëroiana. Mēti-mako ën dano an tu'tu' pëtiro'on, ja kua'a ën iitu ën a'unënao wo'o. Mēa'u-a'uno in tjure' sia, makasa-mio' ruma'mbas an api ng keitjei ang karapi in owa'na, wo mate witu, iaka-akar sia i nirumaindango in api.

Jawoja em pa'pa' in tjato'orao si ëndo, ja si Ulang wo si Talongka' marëmo ulit. Mangënto-ngënto' in towan i Tili'tjir in tjuman sera, ja ra'itja. Tani'tu mēnawo-nawoi si Ulang wo si Talongka' ja ng kuaerao: „E inde'! kamarëmo kita, ja ra'ipe' mai towan-ange i tjaandota i mange kuman. Ka'itu-itu katanu uja! Wona' re'e nitumëkël(ë)kë' si mēsiwo in tjanënta.” Siituoka ng kuao i Talongka' a si Ulang: „Mangemu kua'a re'e ilëkën-ai, inde' si niangeanta ra'ipe' nimakasiwo. Maarëmo jau!”

Mangem beta' si Ulang. Mangena pailëkën si Tili'tjir aitjasuwa'o an api nirumaindango. Wo si Ulang mali'tji-li'tjir-io' in api mëngame-ngame', ëng kuana: „Ka'itu-itu ëndo'ong ko aitjasuwa'kë' an api, e Tili'tjir! Orow ëndo'on! nirumaindango!”

Mëngame-ngame'oka sia tumu'itjo wo'o si Tili'tjir in tjokopit(ë)na n an api. Ta'an da'itja ure ruma'mbas ka'i-mio' an api ëng kokopit(ë)na karapi in owa'na, wo rumaindang ka'i tanu si Tili'tjir. Tani'tu si Tili'tjir wo si Ulang nimateo waja.

Jawoja pangënto-ngënto'on i Talongka' si Ulang, ra'itja mareng-ange; ja makaarëmo ulit sia. Pa'pa'an si Ulang in da'io

mareng-ange, kuao i Talongka': „Mangekupe' ilékén-ai si mésiwo in tjanén, inde' tambisao." Mangenao pailékén si Tili'tjir wo si Ulang aitjasuwa'o waja an api, nimateo wo niru-maindango. Siituoka kua'a si Talongka' mali'tji-li'tjiro in api wo mëngame-ngame', éng kuana: „O inde'! weta' kamu, Tili'tjir wo Ulang! Kua'a tu'u ndo'ong kamu aitjaulur waja tanana?" Mëngame-ngame'oka sia, sumëpuno wo'o. Kësëpuna-mai mio' makasa-mai tjumësot ën sama'na, wo sia ka'i mate. Tani'tu sera in tëlu nimateo waja a si ëndo iitu.

Tio'o katawo-tawoi in tawoiën da'itja kapopoanu.

**10. Kukua an doro' i Tjalowatan wo si Tu'a wo si Wolai,
sinisil i Simon Pandei, Kapoja.**

Kaindo-indono-mai sapaka si Tjalowatan ja nilumantak tana' wo mawaja-waja' mangan, janta'an sia ra'itja nimakaere kanén akar in tjawësuna, iaka-akar sia maarëm(ë)kë', mande i nima-këpeo ë nimawaja-waja'. Am pa'pa'an in tani'tu, ja sia maritja-ritjaoka wo maëmbo-ëmbowoka si seitjë'-mange si ipësung-kul(ë)na am pawaja-waja'ana en sera ja kailë-ilékana im bësu wo ëna'.

Mëmaja-maja'oka tu'u sia, ja sia itjasumpako-mange a si tjaju ma'umbi-wakar wawangkëran; ja n ambitu pakalukutan i Wolai, wo n a niloindong-io' in iitu ja pakaënto'an i Tu'a. Ja këserekë'-mange i Tjalowatan si Tu'a, ja ng kuanao an isia: „E kalo, ambana re'e ko? Ambisa ko wo mai?"

Sumowato si Tu'a, éng kuana: „Sapaka aku, ja nimaséng ambia, em pa'pa' i nimawësuo wo makëpeo ë nimawaja-waja'." Ja kanatoka i Tjalowatan iitu, ja ng kuanao a si Tu'a: „Sapaka ko, e Tu'a, ja pinangipitju kawéngi in tjaréngana ko en sëra'angku, anae talos sama' eng kita in dua nimëta'upo ang kaluluan." Këlingakë' i Tu'a in ainuwu' i Tjalowatan iitu, ja sia talos mainde' wo mio'o tumo'or-ai ang karapi i nigumë'-gër, éng kuana: „Ën iitu ja ra'itja kawisa wo ro'na mamuali, ra'itja kua'a re'e mëkalo kita, e Kalowatan?"

Janta'an sinowat(ě)kě' ka'i i Tjalowatan in tana'i: „Mande rake! tambisa n iitu em pinangipi, karəngana n iitu e mamuali.” Kuano ka'i i Tu'a: „Ĕn iitu ja ra'itja kawisa wo ro'na mamuali; janta'an mange tare mēkiputus si Tjolanota kita, pa'pa'an da'itja ro'na itji'it a si pinangipimu iitu.”

Sapaka si Wolai n an dangka'era in dua, ja mēma'a-ma'an-io' i mēnsowatanera, ta'an sera in dua ra'itja mailėk-ange isia, en sia niri'ndirangkė' i lalaina i ma'umbi. Ja mangem tu'u sera in dua niməntondongan-ange, si Tu'a n an dior, paki'itėn i Tjalowatan. Itjatėka'-mange am paputusan sera, ja sera nima-karoro-roro'-mange in si Tjolano wo se maputus ja ambitu waja. Ambituo se Tumotongko' wo se Kumukunut, wo se Sowa; ambituo ka'i se Wio'o wo se Kalowatan, wo se Laku; ambituo se Uwak wo se Kiong-kiong wo se Nga'ngak. Waja isera ja mėlinga-linga wo mənigi-nigil wo mēmutu-mutus im baja se ailalitj an isera. Tani'tu ipakata'uo-mange i Tu'a a se maputus sapa si mēmėndu-mėndu in atena si aipėambona-mai isera. Maja'o si Tu'a wo si Tjalowatan ja mangko'o-mai si Wolai: „Ja weta' tu'u si Tu'a! tani'tu in tjawangkėr wo ng kakėtėr, ta'an mēmitu-mitukė' ng kalongonan, iaka-akar sia im pėpi-aiėno ka'i wo'on i Tjalowatan.” A si tjaupusanaoka iitu, ja sia tumondongkė'-mange an isera, nimėlawe-lawe-mange a se kaju-kaju, akar sia i nimange nimėnėp a si tjaju rangka' nilumoi-ndong-io' se Kolano i maputus. Ambituoka sia, ja sia makara'nda-mio' wo mēma'a-ma'an in ailalitj i Tu'a wo n sosowat i Tjalowatan wo n tambisa n ipakaputus e maputus.

Pakaputusėn tu'u-mako e maputus, ja ng kuano i Tjolano an isera i nimuse' in iitu: „Ja karəngana itji'it(ě)kė' a nuwu' i Tjalowatan em pinangipina tani'tu.”

Mapo'o-po'ow-ako ě nuwu'era, ja si Wolai mangeo lumėpok-ai nimapaunėr-io' a se maputus wo si Tjolano, iaka-akar sera im baja tumbal i Tjolano ja nimangaja'ka', wo mėwuei a si Wolai, ěng kuaerao: „Kua'a itu-itu ko?” Sumowato si Wolai: „Sapaka aku, e maputus, ja makakili'-wo, ta'an aku ja nima-ngipipi-ngipi, anaitu wo aku itjalėpok-ai.” Ĕng kuano ka'i e ma-

putus: „Sapa m pinangipi-ngipimu-wo, wo ko itjalëpok-ai?”
Sumowato si Wolai: „Sapaka aku, ja nimangipi-ngipi in si
anak i Tjolano ja taneangku.”

Siituoka përiorëno i Tjolano in tjumua ang karapi in ëmbow:
„Ra'itja ro'na mamuali tani'tu.” Janta'an si Wolai mëngëtë-
ngëtër(ë)kë' i mëngua-ngua: „Karëngana mamuali tani'tu, em
pinangipitju.”

Awoja tani'tu in tjaporak puse'eno-mio' i Tjolano si putu-
san iitu, éng kuanao a se maputus: „Ra'itja re'e ro'na si
Tjalowatan sumëra' si Tu'a.”

Anaitu ng kinakaapuan i nuwu' e maputus a si Tu'a wo si
Tjalowatan ja tanu in tjëpuse' i nuwu' i Tjolano an isera. Ta-
ni'tu kumi'it in tjaupusan wo ng kapandeian i Wolai, si Tu'a
aitjawëkar(ë)kë' am pinëwilam bo'on i Tjalowatan isia.

GROEP II.

11a. Kukua an doro' i Tjuow wo si Sokopet, sinisil i Sam Welel, Kuntung wo si Herling Kasiha', Talitjuran, Sondër.

Kaindo-indono-mai sapaka si Tjuow wo si Sokopet ja ni-mëta'up a si ësa ro'kosa in dano. Mëta'up-ange sera in dua, ëng kuao i Tjuow: „Itja'! ën ipakatengemu, kumuruo-mio', ja sumangkëro ka'i-mio' toka sapa ona'." Sowatëno i Soko ëng kuanao: „Mande ëndo'on tani'tu, itjope' ka'i saanu, marae kataangko'!" Siituoka ng kuao i Tjuow: „Saanu, na?" Sowatëno i Soko, ëng kuana: „Me'e weta' ena!" Wo ng kuao i Tjuow: „Ja uanu tana'i: ko meko a si tjuntung anu meko, ta'an ko ja ki'itëngkë'-meko i ataku, wo aku monge ka'itje' a si tjuntung anu monge, ta'an ki'itëngkë' ka'i-monge i atamu, eng kita ë mëmëilëkane', ja ën sairita ja se atatao." Siituoka ëng kuao i Soko: „Sama', mongem kamu wo ka'itje' kami mekom. Ta'an se atata mëna'kë' a mëkele pëawu'unta, wo sa ra'ipe' palingan ën ipakatenge i ësaan-ange an itjita, ja iseraoka ë makua-mange."

Makanuwu'-mako sera, ja sera mëtalitjuro; mongem si Tjuow, mekom si Soko. Jawoja itjatëka'-mange si Tjuow, sia tumengeo, nitumo'tol a nimatojo-tojo'pe'-wo, wo makatatenge, ëng kuana: „Kuow! Ku-ow!! Ku-ow!!! Ku-ow!!!! Ku-ow!!!!!" iaka-akar si Tjuow malëntutoka ëm bërën ë matenge. Janta'an sangatengena sangawuei i ata i Soko a si ata i Tjuow, sawo palingano kaapa ra'ipe'. Janta'an ipëngua-nguakë' i ata i Tjuow in da'itja palingan. Jawoja itji'it si Tjuow nimakawe'e-we'eo

ëng këtër ë nimatenge, ja ra'itja palingan i Soko, kua'a sia mëna'o matenge, wo si Sokopet ka'itje' ën tumenge.

Jawoja tumengeo tu'u si Soko nitumo'tol ka'i a nimatojo-tojo'pe', wo makatatenge ulit, tanu si Tjuow. Ja sangatenge ka'i i Soko, sangawuei i ata i Tjuow a si ata i Soko, sawo palingan kaapa ra'ipe'. A si wona' makatëlu tumenge si Soko ra'ipe' pinalinga i Tjuow.

Janta'an kamang im pinalingao i Tjuow ën tengena i Soko, ja ëng kua'a ën ipakawëta-wëta'o-mai i Soko in tumenge n a si tjakaapuan, iaka-akar si Tjuow mënto'oka nimawëngël.

116. Kukua an doro' i Tjuow wo si Sokope'.

Kaindo-indono-mai, kine, a si ëndo makasa, si Tjuow wo si Sokope' ja nimëta'up. A si ëndokë' itu sera mënuwu-nuwu' ainde'-mako sera ro'na mëngkaki'itan ëm basa, Mëwuei si ësaan-ange an isera, ainde' sera ro'na mëmbataruan. Sumowato si pawueian: „Sama'.” Awoja mapuse'-mako sama' ë nuwu'era, ja mangereo sairi. Makaere-mako sairi, kuano e rua nimëmbataruan: „Sapaka kami ja nimëmbataruan, ainde' si sei ën taangko' ën ipakatenge, si Tjuow kumaapa si Sokope'. Anaitu kami nitumowa itjamu maindo sairi. Awoja, pinënuwu'amio in sama' in sapaka kami ja mëweteng: si ësa mitjo a si tjuntung Lengko'an, si ësa meko a si tjuntung anu meko, ang kuntung i Wa'ilan. Si ësa wo si ësa kinai-alian sairi. Ta'an tana'i: si Tjuow maali si Sokope' maindo sairina, wo tani'tu si Sokope' sairianoka i Tjuow.”

Awoja maema'-mako sama' ën ta'ar wo nuwu'era, ja mëtaneo: mitjom se maitjo, mekom se maeko. Ririor wo mëtane, ja mëema'an in sama', in sapaka ën dirior tumenge, ja si Tjuow, wo tare si Sokope' a si tjuntung anu mitjo. Pareke-rekenën i makaasëngo sama' si tjasaruna, ja iru'ndu'nao-meko si sairina, mangilëk sa ro'na tumo'tolo. Itjatëka'-mai si sairi, tumo'tolo tu'u. Ta'an sapa nimamuali? Ma'an pinëpingow ja ra'itja. Siituoka ka'i iru'ndu' weta' meko si Tjuow sairi itu. Pareke-

rekenen itjatēka'-wo mai sia, ja tumengeo ka'i si Tjuow, ta'an tanu si tjatare in tumenge, tani'tu ka'i ēng karua. Iru'-ndu'o ka'i meko si sairi mangilēk sa ro'na iangko'pe'. Pēngawē-ngawēsan i Tjuow ēn tengena, ta'an mande tani'tu, ra'itja palingan.

Ang karapi i malawi' si sairi maware-wareng, ta'an da'itja wana kinaakoan. Mapēkakoka si Tjuow, ta'an da'itja wana torona, pa'pa'an da'itja pinalinga i Sokope' kasaruna. Pa'pa'an in da'itja pinalinga ēn tengena i Tjuow, ja kuano i Sokope': „Iakupe' ka'itje'." Siituoka sia tumenge pēasarēna kine wo'on tanu si Tjuow, im pētojo'pe' kine wo'on ēng katate-tare, ta'an mande in aitojo'nakē', ta'an toka aiwa'mbar-ai ēng katatenge. A meko si tjuntung i Wa'ilan ra'itja nimēpēsei. A si ēndokē' itu mētaneo sera; ang karapi i malawi' si Tjuow mētane wo si Sokope' pa'pa'an da'itja nimakawolei.

Siituo kine ēng kawalian ja aka-akar se Kuow tumbal in tarepe' maulur tani'tu ēn ipakatenge. Tani'tu se Sokope' akar in tarepe' ipatojo'kē'era i matenge, ta'an marae katajang pa-waja'an.

12a. Ēēngkasēn an doro' e lumelempar i nimēkowa' sa si sei n dangka'-mange ēn telewan.

Kaindo-indono-mai sapaka se lumelempar nimaumung, mai mēnuwu-nuwu' an doro' i angkaiēn kolano an isera, wo sama' sera ro'na ipakawali ka'i pari'ndi-ri'ndiran a mēkipēsarot a se karenderera.

Awoja si Uwak maewe uli-ulit maindo kolano; angen-ai iitu wo mēnuwu'o se lumelempar, ja si Uwak mērioro-mai mangko', wo ng kuana: „Karēngan kita mawataru, en si sei a se lumelempar ē makaange-ange an dangka', ja isiao sisirēnta pakolanon." Awoja itji'it in inde'era si lumelempar tani'tu ēng kawangkēr, kakētēr wo kainde'en, ja makapēnēsoka ēm baja se lumelempar. Awoja siituoka mērioro ka'i numuwu' si

Uwak ang karapi i masale-sale' wo taangko' eng kuanao:
„Uli-ulit sama' tanu m basamiow, siituo eng ki'itenta.”

Siituoka mangko'o ka'i si Uwak eng kuana: „Maio, nao mengure-ngure, in tarepe'kë' ema'antao si wasamiow tumëna iitu. Karëngana kita e mëkowa'o, sa si sei makaange-ange an dangka'.” Ja tani'tu waja se lumelempar tumelewo-mange. Makatelewo-ako em baja isera, ja tumelewo ka'i si Uwak. Ja ra'itja ure këliano se kinowa'ana. Awoja mëkowa'o a si Tjios sia, ja si Tjios tumëka'o-mio' a litjur(ë)na wo mëla'u-la'us ni-sumisip am bu'uk i Uwak.

An somoi-ai in si Uwak en da'io mailëk-ange esa a se lumelempar, am pa'pa' kinowa'anao waja, ja sia mangko': „Awo, si seitja tu'u ë nimange-ange en ipakatelewo?” Siituoka tumelew-ange si Tjios wo ng kuana: „Iakupe' en ambia'i.” Ja këpa'ana itu, makarangka'o-mange si Uwak. Ta'an si Tjios nitumëka' ka'i a litjur(ë)na wo mënenge-nenge. Makaawës en tengena i Tjios, makarangka'-mange si Uwak, akar(ë)na i makëpe wo ra'io itjaange. Wo sia mangeo ruma'mbas-ai, ni-mateo. Ja tani'tu kinatongkeiangkë' i Tjios si Uwak.

126. Eëngkasën an dorö' in altjatambisa wo si Uwak ra'io nimaïndo kolano e lumelempar, sinisil i Sadrach Warow.

Kaindo-indono-mai a si makasa waja se lumelempar nimema' paumungam bangko' am pa'pa' sera mangkai esaan-ange an isera mamuali tjolano an ipakasa se lumelempar. Kamang in ambituo waja se lumelempar, ja numuwu'o si Uwak, eng kuana: „Itji'it im basata, ja karëngana awean em pakolanon an unër(ë)ta im baja, wo sama' wea-wean ë maloindo-loindong se mëgigioan e lumelempar. Itji'it im basaku ja wajakë' se lumelempar wangkër se ro'na matele-telew-ange rumangka-rangka' a langit en dëti tumimboi in tjolano. Anae en do'na indon kolano ja isisir a se Uwak am pa'pa' wajakë' se Uwak ë mangkë-wangkër am baja se lumelempar, wo si Uwak(ë)kë' ka'i si ro'na matelew maange a langit, wo matumpa-mai an

tana', iaka-akar ang karapi in ëna' ë mëli'tji-li'tjir masere-sere im baja se waja. Janta'an en ore wea-wean ë manganat, kaapa masomoi i nuwu' wo mëngimbu-ngimbulu, sapaka kita mawataru si sei n do'na tumelew nirumangka'-mange. Si sei si makaindo, ja isia ë makolano."

Awoja sumowato si Tjios, ëng kuana: „Itu n sama', kita ja mawataru." Maio ng kaëmbowan i Uwak si Tjios, wo sia ipëke'ke'na, karapi im bewelesën, ëng kuana: „Itjoo si waranei mawataru wo iaku! Ko ja ra'itja malawi', kaapa mainde' ë men in iitu? Tananao in tjatëki' wo ko'kos muli-ulit! Sa ko wo lomongku, ja tumambisape' saanu ko?" Sumowato ka'i si Tjios: „Mande aku in tëkitj(ë)kë', me'e kita mawataru!"

Awoja siituoka makaëmbowo si Uwak wo si Tjios pëlo-mona wo'o. Ja kamang i Uwak i ngumangao ë mëtongko' si Tjios, ja si Tjios tumelew-ange am ba'mba' i Uwak mëla'u-la'us nimuntëp-ange an owa'na, wo kulatëna-mako ën ate i Uwak, ja sia kumësoto am pë'nar, maali-ali in tjinulat(ë)na. Ja kumësoto si Tjios, mateo si Uwak.

13. Kukua an doro' i Uwak wo si Tjarokok, sinisil i Sam Welei, Kuntung.

Kaindo-indono-mai sapaka si Uwak wo si Tjarokok ja më-taranak. A si makasa sera in dua anio' makatëka' am panganakë' ësa, wo mëpa'a-pa'ar. Mëpa'a-pa'aroka sera, ja ng kuao i Uwak a si Tjarokok: „Ënso' re'e wo iëpe'ta m porong(ë)mu kalo'or."

Siituoka iwe'eo weta' i Tjarokok si Uwak iëpe'na m porong(ë)na, wo iëpe' ka'itje' i Tjarokok ëm porong i Uwak.

Jawoja tani'tu ë nimamuali. An somoi-mai iitu pangilëkëno eta' wo'o i Tjarokok ëm porong(ë)na, ta'an da'io iwe'e i Uwak, iaka-akar si Tjarokok in tawio maame' ë mangilë-ngilëk. Tani'tu ra'io tu'u aiwe'e i Uwak ëm porong i Tjarokok.

Siituoka ja si Uwak tumintjaso, wo sia ngaranan ka'itje' i Tjarokok in Uwak, em pa'pa' sia nimuwak isia.

**14. Ĕngkasèn an doro' in tambisa ng kinamualian wo m ba'mba'
i Sunga makempot, sinisil i Wilhelmus Piri', Munte.**

Kaindo-indonoka-mai sapaka waja se pongkor nimëngkung-kuanan, ja in ëndo makasa sera karëngana maumung. Awoja maio tu'u in sera i maumungo, ja mëmbueiano sera, sa ambituo waja. Ja ng kuano e walina: „Si tuaritaoka Sangawirang n da'ipe' ambia.” Anaitu iru'ndu'erao se Loe mange mangere isia. Mareng-ai sera, ja kumua in da'itja pinailëkera sia. Siituoka ja sera rumu'ndu'o ka'i se Kërëntungan, mainde'-mako saanu isera n do'na makaere isia. Awoja maja'o sera mangeera përaŋga-rangatën an sësëmpa'an, ta'an da'itja sumowat. Talali' in da'itja sumowat, ja rumawiro wo rumuruo se Kërëntungan. Ja siitu wo niindo se Sangawirang wo iwali-mange am paumungan. Ja ambituoka sera, tare numuwu' se pongkor wangkër ëng kuanerao: „Sapao ën do'na patitjo'onta?” Ja sumangkëro-mange si Sunga ëng kuanao i mangko'-mange: „Ja ëm basaku, itjamu im bangkër ro'na masëra' itjami in tëkek.”

Këangko'kë'-mai i Sunga in tani'tu ja maio ëng kainde'an da'io ipakakua a se pongkor tëkek, ta'an se wangkër ang karapi i masale-sale' mapala'uso mangi'it mësëra' isera. An iitukë' an tutuw in dëga in dintja' kainde'enoka, ja mërioro-mio' si Sunga muntëp am balena i Rëmang. Pailëkëno i Rëmang si Sunga, ja makaëmbowo sia en tani'tuo in tjakare'en ë nuwu' wo ëm banti'na a se karapina, iaka-akar kumompo'kë'-mai karetëno-mange i Rëmang am ba'mba' si Sunga, akaran i nimakempotoka.

**15. Sisil an doro' in tjinamualian i Wolai, sinisil i
Jusup Manampiring, Kuntung.**

Itji'it in sisil e matu-matu'a, ja in dior-ë-wo ja ra'ipe' wana wolai ën a si tana' iasa, ta'an se wolai isera ja nimamualioka ang kasomoian.

Indo-indonoka-mai ja a si ěsa ro'ong an amian, ja pĕngĕnto-ngĕnto'an i ěsa wewene maĕsa-ĕsa makaanak ěsa toja'ang tuama. Sapaka ja mawangko'o-mai si toja'ang isia, ja sia ure makaure makawera' wo taka, ra'itja ki'im masembong a si inanga, janta'an kasusur in ěndo ja sia wĕwĕra'angkĕ' ěn tawoiĕn. Makakĕli-tjĕli ja sia pĕtowan i inanga mange an uma, janta'an mare'ekĕ' sia, kumaapa mangeka an uma sia, ta'an mangekĕ' mĕwĕra-wĕra', iwajana-mio' si inanga ě mĕnawo-nawoi. Wo am pa'pa' im bawangunana tani'tu, sapa-sapa-mange m pangilĕkĕna, ja ra'itja paki'itan i inanga. Maioka tu'u a si makasa an tutuw i inanga i matawoi, ja sia mangilĕk a si inanga, ěng kuanao: „Wean-ai to'ngaw pĕran aku, e ina'!” Ĕng kuano i inanga in sumowat: „O iitjooka ěn iusĕw?” Siituoka ng kuano ka'i i toja'ang: „Ja weangkĕ' kua'a-mai tande!” Sumowato si inanga: „O iitjooka ng kanĕn?”

Awoja a si ěndooka ka'i makasa, an tutuwera i mĕinang in an uma, ja si toja'ang isia pĕnowa-nowan i inanga mange am patawoian, janta'an da'itja kiim(ĕ)na, sia nimĕnto'kĕ'-mio' a lawi mĕwĕra-wĕra'. Siituoka ja ma'mbowo si inang(ĕ)na wo sia mĕra tande, wo itu iwe'ena ang kure' wo tutuwĕn. Ja maja'o sia, ěng kuanao a si toja'ang: „Mai ilĕkĕn ěn tu'tu-mu-sa en aku mangepe' am patawoian.” An somoi tu'u-mai iitu si toja'ang isia maarĕmo, anae sia mangeo mĕngat in tjure', indoana in tjanĕna. Janta'an wuka'anao-mai ěng kĕkĕlĕw in tjure', ja pailĕkĕnao pinumpunangke' im pinĕra. Siituoka ja ng kuanao: „En aku niulur i ina' tani'tu, ja mainaoka pailĕkĕn!” Siituoka ja indonao m pĕpĕraan wĕ itu'una an api; ja mawĕreng-ako ěn iitu, ja itu angkaiĕnao-mai, wo itjĕlĕw-(ĕ)na-mio' wo lukutana, akar i nilumĕtoko ě lulukut. Siituo kine se wolai wo lĕtokan ěm pĕ'nar.

Ja tumo'oro-mai sia ěn am pĕpĕraan, ja sia mĕwalu-waluio tanu wolai, wo masale-sale'oka mĕlapu-laput an dangka', ta'an sia ra'ipe' nimĕla'u-la'us nitumintjas, en sia mangĕnto-ngĕnto'-pĕ'-mai si inanga a lawi. Marengoka si inanga ě nimatawoi, ja tajange'-mange tojo' sia rumangato-mange si ana'na ěn a

lawi, ěng kuana: „Ambanaka ko e itow?” Sumowato sia ěng kuanao: „Ambia'i.” Makatawioka-mai sia, ja palinanao-mange ěn a lawi, ja aweano ě maěngek. Kělinakě' in iitu ja kata'-tapano sia, wo sia měla'u-la'uso-mange muntĕp a lawi. Kaiuntĕp(ě)na-mange a lawi, ja pailěkěnao si ana'na malapu-laputoka ang kalawat, wo měnenge-nenge in tana'i: „Ngek ngok! ngek ngok!” sinangapĕruaano im bolai, lětokanoka. Siituoka mangko'o-mai si inanga: „O weta'! nimaindoo re'e wolai si ana'ku! maio e itow! maio! waja im pangilěkěnu iwe'ekuoka iitjo, maio! maio!” Kuano i toja'ang: „Nao tare, e ina'. Ra'itja wineanu tande pinĕra aku, ra'itja winean to'ngaw ja kainainia sawěl in tu'tu' wineanukě' in tande pinĕra, anaitu aku wo nilumukuto am bĕrenga im pĕpĕraan.”

Siituoka mio' kumontil-ai sia mangem am buwungan i lawi, měngĕnge-ngĕngek wo matete-tete ambitu. Pakaseren-ange i inanga sia, ja nimawolaio ě giona, wo sia kumontilo-mange ang kaju wo tumintjaso an talun, wo akar-ai iitu sia měngĕnto-ngĕnto'oka ambitu. Awoja isiao, kine, nisumuru-mai se wolai a si tana' iasa.

GROEP III.

16. Kukua an doro' i Wolai, sinisil i Thomas Dien.

Kaindo-indonò-mai sapaka si ěsa wewene ja nimitong to-ja'am bĕru, janta'an si toja'ang iitu ja wolaitjĕ'. Jawoja maio i mawangko'o tu'u si toja'ang, ja ng kuanao a si Inanga: „O Ina', sa itjasale'mu ja pĕngarojoran-io' tĕpe ěn a lesar pĕngalukutangupe' wo'o sa aku mĕsĕndang. Sumowato si Inanga ěng kuana: „Sama', e itow! janta'an toka ndo'o ko en da'itja gio in tow, ja mio'o itenda-mio' am pĕlangko-langkoiĕn e tow?” Ēng kuanao: „Mande wo, e Ina', ra'itja kua'a sapa-sapa itu.”

Siituoka susur im boondo ja rojoran-io' i Inanga tĕpe ěn a lesar wo mio' pĕngalukutan i Toja'ang. Awoja mamuali a si makasa, sapaka ŝi Wawu' luluna ja mange lumĕle'-mai, wo sia lumangkoi-mange am pĕngĕnto-ngĕnto'an i Wolai. Siituoka sumigilo si Wolai ěng kuana: „E inde', sa rake wo'o ki'im i Wawu' taneangku.” Ituoka maio a si Inanga sia wo ng kuana: „O Ina', sa itjasale'mu, ja mange wueiĕn-ai si Wawu' mainde' wo'o sia masale'ka taneangku.” Kuao i Inanga: „O ndo'on ěm pales! ra'io sia ja masale'o in da'itja gio in tow! Wo ng karua itu, se lĕngei ndo'o tanuo-mai se itjita ro'na tumane an Anak i Tjolano? Ra'itja ndo'o ro'na, e itow, oreka mapalawi-lawi' in owak; anaitu tio'o tare, e itow.” Janta'an linĕse'kĕ' i Wolai, ěng kuana: „Mande, e Ina', mange ěpe'an mainde'-mako sia masale'kĕ'.”

Siituoka mangem si Inanga; awoja itjatĕka'-mange am bale i Tjolano sia, ja sia mueio a si Tjolano, ěng kuana: „E

Kolano, sapaka aku, ja airu'ndu'-mai i Ana'ku Wolai, maipe' kine wo'o mui sa itjasale'muka, sia ē mangilēk si luluna e ana'mu wewene." Sumowato si Tjolano ēng kuana: „Sama', janta'an wueiēn a si Toja'ang sa sia masale'ka kaapa ra'itja." Wo si Toja'ang wueiēn i Inanga i Wolai, ēng kuana: „O Wawu', sapaka aku ja airu'ndu'-mai i Ana'ku Wolai mēwuei iitjo, sa ko masale'ka ēn taneana." Sumowato si Wawu': „O kekek, si sei ē masale' tanean i Wolai? Mande ka'itare tu'u ra'itja wana n tumane an iaku akar i mate, ja menoka-mange ēn tanean i Wolai! tio'o karu' aku! Ta'an ēpe'an i mui si tjumi'it iaku, kaapa ēsaan-ange a se tuaritju, eng kami ja siow ēm bewene." Awoja wueiēnao se uwalu, ja si Tjaakarangkē' ē nimen.

Awoja men-akō si Tjaakaran, ja marengo-mange si Inang i Wolai wo mangeo sumisil a si ana'na sapa ē nimamuali. Siituoka kuao i Wolai a si Inanga: „O Ina'! wawa'ando ja iwali-mange a si paroma'angku aku eng kami lumaese'-mange, mange lumēle'-mai am palēle'ana." Awoja mawawa'andoo tu'u-mio' ja iwali-mange a si paroma'ana si Wolai. Awoja itja-tēka'-mange sera, ja sera sinēpa i Wawu' ang kara-karapi in ate masale-sale'. Siituoka kuao i Wolai a si paroma'ana: „Sa itjasale'mu, ja kita in dua lumaese', mangepe' lumēle'-mai am palēle'anu." Sumowato si Wawu' ēng kuana: „Ja me'e." Wo sera mangem.

Ja am palēle'ano sera, muka'o in tjaraina si Wolai, pailēkeno i Wawu' ja ēsa re'e Tuam Balanda si Wolai. Awoja makalēle'-mako sera, ja kakajaano i Wolai ēng karaina, ēng kuana: „Kakaja, kakaja, tarepe' makaompēr ambia'i ēm pakean nilumo'or-ai am pakean in tjolano, karapi im pakean im bawu'." Tumarepe' tu'u-mai ambituo waja se kinakaja i Wolai, wo sera sumawēlo wo marengo-mange am bale. Awoja se tow palangkoiēnera-mange ja mangaja-ngaja'ka'oka am pa'pa' in aitjawaluio si Wolai nimaindoo ēsa Tuam Balanda lo'or ni-mangakar, tani'tu ka'i si Tjolano ja nimangaja'ka' ēn sinumpakera-mai am pa'pa' in aitjawaluio si Wolai, wo tani'tuo in

tjalo'or ěm pakeanera in dua. Siituoka ng kuao i Tjolano a si Wolai: „Tuam Bolai, kawisao kamu ě mamale?” Sumowato si Wolai: „Ang kandoanoka, e Tuang Kolano, en aku ja mangepe' maler im bale.”

Awoja siituoka mangeo kumakaja si Wolai, ěng kuana: „Kakaja, kakaja! tarepe' si wale lewo' anio' itjawalui, maindo wale nilumo'or-ai ang kalo'or im bale i Tjolano ang karapi i momonarana.” Tumarepe' tu'u-mai ěm baja itu nimamualio tani'tu. Awoja maio tu'u ang katĕluan ngando, ja lumĕkĕpo in ta'ar sera ang karapi in tjalo'o-lo'oran. Kasomoian-ai iitu ja kuao i Wolai a si pĕnana'ana: „Sapaka aku ja sumengkote', ta'an oreka ko panganatĕn e kaka'mu, ja tana'i: Sa ko wo towanera-mange tumamberen an tĕmbir i lawanan, ja tume-ngam-ange ěsa wua'na in tĕnga' wo ěsa wulinga', en sa ko wo tumamberen, wo ko itukeera-mange rumĕpĕ-rĕpĕt a laur, ja pĕriorĕn-io' i mĕte' ěm bulinga' wo iwe'e-mio' am bawo in tĕnga', wo itu kĕsotan-ai i ěsa ko'ko' laka', am pa'pa' sia kumukukoka ipapalingana-mange iaku.” Wo tu'u si Wolai sumengkot.

Awoja an tutuw(ĕ)nakĕ' tu'u in an sinengkotan, ja towano e kaka'na si pĕnana'an i Wolai i mange tumamberen an tĕmbir i lawanan, janta'am beta' sia ja pinĕtenaanera ěng kuaerao: „Sa si a si Wolai wo tumambereno-sa, ja ituke-mange rumĕpĕ-rĕpĕt a laur wo sia malĕsĕm.” Tani'tu tu'u ě nimamuali. Matamberenoka tu'u weta' si a si Wolai, ja irukeerao-mange rumĕpĕ-rĕpĕt a laur, iaka-akar sia in aitjapasot-ange ang kararĕmana. Awoja siituoka pĕriorĕnao-mio' i mĕte' ěm bulinga' wo iwe'ena-mio' am bawo in tĕnga' wo kumukukomai si Tjo'ko'. Kĕlingakĕ'-mai i Wolai in tjukuk i Tjo'ko', ja mamorako-mai sia, mainao pailĕkĕn si pĕnana'ana makaĕ-na'oka-mio' am bawo in tĕnga' ang karapi i Tjo'ko'. Siituoka indonao-mai si pĕnana'ana wo ipumpuna an ěsa tempa, wo sia lumo'oko-mange am balena. Awoja itjatĕka'-mange, ja pailĕkĕnao si anak luluna e anak i Tjolano ja ambituo. Siituoka pĕwueiĕnao, ěng kuana: „Ĕnso' si pĕnana'angku?” Sumowato

si Wewene isia, éng kuana: „Iakuo ka'itare tu'u si an iitjo, ja pepéseiénuòka?” Éng kuano i Wolai: „Uliti na?” Sumowato ka'i sia: „Uliti.”

Siituoka mangem a si Tjolano si Wolai wo méwuei, éng kuana: „Uliti si am baleku in tarepe' si tjasaruku?” Sumowato si Tjolano: „Isia.” Kuano ka'i i Wolai a si Tjolano: „Uliti tu'u na e Kolano?” Kuano i Tjolano: „Sa ra'itja isia, e Wolai, ja kami in am balesa karapi e ki'itén i an iitjo, ja itjaataoka ka'itje' an iitjo, janta'an sa isiaka, ja karéngana ko en to'tokén.” Siituoka ja ipekiwuka'o i Wolai én tempa pinumpunana si an isia, ja kumésoto-mai si Wawu' aipumpun a si tempa iitu, wo mangaja'ka'o-mai si Tjolano wo se ana'na. Awoja a si éndoké' iitu mamualio kolano si Wolai, wo se Kolano in am balesa kara-karapi e anakera itjaatao a si Wolai.

**17. Sisisilén an doro' i Tumotongko' kaapa Kumékésan,
sinisil i Paulus Mumu, Lóilém.**

Kaindo-indon-ai a si éndo makasa si Tumotongko' ja nimaunér-ange a si ésa ro'ong. Siituoka sia itjasumpak-ange a lawi i ésa wewene maésa-ésa. Pailékéno i Maésa-ésa si Tumotongko', wo sia mainde'. Siituoka ng kuao i Tumotongko': „Tio'o minde-inde' ko em pa'pa'an aku ja ra'itja suméra' iitjo. Janta'an sa ko masale', ja ko pékiinangéngkuo.” Éng kuao i Maésa-ésa: „Sama', aku masale' pékiinangénu.” Ja ng kuao i Tumotongko': „Ko ja iru'ndu'ku mange a si Tjolanomiow, sa itjasale'na aku mangiléék ésa a se lima anak(e)na.”

Mangem si Maésa-ésa iitu. Itjatéka'-mange am bale i Tjolano, ja sia péwueiénao: „Sapa ém bawaja'mu?” Sumowato si Maésa-ésa: „Aku ja airu'ndu'-mai i Tumotongko', mui a si Tjolano, sa itjasale'mu, si Tumotongko' mangiléék ésa a se anak(e)na wewene.” Sowaténo i Tjolano ng kuana: „Wueién tu'u a isera ja sa si sei masale'.” Siituoka to'tolenao a si Luluna i mui akar i tji'itén i Tjaakaran, janta'an da'itja

wana nimasale' an isera. Wueiëno si Tjaakaran, ja isia ë nimasale' pangilëkën i Tumotongko'.

Kumawus-ako itu ja si Maësa-ësa marengo. Itjatëka'-mange sia, kuano i Tumotongko': „Waweangka nimasale' pangilëkëngku a se Anak i Tjolano?” Sumowato si Maësa-ësa, ng kuana: „Si Tjaakaran isiaka nimen.” Siituoka kuao i Tumotongko': „Ja karëngana aku mange a si Tjolano, sa uli-ulit nimengka si Tjaakaran, kumaapa ra'itja.” Mangen tu'u si Tumotongko', ja aitjasale-sale' i Tjolano wo si Anak(ë)na. Ja ng kuano i Tjolano: „En aku matu'ao, ja karëngan si niman-gilëk si Ana'ku isia n sumawël an iaku.” Tani'tu si Tumotongko' mamualio kolano wo sera si Anak i Tjolano mëwali-wali am pamalean.

Pailëkëno i Pëtowëna, si Tumotongko' ja tow re'e, ta'an sia makara-karai in tjulit e tumotongko'. Siituoka mangem a se po'ow(ë)na si Pëtowën i Tumotongko' wo ng kuana a se po'ow(ë)na: „Si Tumotongko' isia pinailekuo ra'itja re'e tumotongko', janta'an sia tow re'e Walanda.” Siitukë' ëm pina-linga e po'ow(ë)na, mangeera ilëkën ulit re'e tow. Ja ng kuao i Luluna: „Sa tani'tu, aku mangilëk tow iru'ndu'-mange an talun wo mange mangere tumotongko', siitu aku n tanu si tuaritju.” Mangen se tow airu'ndu', ja nimakaere tu'u-mai tumotongko' wo paalinera-mai a si Anak i Tjolano luluna. Siituoka iwe'eo kárapina am buni; kasomoian pailëkëno, sinë-ra'kë' i tumotongko' si Anak i Tjolano luluna.

18. Kukua an doro' i Toja'ang tanu Kapitu, sinisil i Frederik Karëwur, Kuntung.

Kaindo-indono-mai sapaka se am balesa ja nimakaere ësa toja'ang, sia ja ra'itja wana ro'kos wo keitjei, tanukë' kapitu. Ja ra'itja ure sia m papiaranera, ja ng kuanerao: „Sapata tu'u in toro i mëwangko-wangko' isia, ra'itja wana katoroan; awëse' tare sia wo irojong(ë)tao, intji?” Kuano i Ësa: „Ja awës ën tani'tuo.” Wo sia saputënera in aroro' wo irojong.

Ja marojongoka sia, ja itjawe'e-mange an dano maringin wo sia itjasampel-ange am batu lëmpar. Ambituoka sia, ja sia pailëkéno i ësa wewene maësa-ësa. Wo si Toja'ang tanu kapitu numuwu', ëng kuanao: „E ra'a, sa ro'na ja indon-ange aku, wo iwali-mange am bale.” Kuano i Wewene isia: „Sapaku in toro i mindo iitjo, en tanukë' kapitu?” Kuano i Toja'ang: „Wawean kua'a katoroan aku, anae sa ro'na, iwali-mange aku.” Kuano i Wewene: „Sapakë' e inde', ra'itja iwalitju!” Wo sia indona wo iwali-mange am bale. Ambituoka, ja ng kuano i Wewene isia a si Tanu Kapitu: „Ra'itja wana kanën, ja.” Kuano i Tanu Kapitu: „Ja ëmparan-io' in tjulo' ë meja, wo iwëkar-ange ambitu aku. Ta'an dumojor(ë)pe' ko wo mangepe' a se katana'-wo, wo tio'o maware-wareng-ai in somoi.”

Tani'tu tu'u kini'itan i Maësa-ësa. Ja mareng-ai sia ja aiompéro m baja in tjakanën wo n ëlëpën e sija', ja mangaja'ka'o-mai isia. Ëng kuano i Toja'ang: „Kumano-wo, em baja in tēla'u-sa ja itia'oka-mio', em bawa'ando ja makaere ka'i tjanën.” Siituoka ja sia kuman. Makakan-ako sia ja maïlëko i murano, wo ng kuanao: „E murano! Ja ambisa m bean iitjo em pati'isan, ja rumëgës ka'i wona'. O inde'! sa n iasa itjarë'mba wo ko atëwën.” Kuano ka'i i Toja'ang: „Ja iwe'e ka'i-mange a meja aku, a'li'an ka'i in tjulo'. Ta'an ka'i ko ja rumojore'-wo, wo tio'o itaure-mai.” Siituoka rumojoro sia wo mange a se katana'. Ambituoka sia, ja sia maïlëko-mange im balena, ja ra'io tani'tu, ta'an aitjaerao, wo sia mareng-ange.

Ra'itja ka'i nimaja' pira ngando, ëng kuano i Ra'ana: „O inde'! makapësuto m bale, ja tēkek ëm bale, sawo wangko', ja ro'na pëmësu-mësutën.” Kuano i Toja'ang: „Mange wueiën ëm bale i Tjolano, mainde' wu'unën.” Kuano i Ra'ana: „Ja sapa n iwe'e in iitu?” Kuano i Toja'ang: „Me'e weta'-wo!” Mangem si Ra'ana wo sia mui. Sumowato si Tjolano: „Itja-sale'ku, ta'an si ësa pariri anu mange ja wutan im paser, wo si ësa ja wutan in susi.” Marengo si Wewene isia, wo

mange kumua a si Toja'ang. Kuano i Toja'ang: „Sama', ta'an sapaka ko, ja mangem am bale i Tjolano wo itjatéka'-mange ja mitong-io' tana' wo ilëpok-io' am pariri, makatëlu n a si ësa, tani'tuka ka'i n a si ësa.”

Tani'tu mangem si Wewene isia wo mema' tanu si aita'ar i Toja'ang. Ja pailëkënao, ja nimawutao im paser wo n susi ëm pariri. Ja aitjuanao a si Tjolano: „Nimawutao ja.” Kuano i Tjolano: „Ja sama'.” Wo sera mëluwo wo rumojoro ën ambitu. Rumojor-ako se Kolano, ja sumosoro-mange si Wewene isia. Pailëkënao ja ra'io lo'or. Siituoka sia mange a si Toja'ang ng kuanao: „Ra'io lo'or, pa'pa'an in tinangkelasano ën ambitu.” Kuano i Toja'ang: „Iwali-mange aku, mange iwëkar-io' an sale'.” Iwalio tu'u-mange sia. Itjatéka'-mange, ja ng kuano i Toja'ang: „Rumojore' ko-wo, iakupe' n ambia'i-wo.”

Rumojoro ka'i si Wewene isia. Mareng-ange sia, ja nima-wutao im përong ëm bale. Ambituoka sera, ja mangeo lumële' si Toja'ang ta'an aira'ndakë' i Ra'ana, wo pailëkëna ja in sapaka sia, ja tuama re'e lo'or. Wo indonao ng karaina wo iëñëp. Ja mangeo pangere-ngeren i Toja'ang ra'io wia. Kuanao: „Ra'io kua'a kumarai in iitu aku, ta'an aku ja tumaneo a si Anak i Tjolano.” Siituoka mangeo mui si Anak i Tjolano sia. Kuano i Tjolano: „Sama', ta'an da'itja sapa n iwe'emu mangekë' mëseke' wo se sangaro'ong, en sera ja tow lewo'. Sa sera kawoleianuka, ja itjooka ng kolano wo ko tumane a si ana'ku.”

Awoja mangel tu'u sia, mangeo mëseke', iaka-akar tu'u in sia nimakawolei. Ja marengo-mange a si Tjolano sia, wo itjuana in isia nimakawolei. Anaitu isiaoka ng kolano ambitu wo sia ka'i nitumane a si Anak i Tjolano.

19. Kukua an doro' i Toja'ang i Malënge-lëngei wo si Lulun.

Awoja sapaka se mëning anio', ja talos lëngei nimangakar, akarera in tjumangkë' e mangilëk. Ja a si makasa sera i mëning, ja maange a se ito' i toja'ang iitu. Ta'an mange-

oka sera, iparitja-ritjaké' e ito'na. Marengo-mange a lawiera sera i mëinang, si lawi mawuruko itu.

Ja a si makasa si Toja'ang iitu makareken in tana'i: „Ja mema'pe' kua'a kolombuang aku.” A si ëndoké' itu si Toja'ang nimema' ësa kolombuang. Tanuo i mawawa'andoo-mio' ja mangeo ita'an i Toja'ang ëng kolombuang. Mando-mai mangenao ilëkën im boondope' ën aita'ana. Itjatëka'-mange sia, ja mio'nao iangkai-ai ja utëroka. Kuanao: „Nimindoka tu'u re'e n aita'angku.” Ja wulengënao-mai se pongkor isera. Maunëroka im bale sia. Ja ng kuano e tow: „Ambisa sera wo, e Anak i Malënge-lëngei, nirumombito karu' ko'?” Sowatëno i Toja'ang iitu ëng kuanao: „Ra'itja, ta'an niindo in tjolombuangku.” Ja wueiëno i ësa tow: „Ja sapa m pangilëk(ë)mu isera?” Kuanao: „Wene'ké' wo'on.” Ja weano weta' am palambakangké'. Ta'an si Toja'ang iitu ja ra'itja nisumowat sapa-sapa. Ja mangem tu'u si Toja'ang a si Inanga, ëng kuanao: „O Ina', waweano tu'u wene' kanën kita.” Kailëkanako i Toja'ang in sapaka ja roro'na kaereana sapa-sapa, ja ng kuanao: „Mema'pe' kua'a ka'i ësa aku.” Ja a si ëndoké' iitu, ja sia nimema' ka'i ësa. Mawawa'ando kai-mio' ruao tu'u ë mangena aitaan. Mandoo ka'i-mai ja mangena ilëkën ën aita'ana. Pailëkënao mawuta-wuta waja e pongkor. Wulengënao-mai se pongkor. Maunëroka ka'i-mange im bale si Toja'ang iitu, ja wueiëno ka'i e tow: „Sapa n ipawe'e se pongkor(ë)mu?” Kuano i Toja'ang iitu: „Karaitjë' wo'o wo salana jau.” Weano tu'u karai wo salana sia. Marengo-mange a si Inanga si Toja'ang iitu ëng kuanao: „O Ina'! wilitën-io' ëng karaitju wo n salanaku, aiwe'e se pongkor(ë)ku niindo in tjolombuang niema'ku.” A si ëndoké' iitu, ëng kuanao ka'i: „Ja mema'pe' kua'a ka'i ësa aku.” Anaitu mawawa'ando-mio', tëlu tu'u ë mangena ita'an. Mandooka-mai im boo-woondope' ja mangenao ilëkën ën aita'ana. Pailëkënao ja mawuta-wuta waja e pongkor se tëlu kolombuang iitu. Wulengënao-mai se pongkor isera. Maunëroka ka'i-mange im bale sia, ja towano ka'i e tow: „E Toja'ang i Malënge-lëngei! sapaka ka'i n ipawe'e

se pongkor(ě)mu?" Kuanao: „Pisow(ě)kě' wo'on." Si Toja'ang isia ja ang karapitjé' i mainde-inde' am pa'pa'an in tow lēngai. O weta' weano ka'i pisow sia, ta'an pisow re'e pungkut. Mande tani'tu sia rai'tja nimerai-mai. Marengo-mange a si Inanga si Toja'ang iitu, ěng kuana: „O Ina'! waweano tu'u pisow kita, e Ina', ta'am beangkupe' uting, wo sama' itumbal(ě)ku."

Jawo itu iema'na tumbalan. Pakaema'ana tu'u-mako itu, ja kalingaanao se Ito'na ja mange mēlitag an talun. Ja mangem a si Ito'na sia, wo ng kuanao: „O Ito', sa itjasale'miow, ja kumi'ite' aku." Kuano e Ito'na: „Ma'ane' pisow ja ra'itja kaulitan, ja wo'ope' in tjumi'it; sa ko kumi'it ja karēngan ko pongkolan in do'kos." Ja mandepe' tina'aran in tjainde'en, ja ra'itja tina'neina itu. Jawo si Toja'ang iitu mange a si Inanga ěng kuana: „O Ina', sa ro'na ialer-io' walun aku, en aku ja kumi'ito' se Ito', mange mēlitag an talun." Siituoka tu'u maja'o se Ito'na, wo sia kumi'it; susur in am pengkoran se Ito'na, ja si Toja'ang iitu mamorak ě mawaja', oreka sia pailēkēn e Ito'na.

O weta'! itjatēnaoka si lalan pareke-rekenēn ěsa pal am papengkoran, ja sia ra'io nimalēk in sine'pangan e Ito'na. Ja ng kuanao: „En aku n tinintjasangkě' e Ito'ku ja mēnto'o kua'a ambia aku." Jawo si Toja'ang iitu kumanat in a'kēl, wo ng kuanao: „Tuma'taso kua'a ambia aku." Wo sia mema' tērung pareke-rekenēn tēlu ngaparas in atēp in talun. Jawo sia mi'mbit sangapulu' ě litag, wo ilitag(ě)na, ta'an aili'tjir(ě)kě'-mio' in tērung. Ipakalitag(ě)na-mako itu, ja sia mange an tērung. Rai'pe' nilumukut sia, ja palinganao marēngkeko.

Ja mangena paten si wio'o. A si tēlu ngando ja puteoka i matatar se wio'o sia, akar in aiema'oka solimai pinakombo'an in sēra'. Ang kaēpatan ngando ja ng kuanao: „Mangerepe'-mange se Ito'ku aku."

Maja'o si Toja'ang iitu, wo sumpakēna-mange se Ito'na. Ja ěsao wangkēr ě niindo, ta'am borung. Kuano e Ito'na: „O ko topukēn! nimakaerekě' tu'u-mai si Toja'ang anio'." Sowatēn

i Toja'ang iitu, ěng kuanao: „Mĕkisĕra'pe' a se Ito'." Ja wangkilano-mange koling sia, ra'itja aiwe'e ang karapi in upus, wo ririor ka'i-mange iitu, ja sia aisalo-salowo i Ito'na. Kuano i Toja'ang itu: „O Ito'! sa kamu masale', ja mangeo rumakut in sĕra' niindoku." Kuano e Ito'na: „Awo koi! ra'itja tu'u re'e nganga' sia? pe'tare kami m bona' lima ngapulu' ěn aita'an ja wajape' in ěsa ě niindo, ja wo'ope' iitjo!" Kuano i Toja'ang: „Ulit e Ito'." Kuano e Ito'na: „Sa ka'itje' ra'itja, ja karĕngan ko em pongkolanami!" Ja maja'o tu'u sera, ipakata'anerakĕ' ang kanat i Toja'ang iitu m pisow. Ja itjatĕka' tu'u-mange se Ito'na, ja uli-ulit. Kuano i Toja'ang: „Sangarakut(ĕ)kĕ' ěn indongku, akar iitu ja itjamuoka." Kuano e Ito'na: „Ja ita'tak-ai lulun kita."

Ja maja'o si Toja'ang iitu tuma'tak lulun. Pĕta'takĕnao si sumpakĕna-mange ja ninumuwu'kĕ' in tana'i: „Ja itjaupus-ai aku, tio'o ta'ta-ta'takĕn aku." Janta'an iwareng(ĕ)naoka-mai i numuwu': „Ta'an mande kua'a aku ta'takĕnu, ta'an tio'o paina-ina'an, mande piso'nakĕ' ěsa, ja tio'o paina-ina'an. Ta'an sa ko mange rumakut im paalinu, ja itampengkĕ'-mange an somoi aku. Jawo sa ko nimangem am bale, ja iwangengkĕ'-mange an du'u aku." Ja mangeoka a se Ito'na sia, ja pĕin-dongkĕ' wo'o e Ito'na. Kuanao: „Itjaupus-ai, tio'o indo-indon ěn iana, wo kamu mangekuoka ita'tak-ai." Mangenao tu'u ita'tak-ai se Ito'na, aisawĕl a si niangena-mai ririor. Jawo tu'u sia mangem am bale, ja si wisa n aitjua i Lulun, ja kin'i'itana, in iwĕkar an du'u. Mandooka-mai im boo-woondope', ja si Toja'ang iitu lumaes-ako wo marengoka-mange en oraso in tjuman. Ja mangem tu'u sia a lawina, mangena pailĕkĕn, ja alero ng kakanĕn am bawo i meja. Jawo sia mangaja'ka' ěng kuana: „O inde'! si sei kua'a re'e ě nimaali-mai in anio'?" Ja paĕnto-ĕnto'ona, jo ra'itja wana ng kumĕsot-ai. Kuanao: „Kumano kua'a aku." Makakan-ako sia, ja ra'itja nimĕlur in tjinanana, wo ka'i sia lumaes. Marengoka ka'i-mange sia e mawĕngio, mange tu'u sia wo pailĕkĕnao ja niengketano n sosoloan, ja alĕro ka'i ng kakanĕn an dangka' i meja. Jawo

sia mangaja'ka' eng kuanao ka'i: „Si sei kua'a e mauwit-ai im pakanengku?” Jawo ento'ona ka'i tojo'. Paento-ento'ona ka'i ja ra'itja wana ng kumesot-ai, ja kumano ka'i sia. A si telu ngando mengulu-ngulur tanu si tjatare. Kaepatan ngando ja si Lulun numuwu' ka'i eng kuana: „Sapaka ko ja mange mamuei im bale i Tjolano.”

Ja ng kuano i Toja'ang iitu: „O ndo'on! sapao ndo'on en iwe'eku iitu, ma'ane' tare karaien-itjo aku ja ra'itja kaulitan, ja wo'ope' i muei im bale i Tjolano?” Kuano i Lulun: „O mangem beta'-wo!” Ja mangel tu'u si Toja'ang, mange a si Tjolano, wo sia muei a si Tjolano: „Ra'itja pawu'unen em bale i Tjolano?” Kuano i Tjolano: „Pawu'unen, ta'an sa n iasa telasanuka, ja irojo(ë)kukë' em baja-waja in an sangkum im bale.” Kuano i Toja'ang: „Mandepë' ja.” Kuano i Tjolano: „Ja mai ambia'i-wo e!” Maio tu'u si Toja'ang eng kuano i Tjolano: „Ja sumereo-mio' im pariri, se ruakë' ka'itje' anio' em buta-wutan im pera. Sa ka'itje' ra'itja indonu, ja karengan ko em pongkolan.” Ja marengo-mange si Toja'ang eng kuanao a si Lulun: „Ja aipapalawi-lawi'muo aku, en aku ja tina'aran i Tjolano in sa ra'itja kapopon, ja karengan aku en dantongenoka. Mewëra-wëra'kë' tu'u! rua m pariri, pakawuta-wutan im pera.” Kuano i Lulun: „Tio'o ko mainde-inde' a siitu, janta'an sapaka ko ja mindo-mai rua piso'na an iaku, tio'o ipapai-pailëk, oreka wana mailëk. Ja itjatëka'-mange ko, ja ilëpok-ange a se pariri rua n iitu, mëkele ësa a si ësa wo si ësa.”

Itjatëka' tu'u-mange sia, ja kini'itana. Ira'mbas tu'u-mio' itu ja pailëkenao m pariri ja kinuwuano im pera. Ja ng kuano tu'u i Tjolano: „Ja rumojoro tu'u kami.” Ipakarojo(ë)na-mako m baja se ambitu, ja pailëkeno i Toja'ang in sapaka si wale itu ja talos wangkër. Kuano i Toja'ang: „Ja sapa tu'u en itiruw(ë)ku si wale anio'? Mëna'-mio' a si ru'una anio' aku, ja si seipe' ka'i e mengëna-ngëna' a se ru'una walina?” Ja marengo-mange sia, eng kuanao: „Ja aipapalawi-lawi'muo aku, mewëra-wëra'kë' tu'u re'e, en itiruw si wale iitu!” Kuano

i Lulun: „Mënë-pënës eta'-wo. Apaka aku ja paalintjê'-mange im bēngi, tio'o ipapai-pailëk, mangekë' iwëta'-mio' a si wuni an unër, wo kusi'angkë'-mange, tio'o pauntë-untëpën ën iitu. Iitjo ja mēna'kë'-mange a si ru'una an sangawiwi.”

Ja kini'itan tu'u i Toja'ang. Mandooka-mai ja sia ka'i lumaeso; ja marengoka-mange sia, ja pailëkēnao ja nimatiruwo in doko' si wale iitu nitjumēli-mai an doko' i Tjolano. Pailëkēna ka'i ja niompērano in tjanën. Kuanao ka'i: „Si sei kua'a tu'u re'e ë mauwit-ai im pakanēngku?” Paënto-ënto'ona-mai, ja ra'itja wana ng kumēsot-ai; ja ng kuanao: „Ja kumano kua'a tare aku.” Makakan-ako sia, ja ra'itja nimēlur in tjinanan, wo tumintjas ka'i. Mareng ka'i-mange sia, tani'tukë' ka'i. Ja a si tēlu ngando ja nimēngulu-ngulur tani'tu. Ja ang kaēpatan ngando, ja ng kuano i Toja'ang iitu: „Ja ilukut(ë)-kupe'.” A si ëndooka tu'u itu ilukut(ë)nao. Pareke-rekenēno tu'u i Lulun, ja nilumaeso ka'i si Toja'ang, ra'itja, e nilumukut si mawe'e im pakanēna, ja ra'ipe' tu'u ure sia ë nilumukut-io', ja kumēsoto-mai si Lulun. Pailëkēno i Toja'ang ja ësa wewene lo'or, ja m bërēna tanu ng kasëndot i ëndo, ën suluna ja paser(ë)kë' wo m ba'ang ja paser(ë)kë' ka'i. Ja timboianao-mange sia wo ng kuano i Toja'ang: „Iitjoo tu'u re'en ë mawe'e im pakanēngku.” Ja sowatēno i Wewene: „Iaku, ta'an apa ko ja muntëp-ai a si wuni anio' wo ko sawēlangku karai.” Ja muntëpo tu'u-mange sera, ja pailë-ilëkēn i Tojaang ë Lulun ra'io wia. Ja sumondolo tu'u in tjarai e Walanda si Toja'ang, wo sera lumaes mēwali-wali. Wo sera pailëkēn i ësa tow, wo mangena iowër a si Tjolano ëng kuana: „O Kolano, wona' ësa kolano si mēngēna-ngēna' am bale i Tjolano-wo;” jawo sia mangaja'ka' wo mainde' am pa'pa'an oreka ipēsēt(ë)na ng kakolanoana. Anaitu wo sia rumu'ndu' se surarona pitu ngapulu' mange wo'o mindo se ambalesa. Mangēoka sera, ja an tēmberane' sera, ja mēlutawo wo'o se suraro, wo iangkaiera-mai n sinapang, ja makauluroka tapi'tu, ra'io toro itjapëku'. Ja kalingaano i Tjolano, ja i nimakailangkë' se surarona, ja sia rumu'ndu'pe' ka'i-mange suraro

pareke-rekenən maatus. Ja mangeoka sera, ja an tēmbērane' sera, ja iangkaierao-mai n sinapang. Itjaiangkaiera in sinapang, ja sera makauluroka ka'i tani'tu.

Ja kalingaan ka'i-mako i Tjolano in tani'tukē' ka'i se surarona, ja ng kuanao: „Ja iaku kua'a ē mētēt-ange.” Ja mindoo-mai in sa'mbēl sia, wo sia mange. Itjatēka'-mange sia, ja pailēkēnao tu'u, ja uli-ulit si tuama ja Walanda talos lo'or, tani'tuka ka'i si wewene talos lo'or nimangakar. Ja makasosor-ange sia, ja weso'onao-mai n sa'mbēl wo ipēparak(ē)na isera in ambalesa; itjaiangkai-ai in sa'mbēl, ja makauluroka tani'tu. Ja ng kuanerao in ambalesa: „Ja iwajape'-mio' sia-wo, akar in sangaoras sia ra'io itjapēku'.” Iaka-akar tu'u si Tjolano i mēkiampung, ēng kuana: „Sa ro'na ja sama'ano-mai aku wo iitjooka ka'itje' ng kolano, ta'an iaku ng kumarua iitjo.” Jawo mapo'o-po'ow-io' a si ēndo iitu n isiaoka' ng kolano. Ja ng kuanao: „Ja mema'pe' kua'a kasale-sale'an kita, en aku ja mēkitowape' se mapērenta am bawa'ku-mio', wo se po'o-po'ow.”

Ja ipēkiangenao-mai se Ito'na. Mangeoka se airu'ndu'-mange ja sera mangaja'ka' ēng kuanerao: „Itjatambisa itu wo tani'tu, wo kami ēnotēn ang kasale-sale'an i Tjolano?” Ja kuano e airu'n-du'-mange: „Aita'ar-ai an itjami, ja karēngan kine kamu e mange.” Jawo tu'u sera mange, ja itjatēka' tu'u-mange sera, ja alero m baja kakanēn, wo se aka im banua tuama ja ambituo waja. Am pa'pa'an in ambituo waja, ja kuano i Tjolano: „Ja en alero waja, ja lumukuto kita.” Wo sera kuman. Tawio makakan ja kuano i Tjolano in tjumua a se mateir ang kakanēn: „Ja e makakano-sa, ja iwaja'o-mai si paēlēpēn iana.” Iwaja'erao tu'u, aito'tol a si Tjolano wo mange a se mapērenta am bawa'na-mio' wo mange a se Ito' i Tjolano, ja itjaitu'tukera-mio' am paēlēpan, ja itjalengket(ē)-kē'-mange am biwi m paēlēpan, wo nilumengket ka'i-mio' am palukutan m pē'narera, iaka-akarera i mēkia-kiampung a si makaito' isera. Ja sowatēno i Tjolano itu ēng kuanao: „Jawo mamēndamo-mange kamu, an tutuw(ē)ku in toja'ange'-wo, pi-

nalēnge-lēngeimiow(ě)kě'-mio'-wo, janta'an pēdamēniow-mange m bawaer(ě)ku an itjamu. Anae kamu ja sangasērap ēn ambana. Jawo sa kamu ra'io n a si ukuman iana, ja kamu in Ito'ku wo se toja'angiw ja maindooka ataku waja." Tani'tu sera nimaindooka ata i makaito' isera, sera in ambalesa wo se toja'ang. Siitukě'.

20. Kukua an doro' i Repi, sinisil i Albert Sumual, Sulu'un.

Kaindo-indono-mai si wewene ěsa ja makaanak ěsa anak tuama, ningaranana sia Repi. Mawangko'o-mai si Toja'ang isia, iru'ndu'o i Inanga mange tuma'tak-ai tambēlang panono-anera. Siituoka mangeo tuma'tak si Toja'ang isia. Ja kēparak(ě)nape'-mange im bowong ěsa, ja pailēkēna-mange ěm bulinga' ěsa, wo itu indona, paalina-mange am bale, iwe'ena am bakul paweana in tjarai, wo sia mangeo tumawoi.

Mawēngio-mio', ja mangem am bale sia milēk im bulinga' aiēnēp(ě)na am bakul. Itjatēka'-mange, ja pailēkēnao si ěsa wewene am bale. Ja ng kuano i Wewene iitu: „Kua'itu ko mangere-ngere im bulinga' iitu? pinēte'kuo kua'a ěn iitu, en iitu ja waleku. Ta'an en iitu ě niindomu, ja iitjoo ě mēnana' an iaku." Mando-mai ja lumangkoio si Anak i Tjolano, wo sia mailēk si Wewene isia makalukut an tētēngoan. Siituoka muntēpo am bale i Repi si Anak i Tjolano, ta'an airintuk(ě)kě' i Repi, wo sia mareng am bale mange-mai suraro sangapulu', mindo si Wewene pēnana'an i Repi.

Awoja se suraro nisumumpako-mange si Repi i matongkei in tjaju an tēmbir im bale. Siituoka mangelao itjua a si pēnana'ana. Kuano i pēnana'ana: „Tio'o mainde-inde'." Ja kumēsoto am bale si pēnana'ana mange a lesar, wo sia mangko': „Apo-apo'ku in dior! sa kamu ulit apo-apo'ku, ja iema'-mai wenten ěsa a li'tjir i lesar." Mailēkoka in iitu se suraro, ja marengo sera, wo itu mangeera sisilēn a si Tjolano. Siituoka iru'ndu'o i Tjolano waja se surarona mange mindo si Wewene isia. Janta'an lumutawo se suraro, ja numuwu'o si Wewene

isia: „Waja se ipalutawera ja mange ambitu.” Awoja ambisa ěm pinaturu'an i Wewene iitu, ja ambitu ěm paangean i ipalutawera. Pailěkěnera-mako in da'itja kaindoanera ěm benten, ja sera marengo. Marengo sera ja ng kuano i Wewene iitu a si Repi: „Ambisa-wisa ěn angeanu, ja paalinukě' aku en sapaka aku ja ro'nakě' ka'i muntĕp sumawĕl am bulinga'.” Am pa'pa'an sera i mainde-inde'oka mĕngĕnto-ngĕnto' a si ro'ong iitu, ja sera mangem an do'ong walina wo mĕnto'o ambitu.

21. Sisil an doro' i Anak tuama i Tjolano a langit wo si Wawu' am bawo in tana', sinisil i A. Moku.

Awoja kĕaipe' i Anak i Tjolano a langit wo mai am bawo in tana', ja sia nimindo i giona i membe'. A si ěndooka makasa ja si Membe' rumu'ndu'-mange ěsa tow, mange mui-ai si Wawu' luluna i Tjolano a si ro'ong lina'usana-mai, taneana kine wo'on. Mangen tu'u si airu'ndu' wo muiio sia tana'i: „Nitjumua-mai in siri' si Membe' mĕwueipe' kine, sa ko masale' taneana.” Sumowato si Wawu' ěng kuanao: „Si sei ě masale' tanean i Membe'!” Tani'tu marengo-mange si airu'ndu' wo sisilĕna in sapaka si Wawu' ja nisumowat(ĕ)kě' in tana'i: „Si sei tjine, ě masale' tanean i Membe'!”

Pa'pa'an in tani'tukě' ě nuwu' i Wawu' luluna kua'a ka'i sia ěn dumu'ndu'o-mange mui si Wawu' kumarua, tanu ka'i im buwuei a si luluna. Sumowato sia, tanukě' ka'i in sosowat i luluna. Pa'pa'an in da'itja wana ě nimasale' isia a se rua Wawu', kua'a ka'i sia ě mapawueio si Tjaakaran, tanuka ka'i im buwuei a se rua ki'itĕna. Sumowato si Tjaakaran, ěng kuanao: „Itjua-mange ěn siri'tju a si Membe', in aku ja masale' taneana.”

Marengo-mange si airu'ndu' wo sumisil in aisowat i Tjaakaran, ěng kuanao: „Sapaka si Wawu' ja nitjumua-mai in siri'na a si Membe', in sia ja masale' taneanu.” A si wĕngitjĕ' iitu, ja m bale i Tjolano tanuoka ěndo-ěndoan, in solo kina-

kaja-mai i Membe'. Siituoka mangaja'ka'o-mai sera im baja, ěng kuanerao: „Kaitu-itu ja!” Ang karuaangkě' ngando, ja ng kuano i Membe': „Tumaneo kita.” Wo mai tu'u a si ěndo kumatělu in sera in tumaneo, wo mema' kasale-sale'an a si wěngi iitu, ja si Membe' ka'i mai nilumukut ang karapi e wangko-wangko'. Maio a si ěndo kumarua in sera i nitumaneo, ja ng kuano i pěnana'an i Membe' a si tawang(ě)na: „Wawa'ando ialer-io' rano, inamoangupe' woondo.” Tani'tu ialero i tawang rano wo iwe'ena an du'u im buni ang kanaraměn pěngainamoana. Mando tu'u-mai ja mangereo in dano sia inamoam bo'on, pailěkěnaoka ja niinamoano i sei wona.' Tani'tu in tjarior towanao si tawang(ě)na wo wueiana in sa si sei ě niminamo a si rano nialer(ě)na kawěngi. Janta'an si pěnana'angka i Membe' in ěsa wo kumua a si tawang(ě)na ěng kuanao: „Litjokě' re'en ě niminamo an dano, intji?” Sumowato si tawang(ě)na: „Ra'itja iaku.” Ěmbowoka i pėnana'an i Membe' kua'a sia ěn tėpiana.

Maio a si tjaruaan ngawěngi, kua'a si tawang(ě)na ěn sumu'upo am bua'na in tjamana, wo sia ra'io toro tuměkěl am pa'pa'an im bėnduo ěm pamėnda-mėndaměn. Mando tu'u-mai ja pailěkěno-mange i tawang(ě)na in si Membe' mainamo; kua'a si penana'an i Membe' ěng kumbitėnao-mange, wo mapoloo tu'u-mai sia. Tė'tėrėnao-mange si Membe' mainamo; ta'am Balandaoka. Tani'tu teronėnao-mange in tjumėrės sia wo ng kuanao: „Ra'io tu'u iwėkar(ě)ku ko.” Tumo'tolo-mai a si ěndo iitu, ěn sera mėwali-walioka.

Ang kasomoian-ai iitu, ja si Membe' kumua a si pěnana'ana in sia mangepe' mangere-mai sėra'. Tani'tu sumawėlo sia nimindo in tjarai i membe' ka'i, wo sia mangem an ta'asitj. Pa'pa'an si Membe' i nimangem, ja ng kuano e kaka' i pėnana'an i Membe' an isia: „Sa sia marengo-mai, ja an darane' weta' sia, weano-mio' in dano paso' wo siitu ko ěn itjaups(ě)na.” Tani'tu tu'u, maio si Membe'. Ja an darane' sia pa'pakanao-mio' in dano paso'. Ěng kuano i Membe': „Kaitu-itu ko nima'pak in dano paso' an iaku?” Sumowato si pėna-

na'ana, ɛng kuanao: „Siitu kine aku ɛn itjaupus(ɛ)mu, aitjua e kaka'ku.” Kuano i Membe': „Maemangkɛ' re'en im pate-naanera ko?”

Maja'o ka'i pira ngando an somoi-ai iitu, ɛng kuano i Membe': „Aku ja mangepe' ka'i mangere-mai sɛra' a lawanan.” Tani'tu ka'i sia mangem. Kua'a ka'i ɛ maio se kaka' i wewene, ɛng kuanerao: „Sa ka'i sia marengo-mai sa, ja an darane', lɛpokano-mio' im pisow wo siitu ko ɛn itjaupus(ɛ)na.” Tani'tu marengo-mai ka'i sia. Ja an darane' tu'u, lɛpokanao-mio' im pisow. Siituoka ɛng kuano i Membe': „Kaitu-itu aku paulurɛnu tani'tu?” Sumowato si pɛnana'ana, ɛng kuanao: „Siitu kine aku ɛn itjaupus(ɛ)mu, aitjua e kaka'ku.” Kuano i Membe': „Sama', en aku m paulurɛnu tani'tu, ja marengo karu' mange a si amangku a langit aku.” Tani'tu ng kerior sia n tumu'tulo wo maja'o, ta'an ka'i si pɛnana'ana ja nitjumi'it(ɛ)kɛ' isia. Tani'tu mɛmaja-maja'o-mange sera, si Membe' ɛn an dior, patintjasanakɛ' si pɛnana'ana. Pa'pa'an in itjaupus(ɛ)nao, kua'a sia ɛn ɛnto'anao a si ɛsa kuntung. Itjatɛka'o-mange ambitu si pɛnana'ana, ja sia nimɛla'u-la'usoka nitumɛkɛl am pa'a i Membe' am pa'pa'an i makɛpeo. Makaasɛng ka'i-mako si Membe', ja angkaiɛnao-mai si pɛnana'ana wo sia numani tana'i:

„Kuntung iitjo, kuntung iitjo!

Paalin-ange si toja'ang e makatoja'ang.”

Wo tani'tu si Membe' meneto ka'i-mange im pawaja'anera.

Ra'itja ure si Membe' ɛ nirumeso ambitu, ja mapoloo-mai si pɛnana'ana wo sia kumi'ito ka'i-mange si Membe', akarana i makatawi-mange isia. Pa'pa'an im pailɛkɛn i Membe' i makɛpeo ka'i si pɛnana'ana, ja sia ɛnto'anao ka'i akar(ɛ)na i makangi'it-ai isia. Ja makangi'ito-mange si Membe' si pɛnana'ana, ja sia nimɛla'u-la'us ka'i nitumɛkɛl am pa'a i Membe'. Makaasɛng-ako si Membe' angkaiɛnao-mai si pɛnana'ana, wo sia numani, ɛng kuanao:

„O rintjeng, o rintjeng!

Paalin-ange si toja'ang e makatoja'ang.”

Wo si Membe' maja'o ka'i.

Mēmaja-maja'oka-mange si Membe', ja sia paki'itēno-mange i pēnana'ana. Awoja am pa'pa'an tu'u i matawio in sosoran a langit, ja sia ēnto'onaŋ an tēmbir i rojongan makangaran: Rano Makawuringēn. Ambituoka ja ita'ar(ē)naŋ a si pēna-na'ana: „Sa ko wo masale' kumi'it iaku mange a langit, ja kita karēngan lumēle' a si rano anio'.” Ja sera lumēle'o a si rano iitu. Makalēle'-mako sera, ja ng kuano i Membe': „Sa ko wo masale' mange karapitju, ja mangelukē' itjua in tawangku ko, eni? em pa'pa'an da'itja itjasale' e mama' ēn aku nitumane am bawo in tana'.”

Ja tani'tu sera in sumosoro a langit. Itjatēka'o-mange, wu-eiēno e amang(ē)na: „Sapamu sia?” Sumowato si anak(ē)na, ēng kuanaŋ: „Tawangku.” Maio tu'u in tumu'tulo si Anak i Tjolano in itaneo e amanga, ja weano tawoiēn si tawang(ē)-na. Katare-tare ja ipa'pako i Penana'an i Tjolano ēm batuna i mostor sangawantang an tana'. Ipa'pak(ē)na-mako n iitu, ja ng kuanaŋ a si tawang i ana'na: „Pitongēnu ēm baja se watuna i mostor an tana' anio'.” Malinga-mako in iitu sia, ja sia mangem a si mēnana' an isia mange mangilēk tawangan, ēng kuanaŋ: „Sapaka aku ja kinuanan i inangu i mitong im batuna i mostor makasa im bantang aipa'pak(ē)na an tana', wo iwe'e ka'i am bantang, ta'an aitjuana, ra'itja toro mande ēsakē' itjatēla'u, karēngana iwe'e waja am bantang.” Ēng kuano i Anak i Tjolano a si tawang(ē)na: „Itjatēka'-mange ambitu ko, ja kumua in tana'i: „Aitjua-mai i Anak i Tjolano im baja, kine, se sērēm ja mai mitong im batuna i mostor anio', wo iwe'e am bantang, wo ra'itja toro ēsa itjatēla'u, karēngan ipakawe'e-we'e am bantang.” Tani'tu tu'u mali'uso-mai se sērēm, wo pitongēnerao wo iwe'e am bantang. Ipakawe'eera-mako am bantang ēn iitu, ja si tawang i Anak i Tjolano mangem a si Pēnana'an i Tjolano, ēng kuanaŋ: „Ra'io, pinakapitongkuo!” Kuano ka'i i Pēnana'an i Tjolano: „Indon ēm berong anio', wo mange iasu-mai rano!” Tani'tu ng kerior mangem ka'i a si Anak i Tjolano si tawang(ē)na, ēng kuanaŋ

ka'i: „Aitjua i inangu, ja aku mindo im berong wo mange iasu-mai rano, anae tambisangku en iitu?” Eng kuano i Anak i Tjolano: „Itjateka'-mange an dano ko sa, ja ng kuanuo: „Aitjua-mai i Anak i Tjolano im baja se kosei ja mai lumintjun am berong.” Itjateka' tu'u-mange an dano sia, eng kuanao: „Aitjua-mai i Anak i Tjolano, im baja se kosei ja mai lumintjun am berong.” Wo m berong ilëpok(ë)nao-mio'; pailëkënao tu'u-mio', ja nilintjunano e kosei, wo indonao-mai en iitu wo iasuna rano paalin-ange am bale i Tjolano. Itjateka'-mange, ja ng kuanao a si Penana'an i Tjolano: „Kënu en dano.” Kuano i Penana'an i Tjolano: „Sama', iwëkaro-mio' ambana.” Kasomoian-ai iitu eng kuano ka'i i Penana'an i Tjolano: „Wawa'ando ja si ana'ku en tumaneo, anaitu ko tumimboi an dëri, iëla'b an isera.” Mawengi tu'u-mio', ja itjalalitjo in sera i lumukuto, wo timboiano i tawang i Anak i Tjolano en ipaela'b. Makalukutoka si Anak i Tjolano, ja warengëna-mako em bërën, si tawang(e)na ja mëngame-ngame'oka, pa'pa'an i malua'bo eng kama paso'so'an in dëri. Kua'a en iitu em pisinao-mako wo masama'o ka'i-mai. Karua ka'i i mareng-ako in somoi, ja si tawang(e)na maame', pa'pa'an i malunguso eng kama paso'so'an in dëri, wo tani'tu pisinao ka'i-mako wo en iitu mapali'o ka'i-mai. Katëluna i mareng-ako in somoi ja timboianao-mai si tawang(e)na wo ng kuanao: „Maio, mio'om karu' am bawo in tana' kita.” Siituoka ja maëgao-mai se nilumukut wo'o ang kasale-sale'an, eng kuane-rao: „Awo, ra'itja tu'u isiao si pënana'ana!”

Ja si Anak i Tjolano wo si pënana'ana nimaja'o-mai am bawo in tana'. Akar(ë)kë' iitu.

22. Kukua an dore' i Pokol, sinisil i Kambel Nengko', Kuntang.

1. Sapaka si Inang wo si Amang i Pokol ja tow lengei. An somoi-mai in si Amang i Pokol i nimateo, ja sia anio' mamualio tow: sapaka sia, ja toja'ang tuama.

Tumowo-mai sia, ja sia ra'itja wana kama wo keitjei tanu

Wo si Membe' maja'o ka'i.

Mēmaja-maja'oka-mange si Membe', ja sia paki'itēno-mange i pēnana'ana. Awoja am pa'pa'an tu'u i matawio in sosoran a langit, ja sia ēnto'onaŋ an tēm̄bir i rojongan makangaran: Rano Makawuringēn. Ambituoka ja ita'ar(ē)naŋ a si pēna-na'ana: „Sa ko wo masale' kumi'it iaku mange a langit, ja kita karēngan lumēle' a si rano anio'.” Ja sera lumēle'o a si rano iitu. Makalēle'-mako sera, ja ng kuano i Membe': „Sa ko wo masale' mange karapitju, ja mangelukē' itjua in tawangku ko, eni? em pa'pa'an da'itja itjasale' e mama' ēn aku nitumane am bawo in tana'.”

Ja tani'tu sera in sumosoro a langit. Itjatēka'o-mange, wueiēno e amang(ē)na: „Sapamu sia?” Sumowato si anak(ē)na, ēng kuanaŋ: „Tawangku.” Maio tu'u in tumu'tulo si Anak i Tjolano in itaneo e amanga, ja weano tawoiēn si tawang(ē)na. Katare-tare ja ipa'pako i Penana'an i Tjolano ēm batuna i mostor sangawantang an tana'. Ipa'pak(ē)na-mako n iitu, ja ng kuanaŋ a si tawang i ana'na: „Pitongēnu ēm baja se watuna i mostor an tana' anio'.” Malinga-mako in iitu sia, ja sia mangem a si mēnana' an isia mange mangilēk tawangan, ēng kuanaŋ: „Sapaka aku ja kinuanan i inangu i mitong im batuna i mostor makasa im bantang aipa'pak(ē)na an tana', wo iwe'e ka'i am bantang, ta'an aitjuana, ra'itja toro mande ēsakē' itjatēla'u, karēngana iwe'e waja am bantang.” Ēng kuano i Anak i Tjolano a si tawang(ē)na: „Itjatēka'-mange ambitu ko, ja kumua in tana'i: „Aitjua-mai i Anak i Tjolano im baja, kine, se sērēm ja mai mitong im batuna i mostor anio', wo iwe'e am bantang, wo ra'itja toro ēsa itjatēla'u, karēngan ipakawe'e-we'e am bantang.” Tani'tu tu'u mali'uso-mai se sērēm, wo pitongēnerao wo iwe'e am bantang. Ipakawe'eera-mako am bantang ēn iitu, ja si tawang i Anak i Tjolano mangem a si Pēnana'an i Tjolano, ēng kuanaŋ: „Ra'io, pinakapitongkuo!” Kuano ka'i i Pēnana'an i Tjolano: „Indon ēm berong anio', wo mange iasu-mai rano!” Tani'tu ng kerior mangem ka'i a si Anak i Tjolano si tawang(ē)na, ēng kuanaŋ

ka'i: „Aitjua i inangu, ja aku mindo im berong wo mange iasu-mai rano, anae tambisangku ěn iitu?” Ĕng kuano i Anak i Tjolano: „Itjatĕka'-mange an dano ko sa, ja ng kuanuo: „Aitjua-mai i Anak i Tjolano im baja se kosei ja mai lumintjun am berong.” Itjatĕka' tu'u-mange an dano sia, ěng kuanao: „Aitjua-mai i Anak i Tjolano, im baja se kosei ja mai lumintjun am berong.” Wo m berong ilĕpok(ĕ)nao-mio'; pailĕkĕnao tu'u-mio', ja nilintjunano e kosei, wo indonao-mai ěn iitu wo iasuna rano paalin-ange am bale i Tjolano. Itjatĕka'-mange, ja ng kuanao a si Pĕnana'an i Tjolano: „Kĕnu ěn dano.” Kuano i Pĕnana'an i Tjolano: „Sama', iwĕkaro-mio' ambana.” Kasomoian-ai iitu ěng kuano ka'i i Pĕnana'an i Tjolano: „Wawa'ando ja si ana'ku ěn tumaneo, anaitu ko tumimboi an dĕri, iĕla'b an isera.” Mawĕngi tu'u-mio', ja itjalalitjo in sera i lumukuto, wo timboiano i tawang i Anak i Tjolano ěn ipaĕla'b. Makalukutoka si Anak i Tjolano, ja warengĕna-mako ěm bĕrĕn, si tawang(ĕ)na ja mĕngame-ngame'-oka, pa'pa'an i malua'bo ěng kama paso'so'an in dĕri. Kua'a ěn iitu ěm pisinao-mako wo masama'o ka'i-mai. Karua ka'i i mareng-ako in somoi, ja si tawang(ĕ)na maame', pa'pa'an i malunguso ěng kama paso'so'an in dĕri, wo tani'tu pisinao ka'i-mako wo ěn iitu mapali'o ka'i-mai. Katĕluna i mareng-ako in somoi ja timboianao-mai si tawang(ĕ)na wo ng kuanao: „Maio, mio'om karu' am bawo in tana' kita.” Siituoka ja maĕgao-mai se nilumukut wo'o ang kasale-sale'an, ěng kuane-rao: „Awo, ra'itja tu'u isiao si pĕnana'ana!”

Ja si Anak i Tjolano wo si pĕnana'ana nimaja'o-mai am bawo in tana'. Akar(ĕ)kĕ' iitu.

22. Kukua an doro' i Pokol, sinisil i Kambel Mengko', Kuntung.

1. Sapaka si Inang wo si Amang i Pokol ja tow lĕngei. An somoi-mai in si Amang i Pokol i nimateo, ja sia anio' mamualio tow; sapaka sia, ja toja'ang tuama.

Tumowo-mai sia, ja sia ra'itja wana kama wo keitjei tanu

Wo si Membe' maja'o ka'i.

Mēmaja-maja'oka-mange si Membe', ja sia paki'itēno-mange i pēnana'ana. Awoja am pa'pa'an tu'u i matawio in sosoran a langit, ja sia ěnto'ona an tēmbir i rojongan makangaran: Rano Makawuringēn. Ambituoka ja ita'ar(ě)nao a si pēnana'ana: „Sa ko wo masale' kumi'it iaku mange a langit, ja kita karēngan lumēle' a si rano anio'.” Ja sera lumēle'o a si rano iitu. Makalēle'-mako sera, ja ng kuano i Membe': „Sa ko wo masale' mange karapitju, ja mangedukē' itjua in tawangku ko, eni? em pa'pa'an da'itja itjasale' e mama' ěn aku nitumane am bawo in tana'.”

Ja tani'tu sera in sumosoro a langit. Itjatēka'o-mange, wu-ēiēno e amang(ě)na: „Sapamu sia?” Sumowato si anak(ě)na, ěng kuanao: „Tawangku.” Maio tu'u in tumu'tulo si Anak i Tjolano in itaneo e amanga, ja weano tawoiēn si tawang(ě)na. Katare-tare ja ipa'pako i Penana'an i Tjolano ěm batuna i mostor sangawantang an tana'. Ipa'pak(ě)na-mako n iitu, ja ng kuanao a si tawang i ana'na: „Pitongēnu ěm baja se watuna i mostor an tana' anio'.” Malinga-mako in iitu sia, ja sia mangem a si mēnana' an isia mange mangilēk tawangan, ěng kuanao: „Sapaka aku ja kinuanan i inangu i mitong im batuna i mostor makasa im bantang aipa'pak(ě)na an tana', wo iwe'e ka'i am bantang, ta'an aitjuana, ra'itja toro mande ēsakē' itjatēla'u, karēngana iwe'e waja am bantang.” ěng kuano i Anak i Tjolano a si tawang(ě)na: „Itjatēka'-mange ambitu ko, ja kumua in tana'i: „Aitjua-mai i Anak i Tjolano im baja, kine, se sērēm ja mai mitong im batuna i mostor anio', wo iwe'e am bantang, wo ra'itja toro ēsa itjatēla'u, karēngan ipakawe'e-we'e am bantang.” Tani'tu tu'u mali'uso-mai se sērēm, wo pitongēnerao wo iwe'e am bantang. Ipakawe'eera-mako am bantang ěn iitu, ja si tawang i Anak i Tjolano mangem a si Pēnana'an i Tjolano, ěng kuanao: „Ra'io, pinakapitongkuo!” Kuano ka'i i Pēnana'an i Tjolano: „Indon ěm berong anio', wo mange iasu-mai rano!” Tani'tu ng krior mangem ka'i a si Anak i Tjolano si tawang(ě)na, ěng kuanao

ka'i: „Aitjua i inangu, ja aku mindo im berong wo mange iasu-mai rano, anae tambisanku ěn iitu?” Ěng kuano i Anak i Tjolano: „Itjatĕka'-mange an dano ko sa, ja ng kuanuo: „Aitjua-mai i Anak i Tjolano im baja se kosei ja mai lumintjun am berong.” Itjatĕka' tu'u-mange an dano sia, ěng kuanao: „Aitjua-mai i Anak i Tjolano, im baja se kosei ja mai lumintjun am berong.” Wo m berong ilĕpok(ĕ)nao-mio'; pailĕkĕnao tu'u-mio', ja nilintjunano e kosei, wo indonao-mai ěn iitu wo iasuna rano paalin-ange am bale i Tjolano. Itjatĕka'-mange, ja ng kuanao a si Pĕnana'an i Tjolano: „Kĕnu ěn dano.” Kuano i Pĕnana'an i Tjolano: „Sama', iwĕkaro-mio' ambana.” Kasomoian-ai iitu ěng kuano ka'i i Penana'an i Tjolano: „Wawa'ando ja si ana'ku ěn tumaneo, anaitu ko tumimboi an dĕri, iĕla'b an isera.” Mawĕngi tu'u-mio', ja itjalalitjo in sera i lumukuto, wo timboiano i tawang i Anak i Tjolano ěn ipaĕla'b. Makalukutoka si Anak i Tjolano, ja warengĕna-mako ĕm bĕrĕn, si tawang(ĕ)na ja mĕngame-ngame'-oka, pa'pa'an i malua'bo ěng kama paso'so'an in dĕri. Kua'a ěn iitu ĕm pisinao-mako wo masama'o ka'i-mai. Karua ka'i i mareng-ako in somoi, ja si tawang(ĕ)na maame', pa'pa'an i malunguso ěng kama paso'so'an in dĕri, wo tani'tu pisinao ka'i-mako wo ěn iitu mapali'o ka'i-mai. Katĕluna i mareng-ako in somoi ja timboiana-mai si tawang(ĕ)na wo ng kuanao: „Maio, mio'om karu' am bawo in tana' kita.” Siituoka ja maĕgao-mai se nilumukut wo'o ang kasale-sale'an, ěng kuane-rao: „Awo, ra'itja tu'u isiao si pĕnana'ana!”

Ja si Anak i Tjolano wo si pĕnana'ana nimaja'o-mai am bawo in tana'. Akar(ĕ)kĕ' iitu.

22. Kukua an doro' i Pokol, sinisil i Kambei Mengko', Kuntung.

1. Sapaka si Inang wo si Amang i Pokol ja tow lĕngei. An somoi-mai in si Amang i Pokol i nimateo, ja sia anio' mamualio tow; sapaka sia, ja toja'ang tuama.

Tumowo-mai sia, ja sia ra'itja wana kama wo keitjei tanu

Wo si Membe' maja'o ka'i.

Mēmaja-maja'oka-mange si Membe', ja sia paki'itēno-mange i pēnana'ana. Awoja am pa'pa'an tu'u i matawio in sosoran a langit, ja sia ēnto'ona an tēmbir i rojongan makangaran: Rano Makawuringēn. Ambituoka ja ita'ar(ē)nao a si pēna-na'ana: „Sa ko wo masale' kumi'it iaku mange a langit, ja kita karēngan lumēle' a si rano anio'.” Ja sera lumēle'o a si rano iitu. Makalēle'-mako sera, ja ng kuano i Membe': „Sa ko wo masale' mange karapitju, ja manglekukē' itjua in tawangku ko, eni? em pa'pa'an da'itja itjasale' e mama' ēn aku nitumane am bawo in tana'.”

Ja tani'tu sera in sumosoro a langit. Itjatēka'o-mange, wu-eiēno e amang(ē)na: „Sapamu sia?” Sumowato si anak(ē)na, ēng kuanao: „Tawangku.” Maio tu'u in tumu'tulo si Anak i Tjolano in itaneo e amanga, ja weano tawoiēn si tawang(ē)na. Katare-tare ja ipa'pako i Penana'an i Tjolano ēm batuna i mostor sangawantang an tana'. Ipa'pak(ē)na-mako n iitu, ja ng kuanao a si tawang i ana'na: „Pitongēnu ēm baja se watuna i mostor an tana' anio'.” Malinga-mako in iitu sia, ja sia mangem a si mēnana' an isia mange mangilēk tawangan, ēng kuanao: „Sapaka aku ja kinuanan i inangu i mitong im batuna i mostor makasa im bantang aipa'pak(ē)na an tana', wo iwe'e ka'i am bantang, ta'an aitjuana, ra'itja toro mande ēsakē' itjatēla'u, karēngana iwe'e waja am bantang.” Ēng kuano i Anak i Tjolano a si tawang(ē)na: „Itjatēka'-mange ambitu ko, ja kumua in tana'i: „Aitjua-mai i Anak i Tjolano im baja, kine, se sērēm ja mai mitong im batuna i mostor anio', wo iwe'e am bantang, wo ra'itja toro ēsa itjatēla'u, karēngan ipakawe'e-we'e am bantang.” Tani'tu tu'u mali'uso-mai se sērēm, wo pitongēnerao wo iwe'e am bantang. Ipakawe'eera-mako am bantang ēn iitu, ja si tawang i Anak i Tjolano mangem a si Pēnana'an i Tjolano, ēng kuanao: „Ra'io, pinakapitongkuo!” Kuano ka'i i Pēnana'an i Tjolano: „Indon ēm berong anio', wo mange iasu-mai rano!” Tani'tu ng kerior mangem ka'i a si Anak i Tjolano si tawang(ē)na, ēng kuanao

ka'i: „Aitjua i inangu, ja aku mindo im berong wo mange iasu-mai rano, anae tambisangukku ěn iitu?” Ěng kuano i Anak i Tjolano: „Itjatĕka'-mange an dano ko sa, ja ng kuanuo: „Aitjua-mai i Anak i Tjolano im baja se kosei ja mai lumintjun am berong.” Itjatĕka' tu'u-mange an dano sia, ěng kuanao: „Aitjua-mai i Anak i Tjolano, im baja se kosei ja mai lumintjun am berong.” Wo m berong ilĕpok(ĕ)nao-mio'; pailĕkĕnao tu'u-mio', ja nilintjunano e kosei, wo indonao-mai ěn iitu wo iasuna rano paalin-ange am bale i Tjolano. Itjatĕka'-mange, ja ng kuanao a si Pĕnana'an i Tjolano: „Kĕnu ěn dano.” Kuano i Pĕnana'an i Tjolano: „Sama', iwĕkaro-mio' ambana.” Kasomoian-ai iitu ěng kuano ka'i i Pĕnana'an i Tjolano: „Wawa'ando ja si ana'ku ěn tumaneo, anaitu ko tumimboi an dĕri, iĕla'b an isera.” Mawĕngi tu'u-mio', ja itjalalitjo in sera i lumukuto, wo timboiano i tawang i Anak i Tjolano ěn ipaĕla'b. Makalukutoka si Anak i Tjolano, ja warengĕna-mako ĕm bĕrĕn, si tawang(ĕ)na ja mĕngame-ngame'-oka, pa'pa'an i malua'bo ěng kama paso'so'an in dĕri. Kua'a ěn iitu ĕm pisinao-mako wo masama'o ka'i-mai. Karua ka'i i mareng-ako in somoi, ja si tawang(ĕ)na maame', pa'pa'an i malunguso ěng kama paso'so'an in dĕri, wo tani'tu pisinao ka'i-mako wo ěn iitu mapali'o ka'i-mai. Katĕluna i mareng-ako in somoi ja timboianao-mai si tawang(ĕ)na wo ng kuanao: „Maio, mio'om karu' am bawo in tana' kita.” Siituoka ja maĕgao-mai se nilumukut wo'o ang kasale-sale'an, ěng kuane-rao: „Awo, ra'itja tu'u isiao si pĕnana'ana!”

Ja si Anak i Tjolano wo si pĕnana'ana nimaja'o-mai am bawo in tana'. Akar(ĕ)kĕ' iitu.

22. Kukua an doro' i Pokol, sinisil i Kambel Mengko', Kuntung.

1. Sapaka si Inang wo si Amang i Pokol ja tow lĕngei. An somoi-mai in si Amang i Pokol i nimateo, ja sia anio' mamualio tow; sapaka sia, ja toja'ang tuama.

Tumowo-mai sia, ja sia ra'itja wana kama wo keitjei tanu

Wo si Membe' maja'o ka'i.

Mēmaja-maja'oka-mange si Membe', ja sia paki'itēno-mange i pēnana'ana. Awoja am pa'pa'an tu'u i matawio in sosoran a langit, ja sia ēnto'ona an tēmbir i rojongan makangaran: Rano Makawuringēn. Ambituoka ja ita'ar(ē)nao a si pēnana'ana: „Sa ko wo masale' kumi'it iaku mange a langit, ja kita karēngan lumēle' a si rano anio'.” Ja sera lumēle'o a si rano iitu. Makalēle'-mako sera, ja ng kuano i Membe': „Sa ko wo masale' mange karapitju, ja mangelukē' itjua in tawangku ko, eni? em pa'pa'an da'itja itjasale' e mama' ēn aku nitumane am bawo in tana'.”

Ja tani'tu sera in sumosoro a langit. Itjatēka'o-mange, wu-eiēno e amang(ē)na: „Sapamu sia?” Sumowato si anak(ē)na, ēng kuanao: „Tawangku.” Maio tu'u in tumu'tulo si Anak i Tjolano in itaneo e amanga, ja weano tawoiēn si tawang(ē)na. Katare-tare ja ipa'pako i Penana'an i Tjolano ēm batuna i mostor sangawantang an tana'. Ipa'pak(ē)na-mako n iitu, ja ng kuanao a si tawang i ana'na: „Pitongēnu ēm baja se watuna i mostor an tana' anio'.” Malinga-mako in iitu sia, ja sia mangem a si mēnana' an isia mange mangilēk tawangan, ēng kuanao: „Sapaka aku ja kinuanan i inangu i mitong im batuna i mostor makasa im bantang aipa'pak(ē)na an tana', wo iwe'e ka'i am bantang, ta'an aitjuana, ra'itja toro mande ēsakē' itjatēla'u, karēngana iwe'e waja am bantang.” Ēng kuano i Anak i Tjolano a si tawang(ē)na: „Itjatēka'-mange ambitu ko, ja kumua in tana'i: „Aitjua-mai i Anak i Tjolano im baja, kine, se sērēm ja mai mitong im batuna i mostor anio', wo iwe'e am bantang, wo ra'itja toro ēsa itjatēla'u, karēngan ipakawe'e-we'e am bantang.” Tani'tu tu'u mali'uso-mai se sērēm, wo pitongēnerao wo iwe'e am bantang. Ipakawe'eera-mako am bantang ēn iitu, ja si tawang i Anak i Tjolano mangem a si Pēnana'an i Tjolano, ēng kuanao: „Ra'io, pinakapitongkuo!” Kuano ka'i i Pēnana'an i Tjolano: „Indon ēm berong anio', wo mange iasu-mai rano!” Tani'tu ng karioir mangem ka'i a si Anak i Tjolano si tawang(ē)na, ēng kuanao

ka'i: „Aitjua i inangu, ja aku mindo im berong wo mange iasu-mai rano, anae tambisangku ěn iitu?” Ěng kuano i Anak i Tjolano: „Itjatĕka'-mange an dano ko sa, ja ng kuanuo: „Aitjua-mai i Anak i Tjolano im baja se kosei ja mai lumintjun am berong.” Itjatĕka' tu'u-mange an dano sia, ěng kuanao: „Aitjua-mai i Anak i Tjolano, im baja se kosei ja mai lumintjun am berong.” Wo m berong ilĕpok(ĕ)nao-mio'; pailĕkĕnao tu'u-mio', ja nilintjunano e kosei, wo indonao-mai ěn iitu wo iasuna rano paalin-ange am bale i Tjolano. Itjatĕka'-mange, ja ng kuanao a si Pĕnana'an i Tjolano: „Kĕnu ěn dano.” Kuano i Pĕnana'an i Tjolano: „Sama', iwĕkaro-mio' ambana.” Kasomoian-ai iitu ěng kuano ka'i i Penana'an i Tjolano: „Wawa'ando ja si ana'ku ěn tumaneo, anaitu ko tumimboi an dĕri, iĕla'b an isera.” Mawĕngi tu'u-mio', ja itjalalitjo in sera i lumukuto, wo timboiano i tawang i Anak i Tjolano ěn ipaĕla'b. Makalukutoka si Anak i Tjolano, ja warengĕna-mako ĕm bĕrĕn, si tawang(ĕ)na ja mĕngame-ngame'-oka, pa'pa'an i malua'bo ěng kama paso'so'an in dĕri. Kua'a ěn iitu ĕm pisinao-mako wo masama'o ka'i-mai. Karua ka'i i mareng-ako in somoi, ja si tawang(ĕ)na maame', pa'pa'an i malunguso ěng kama paso'so'an in dĕri, wo tani'tu pisinao ka'i-mako wo ěn iitu mapali'o ka'i-mai. Katĕluna i mareng-ako in somoi ja timboianao-mai si tawang(ĕ)na wo ng kuanao: „Maio, mio'om karu' am bawo in tana' kita.” Siituoka ja maĕgao-mai se nilumukut wo'o ang kasale-sale'an, ěng kuane-rao: „Awo, ra'itja tu'u isiao si pĕnana'ana!”

Ja si Anak i Tjolano wo si pĕnana'ana nimaja'o-mai am bawo in tana'. Akar(ĕ)kĕ' iitu.

22. Kukua an doro' i Pokol, sinisil i Kambel Mengko', Kuntung.

1. Sapaka si Inang wo si Amang i Pokol ja tow lĕngei. An somoi-mai in si Amang i Pokol i nimateo, ja sia anio' mamualio tow; sapaka sia, ja toja'ang tuama.

Tumowo-mai sia, ja sia ra'itja wana kama wo keitjei tanu

Wo si Membe' maja'o ka'i.

Mēmaja-maja'oka-mange si Membe', ja sia paki'itēno-mange i pēnana'ana. Awoja am pa'pa'an tu'u i matawio in sosoran a langit, ja sia ēnto'onao an tēmbir i rojongan makangaran: Rano Makawuringēn. Ambituoka ja ita'ar(ē)nao a si pēna-na'ana: „Sa ko wo masale' kumi'it iaku mange a langit, ja kita karēngan lumēle' a si rano anio'.” Ja sera lumēle'o a si rano iitu. Makalēle'-mako sera, ja ng kuano i Membe': „Sa ko wo masale' mange karapitju, ja manglekukē' itjua in tawangku ko, eni? em pa'pa'an da'itja itjasale' e mama' ēn aku nitumane am bawo in tana'.”

Ja tani'tu sera in sumosoro a langit. Itjatēka'o-mange, wueiēno e amang(ē)na: „Sapamu sia?” Sumowato si anak(ē)na, ēng kuanao: „Tawangku.” Maio tu'u in tumu'tulo si Anak i Tjolano in itaneo e amanga, ja weano tawoiēn si tawang(ē)-na. Katare-tare ja ipa'pako i Penana'an i Tjolano ēm batuna i mostor sangawantang an tana'. Ipa'pak(ē)na-mako n iitu, ja ng kuanao a si tawang i ana'na: „Pitongēnu ēm baja se watuna i mostor an tana' anio'.” Malinga-mako in iitu sia, ja sia mangem a si mēnana' an isia mange mangilēk tawangan, ēng kuanao: „Sapaka aku ja kinuanan i inangu i mitong im batuna i mostor makasa im bantang aipa'pak(ē)na an tana', wo iwe'e ka'i am bantang, ta'an aitjuana, ra'itja toro mande ēsakē' itjatēla'u, karēngana iwe'e waja am bantang.” Ēng kuano i Anak i Tjolano a si tawang(ē)na: „Itjatēka'-mange ambitu ko, ja kumua in tana'i: „Aitjua-mai i Anak i Tjolano im baja, kine, se sērēm ja mai mitong im batuna i mostor anio', wo iwe'e am bantang, wo ra'itja toro ēsa itjatēla'u, karēngan ipakawe'e-we'e am bantang.” Tani'tu tu'u mali'uso-mai se sērēm, wo pitongēnerao wo iwe'e am bantang. Ipakawe'eera-mako am bantang ēn iitu, ja si tawang i Anak i Tjolano mangem a si Pēnana'an i Tjolano, ēng kuanao: „Ra'io, pinakapitongkuo!” Kuano ka'i i Pēnana'an i Tjolano: „Indon ēm berong anio', wo mange iasu-mai rano!” Tani'tu ng kerior mangem ka'i a si Anak i Tjolano si tawang(ē)na, ēng kuanao

ka'i: „Aitjua i inangu, ja aku mindo im berong wo mange iasu-mai rano, anae tambisangukū ěn iitu?” Ĕng kuano i Anak i Tjolano: „Itjatĕka'-mange an dano ko sa, ja ng kuanuo: „Aitjua-mai i Anak i Tjolano im baja se kosei ja mai lumintjun am berong.” Itjatĕka' tu'u-mange an dano sia, ěng kuanao: „Aitjua-mai i Anak i Tjolano, im baja se kosei ja mai lumintjun am berong.” Wo m berong ilĕpok(ĕ)nao-mio'; pailĕkĕnao tu'u-mio', ja nilintjunano e kosei, wo indonao-mai ěn iitu wo iasuna rano paalin-ange am bale i Tjolano. Itjatĕka'-mange, ja ng kuanao a si Pĕnana'an i Tjolano: „Kĕnu ěn dano.” Kuano i Pĕnana'an i Tjolano: „Sama', iwĕkaro-mio' ambana.” Kasomoian-ai iitu ěng kuano ka'i i Pĕnana'an i Tjolano: „Wawa'ando ja si ana'ku ěn tumaneo, anaitu ko tumimboi an dĕri, iĕla'b an isera.” Mawĕngi tu'u-mio', ja itjalalitjo in sera i lumukuto, wo timboiano i tawang i Anak i Tjolano ěn ipaĕla'b. Makalukutoka si Anak i Tjolano, ja warĕngĕna-mako ĕm bĕrĕn, si tawang(ĕ)na ja mĕngame-ngame'-oka, pa'pa'an i malua'bo ěng kama paso'so'an in dĕri. Kua'a ěn iitu ĕm pisinao-mako wo masama'o ka'i-mai. Karua ka'i i mareng-ako in somoi, ja si tawang(ĕ)na maame', pa'pa'an i malunguso ěng kama paso'so'an in dĕri, wo tani'tu pisinao ka'i-mako wo ěn iitu mapali'o ka'i-mai. Katĕluna i mareng-ako in somoi ja timboiana-mai si tawang(ĕ)na wo ng kuanao: „Maio, mio'om karu' am bawo in tana' kita.” Siituoka ja maĕgao-mai se nilumukut wo'o ang kasale-sale'an, ěng kuane-rao: „Awo, ra'itja tu'u isiao si pĕnana'ana!”

Ja si Anak i Tjolano wo si pĕnana'ana nimaja'o-mai am bawo in tana'. Akar(ĕ)kĕ' iitu.

22. Kukua an doro' i Pokol, sinisil i Kambei Mengko', Kuntung.

1. Sapaka si Inang wo si Amang i Pokol ja tow lĕngei. An somoi-mai in si Amang i Pokol i nimateo, ja sia anio' mamualio tow; sapaka sia, ja toja'ang tuama.

Tumowo-mai sia, ja sia ra'itja wana kama wo keitjei tanu

Wo si Membe' maja'o ka'i.

Mēmaja-maja'oka-mange si Membe', ja sia paki'itēno-mange i pēnana'ana. Awoja am pa'pa'an tu'u i matawio in sosoran a langit, ja sia ēnto'ona an tēmbir i rojongan makangaran: Rano Makawuringēn. Ambituoka ja ita'ar(ē)nao a si pēnana'ana: „Sa ko wo masale' kumi'it iaku mange a langit, ja kita karēngan lumēle' a si rano anio'.” Ja sera lumēle'o a si rano iitu. Makalēle'-mako sera, ja ng kuano i Membe': „Sa ko wo masale' mange karapitju, ja mangelukē' itjua in tawangku ko, eni? em pa'pa'an da'itja itjasale' e mama' ēn aku nitumane am bawo in tana'.”

Ja tani'tu sera in sumosoro a langit. Itjatēka'o-mange, wueiēno e amang(ē)na: „Sapamu sia?” Sumowato si anak(ē)na, ēng kuanao: „Tawangku.” Maio tu'u in tumu'tulo si Anak i Tjolano in itaneo e amanga, ja weano tawoiēn si tawang(ē)na. Katare-tare ja ipa'pako i Penana'an i Tjolano ēm batuna i mostor sangawantang an tana'. Ipa'pak(ē)na-mako n iitu, ja ng kuanao a si tawang i ana'na: „Pitongēnu ēm baja se watuna i mostor an tana' anio'.” Malinga-mako in iitu sia, ja sia mangem a si mēnana' an isia mange mangilēk tawangan, ēng kuanao: „Sapaka aku ja kinuanan i inangu i mitong im batuna i mostor makasa im bantang aipa'pak(ē)na an tana', wo iwe'e ka'i am bantang, ta'an aitjuana, ra'itja toro mande ēsakē' itjatēla'u, karēngana iwe'e waja am bantang.” Ēng kuano i Anak i Tjolano a si tawang(ē)na: „Itjatēka'-mange ambitu ko, ja kumua in tana'i: „Aitjua-mai i Anak i Tjolano im baja, kine, se sērēm ja mai mitong im batuna i mostor anio', wo iwe'e am bantang, wo ra'itja toro ēsa itjatēla'u, karēngan ipakawe'e-we'e am bantang.” Tani'tu tu'u mali'uso-mai se sērēm, wo pitongēnerao wo iwe'e am bantang. Ipakawe'eera-mako am bantang ēn iitu, ja si tawang i Anak i Tjolano mangem a si Pēnana'an i Tjolano, ēng kuanao: „Ra'io, pinakapitongkuo!” Kuano ka'i i Pēnana'an i Tjolano: „Indon ēm berong anio', wo mange iasu-mai rano!” Tani'tu ng krior mangem ka'i a si Anak i Tjolano si tawang(ē)na, ēng kuanao

ka'i: „Aitjua i inangu, ja aku mindo im berong wo mange iasu-mai rano, anae tambisangku ěn iitu?” Ěng kuano i Anak i Tjolano: „Itjatěka'-mange an dano ko sa, ja ng kuanuo: „Aitjua-mai i Anak i Tjolano im baja se kosei ja mai lumintjun am berong.” Itjatěka' tu'u-mange an dano sia, ěng kuanao: „Aitjua-mai i Anak i Tjolano, im baja se kosei ja mai lumintjun am berong.” Wo m berong ilěpok(ě)nao-mio'; pailěkěnao tu'u-mio', ja nilintjunano e kosei, wo indonao-mai ěn iitu wo iasuna rano paalin-ange am bale i Tjolano. Itjatěka'-mange, ja ng kuanao a si Pěnana'an i Tjolano: „Kěnu ěn dano.” Kuano i Pěnana'an i Tjolano: „Sama', iwěkaro-mio' ambana.” Kasomoian-ai iitu ěng kuano ka'i i Pěnana'an i Tjolano: „Wawa'ando ja si ana'ku ěn tumaneo, anaitu ko tumimboi an děri, iěla'b an isera.” Mawěngi tu'u-mio', ja itjalalitjo in sera i lumukuto, wo timboiano i tawang i Anak i Tjolano ěn ipaěla'b. Makalukutoka si Anak i Tjolano, ja warengěna-mako ěm běrěn, si tawang(ě)na ja měngame-ngame'-oka, pa'pa'an i malua'bo ěng kama paso'so'an in děri. Kua'a ěn iitu ěm pisinao-mako wo masama'o ka'i-mai. Karua ka'i i mareng-ako in somoi, ja si tawang(ě)na maame', pa'pa'an i malunguso ěng kama paso'so'an in děri, wo tani'tu pisinao ka'i-mako wo ěn iitu mapali'o ka'i-mai. Katěluna i mareng-ako in somoi ja timboianao-mai si tawang(ě)na wo ng kuanao: „Maio, mio'om karu' am bawo in tana' kita.” Siituoka ja maěgao-mai se nilumukut wo'o ang kasale-sale'an, ěng kuane-rao: „Awo, ra'itja tu'u isiao si pěnana'ana!”

Ja si Anak i Tjolano wo si pěnana'ana nimaja'o-mai am bawo in tana'. Akar(ě)kě' iitu.

22. Kukua an doro' i Pokol, sinisil i Kambel Mengko', Kuntung.

1. Sapaka si Inang wo si Amang i Pokol ja tow lěngei. An somoi-mai in si Amang i Pokol i nimateo, ja sia anio' mamualio tow; sapaka sia, ja toja'ang tuama.

Tumowo-mai sia, ja sia ra'itja wana kama wo keitjei tanu

se tow. Awoja itji'it in da'ipe' wana-mako ě nimamuali tani'tu a si ro'ong iitu, kaapa n am pakasa si tana' iitu, ja kĕkĕlian se tow nimai nilumili, kara-karapi e wangko-wangko' wo se sija-sija' a si tana' iitu, ta'an sera nimaali-ali waja-mai ta-tamber, mai iwe'e si Inang i Pokol anio." Ra'io; pĕwangko'on i Inanga sia aka-akarana i makailĕko mĕnuwu-nuwu', wo mai im baweano reke-rekenĕn. Ja sia anio' mĕlinga-linga in ipakua an doro' in tjapal i mange wo mai an tana-tana' walina. Makata'nei-mai si Pokol anio' sapaka sia ja masale' muli-ulit sumengkot. Ĕng kuana a si Inanga: „O Ina', sa itjasale'mu, sapaka aku ja masale' sumengkot." Sowatĕno i Inanga: „O itow! sapaka itu, ja ra'itja ro'na wo mamuali, pa'pa'an ko ja ra'itja wana kama wo keitjei. Tumambisao ko wo ro'na mange an tana' walina? Mangeo matambi-tambisa ko? Anaituo wo ra'itja itjasale'ku ko n sumengkot." Ta'an pinĕlĕse-lĕse'kĕ' i Pokol, iaka-akar in tjinaki'itangkĕ' i Inanga. Kuano i Pokol a si Inanga: „Sa aku wo sumengkoto ialer(ĕ)kĕ'-mai sangasaput watuna in tjapitu wo sangasaput ĕm batuna im bala'ang, wo ĕsa pagi', ĕsa pisow wo ĕsa pati. Maja'o tu'u ĕng kapal, ja indono-mai i Inanga si Pokol wo ipumpunao-mio' am' bantang, kara-karapi im batuna in tjapituo wo m bala'ang, wo m pagi', wo m pisow, wo m pati, pinĕwali-wali waja ambitu. Pakatu'tulĕn-ako ja teinten-gĕnao-mange i Inanga a mange ě lawanan; aiwĕkar(ĕ)na ambisa m patumpaan-ai e mantĕros.

Pailĕkĕno e mantĕros sia, ja se mantĕros nimangaja'ka' am pa'pa'an sera in da'ipe' nimailek-ako tow tani'tu. Numuwu'o si Pokol, ĕng kuana: „Sa itjasale'miow, e mantĕros, mange itju'a-mange a si Tuang Kapĕteng, sapaka aku ja masale' sumengkot." Marengo tu'u-mange ang kapal se mantĕros, wo ipakata'uera-mange a si Tjapĕteng, sapa si aitjua i Pokol. Kuano i Tjapĕteng: „Sama'! angeniowo-mai sia." Mangem ka'i se mantĕros, mangeo-mai si Pokol. Janta'an dirior wo si Pokol paalin-ange ang kapal, ja sia mangilĕko se mantĕros, ĕng kuana: „Sa aku a mangeo ng kapal-sa, ja tio'o iwĕka-

wëkar a mio' ën darëm, ta'an iwëkar(ë)kë'-mio' a mange n dangka'." Ja n iitu kini'itan tu'u e mantëros. Itjatëka'o tu'u-mange sia, pailëkëno i Tjapëteng, ja si Tjapëteng nimanga-ja'ka' tanuka ka'i se mantëros. Ja si Pokol anio' aiwëkar(ë)-kë' tu'u an dangka', siitu kine sia ë mailëk se waja im baja palangkoiënera, am pa'pa' sia ja kolëkoka ë nitjumësot-ange am bantang.

Moleo tu'u ng kapal. Maja' pira ngando si Pokol mailëk ësa punten. Sapaka si punten itu, ja ra'itja wana tow. Siituoka mangilëko a si Tjapëteng sia: „Sa roro'na, ja itumpao-mio' a si punten anio' aku, ta'an mangekë' iwëta'-mio' am paakaran in sonop." Ki'itano tu'u i Tjapëteng, iaka-akar iru'ndu'nao se mantëros, maali-mange si Pokol a lawanan a si punten iitu. Itjatëka'-mange ja iwëkarerao tu'u a lawanan si Pokol, tanu im pinangilëk(ë)na. Marengo tu'u se mantëros, janta'an sera nimawaja'-mange, ja nimarengkë'-mange in somoi wo makasere-mange si Pokol, am pa'pa'an sera ja talos mau-pus ë mata'nei si tow pokol isia, itëla'uo a si tana' kaluluan in tow. Ra'io, maja'o tu'u ng kapal wo mange nimakatajang. Ja kamang i pëtu'u-tu'usënoka-mange i Pokol ëng kapal, ja ng kuanao: „Pë'tare ng kapal pëtu'u-tu'usënguoka-mange, wo'ope'ka-mai isera i mailëk(ë)pe'-mai iaku." Siituoka sia muka'o-mai in tjaraina. Pakawuka'ana-mako iitu, ja sia nimaindoo tow Walanda, tuama wangkër wo rangka'. Sapaka re'e m pokol ja karainakë'.

Awoja mio'o tumo'or-ai sia wo ipumpuna am bantang ëng karaina wo itu kipitënao-mai wo sia muntëpo-mange an talun. Muntëpo-mange sia, ja sia mindoo-mai im pisow wo sia mema'tërung; ën iema'na tërung, ja simbël, am pa'pa'an ën ambitu ja këkëlian simbël. Pakaema'ana-mako itu, ja sia mindoo-mai im pagi' wo iema'na karisoran api. Mando-mai sia mindoo im pisow wo sia maras uma; pailëkëna im bangko'o m pinaras, sia mindoo-mai im pati wo itongkeina in tjaju. Ra'itja pira ngando n akar-ai iitu, pailëkëna nimapërao ng kaju. Siituoka n iitu ritjëtanao, akar in tjinaa-kaapu in api karapi e

kaju wangkër. Mando-mai sia musëwo im bala'ang wo ng kapitu; këusëw(ë)na ja pinëkëmu-këmukë'. Maja' tëlu ngando, pailëkënao maluluno; maja tëlu ngando nimëta'upo ë lalaina, maja ka'i tëlu ngando, pailëkëna masëputo. Ra'itja nimaure-ure, ja waweano ë mëririan am bua'na.

Siituoka sia mawaja-waja', mailë-ilëk im bua'na in tjapitu wo m bala'ang. Mawaja-waja'oka sia, pailëkëna waweano m pakë'këtan e kawok. Mando ka'i-mai pailëkënao si tjapitu ësa ja tumawio kaapun i tjawok. Siituoka ng kuano i Pokol: „A nde'e! ja tia'pe' wo ta'anangku, kaapunukë' re'e ng kapituku!” Ja mindoo-mai im pagi' sia wo iema'na ta'an in tjawok. Pakaema'ana-mako itu, ja ita'anao. Mando-mai pailëkëna nimindoo tu'u kawok, ta'an kawok wangkër, toka wawi. Pëpatenao wo'o sia, kuano i Tjawok: „Ampung, ampung! sa itjasale'mu tio'o pate-paten aku.” Sowatëno i Pokol: „O ra'itja, karëngan ko em patengku, en iitjo si maindo in tjapituku wo m bala'ang.” Ëng kuano i Tjawok: „Itjaupus-ai, itjaupus-ai aku, tio'o pate-paten! Sapaka n iana, ja ra'itja wala'am bo kapitu, ta'an ën iana ja paser. Anaitu sa ko wo masale', ko iwalitju-mange am baleku paser.” Sowatëno i Pokol: „Sama'.” Siituoka ng kuano i Tjawok: „Sapaka ko ja tumimboitjë'-mai an ipus(ë)ku, wo mëngi'i-ngi'it iaku, am-bisa m pengkorangku, ambitu m baja'anu.”

Maja'o tu'u sera, wo sumumpak-ange sera kawok tani'tuo ng kakëli. Ja si Tjawok wangkër makasa-kasa manuwu' ta'an da'itja kailëkan i Pokol sapa ën ipanuwu'na. Ta'an sanganu-wu'-mai i Tjawok wangkër, tani'tu ng kario se kawok mali'us-ange wo sera kumaset am pawaja'anera in dua, iaka-akar se kawok i nilumisi'doka n sangawiwi wo n sangawiwi. An iitu kailëkano i Pokol in sapaka si Tjawok wangkër anio' ja mapërenta. Mëmaja-maja'oka ka'i sera, ja sera itjasumpako ka'i-mange se kawok tani'tuo in tjakëli. An somoi-mai iitu, sera itjasumpako-mange a si lalan mëla'u-la'us-ange a si wale paser. Kuano i Tjawok a si Pokol: „Nange m baleku!” Mëmaja-maja'ka tu'u sera itjatëka'o-mange a si wale iitu. Pailë-

kěno i Pokol si wale itu ja paser, tumo'tol an ari'i tumbal im buwungan. Karapi in tjantil wo ě meja wo m bangku, ra'itja wana nigumaet ta'an paser ipakasa. Siituoka sera sumosor-ange a logos wo sera muntěp am buni wo mareng ka'i-mai a logos. Mělukulu-lukutoka ambitu sera in dua ja ng kuana i Tjawok a si Pokol: „Sapaka m bala'am bo kapitu, ja wowoso, anaitu ko ja marengo-mange wo mangeo tipu'un; sa itu pinakatipu'muo-sa, ja uwitěno-mange a lawanan wo mange iělor sumama-sama' am pa'pa'an sa ituo pinakaaler(ě)-muo, ja tani'tu ng kerior wawean kapal lumangkoi. Ja sa lumangkoio ng kapal-sa, towanu-mange wo ipěkisakemu-mange ambitu ng kakěli in tjapitu wo m bala'ang. Ja takura m pangilěkěn i Tjapěteng in sakean in iitu, ja iwe'emu-mange n ěsa kapitu, janta'an ěn iitu ra'itja kapitu kaapa wala'ang, ta'an paser. Wo sa itu aitjatěka'o-mange an tana'mu-sa, ja těla'uan-ange limangapulu' n a lawanan; se akar iitu ja pa-kaali-alinu waja-mange a lesar im bale i Inangu. Janta'an dirior(ě)mu wo maja' kumembut-ai se tělu kumi an iaku. Sa itjatěka'o-mange-sa, ja indonu si tjumitju wo isusul-ange an api wo ilěinděm-io' an ta'asitj, siitu ng kailěkangku in tjo in aitjatěka'o.”

Awoja marengo tu'u si Pokol, mangenao pailěkěn wowoso ng kapitu wo m bala'ang. Siituoka tipu'unao wo uwitěna-mange a lawanan, mangena ělurěn ambitu, akar im bawean kapal lumangkoi, tanu in aita'ar i Tjawok an isia. Pakaělu-rěna tu'u-mako m baja se itu, lumangkoio wo'o ng kapal. Tajange' ng kapal, parangatěnao-mange akar tu'u i niměnto.' Ĕng kuanao a si Tjapěteng: „Ro'na sakean im paser(ě)ku?” Sumowato si Tjapěteng: „Sama'.” Siituoka ja isakeerao ěm paser. Ipakasake-mako, ja pailěkěno, nitumě'těpoka n sanga-wiwi in tjapal, am pa'pa'an in tani'tuo in tjakěli ěm paser. Ja kumi'it tu'u in ta'ar i Tjawok, weanao-mange ěsa si Tjapěteng, tělěs in sinakean im paser(ě)na. Tani'tu maja'o ng kapal. Sumuwa'o-mange ěng kapal, itumpaerao ěm paser i Pokol. Ipakatumpaera-mako m baja in iitu, ja mangem a si

Inanga si Pokol, mange kumua: „Sapaka aku, ja nimarengo-mai.” Tani'tuo in tjarior sera mange a lawanan, wo mangeo muwit-ai im paser, mai ipawëkar a lesarera. Ta'an diriorera wo muwit in iitu, ja aitaneo se lima ngapulu'-wo. Pakauwitën-era-mako si tëla'u iitu, ja si Pokol mareng'e' ka'i-mange a lawanan, mange nimëngat se lima ngapulu' aitela'u. Mange sia, ra'io tu'u wana tow ën a lawanan.

Siituoka sia mindo-mai in tjumi i Tjawok wo isusul(ë)na-mio' an api, wo ilëindëm(ë)na-mio' an ta'asitj. Indona ka'i-mai ng karaina, wo karaiëna. Tani'tu nimaïndoo ka'i Pokol sia. Ra'itja nimaure-ure, kumësoto-mai si Tjawok kara-karapi e riwu ng kakawok(ë)na. Kuano i Tjawok wangkër a si Pokol: „Sapaka aku ja ambia'io; ambisao n to'oran im bale?” Kuano i Pokol: „A si lesaro anio'.” Kuano ka'i i Tjawok a si Pokol: „Ituru-turu'o waja-mai sapa si tjasale'anu.” Itjakua tu'u i Pokol sapa se itjasale'na. Siituoka iru'ndu'o i Tjawok wangkër ëm baja se kawok karapina. Tani'tu ng karior se kawok mema' si wale iitu. Pinëma'i-ma'ilonganerakë' wo nimamualio wale. Sapaka n aipapa'ilongera ja paser(ë)kë' ka'i. Siituo si paser aitéla'u i Pokol a lawanan, ta'an tinulierakë'-mai i nitjuman. Taporak ulit ëng këema' e kawok si wale iitu, wajakë' im po'ow i ëndo. Sapaka si wale itu ja paser-(ë)kë' waja nitumo'tol an ari'i tumbal-ange im buwungan wo m baja in an sangkum i wale itu ja paser ipakasa. A si wengitjë' iitu marengo se kawok.

2. Mando-mai pailëkëno e tow a si ro'ong iitu si wale iitu, ja sumela-selap, iaka-akar mangaja-ngaja'ka' waja se tow en toka ëndo-ëndoan, ma'angka wo'o im bëngipe'. Ra'itja ure n an akar-ai iitu ja si Pokol masale'o tumane. Kuanao a si Inanga: „Wo Ina'! sapaka aku ja masale'o tumane.” Sumowato si Inanga: „Itu ja sama'.” Siituoka iru'ndu'nao si Inanga, ëng kuanao: „Sapaka ko, e Ina', mange a si Tjolano, wo wueiën-ange sa roro'na aku ja masale' tumane a si ësaan-ange a se anak i Tjolano.” Mangem tu'u a si Tjolano si Inang i Pokol, wo mange kumua in sapa si aijtjua

i ana'na. Sowatëno i Tjolano: „Sama', ta'an mange alin-ai sia.” Marengo-mai si Inang i Pokol mai-mange isia, wo sia teintengëna-mange am bale i Tjolano. Itjatëka'-mange, ëng kuano i Tjolano: „Kënu se ana'ku siow ëm bewene. Ta'an itji'it in tjanaramën, si matu'a ng katare wueiën.” Ja si Pokol anio' maali-ali tëtënga'an passer. Ja si sei si mindo in iitu, isia si taneana, kumaapa maindo pënana'ana. Mueio si Pokol katare a, si luluna. Janta'an si Luluna nisumowat: „E, iitjoo wo tumane a iaku! pokol ja uanu!” Mai tja'i a si Tjumarua tani'tukë' ë nuwu', wo nimëngasa-ngasar(ë)kë' tani'tu waja se uwalu. Kasiowoka ja sia si nimasale' wo indonao-mange si tëtënga'an passer itu. Sapaka si Tjaakaran anio' ja aipasero' e kaka'na pa'pa'an kine sia i nimasale' tanean i Pokol.

Siituoka ja pangilëkeno i Pokol a si Tjolano, in sa roro'na, woondo sera ja tumaneo. Sowatëno i Tjolano: „Ja, itu ra'ipe' mamuali pa'pa'an da'ipe' aler ëng kanën wo n ëëlëpën e niënnot.” Numuwu'o si Pokol: „Ja itu, e Tuang Kolano, ra'itja wëndu ë mëaler, asal(ë)kë' wo se mateir ang kakanën ën alerën.” Ja itji'ito i Tjolano ambitu. Si upusoka i Tjolano si Pokol, ja sia turu'anao ësa wuni wo tëkëlana a si wëngi iitu, ra'io aiwe'e i Tjolano nimange am balena. Numuwu'o ka'i si Pokol ëng kuana a si Tjolano: „Sa itjasale' i Tuang Kolano, wawa'ando ja iëpe', sa ulit(ë)ka si aitjuaku kaapa ra'itja.” Ki'itano tu'u i Tjolano, wo sia mënot se Wangko-wangko', mai tjuman am balena a si wawa'ando. Itjaiwëngi-mio' ja si Pokol kumua a se Kolano in ambalesa wo se anak i Tjolano tana'i: „Sa roro'na, muntëpe' waja am buni-wo, wo ra'itja wana ësa maai-ai ang kësot.” Siituoka muntëpo waja am buni sera, ma'an ka'i si Pokol wo si Inanga nimuntëp(ë)kë'-mange am bunina. Ambituoka sia ja sia kumakaja, ëng kuana: „Kësotan-ai in tjakanën wo n ëëlëpën wo sapakë' se itjaewe e niënnot!” Mangeo tu'u ëngatën ën a meja, ja alero waja ng kakanën wo n ëëlëpën wo m baja se itjasale' e niënnot. Siituoka sia rumu'ndu' si Inanga mange tumengkor im papalën im buni e Kolano in am balesa, wo m buni e anakera. Kumësoto

tu'u-mai sera, ja sera mailëk in am bawo i meja, ambituo waja ng kakanën wo n ëëlëpën.

Muntëpo-mange si Inang i Pokol, wo si Pokol sumawëlo in tjaraina itëla'unao-mio' am buni si tjaraina pokol. Kumësot-ai sia, ja nimawalandao ka'i wo tuama rangka' em bangkër. Pailëkëno e uwalu anak i Tjolano sia, ja sera marengo-mange am buniera, wo mange mëngame-ngame', e manësël muli-ulit, am pa'pa'an sera ja nimare'ekë' si Pokol, ënta'an sia ja ra'itja re'e pokol, ta'an tuama re'e lo'or.

Ra'itja ure ja kumësoto-mai se tuan-tuang niënot i Tjolano. Ja kumano tu'u se tuan-tuang. Janta'an si pënana'an i Tjolano ra'itja ki'im tjuman, en da'itja nilumukut kara-karapi e tuan-tuang si Inang i Pokol, wo se uwalu mangala'un ra'itja ka'i tji'im nilumukut, anaitu ng kantil, se nilukutanera wo'on, ra'itja nilukutan. Makakan-ako se tuan-tuang, ja ipapaangkaio waja i Pokol ën am bawo i meja, wo sia muntëp ka'i-mange am buni, mange ka'i tjumakaja kakanën. Makakaja-mako sia, ja papakësotënao si Inanga wo mange lumukut-io' karapi i pënana'an i Tjolano. Ja wisao ë giona e kakanën am bawo i meja a si tjatarepe', ja tani'tuka ka'i se ipakaompëro.

Mando-mai ja si Pokol wo si Wawu' pangilëkëno i Tjolano i lumëkëpo in ta'arera in tumane. Jawo si Tjolano mënot se tuan-tuang am bawa' im përentana, wo se sij-sija', aka-akaran si Tjolano i nimema' lawi nialer(ë)na kanan e tow tani'tuo in tjakëli. Mali'uso tu'u-mai m baja se niënot, ja si Pokol kumakajao ka'i tjakanën. Ja wisao ka'i ë nimamuali a si tjaawi'i, tani'tuka ka'i ën a si oras iitu, ë nimëgigioanoka ng kakanën wo n ëëlëpën. Makakan-ako se tuang, iwali-mangeera am bale i Pokol si penana'ana.

Tëlu ngando n an somoi-mai iitu, ja si Pokol sumengkoto ka'i, itëla'una-mio' am bale si pënana'ana, a si Inanga. Ra'itja pira ngando n an somoi-mai in tjësengkot i Pokol, ja si pënana'ana ipëtenao e kaka'na uwalu, in sia in iwilangerao wo'on, pa'pa'an sia ja panganatënerao, en isiakë' n tinanean i Pokol. Siituoka towano e kaka'na si pënana'an i Pokol, wo sera mange

tumamberen an tatamberenan an tēmbir in ta'asitj. Ja kumi'it in tetenaera, ja sa si Tjaakaranera matambereno, ja sia ituke-
erao-mange rumēpē-rēpēt an ta'asitj, wo siitu sia ē malēsēm. Maio tu'u in tumambereno, ja si Luluna n dirior wo pēngi'i-
ngi'itan-ai, tumbal-ai si Tjaakaran. Tumambereno si Tjaakaran,
ja sia ipatukeera-mange rumēpē-rēpēt an ta'asitj, iaka-akar sia
i mēkia-kiampungoka, ta'an ipakarēpēterakē'.

Siituoka si pēnana'an i Pokol itjapē'pēso-mange a si ēsa
punten ra'itja paēnto-ēnto'an in tow. Ambituoka sia, ja sia
lumaput a si tjaju an tēmbir i lawanan wo mēnganko-nganko',
ēng kuanao: „Kusoi, Kusoi! aku e! ēn aitaju-mai i tjaka'ku
Rintjitan.” Ēndo wo m bēngi ja siitu n ipēngangko-nganko'na
an sangkum i rua ngasērap am puru'na i tjaju iitu. Sapaka
n an tutuw iitu, ja sia ra'io nimakan. An somoi-ai iitu ja
pailēkēnao-mange wawean kapal maai. Siituoka sia mangko' ka'i
ēng kuanao: „Kusoi, Kusoi! aku e! ēn aitaju-mai i tjaka'ku
Rintjitan.” Makatawio tu'u-mai ng kapal, ja si Pokol makasake
ambitu. Palingano i Pokol im bawean ē matu'ul i ngarana,
ja ipēkiēnto'na ng kapal. Tumumpao-mange sia, mangena
pailēkēn wawean ēsa tow am puruk in tjaju. Sapaka sia, ja
worungoka ulit wo wageioka, tanuoka gio e nimateo. Anaitu
sia pētū'u-tu'usēnaoka, tawioka ra'io katu'usana in isia si pē-
nana'ana. Katu'usana-mako sia, ja si Pokol maūpuso muli-ulit
isia, wo sia mangena kē'kēpēn-ai wo sera maame'. Siituoka
sia iwalinao-mange ang kapal. Awoja sisilēno-mange i pēnana'an
i Pokol a si Pokol, sapa ng kinawaliana wo aitjawe'e-mai a
si punten iitu. Itjatēka'-mange ang kapal, ja weano i Pokol
kanēn sia, sapa-sapakē' si itjasale'na. Jawo mindoo-mai ēsa
pawean in doko' si Pokol wo itjēsot(ē)na se roko' ambitu, wo
weana pasēngoran in asēng. Pakaema'ana-mako itu, ja ipum-
puno ambitu si pēnana'ana wo kara-karapi in tjakanēna.
Itjatēka'o-mai am balena si Pokol, ja ng kuanao: „Si pawean
in doko' anio' ja pinumpunan in doko', anaitu paalin-ange
ang karapi in ti'tir, oreoka malewo'.” Ambituoka sia, eng kuanao
a si Inanga: „O Ina', ambisa si pēnana'angku?” Sowatēno i

Inanga: „Sapaka sia, ja tinuli-mai e kaka'na; akaroka-mai iitu, sia ra'io pinailë-ilëk(ë)ku-mako.” Ëng kuano i Pokol: „Sama'!” Siituoka sia mange a si Tjolano, wo mui sa ambisa si pënana'ana. Sowatëno i Tjolano: „Siituo ng kinawalian e toja'ang anio', wo niares(ë)ku.” Wueiëno ka'i i Pokol a se anak i Tjolano, sa ambisaka si pënana'ana. Sowatënerao: „Ja ra'itja kailëkanami, sa sia ambisa.”

Maio in tjuman, waja isera nilumukut kara-karapi i Pokol. Tumo'tolo kuman, si Pokol muiio ka'i sumawël, sa ambisa si pënana'ana. Janta'an mëngelo-ngelongkë' waja se uwalu mangala'un. Siituoka ng kuano i Pokol: „Itji't re'e in tani'tu ja kamu aresëngku.” Siitukë' ë nuwu' i Pokol. Ra'itja nimau-re-ure ën akar-ai iitu, ja si Pokol numuwu' tana'i: „Timbong-timbong ëng kakanan, timbong-timbong ëng kakanan.” Siitukë' ë nuwu' i Pokol, ja lumengketo-mange am biwiera m piring karapi in tu'tu' wo n sëra'. Siituoka ng kuano i Pokol a se Kolano in ambalesa: „Sapaka aku, ja mangepe' mangere-mai si pënana'angku, sa sia kaerangkupe', anaitu aku sumengkote' ka'i.” Ja indonao-mai m pinumpunana si pënana'ana wo sia sumengkot. Tëlu ngando ng kaurena i nisumengkot, wo mareng-ai. Marengo-mai sia, ja nimëgigioanoka ng kulintang wo se patengem balina. Anaitu tajange'-mange ng kapal ja palingano-mange e tow a si tana' iitu, iaka-akar këkëlian se tow wo se tuan-tuang mange nilumili am tëmbir im pasuwa'an in tjapal.

Itjatëka'-mai si Pokol ja sia nimëla'u-la'us a si Tjolano. Ra'io nitjumëli nuwu' si Tjolano, ta'an kuanao a si Pokol: „Sa itjasale'mu, ja itjooka ng kolano, asal wo wuka'ano-mange m piring am ba'mba' e ana'ku, am pa'pa'an aku mau-puso muli-ulit isera.” Kuano i Pokol: „Sama' sa tanu i nuwu'mu, ta'an dirior wo n iitu mamuali, karëngan ën iitu ipakata'u am baja se am bawa' im përentamu, in iakuoka ng kolano.” Ipakata'uo tu'u si nuwu' iitu am baja se tow, iaka-akar i nimasale' ëm baja se tow. Siituoka ng kuano i Pokol: „Timbong-timbong ëng kakanan! Timbong-timbong ëng ka-

kanan!" Siitukë' ka'i ë nuwu' i Pokol, ja maindoo tu'u-mai waja m piring am biwi e uwalu mangala'un anio'.

Tani'tu si Pokol nimamuali kolano. Ja se uwalu mangala'un anio' nimënto' waja ang kama i Tjolano, wo malinga-linga sapa ën itjua e ambalesa. Ja sera anio' ra'itja aipawe'e-we'e i Tjolano tinanean akar i mate. Siitukë'.

GROEP IV.

23. Kukua an doro' i Tjekekow wo se rua Mětuari, sinisil i Natanael Bumokoi, Sondër.

Sapaka se Mětuari anio' ja tuama, wo léngei e lengei. Sera ra'io wana inang wo amang. Anaitu si Ito'eraoka wo'o é matei-teir an isera, ta'an sera ra'itja pinana'neina; ta'an iparu'mba-ru'mbajanaké', iaka-akar mawangko'o-mai sera, ra'itja sapa m pinatawoiera [mëndondo, mangeké' mēmito-mitong in sinduk ipatia' e mara'as.

Makéli-mako n sinduk pinitongera, ja mangeo kumuku sende'en sera, wo mindo mata' nonoanera in sinduk. Ja sera mēngasa-ngasar tani'tu susur in ěndo.

Maioka a si makasa an uněrera i nimapo'ow i mata', ja awean lumelempar mēnenge-nenge an darěm in tju'ung an tawiera, makua in tana'i: „Kekekow! aiěn-ange aku, e Mětuari, wo mulinga'.” Ja, ě ngaran i lumelempar isia Kekekow, lumelempar těkis mēngaěnto' makakéli-tjěli an uněr im běne', kasale'enoka ě giona, kaupusěnoka n ipakatengena. Mēnenge-nengeoka sia, ja mangeerao pangusuiěn an darěm in tju'ung, wo paalineramange am bale.

Ambituoka ka'i sia tumenge: „Kekekow, tutuwěn am bantang aku, wo mulinga'.” Tutuwěnerao tu'u sia. Ra'itja ure tumenge ka'i sia, ěng kuanao: „Kekekow, wuka'an aku e Mětuari!” Siituoka wuka'ano e Mětuari; pailěkěnerao, ja nimawutao im běne' ěm bantang. Ja malintěro sera. Mawawa'andoo tumengeo ka'i si lumelempar, ěng kuana: „Kekekow!

iwe'e an sangkor aku, e Mētuari, wo patutuwēn ěm bēngi." Mando-mai tumengeo ka'i sia, ěng kuana: „Kekekow, wuka'an aku, e Mētuari, wo ilėkėno-mio'." Pailėkėnerao tu'u n sangkor ja nimatiruwo im bene' lo'or. Ja ra'io ipakakua ng kasa-le'anera i Mētuari, makasere im bene' an sangkorera. Awoja pinangene-ngenet i Tjekekow tani'tu kasusur in ěndo, akaran i nimawutao im bene' sama' ěm baleera i Mētuari.

Ja itjarėgėso a se makali'tjir, sapaka m bene'era ja sa'alo. Anaitu maio ira'nda i Ito'era sera. Ja itjatėka'o-mange sia, mangaja'ka'o-mai ě nimailėk im baleera tawio irė'mba im bene'. Ja se makaito' isia panganatėnao wo ng kuana: „Ja nirumombito karu' kamu?" Sumowato se Mētuari: „Ra'itja, e Ito'; ta'an mai milėk si mawulinga' se wene' anio', sia ja ambia'i." Makakontoioika se makaito' am bineanera si lumelempar en si Ito'era makasereoka i makali'tjir ang karapi i mėngawė-ngawės ěng kaewean im bene'era tani'tuo in tjasa'al, ja tumengeo tu'u-mai si Tjekekow ěng kuanao: „Kekekow! tutuwēn am bantang aku, wo mulinga'." Ja tutuwėnerao ka'i. Ra'itja ure, kuano ka'i i Tjekekow: „Kekekow! wuka'an aku, e Mētuari!" Wuka'anerao tu'u sia. Pailėkėno i Ito'era, ja makarėpėto ng kanat(ė)na isera, wo ng kuana: „Ja! ulit tu'u re'e! Uanu tare, iwe'epe'-mange an iaku-wo, e makaito'!" Ja itu kini'itanera ěng kuanerao: „Sama', ta'an oreka iwaja e Ito'."

Marengo tu'u si Ito'era, irapinao si lumelempar. Ja a mangeoka m bale sia, tumengeo ka'i si Tjekekow, ěng kuanao: „Kekekow! tutuwēn am bantang aku, wo mulinga'." Ja pėriorėna-mio' in tumutuw i ni'u si lumelempar am bantang. Ra'itja ure kuano ka'i i Tjekekow: „Kekekow! wuka'an aku, e Ito' e Mētuari!" Kaitenge-mai i Tjekekow, ja mapala'uso wuka'ano, ang karapi i masale-sale' e makaere kamang. Ja pailėkėnao n am bantang ra'itja wene', wajakė' in tataokok. Pailėkėna-mako in tataokok(ė)kė', ja siituo ě nirumango isia, wo si lumelempar indonao wo patena, akar im pinakasėra-sėra'na. Ja waja in du'i aitia'na-mio' an amporan.

Talali' nimaja'o n ěndo ra'io wana ng kailėkan-ai e Mētuari

a si Tjekekowera, ja sera mangeo a si Ito'era, wo muēi si Tjekekow. Kuano i Ito'era: „O, sapaka sia ja sinēra'kuo am pa'pa'ana in da'itja mawulinga' im bene', mawulinga'kē' in da'itja pakanēn.” Kēilingakē'era si nuwu' itu ja matēkuro sera wo maame'o en sinēra'o si matawang an isera. Maame'oka sera, ja ng kuano i Ito'era: „O inde' kamu, e makaito'! paa-me'aniow re'e si ra'itja wana katoroan, wo ipapiaitjē' se tow.” Sumowato se Mētuari: „Sa itjasale' i Ito' ja iwe'e-mai n du'i wo umungēnami.” Indonerao tu'u an amporan ēn du'i, wo mangeera iusēw an talun. Ipakausēwera-mako n itu, ja weanerao ta'ar ēng kuanerao: „Katēluan ngando ja kami mai.” Kumawus-ako tēlu ngando, mangem sera; pailēkēnerao, ja nitumowo. Tuma'aro ka'i sera: „Tēlu ka'i ngando ja kami mai.” Maierao pailēkēn, ja nime'eo pangana wo lalaina. Weanerao ka'i ta'ar: „Tēlu ka'i ngando ja kami mai.” Maio ka'i sera, pailēkēnerao, sapaka ē lalaina i tjaju itu ja kapas lēme'. Tuma'aro ka'i sera: „Tēlu ka'i ngando ja kami mai.” Katēluan tu'u ka'i ngando, ja sera maio, pailēkēnerao ja nimua'o. Ēm bua'na i tjaju itu, ja kulintang wo momongan wo kelana; sawo itu rēgēsan-ai, ja itengena-mai; n tengena lolo'oran, tanuoka pēlinga-lingaan-ange im pēngatengen e mapēli'i ang kambung. Ja a si ēndo itu se Mētuari ra'io ipakakua n aaru-iēnera, en sera nimawa'ilano.

Kalingaano i Tjolano in se Mētuari nimawa'ilano, ipēkiilēk-(ē)nao se malukar sa sapa ē nimange-mai isera wo nimawa'ilano. Ja ra'itja wo'o itjua e Mētuari, ta'an ipaēnē-ēnēperakē' wo'o a si Tjolano. Pa'pa'an im paware-warengēnoka-mio' i Tjolano i mēmue-muei, ja itjuao e Mētuari a si Tjolano ēng kuanerao: „Oreka itjua i Tjolano kami anio' ja marombit(ē)kē', ja si Tjolano in ēsa mange milēk an talun si tjaju paupu'anami se kana'an iitu.”

Pailēkēno i Tjolano ja ulit. Ēng kuano i Tjolano: „Kumi'it in iaku ng kolano, wo makaanu in tjētēr an ipakasa in tinambar e tow(ē)ku, ja iakupe'-wo ē maupu' se kana'an anio'.” Ta'an da'itja ki'im e Mētuari. En itjare'ekē'era, ja ma'mbowo

si Tjolano wo iru'ndu'nao se malukar(é)na makatêlu siow, mange tumongkei si tjaju itu. Mangem tu'u sera, wo tongkeiënera, ta'an ên iitu ja ra'itja kinatongkeianera am pa'pa'an mênongke-nongkeitja sera, ja aitjawaluio uwasei. Nimamuali uwasei si tjaju iitu, karangoano makauli-ulit si Tjolano, wo ng kuanao a se Mëtuari: „En se airu'ndu'ku ra'itja makatongkei si tjaju iitu, ja itjamuo ng karêngana mërior tumongkei in iitu, en sa iitu ra'itja katongkeianiow ja kamu pëmë'di-më'di-sêngkuoka akar i marai'.” Tani'tu si Tjolano nimanginde' isera, ta'an sera ra'itja nimaliei.

Tumarepe'kë-mai itëwa'era tëtëwa', wo isu'upera si tjajuera akar in itjarë'mba.

Rumë'mba-mako si tjaju iitu, ja tapeoka si Tjolano, wo ang karapi i mënginde-nginde' kuanao an isera: „Itji'it in da'itja kaindoangku an itjamu si tjaju anio', ja timboiëno-mange ng kakolanoangku.”

Tani'tu se Mëtuari anio' nimakar a nimaindo kolano.

Awoja tananao m pinëngata'nei e kowinsom-bo i maupu' an doro' i Tjekekow wo se rua Mëtuari am biwinsonënera:

Kekekow!

Kam беру, wa'ilan!

Nitjumapei se rua Mëtuari,

Kam беру, wa'ilan!

Si Tjekekow wo si Wëris,

Kam беру wa'ilan!

Kumale'kew im bene',

Kam беру wa'ilan!

24. Kukua an doro' i Toja'ang toloatëkënoka wo si Sapi, sinisil i Geertruida Raintung, Lëllëm.

Kaindo-indono-mai, sapaka si Toja'ang anio', ja toloatëkënoka, janta'an sia palënge-lëngeiëngkë' i Tumoloatëk isia. Kasusur in ëndo ari dumintju, ja sia mangilëk wò'o i muntëp

a gëreja, ta'an sia pinémia-miaitjé' i Ra'ana, éng kuana: „A si ari dumintjuoka maai ko ja muntép a gëreja.” Itjaambo ka'i-mai si ari dumintju iitu, mueio ka'i a si Ra'ana si toja'ang, éng kuana: „Jawo, e Ra'a iakupe' ka'itje' é muntép, intji.” Sumowato si Ra'ana, éng kuana: „O ra'ipe' re'e muntép ko, eng ko ng kumémés(é)pe' re'e, janta'an ko mindo wulinga', mio'mu kelean-ai in tjémésanu, sa tanuo im bulinga' ng kakulo', ja paalino-mai.”

Mio'oka si Toja'ang, pailékénao wawean sapi aiwa'kés an da'ter in dano. Siituoka sia pailékéno-mange i Sapi maali-ali im bulinga' wo ng kuana: „Kua'a ko maali-ali im bulinga'?” Sumowato si Toja'ang, ng kuana: „Kelean kua'a kine in tjémésan! sa kine tanuo si wulinga' anio' éng kakulo', ja paalino-mange.” Éng kuano i Sapi: „Wean-ai kémésan aku.” Sowaténo i Toja'ang si Sapi, éng kuana: „Mainde'ké' aku oreka kese'enu.” Éng kuano ka'i i Sapi: „Tio'o minde-inde' ko, ra'itja kua'a kese'engku n iitu.” Siituoka weano tu'u i Toja'ang kémésan si Sapi. Pailékéno i Toja'ang paku'uséngké' i Sapi, wo sia mainde'o wo ng kuana: „Paku'uséngké' re'e i Sapi i makémés.” Numuwu' si Sapi, éng kuana: „Ra'itja kua'a makese' én iitu.” Pakakémésan-ako i Sapi én iitu, ja pangilékéno i Tojaang. Iwe'e-mako i Sapi ng kinémésan, paalinao-mange am bale.

Itjatéka'-mange sia, éng kuao i Ra'ana: „Si sei é nisumembong nitjumémés?” Ja ra'itja wo'o itjua i Toja'ang. Janta'an kuano i Ra'ana: „Sa ra'itja itjuamu, ja ko tēpiangku.” Siituoka itjua tu'u i Toja'ang a si Ra'ana, éng kuana: „Si Sapi tu'uman é nisumembong nitjumémés.” Éng kuao i Ra'ana: „Woondo ja io'on-ai sia wo séra'an.”

Mando-mai mio'om tu'u si Toja'ang, wo ng kuao i Toja'ang a si Sapi: „Aitjuaké' i Ra'a in séra'an ko ja.” Sumowato si Sapi, éng kuana: „En aku n aitjuanaké' in sera'an, ja iuséw(é)ké'-mange én du'itju, eni!” Marengo-mange am bale si Toja'ang, turu'ano ka'i i Ra'ana tawoién, janta'an si Sapi ra'ipe' wineso'na-mai. Jawoja itjaambo ka'i in éndo ari du-

mintju. Mueio wo'o si Toja'ang: „Muntëpoka re'e itu aku, intji, e Ra'a?" Sumowato si Ra'ana, ëng kuana: „Ra'ipe' ka'i re'e muntëp ko ja, en sumiwope' in tjanën." Wo ki'itan eta' i Toja'ang. Ja ng kuao ka'i i Ra'ana: „Angen-ai si Sapi wo siwon." Jawoja mangeo muntëp si Ra'ana, ja mangeo-mai si Sapi si Toja'ang wo siwon. Mareng-ai si Ra'ana ë nimuntëp-wo, nimakasiwoo si Toja'ang, janta'an da'itja ambitu sia. Pangereno i Ra'ana sia mange re'e nimusëw in du'i i Sapi, ailowëng(ë)na sumama-sama'. Marengo-mai si Toja'ang, ja nitjumano si Ra'ana. Siituoka sia kumano.

Maja'oka pira ngando n an somoi-ai iitu, mangeo pailëkën i Toja'ang ën du'i i Sapi aiusëw(ë)na, ja nitumowo wo nimua'o im baja-waja. Pirao ka'i wona' ngando ng kaure, ja mangeo ka'i pailëkën i Toja'ang ën a niusëwana in du'i, ja nitumowo re'e sumawël si Inanga. Siituoka maio itjua i Toja'ang a si Amanga ëng kuana: „Sapaka si Ina', e Mama', ja nitumowo sumawël a niusëwangku in du'i i Sapi. Palingan-ako i Amanga n iitu, ja wo'mbo'ono i Amanga si Ra'ana. Maentos-ako sera in dua, ja mamaleo ka'i sumawël sera si Inang i Toja'ang iitu.

Anaitu si Ra'a i Toja'ang iitu ja wino'mbo'nao. Akar- (ë)kë' iitu.

25. Kukua an doro' i Wulur, sinisil i Albert Sumual, Sulu'uu.

Awoja makaanako-mai si ësa wewene lëngei, ja ësa toja'ang tuama, wo sia ningarananera im Bulur. A si makasaoka in sia im bangko'o, ja sia mëwëra-wëra' a no'o wo sia mitong paneti ësa. Ja ema'anao pësi paneti iitu; pakaema'ana-mako, ja sia mangeo mamësi a lawanan. Makaindoo sia, ja ësa pongkor tëkek. Kuano i Wulur: „O toro! waweangka re'e sëra'an kami i mëinang." Kuano ka'itje' i Pongkor a si Wulur: „Sa ro'na, tio'o sëra-sëra'an aku em baweang kua'a katoroanu an iaku-sa." Kumua si Wulur: „Ja sama' sa tani'tu." Kumua ka'i si Pongkor: „Sa awean ëm paawonu-sa, towangkë'-mai aku."

Iwëkaro tu'u-mio' i Wulur si Pongkor, wo sia marengo-

mange am bale. Ja a lalanoka sia, ja sia mailëk si anak wewene i Tjolano mange lumële'. Keilëk(ë)kë' i Wulur si Wawu' isia, ja si Wulur masale-sale' mindo isia pënana'an, wo itu mangena itjua a si Inanga. Janta'an sia aisero'kë' i Inanga, ng kuanao: „Tani'tuo in tjaléngaita, ja indonuo pënana'anu si Anak i Tjolano!” Ta'an palëlonoka i Wulur si Anak i Tjolano. Mando-mai ja sia ka'i mange mamësi a lawanan. Itjatëka'-mange a lawanan sia, ja sia tumowa si Pongkor: „O Pongkor, o Pongkor!” Siituoka ja mai si Pongkor wo sia mui a si Wulur, ëng kuana: „Kaitu-itu ko?” Kuano i Wulur: „Kaawi'i aku ja nimailëk si wewene Anak i Tjolano, ja isia si itjasale'ku indon pënana'an, ta'an da'itja toro en aku ja anak(ë)kë' i lëngai.” Kuano i Pongkor a si Wulur: „Mange a si Tjolano, wo wueien an isia, sa itjasale'na indonu pënana'an si Wawu' isia; tio'o minde-inde'.”

Siituoka marengo am balena si Wulur. An unëroka i lalan sia, ja sia mailëk si ësa sërëm mapulë-pulësoka. Wueiano i Wulur si sërëm: „Kaitu-itu ko?” Sumowato si Sërëm: „Wean-ai rano aku.” Ja weano tu'u i Wulur rano si Sërëm. Kuano ka'itje' i Sërëm a si Wulur: „Sa ko wawean ëm paawon an iaku-sa, ja towan-ai aku.” Wo si Sërëm maja'. Ja marengo ka'itje' am baleera si Wulur.

Mando-mai, ja sia mangem a si Tjolano, wo sia mangilëk sa ro'na indona pënana'an si Wawu' isia. Kuano i Tjolano: „Wueien an isia!” Wueieno an isia, ja sinowat(ë)nakë' in tana'i: „Sa ko wo ro'na mindo in sisim(ë)ku aitjatinëp an ta'asitj rararëman, ja aku masale' taneanu.” Marengo si Wulur, wo ë nuwu' i Wawu' mangena itjua a si Pongkor. Kuano i Pongkor: „Woondo ko ja mai ambia, wo itu iwe'ekuoka iitjo.” Marengo am bale i Inanga si Wulur. Jawoja woo-woondope' tu'u ja an ta'asitjo sia, wo sia tumowa si Pongkor: „O Pongkor, o Pongkor!” Ra'itja ure ambituo ka'i si Pongkor, wo ng kuanao: „Nio' kua'a iitu e.” Ja iwe'e-mako i Pongkor a si Wulur ën sisim; ja marengo si Pongkor, paalino ka'itje'-mangë i Wulur a si Wawu' ën sisim, Këpailëk(ë)kë' i Wawu' in iitu,

ja sia masale-sale' eng kinaereanao n sisim(ë)na. Kuano i Wawu' a si Wulur: „Eng ko nimakaereka in sisim(ë)ku, ja aku masale'ka taneanu.” Itjuaoka i Wulur a si Tjolano n aitjua i Wawu' an isia. Ja itjelongkë' i Tjolano si Wawu' ën tanean i Wulur. Am pa'pa'an in tani'tu, ja itintjaso-mange i Wulur an do'ong walina si Wawu', wo sera mangereo wale paëna-ëna'anera ambitu.

Awoja ure-ureanoka n an somoi-ai iitu, ja mangeo lumële' si pënana'an i Wulur. Wo sia pailëkën i mateir a se sapi i Tjolano. Mailë-ilëkoka si wewene isia si Mateir a se sapi, ja ra'io re'e kata'neiana se patei-teirana, wo sera kuman in tinanëm e tow an do'ong iitu. Ilëkënoka e tow ën tinanëmera kinaa-kaapuo e sapi i Tjolano, ja mangeerao ipakata'u a si Tjolano si Mateir a se sapi isera. Towano i Tjolano si Mateir a se sapi isera, wo ng kuanao: „Kaitu-itu ipawajamukë' se sapitju ë makan in tinanëm e tow?” Sumowato si Mateir a se sapi: „Sapaka ng kinawalian wo iwajaku se sapi nitjuman in tinanëm e tow, ja am pa'pa' aku i mëilë-ilëkoka si wewene ësa, isiape' ë lo'or e si pënana'an i Tjolano.” Siituoka si Tjolano mëkitowa si Wulur mënana' a si wewene iitu, wo indon i Tjolano mamuali pënana'ana si pënana'an i Wulur. Wo ng kuano i Tjolano: „Wulur! sa ko makalaput(ë)ka si tu'ura i po'po' anio', ja ko ra'itja to'tokëngku.” Ja sapaka si tu'ura i po'po' iitu ja ra'itja toro palaputën e tow; si sei ë lumaput in iitu, ja matekë'. Siituoka si Wulur mange tumowa-mai si Pongkor wo itu sisilëna a si Pongkor. Kuano i Pongkor: „Tio'o mainde-inde' lumaput(ë)kë' ta'an sa ko an dangka'o-sa, ja mindo-mai këmbal ësa, wo itu irokor(ë)mu-mai, wo paalin am balemu, wo kimbengën-ange ën iitu.” Jawoja marengo si Wulur, wo sia lumaput si po'po' iitu. An dangka'oka sia, ja sia mindo-mai ësa këmbal, tanu in aitjua i Pongkor. Ja palinao-mange am balena si po'po' iitu wo kimbengëna. Paka-kimbengëna-mako n iitu, tumowo-mai ambitu ësa wewene lo'or wo sia indona pënana'ana.

A si makasa si pënana'an i Wulur makasake an tëtëngoan

makasere se sapi i Tjolano. Ambituoka sia, ja sia pailėkėn i Mateir a se sapi isera; ja kėilėk(ė)nakė'-mange isia, ja mangelao ipakata'u a si Tjolano si wewene isia. Kuano i Mateir a se sapi: „Sapaka aku, e Kolano, ja mai makata'u si Wulur, in sapaka sia ja waweano ka'i pėnana'an ėsa, isiape' ė lo'or e si pėnana'ana-wo.” Siituoka ipėkiindoo ka'i i Tjolano si wewene isia n a si Wulur. Kuano i Tjolano a si Wulur: „Sa ko makaindoka in dano mėnoi-now, ja ra'itja patengku ko.” Mangel ka'i an ta'asitj si Wulur, wo tumowa si Pongkor: „O Pongkor, o Pongkor!” Siituoka mai ka'i si Pongkor wo ng kuana a si Wulur: „Kaitu-itu ko?” Sisilėno-mange i Wulur an isia sapa ė nimamuali an isia. Kuano i Pongkor: „Sumakekė'-mai a litjur(ė)ku, wo ko paalingku-mange a si tana' wawean si Rano mėnoi-now iitu.” Kuano i Wulur: „Tani'tu in tjatėkek(ė)mu, ja ro'na sakeangku?” Siituoka mawangko'o-mai si Pongkor isia, wo sia sakean i Wulur, wo sera lumaaur. Malau-lauroka sera, ja si Pongkor mailėko ėsa tana' an tajang. Siituoka ng kuano i Pongkor a si Wulur: „Nange kua'a si tana' wawean in Dano mėnoi-now e.” Itjatėka'-mange a si tana' iitu sera, ja si Wulur itana'o i Pongkor. Pailėkėno i Wulur, wawean ėsa wewene mėluku-lukut an tėmbir in saroinsong, wo wueiana si Wulur: „Mawisa ko?” Sumowato si Wulur: „Sapaka aku, ja mai mindo si Rano mėnoi-now anio'.” Ɛng kuano i Wewene iitu: „Sa ko mindo iaku pėnana'anu, ja sama' ro'na mindo rano.” Sumowato si Wulur: „Sama', e niindoo i Tjolano si pėnana'angku-wo.” Ja mindoo im bowong ėsa si Wulur, warengana in Dano mėnoi-now. Pakatu'tulėna-mako n iitu, ja sera in dua sumakeo a si Pongkor e marengo. Itjatėka'-mai an tana'na sera, ja si Rano iitu paalino-mange i Wulur a si Tjolano. An tawioka im bale i Tjolano, ja itjalėpoko ėm bowong, iaka-akar in aitjatia' ėn Dano mėnoi-now.

Awoja mėmėndu-mėmėnduoka si Wulur, am pa'pa'an sia ja patengkė' i Tjolano, en da'itja maali-ali si Rano mėnoi-now iitu. Siituoka sia tumowa si Sėrėm. Maio si Sėrėm mėwuei:

„Kaitu-itu-wo?” Sumowato si Wulur: „Itjaupus-ai aku am pa'pa'an aitia'kuké' si Rano mēnoi-now iitu. Ja aitjua i Tjolano sa, kine, ra'itja paalingku-mange an isia si Rano iitu, ja patena, kine, aku.” Kuano i Sērēm: „Eng ko nitumawang iaku-wo, ja tawangēngku ka'itje' ko.” Siituoka si Sērēm iitu mange tumowa-mai se kasērēm(ě)na, wo sera mai mindo si Rano menoi-now aitjatia' iitu, akar im pinakaindo-indoera, wo paalin-ange i Wulur a si Tjolano si Rano iitu. Janta'an se Wulur ja mainde-inde'oka ě maěnto-ěnto' a si ro'ong iitu, anaitu sera tumintjaso. Awoja sera in dua sumakeo a si Pongkor, mange an do'ong i Wulur, wo mangeo mēnto' am bale i inanga. Akar(ě)ké' iitu.

26. Kukua an doro' i Wutul, sinisil i Elisa Tengor, Sulu'un.

Awoja mawangko'o-mai si toja'ang anio', ja sia mapaema' londei wo pēsi si amanga. Kini'itam baja i amanga. Siituoka tumo'tolo sia ě mange mēngamēsi-mēsi. Mangeo mamēsi sia, ja ra'itja nimindo, wo sia marengo-mai a si amanga ěng kuanao: „Tja maindo, e Mama'! ema'angkupe' sumawel ěn iasa ja.” Siituoka ema'anao; pakaema'ana-mako n iitu, pailē-kēno i amanga ěng kuanao: „Kua'a itu n iana nirondor(ě)-muo!” Sowatēno i Wutul ěn iitu, ěng kuano: „En aku ě ningarananu im Butul, ja wutul ěn iana.” Ja sia mangeng ka'i mamēsi.

Itjatēka'mange a lawanan, itontonao-mio' ěm pēsi. Mio'nao we'mbetēn-ai, ja pongkor wangkēr si niindo-mai im pēsi. Kamang in am bawoo in dano, ja ipēwe'ena wo'on a londei, ta'an mēkiampungo-mai si Pongkor ěng kuanao: „O ampung, e Wutul!” Sowatēno i Wutul: „O ra'itja toro, pa'pa'an aku ja ureo ě mēmēsi-mēsi ra'ipe' nimindo-mako, ja tarepe'o tu'u.” Siituoka ng kuano i Pongkor: „Sa ro'na, ja ampungan-ai aku, wo sapaoka ěm pangilēkēnu an iaku, karēngang ka'itje' ko en tawangēngkuoka, wo itjuaku iitjō: sa ko mēkitawang iaku, ja mai rumangat tana'i: O Pongkor, ěn ta'ar(ě)mu an iaku! ěng kērangat(ě)mu iaku, ja tarepe' aku tumo'or(ě)ké'-mai an

dior(ě)mu." Siituoka ng kuano i Wutul: „Anae uli-ulit?" Sumowato si Pongkōr: „Ulit." Kuano ka'i i Wutul: „Sama' sapaka ko, ja iwěta'kukě'."

Siituoka marengo-mai ang katana'an si Wutul, ta'an sia ra'io nimareng a si amanga; ěm binarengana-mai nimaioka a si Tjolano e Sělam. Awoja itjatěka'-mai ambitu sia, ja nima-ěně-ěněpe'. Pailěkěnao wawean ěsa Wawu' n a si Tjolano. Si Wawu' anio' ja paroma'an i mapatitj a si Tjolano. Palinanao, měnta'arano si Wawu' wo si Mapatitj, ěng kuanerao: „Tuminting in tělu ja kita tumi'ir ěn ambia; anae a si oras iitu alero se kawajo sakeanta, ěng kita ja mangepe' a si tana' an sangawiwi." Ja waja in iitu ja pěma'a-ma'aněn i Wutul. Siituoka serenaosumama-sama' ěm pėkaraiěn i Mapatitj, ja n iitu kulo' waja. Siituoka sumawělo karai wo salana si Wutul, aiti'iit(ě)na an tambisa ěm pėkaraiěn i Mapatitj. Tumintingo in tělu kuananao si Wawu': „Sumakeo kita." Siituoka sumakeo tu'u sera, wo sera maja.' Měmaja-maja'ka sera, ja kaěndoano, wo pailěkěno i Wawu' si Wutul, ra'itja si Mapatitj. Kuano i Wawu': „Tumambisape'? Itjoo tare! Měmaja-maja'o tare!" Wo sera itjatěka'-mange a si tana' an sangawiwi. Ambituoka sera, ja sera mailěk ěsa wale, wale i Maěsa-ěsa wo sera tumuli ambitu. Wueiěno-mio' i makawale: „Tonapa kamu?" Sowatěnerao-mange n iitu: „Tow an tana' sangawiwi wo mai, ta'an sapaka kami masale' wo'o mėkiinang iitjo." Sowatěno i Ma-ěsa-ěsa n iitu: „Toka aku ě lěngei!" Kuano i Wawu' wo si Wutul: „Itjamipe' ka'i ě lěngei ja." Siituoka ng kuano i Ma-ěsa-ěsa: „Sama', sa kamu masale' indongku anak." Měnto'o tu'u ambitu sera.

Mando-mai lumangkoio-mai si Malukar a se sapi, marintuk se sapi. Sumereo-mange si Wawu' sia, ěng kuanao: „O ire', kalo'or si Wawu' anu mange!" Ja makasereoka-mange sia, ja itjasěraro se sapi, wo muntěp im patinaněman. Pailěkěn-ako e makatinaněm se sapi, ja si Malukar anio' mangeerao ipakata'u a si Tjolano. Wueiěno i Tjolano a si Malukar. Sowatěno i Malukar a se sapi: „Ja ulit, pa'pa'an aku, ja nima-

kasereoka am bale i Maësa-ësa ja waweam Bawu' lo'or. Ma'an si pënana'an i Tjolano, ja isiape' ë lo'or." Siituoka ng kuano i Tjolano: „Nae uli-ulit?" Sumowato si Malukar a se sapi: „Ja ulit, ma'an ipëkitowa." Siituoka ng kuano i Tjolano: „Ja mange towan-ai." Angeno tu'u-mai sia. Ja maio pëputembo si pënana'an i Tjolano, ja uli-ulit isia ë lo'or. Kuano i Tjolano a si Wutul: „Ja sapaka ko lumaput im po'po'. Sa ko ra'itja makaange ja karëngan ko rantongën, ën si Wawu' ja indongkukë' an iitjo." Siituoka marengo-mange a si pinëkiinangera si Wutul; pëwueiëno i Inangera: „Kua'itu ko tëkuroka e itow?" Sumowato sia: „Uanu ja niindokë' i Tjolano si Wawu' wo aitjuana ka'i aku, lumaput, kine, im po'po'; ja sa, kine, aku ra'itja itjaange ja rantongën." Siituoka ng kuano i Inangera: „Tja wo'o wana si roro'na tumawang iitjo?" Kuano i Wutul: „Ja wawean de'e itu."

Siituoka ja sia mange rumangat si Pongkor, ëng kuanao: „O Pongkor, ën ta'ar(ë)mu an iaku!" Kërangat(ë)nakë', ja kumësoto-mai an saru-saruna si Pongkor, wo ng kuanao: „Sapa n iitu?" Kuano i Wutul: „Sapaka aku ja airu'ndu' i Tjolano lumaput im po'po'." Kuano i Pongkor: „Ja sama', mangeo lumaput." Lumaputo tu'u, ra'itja aitjalëpok, ta'an po'po' niindona ja rua, si ësa aira'mbas, si ësa airojor(ë)nakë'. Mandomai in dangka'o si ëndo, ja mare'omo si Wutul. Siituoka te'telënao si po'po' airojor. Këte'tel(ë)na in iitu, ja mio'o kumësot-ai si Wawu' ësa; isiape' ka'i ë lo'or e si Wawu' niindokë' i Tjolano.

An tutuw iitu, mangeo ka'i maja'-mai si Mawali-wali se sapi, wo sia itjasere-mange si Wawu' a mange m bale i Maësa-ësa. Makasereoka ka'i-mange sia, ja itjasëraro ka'i se sapi wo mange muntëp in tinanëm. Mangeo ka'i makata'u a si Tjolano si makatinanëm. Wueiëno i Tjolano a si Mateir a se sapi. Sumowato sia: „Ja sapaka aku nimailek ka'i ësa Wawu' am bale i Maësa-ësa, isiape' ka'i ë lo'or e si Wawu' niindo i Tjolano." Siituoka angeno ka'i-mai si Wawu' tinimboiangkë' ka'i i Tjolano. Kuanao a si Wutul: „Ja sapaka ko

mere si Rano Manuwu'." Siituoka mangeng ka'i a si Inanga si Wutul. Itjatēka'-mange sia, ja tēkuroka. Kuano i Inanga: „Kua'itu ko tēkuroka ka'i?" Sumowato sia: „Ja aku wo tēkuroka ja niindokē' ka'i i Tjolano si Wawu' wo itjuanao ka'i an iaku, mangere, kine, si Rano Manuwu'." Kuano ka'i i Inanga: „Tja ka'i wana si roro'na tumawang iitjo?" Sowatēno i Wutul: „Wawean de'e itu." Mueio ka'i si Inanga: „Si sei tja'i?" Sumowato si Wutul: „Si Pongkor." Siituoka sia mange rumangat si Pongkor, tanu in susuina an isia. Tani'tu mio' ka'i kumēsot-ai an dior(ē)na si Pongkor, ēng kuanao: „Sapa ka'i itu?" Sumowato si Wutul: „Kinuanang ka'i i Tjolano aku, mere, kine, si Rano Manuwu'." Kuano i Pongkor: „Sama', maio wo ipakawalitju."

Mēmaja-maja'oka sera, ja sia turu'ano tu'u i Pongkor si Wawu' makalukar a si Rano Manuwu' wo susuianao si Wutul ēng kuanao: „Sapaka ko, mange an isia kumua-mange i maere-ere si Rano Manuwu' sa pēwueiēn i Wawu' mateir ambitu, eni?" Mangen si Wutul wo wueiēno tu'u i Wawu' ambitu. Ja sinowat i Wutul tanu in aisusui i Pongkor. Siituoka mangilēko rano si Wutul. Kuano i Wawu': „Ja mindo re'e mio' sangatintjo'." Makaindo-mako rano si Wutul, ja sia maja'o wo'o, ta'an kuano i Wawu': „E Wutul, ambisa m pa-angeanu?" Sumowato si Wutul: „Mareng tu'u am bale ja." Kuano ka'i i Wawu': „Ja sapaka aku masale' kumi'it iitjo, en iitjo ē nimakaere iaku. Nae ambisa ēn angeanu ja ambitu aku." Sowatēno i Wutul: „Toka aku ē lēngei." Kuano i Wawu': „Mande tani'tu, iitjoo ē nimakaere iaku" Sowatēno ka'i i Wutul: „Ja sama'." Mangen sera nimēla'u-la'us ka'i-mange am bale i Maēsa-ēsa.

Awoja ambituoka sera, mangeo ka'i maja'-mai si Mengawali-wali se sapi, wo sumere ka'i-mange. Makasereoka ka'i-mange sia, ja itjasēraro ka'i-mako am patinanēman se sapi. Mangeo ka'i makata'u a si Tjolano se makatinanēm. Putusēno ka'i i Tjolano, ja sinowat(ē)kē' i Méngawali-wali se sapi in tana'i: „Ja sapaka aku, nimailek ka'i ēsa Wawu' am bale i

Maësa-ësa, isiape' ë lo'or e se Wawu' niindo i Tjolano." Siituoka ipëkiangeo-mai i Tjolano si Wawu' isia. Maio sera ëng kuano i Tjolano a si Wutul: „Sapaka sia, ja timboiang-kukë' ka'i, ta'an karëngan ko mangere si Rano Pera." Ja mangem ka'i a si Inanga si Wutul, tékuroka ka'i-mako. Wueiano i Inanga sia, ëng kuanao in sumowat: „Sapa eta' niindokë' ka'i i Tjolano si Wawu', kinuanana ka'i aku i mangere si Rano Pera." Wueiano ka'i i Inanga sia: „Jo wo'o wana si roro'na tumawang iitjo?" Sumowato si Wutul: „Wawean, si Pongkor ka'i re'e itu." Siituoka mangem ka'i a lawanan sia wo rumangat si Pongkor. Kërangat(ë)nakë' ka'i, ja mio'o tumo'or-ai an dior(ë)na si Pongkor, wo mëwuei: „Sapa ka'i itu?" Sowatëno i Wutul: „Mangere kine ka'i si Rano Pera." Kuano i Pongkor: „Sama', kumi'it-ai iaku." Maja'o ka'i sera mange a si Rano Pera. An unëroka i mawaja' ja ng kuano i Pongkor: „Mangem, iitjooka ë mange, makar(ë)kë' ambia'i aku. Sa ko mange ja kumua i mangere-ngere si Rano Pera, sa pëwueiënera." Itjatëka' tu'u-mangë si Wutul, ja pëwueiëno i Mateir a si Rano Pera. Sowatënao ën iitu tanu tu'u in aisusui i Pongkor. Kuano i Malukar a si Rano Pera: „Ambisa ën angeanu, mange aku." Siituoka maio am bale i Maësa-ësa sera. Ambituoka sera, mangeo ka'i maja'-mai si Marintuk se sapi, wo sia itjasere-mange si Wawu' a mange m bale i Maësa-ësa. An tutuw iitu itjasëraro ka'i-mako se sapi, wo mangeo ka'i makata'u a si Tjolano si makatinanëm. Wueiano i Tjolano si Malukar a se sapi, sinowat(ë)nakë' in tana'i: „Nimailëk ka'i si Wawu' aku, a si wale pinailëkangku se pira-pira Wawu' niindo i Tjolano, wo an tutuw(ë)ku i makasere, ja se sapi muntëp in tinanëm." Kuano i Tjolano: „Angen-ai." Itjatëka'-mai si Wawu' Pera, ja niindokë' ka'i i Tjolano; kuananao ka'i si Wutul: „Sapaka ko, ja mangere-mai si Rano Paser. Sa ra'itja makaere si Rano iitu ja rantongën tu'u ko."

Maio a si Inanga si Wutul. Itjatëka'-mai sia, ja sia tékuroka ka'i-mako. Wueiëno i Inanga sia: „Kua'itu ko ra'io mintjaja'-

mai?" Sowatēnao n itu ēng kuanao: „Niindokē' ka'i i Tjolano si Wawu'. Ja kinuananao aku mangere kine si Rano Paser." Kuano i Inanga i mēwuei: „Ra'io tu'u wo'o wana ēn do'na tumawang iitjo tanu si nimatawang iitjo a se pira-pira Wawu'?" Sumowato sia ēng kuanao: „Si Pongkor ka'i wo'on ja." Siituoka ka'i mangeo rumangat si Pongkor si Wutul. Kumēsot-ai an dior(ē)na si Pongkor wo mēwuei: „Sapa ka'i n iitu, e Wutul?" Sumowato si Wutul: „Ēn iparangat(ē)ku iitjo, ja mere kine ka'i si Rano Paser." Siituoka ng kuano i Pongkor: „Sama', maio, kumi'it-ai iaku." Maja'o ka'i sera; mēmajamaja' sera akar i mailēk si Rano iitu." Mangilēko rano si Wutul. Kuano i Wawu': „Sama', makaere, ta'an ambisa n angeanu? Aku masale' kumi'it iitjo." Kuano i Wutul: „Sama', mande aku i lēngei."

Siituoka maio sera. Itjatēka' ka'i-mai sera, ja tanukē' ka'i i niema-ema' i Tjolano an isia a se pira-pira Wawu'na. Siituoka ng kuano e Wawu' anio': „Sapaka si Wutul, ja pangilēkēnta a si Tjolano in to'tokēn." Awoja to'tokēnerao tu'u sia. Pakato'tokēn-ako sia, ja waja se rano nierena ja ailēle' waja e Wawu' in tino'tok. Itjaiwa'mbarera-mio' in dano iitu, ja tumowo-mai si Wutul, isiaoka ē lo'or e si Tjolano. Kēilēk i Tjolano in tani'tu, ja sia mēkito'tok. To'tokēn e Wawu' si Tjolano, ta'an da'itja niema'era tanu si Wutul. An somoi-ai iitu si Wutuloka ē nisumawēl a si Tjolano, akar in isiaoka ng Kolano e waja im pinapērenta i Tjolano tino'toko.

Akar(ē)kē' iitu.

27. Kukua a si Rumangu wo si Rameitjau'.

Sapaka si Rumangu wo si Rameitjau', ja mēngēnto-ngēnto' an Dumo'ong, ja sera in dua mēontolan, ta'an makakēli-tjēli sera mēmēnsuluan-io' tani'tu wo makakēli-tjēlika mēmēlēloan en da'io ipakakua-mange ē lēloera.

Kaindo-indono-mai a si makasa ka'i pinēsuluan i Rameitjau' si Rumangu wo ng kuano i Rumangu: „Inde'! sa ko mēsulu-

sulu-mio' tani'tu an iaku, ja aku tumintjas(ě)kě'." Sowatěno i Rameitjau': „Sa ko tumintjas, tondongangkukě', mande ambisa ěn tintjasanu." Niulit re'e i Rumangu ě nuwu'na, en sia n tumintjaso, kumi'it wo sumalu'suk-eko in dojongan in Dano i Apo'. Kěkailěk-ai i Rameitjau' in ši Rumangu nitumintjaso, ja tondonganao, wo ěngatěna sia, ja pailěkěnao ang keitjei ja si Rumangu nisumě'sěk-eko in Dano i Apo'. Pěngi'i-ngi'itěna se tu'us in tjeitjei iitu. Měmaja-maja' si Rameitjau', akar i makatajang, wo mailěk si ěsa kosei, wo wueiana sia: „E kosei, ra'itja nimailěk si Rumangu ko?" Sumowato si Tjosei: „O inde', nilumangkoio tarepe' sia, nitjume'os re'en an iaku, serenu kua'a-mai ěn ipus(ě)ku, lěmparoka eng kinake'osana." Awoja siituo ng kinatu'uran-ai wo n ipus e kosei ja lěmparoka, am pa'pa'an ěn ipusera-wo ja purengkeitjě'.

Kělinga i Rameitjau' in si Rumangu ja pinailěk i Tjosei, kua'a sia ě mamorako maja'. An tutuw(ě)na i mawaja', ja sia manani tana'i:

„Rumangu, Rumangu! ěnto'an, ěnto'an
si Rameitjau', em běnduo, ei!"

Makanani-mako, ja sia mailěko ka'i si Tili'tjir, wo wueiana: „E Tili'tjir! ra'itja pinailěk(ě)mu si Rumangu?" Ěng kuano i Tili'tjir: „O inde', sapakě' aku wo makatili'tjiroka, tinulina kua'a tarepe'." Ja am pa'pa'ano iitu wo se tili'tjir tani'tu m bawangunan, niange-mai in tinuli i Rumangu, e in dior-wo sera ja makarondor(ě)kě'.

Maja'o ka'i si Rameitjau' wo numani tanu si aipananina tarepe':

„Rumangu, Rumangu! ěnto'an, ěnto'an
si Rameitjau', em běnduo, ei!"

Měnani-nanioka sia, ja sia ka'i mailěk si Tjuměkěpa wo wueiana: „E Kuměkěpa! ra'itja pinailěk(ě)mu si Rumangu?" Sumowato si Tjuměkěpa: „O inde', sapakě' aku wo makakěpaoka am batu, aitjasu'su' kua'a an iaku sia, wo aku aitjawangkil-ai." Awoja siitu ka'i ng kinawaliam bo se patu'ulěn kuměkěpa ja makalengket(ě)kě' kaapa makakěpakě' am batu,

ja i mande ang karëpëtan in dano, sera ja ra'itja itjarojong, ta'an makatangka'kë'.

Maja'o ka'i si Rameitjau' wo numani tanu ka'i se aipananina ririor. Mailëko ka'i warukus i lépo sia wo wueiana: „e Warukus! ra'itja nimailëk si Rumangu ko?” Sumowato si Warukus: „O inde', nilumangkoio tarepe' sia, wo aku aité'tëp(ë)na a lépo.” Ja siituo ë nimange-mai wo ëm paënto-ënto'an e warukus anio' ja a lélépoangkë', iaka-akar sera patu'ulëngkë': „lépo.”

Maja'o ka'i si Rameitjau' wo numani ka'i wo'on, ta'an palinganao patondongangkë' i Warukus nuwu' ng kuanao: „Nisume'pang-ange ambana sia, nimange, kine, am balena en ambana ëm balena.” Siituoka ki'itano i Rameitjau' ë nuwu' i Warukus; ja ra'io tajang ëm binaja'ana-mange wo pailëkënao ëm bale i Rumangu. Awoja angen i Rameitjau' ja makaëna' witu sia. Mëmailëkan-ange sera, ja sera mëngkë'këpano, wo ra'io ipakakua ëng kasale-sale'an i Rameitjau', eng kinaereanao si Rumangu. Numuwu'o si Rumangu ëng kuanao: „Me'e, kakajanta!” Këkakajakë' i Rumangu, ja mëruto-mai ën uran dëpët, ra'io nimapo'o-po'ow ën a si sangando wo sangawëngi, iaka-akar sera in dua aitjawëimbën am bale i Rumangu. Mënës-ako ën uran, kua'a ka'i si Rumangu ng kumakajao; ëng kinakajana ja kareta kara-karapi e kawajo ambituo. Siituoka sera mëngkuanano i marengo an do'ongera, wo mio' pailëkën e po'owera sera ë nitumaneo. Ta'an sera rumondakë'-mio' in tjareta, ra'io nimaja'. Tani'tu sera sumakeo ang kareta e mio'om. Itjatëka'-mio' an Dumo'ong sera, ja itjakaja'ka'kë' e po'o-po'owera in sera ë nimarengë'-mai em pa'pa'an sera pinaere-ereera ra'itja kinaerean, wo'o'pe' itjakaja'ka'era i makasere si Rumangu nimasija'o, aweano kareta wo nitumaneo a si Rameitjau'. Siituoka se po'o-po'ow mërioro rumu'kup-ange ruru'kup, ra'io ipakakua ëng kakëli.

**28. Kukua an doro' i Tjérisén, sinisil i Narcissus
Lantang, Sulu'un.**

Kaindo-indono-mai a si makasa ja si ésa tare-tumow ma-roma' a si Wawu'. Janta'an si Tare-tumow isia ja ra'itja iwe'e i Tjolano tumane a si Wawu'. Siituoka mēnuwu-nuwu'o si Tare-tumow wo si Wawu', in sapaka sera ja tumintjaso, en tani'tuké' én deken i Tjolano. Kuano i Wawu' a si Tare-tumow isia: „Ja tana'i: kēkokow-ai e kokow, ja maimuo' alerén se kawajo i mama' sakeanta. Sawo pinakaaler(é)muo, ja maio rosorén am bo'so aku, wo turukén-ange an tētēngoan.” Sumowato si Tare-tumow: „Ja sama', siitu éng ki'itan.” Awoja mapo'o-po'ow-ako é nuwu'era kua'a si Tare-tumow é marengo am balena.

Kaindo-indono-mai sapaka si Tjérisén én an tutuw iitu, ja malukar a si Tjolano; anaitu pinakapa'ana ém pinēnuwu-nuwu' i Tare-tumow wo si Wawu'. Awoja ra'ipe' nitjumokow se kokow, mangeo alerén i Tjérisén se kawajo, en itintjas(é)nao si Wawu'. Pakaaleréna-mako se kawajo, ja mangelao rosorén am bo'so si Wawu' wo turukéna an tētēngoan; aipakaki'i-tji'it(é)na tanu im pinēnuwu-nuwu' i Tare-tumow wo si Wawu'. Awoja isakena-mako a si tjawajo si Wawu', ja sia sumakeo, wo sera tumintjaso tumaja-tajang, akar in da'io ro'na kaerean i Tjolano. Ja am pa'pa'an im bēngipe', anae ra'itja kinatu'-usan i Wawu' in si Tjériséngké' é mawali-wali isia. Awoja kamang in tajango ém binaja'anera, wo nimuntépo an talum bangko', ja sera kaēndoano. Makaēndo-mai sama' katu'usano i Wawu' in si Tjériséngké' re'e é mawali-wali isia. Siituoka éng kuanao: „E, Kérisén! kaitu-itu ko nitumowo'an iaku? Itjuaku ko ja si maroma' an iaku!” Sumowato si Tjérisén: „Anae tambisa ko; marengké' kaapa kumi'ito iaku, en aku ja mēla'u-la'us(é)ké'.” Sumowato si Wawu': „Tumambisao rake; ra'itja kumi'ito iitjo? e mainde'oka aku é mareng.”

Siituoka maja'o sera in dua, akar in itjatéka'-mange a lawanan. Mēlawalawanoka sera, ja sera mailék si ésa pongkor

wo sia indon i Tjërisën. Siituoka ëng kuano i Pongkor: „E Kërisën! tio'o sëra-sëra'an aku.” Kuano i Tjërisën: „O ra'itja, karëngan ko en sëra'angku.” Kuano i Pongkor: „Tio'o sëra-sëra'an aku, ta'an tana'i: mindo-mai tëlû kumi an iaku ko, wo sa ko makaere kawënduan akar-ange inania ja mindo-mange ësa a se itu wo rëngisan-io' tēkek, tarepe' aku ambitu.” Siituoka mindoo tëlû kumi si Tjërisën wo si Pongkor iitu iwëkar(ë)nao.

Tani'tu rumesoo ambitu si Tjërisën wo si Wawu' muntëpo in talun. Mëmaja-maja'oka sera, mailëko in ësa rojongan, parojongan-ai in ësa munte. Siituoka ng kuanerao: „O, karëngana tawioka n do'ong em baweano munte pinailëk.” Wo sera sumalu'suko si rojongan iitu, akar in itjatëka'-mai am bale i Maësa-ësa. Awoja itjatëka'-mai ambitu sera, ng kuanerao a si Maësa-ësa: „E apo', pëkiinangënamio tare ko?” Sumowato si Maësa-ësa: „O inde', iakuo ndo'on pëkiinangëniow? Sumereo-mai, ra'itja wana sapa-sapa ën an iaku ë maindo tëlâ'uëniow.” Kuano i Tjërisën wo si Wawu': „Mande tani'tukë', ta'an itjasale'ami tjo ëm pëkiinangënami.” Kuano i Maësa-ësa: „Ja sama', tani'tuo kua'a.” Siituoka si Tjërisën wo si Wawu' mënto'o am bale i inangera.

Kaindo-indono-mai ang këtintjase' i Wawu'-wo, sia nimaali im pakakajaan i amanga, anaeitu pirape' ngando ang kaso-moian-ai in sera mëngënto-ngënto'o a si pinëkiinangera, ja sera kumakajao wale paser, karapi e ipalo'or in am bu'mbu' im bale ja ambituo waja. Këilëk i Tjolano a si ro'ong iitu ëng kalo'or im bale i Tjërisën wo si Wawu' ipawali-walina, kua'a sia ë mangaja'ka'o wo si Tjërisën tawoianao in toang, wo ro'na ëm bale karapi i Wawu' kaereana. Ën toang itawoi i Tjolano si Tjërisën, ja sia iru'ndu'na-mitjo am Paondolan i Ëndo. Awoja sa si sei ë mitjo ambitu, ja ra'io ipëngakawareng-ako em papatengkö'-mai e tow a mitjo mbitu. Towano i Tjolano si Tjërisën wo ng kuana: „E Kërisën! karëngan ko mindo tintjo' wo iitjo-mai rano am Paondolan i Ëndo.” Pakanuwu'an-ako i Tjolano si Tjërisën ja sia maja'o. Ta'an

sia ẽ mawaja'-mitjo karapi im bẽndu ẽn ate, pa'pa'an kailẽ-
ilẽkana in sapaka sia ja ra'io itjawareng-ako, mateo-mai a
mitjo mbitu. An unẽr(ẽ)naoka i mẽmaja-maja', makata'neio
sia ẽng kuana: „O inde', maali-ali re'e itu kumi i Pongkor
aku e!” Siituoka rẽngisana-mio' tẽkek si tjumi ẽsa, tumarepe'
tu'u-mai ambituo si Pongkor wo ng kuana: „Sapa ng kawẽn-
duanu, eng ko ẽ nimẽkitowa iaku?” Sumowato si Tjẽrisẽn:
„Sapaka aku ja airu'ndu' i Tjolano i mitjo-mai rano am Pa-
ondolan i Ẽndo. Ja sa mitjo ambitu, ra'io ipẽngakawareng-ai,
mẽngapateoka-mai a mitjo mbitu.” Kuano i Pongkor: „Tana'i:
sumakeo-mai an iaku ko, wo iwalitju-mitjo, ta'an tumo'tol-itjo
ambia akar in itjatẽka'-mitjo ambitu, tio'o manuwu-nuwu' mande
pẽtambisanerao, tio'o mẽngku-ẽngkut, en tia' ko mate.”

Pakanuwu'an-ako i Pongkor si Tjẽrisẽn, ja sera maja'o.
Itjatẽka'-mitjo am paasuan am Paondolan i Ẽndo sera, ẽng
kuano i Pongkor a si Tjẽrisẽn: „Ja masuo ambia'i.” Siituoka
sia masuo, wo pakaserena tu'u se Wawu' malukar a si rano
iitu toka sapa ng kakeli. Ra'itja maure-ure an unẽr i Tjẽrisẽn
i maasu, maio si ẽsa Wawu' wo ng kuana: „E rombit! kaitu-
itu ko marombit in dano palukaranami?” Ja ra'itja tu'u ni-
maẽngku-ẽngkut si Tjẽrisẽn, akar(ẽ)na i nimakaasuo. Makaasu-
mako sia, sumakeo a si Pongkor sia, wo sera makom.

Kamang sera i mawaja'o ẽng kuano i Wawu': „E, kumi'ito
tare itjamu aku, mainde'oka eta' aku ẽ mẽnto': nirombitano
ẽn dano, itjaẽmbowo kua'a i apo' makarano aku.” Siituoka
kumi'ito si Tjẽrisẽn si Wawu' isia. Itjatẽka'-mako an tinowaan
i Tjẽrisẽn si Pongkor sera, kua'a sera ẽ mẽtalitjuro; si Pongkor
nimangem am balena, si Tjẽrisẽm bo si Wawu' nimakom am
bale i Tjẽrisẽn. Itjatẽka'-mako am bale sera, itẽla'u i Tjẽrisẽn
ambitu si Wawu' karapi in dano. Siituoka si Tjẽrisẽn mangem
a si Tjolano, wo ng kuana: „Nimarengo aku ja.” Pailẽkẽno i
Tjolano in ambitukẽ' sia, kua'a sia ẽ mangaja-ngaja'ka'. Siituoka
ng kuanao: „Ja sama' re'en e nimarengo.” Kasomoian-ai iitu
iru'ndu'o ka'i i Tjolano si Tjẽrisẽn mako am Pauntẽpan i
Ẽndo, en ambitu ka'i tanu i maitjo am Paondolan i Ẽndo.

Awoja si Tjërisën ë nimako am Pauntëpan i Ěndo, tanukë' ka'i in tjëitjona am Paondolan i Ěndo, e mako ka'i nimakawali-mai ësa Wawu'. Itjatëka'-mitjo am bale i Tjërisën sera, ja itëla'unao-mio' ambitu si Wawu' wo n dano, wo sia mangem a si Tjolano. Kuanao a si Tjolano: „Nimarengo aku ja.” Pailëkën-io' i Tjolano in si Tjërisën ambitukë' ka'i, ja sia mangaja-ngaja'ka' ka'i, en si Tjërisën nimarengkë' ka'i-mai. Siituoka ng kuano i Tjolano: „Ja sama' re'en, eng ko nimarengo.”

Ang kasomoian iitu pa'pa'an pailëkën i Tjolano in da'itja mate si Tjërisën, ja iru'ndu'nao se tow ë moimbong kaju këli-tjëlin, en si Tjërisën isuwa' ambitu. Awoja kaëmbu-ëmbungo im boimbon ja si Tjërisën iruruko ambitu, wo sia mate. Mate-mako sia, ëng kuano i Tjolano: „Ra'io, nimateo tu'u.” Awoja pailëkën-ako i Wawu' niako-mai i Tjërisën am Pauntëpan i Ěndo wo si Wawu' niitjo-mai am Paondolan i Ěndo in si Tjërisën nimateo, ja ng kuanerao: „Ra'itja re'e wewene kita sa ra'itja katowanta sia.” Siituoka ipangilëkera uran ilësëm am boimbon, wo ro'na ën du'i i Tjërisën ra'itja makaapu. Mate-mako ën api, ja umungënerao n du'i wo pëtulusënera. Pakatulusënera-mako n iitu, ja umungënerao ka'i n awu, wo iwu'mburera an du'i tinulusera. Siituoka n iitu na'amënerao in dano niitjo-mai i Tjërisën am Paondolan i Ěndo, wo ë niako-mai am Pauntëpan i Ěndo. Ipakana'amera-mako n iitu, mio'o tu'u tumo'or-ai si Tjërisën, nimamualio ka'i tow tanu in dior.

Kasomoian-ai iitu mereo ka'itje' lalan si Tjërisën an duma-itja si Tjolano. Mangeo mui a si inanga sia: „Ě ina', kailëkanu ëng kinarai i amang i Tjolano in tjëpatena?” Kuano i inanga: „O, kailëkangku, itjamio ë nimawilit-wo jau.” Kuano i Tjërisën: „Jau iwilit re'e-mio' tanu in tjinaraina-wo, em baweane' ën tawoiëngku.” Ja iwilito tu'u i inanga tanu in tjinarai i Tjolano nimate. Pakawilitën-ako n iitu ja saputën i Tjërisën wo sia lumaes-ange a si Tjolano kara-karapi e Wawu'. Këilëk(ë)kë'-mio' i Tjolano si Tjërisën, ja sia mangaja'-ka'o-mai wo ng kuanao: „O inde', ambanakë' re'e ko, e

Kërisën, ja nirëngiso?" Sumowato sia: „Ambia'itjë'." Siituoka sia sumisilo ëng kuana: „Ëng kawaliangku wo tanu iasa, ja tana'i: „ra'itja urë aku n aisuwa'-mange am boimbon, ja itjawu'mbuso-mio' ën tinëkëlangku, wo aku itjatulungo-mio' an do'ong lo'or nimangakar. Siituoka aku sumaluo-mange in tëmberam bangko', maongeoka aku, rangatëno-mai i ësa Wangko', ra'itja katu'usangku, ëng kuanao: „Tow ambisa ko-wo?" Kuangkuo: „Tow a mange m bawo in tana'-wo." Kuanao ka'i: „Sapaka aku, ja Kolano a mai n darëm in tana', amang i Tjolano a mange m bawo in tana'; awoja sama'ka si Tjolano a mange mbitu?" Kuangkuo: „O waja isera ja sama' n owak." Kuanao ka'i: „Ja mange re'e ko, wo itjua-mange in si Tjolano karapi i pënana'ana wo waja se matimbo-timboi im përenta karapina, ja karëngana mai, itëla'uoka-mio' se Wawu' ën tumeir am bale." Kuano i Tjolano am bawo in tana': „O, ulit tu'u na? Ra'itja towoanu kami?" Sumowato si Tjërisën: „En tia' si Tjolano kumuakë' im pëtowoan, ja nio' ng karai i Tjolano an darëm in tana', aiwe'ëna-mai tu'us kine, oreka kamu ra'itja meman." Kësere-mio' i Tjolano in tjarai, katu'usanao-mio' in siitu ëng kinarai i amanga ang kèpatena. Siituoka masale-sale'o si Tjolano wo wueiëna a si Tjërisën: „Ambisa m baja'anami-mio'?" Sumowato si Tjërisën: „O, iruruk am boimbon, tanu im binaja'-angku. Ta'an eng kamu ng këli, ja wangkë-wangkëren ëm boimbon." Siituoka iru'ndu'o i Tjolano se tow mumung kaju. Kamang in tjëlio ng kaju niუმung, ja susulano. Kaëmbu-ëmbungo tu'u im boimbon, ja ng kuano i Tjërisën: „Ja sumuwa'o waja!" Siituoka si Tjolano karapi i pënana'ana wo se mapërenta karapina sumuwa'o-mange am boimbon maëmbung. Makasuwa'-mako sera, ëng kuano i Tjërisën: „Sapaka ëng kolano ambia ja iakuoka." Tani'tu si Tjërisën nimamualio kolano a si ro'ong iitu, en si Tjolano ambitu ja nimateo kara-karapi e mapërenta karapina.

Tani'tuo si sisil an doro' i Tjërisën.

**29. Sisil an doro' i ěsa Toja'ang wo si Tumotongko',
sinisil i Servius Rawung.**

Kaindo-indono-mai si ěsa Kolano an sangaro'ong ja awean ěsa toja'ang tuama. Si Tjolano iitu ja akaro iitu ěng kakěli in doit aipumpuna am pariri. Ja mawangko'o-mai si toja'angera, ja si Tjolano ipěkiwarengo. Awoja maio a si makasa si Toja'ang iitu piaien e karětuk(ě)na, ěng kuaerao an isia: „Maio e karapi, wo mangeta ringiněn in doit wo měmailěkan mainde' si seitja ě makaindo.” Tani'tu si Toja'ang mangeo-mai roit karapi i maěně-ěněp a si Inanga wo sia mangeo měwěra' karapi e karětuk(ě)na.

Awoja katারে-tare sia nimaweso'pe', ta'an ang kasomoian sia nimarugi, iaka-akar waja se roit kinausuan, kaapa těla'uěn i amanga itu nimakaa-kaapu, wajaoka im pulu' roit ě nima-těla'u-mio' ang kama i Inanga. Ang karapi in tjatapean sia marengo-mai a si Inanga wo sia tumowo i měngame-ngame' wo mangilě-ngilěk kaněn. Siituoka ěng kuano i Inanga: „Sa-pape' re'e n do'na ipanělěs(ě)ta titjo'o sangando-sangando, e ana'ku, em baja re'en in doit těla'uěn i amang(ě)mu itu ja aipakatia'muo re'en am putar!” Ja pakanuwu'ana-mako in tjapoloan sia, ja iindona-mai lima roit wo itu ituruk(ě)na-mio' a si Toja'ang wo ng kuana: „Indon-ange si roit anio' wo mange itělěs-ai těwi' kaněn kita.” Siituoka indono-mai i Toja'-ang ěn doit wo sia mange am pasar. Ja ambituoka sia mailěk ěsa meong wo si meong itu tělěsana in doit paali-alina, wo sia marengo-mange am bale. Itjatěka'-mange sia, ja mangaja'-ka'o-mai si Inanga, pa'pa'an si Toja'ang ja ra'itja nitumělěs těwi', ta'an nitumělěs(ě)kě' meong, wo siituoka sia itjaěmbow(ě)nao.

Ja ra'itja nimaure-ure an somoi-mai iitu iwe'eo ka'i-mio' i Inanga se lima roit wo ka'i sia iru'ndu'nao mange am pasar, mange tumělěs těwi'. Janta'an mangem ka'i si Toja'ang ja aitělěs(ě)nake' si tumotongko' těkek si roit pinaali-alina-mange. Si tumotongko' tinělěsana ja měnoi-now, anaitu si tumotongko'

itu ja indona pëngëwëra-wëra'an. Itjatëka' ka'i-mange am bale si Toja'ang, ja mangaja'ka'o-mai si Inanga iaka-akar sia niluatana wo nuwu'ana. Awoja an somoi-mai iitu ipëkiangenao-mai si Toja'ang si tumotongko', en siwono. Ta'an mangem si Toja'ang a si tumotongko', ëng kuano i Tumotongko': „Sa itjasale'mu, tio'o indo-indon aku, wo ko tawangën wo kamangëngkuoka ka'itje', em pa'pa' ko tarepe' ja pinalingaku-mai ipakaëmbow i Inangu an doro'ku.” Sumowato si Toja'ang an isia, ëng kuana: „Sama', ta'an sapao n do'na itjamang(ë)mu iaku?” Numuwu' si Tumotongko' ëng kuana: „Sa aku wo ra'itja patenu, ja ko iwalitjuoka am bale e apo'ku, wo ko mangekuoka wean-ai si pëngakakajaan se waja-waja, sapakë' si itjasale'mu.” Sumowato si Toja'ang: „Sa aku tongko'on e apo'mu?” Sumowato ka'i si Tumotongko': „Tio'o mainde-inde', ko ja patei-teirangkuoka, wo sa ko mawarengomai, ja iwalitjukë' ka'i-mai, anaitu kumi'ito-mai in ipus(ë)ku wo ambisa ëm baja'angku, ambitu ëm baja'anu.”

Tani'tu sera maja'o. Sumumpak-ange im bu'mbu'an sera, ëng kuano i Toja'ang: „Eng kita muntëpo am bale e apo'mu, ja pawasangku, ra'itja nimako ambisa eng këlian se tumotongko' ën ambitu, anaitu sa aku tongko'onera?” Sumowato si Tumotongko': „Tio'o minde-inde', em pa'pa' sa tanu wo awean ë mëtongko' iitjo, ja nuwu'angkuoka sera, oreoka ko indonera, anaitu maio!” Siituoka sera muntëpo-mio'. Sumumpak-io' im balena e tumotongko' sera, ja kuano i apo' i tumotongko' tëkek: „Sama' re'e, e pojo'ku, eng kita pinaali-anuo-mai sëra'.” Siituoka ng kuano i Tumotongko' tëkek: „Tio'o indo-indon sia, en sa aku ra'itja tineirana, ja in tarepe' iasa aku ra'io wo'o ambia. Sia tinowaku nitjumi'it-ai wo mai-mange im pëngakakajaan. Ën iitu ja aiwaer(ë)ku an isia, pa'pa'an aku ra'itja pinatena wo ra'itja sinëra'na.” An somoi-mai iitu iwe'eerao-mange ëm pëngakakajaan a si Toja'ang itu wo sia marengo-mai, ta'an sia aiwalitjë'-mai i Tumotongko' tëkek, akar in tjumësot-ai am bawo in tana'. Wo itjatëka'-mai am pana'pa' im bu'mbu'an, sera ja mëtalitjuro, ëng kuano

i Tumotongko': „Marengo-mange am bale i Inangu ko, wo mange ema'an-ange tanu se aisusuitju an iitjo én an doro' i pëngakakajaan anio'."

Awoja wëngi-wëngipe' itjateka'o-mange am baleera sia, wo sia mange tumulung am bawo i meja wo sia kumakaja, ëng kuana: „Kakaja, kakaja! tarepe' waja si meja anio' ja mawuta-wuta in tjakanën!" Tani'tu ra'itja nimaure-ure ja nima-wutao in tjakanën wo n ëlëpën n am bawo i meja. Siituoka mangelao polon si Inanga wo kuman. Ja sumumpak-ai si Inanga ëng kuana ang karapi i mangaja'ka': „E na'ku! ambisa én iasa-wo? wo si sei ë nisumiwo in iasa?" Sumowato sia: „E Inangku! én iasa ja ra'itja ambisa wo mai, janta'an sapaka n iasa ja kinakajakë' em pa'pa'an aku ja wineano-mai i Tumotongko' im pëngakakajaan."

An somoi tja'i-mai iitu si Toja'ang kumakaja roit kéli, iaka-akar waja se pariri in doit nimakaapuo itu ja nimawutao ka'i sumawël. Awoja an somoi tja'i-mai iitu sia kumakaja wale lo'or karapi i monarana, ja n iitu nimamuali. Awoja sera i mëinang nimasija'o am baja-waja, sama' én doit, sama' ëm bale, wo kumëli-mai a se pëtowën ra'io itjakua. Ja kailëkan-ako e sangaro'ong ambitu in sera ja këlïo ëng kinau-suian, anaitu si Toja'ang iitu angkaiënerao maindo kolano wo én an tutuw im pinapërentana, se tow ambitu nimëno-now ang karapi in ëna' wo ëlur. Akar(ë)kë' itu.

30. Kukua an doro' in Tjupang Ėsa, sinisil i Paulus

Mumu, Lëllëm.

Kaindo-indono-mai wawean ësa Kolano këtër nimangakar. Ta'an sia ja ra'itja makaki'i-tji'it, ja in sia matimboi in tja-këtërana an da'itja mësiri' se tow(ë)na, iaka-akar sia i nimakasija-sija'o, ta'an se tow(ë)na ja nimakalënge-lëngeio. Awoja maio i nimateo si Tjolano iitu, ja kuluno i Toja'ang én tëlauën i Amanga. Ja si Tjolano iitu wawean po'ow(ë)na tuama, kumaapa ito' i ana'na. Ėng kuanao a si Anak i

Tjolano: „Waja in tēla'uēn i Amangu ja isake a londei.” Isakeo, ja mawuta-wuta i londei. Ita'aro i Ito'na: „Mange ang kararēmana, wo mange ilēwu an dano waja se tēla'uēn iana; si ra'itja itjatinēp, siitu ja ra'itja pinarusi i Amangu.” Siituoka iwolenaomange ang kararēmana. Ilēwunao tu'u m baja in tjupang wo n aroro' wo se sapa wona' waja, ja kupangoka ēsa n da'itja nituminēp. Indonao tu'u n iitu. Ja kumi'it in ta'ar i Ito'na, ja alinaomange a si Inanga.

Itjatēka'o-mange sia, ja iwe'ena a si Inanga. Ēng kuano i Inanga an isia: „Ja mangeo tare itēlēs sapa-sapa am pasar si roit iana.” Mangem sia, ja mailēko si ēsa tow maali-ali si meong, wo wueiēnao: „Pawu'unēn si meong?” Sumowato si maali-ali si meong: „Pawu'unēn.” Mucio ka'i sia: „Takura n iwe'eku isia?” Sumowato si mawangker si meong: „Kupang ēsa.” Siituoka iwe'eo i Anak i Tjolano si tjupang ēsa iitu wo indonao-mai si meong.

Maja'o wona' pira ngando, ja kalingaana im bawean ēn sumengkot an tana' walina. Maio in sera nimleo, ja iwe'eo i Anak i Tjolano an isera si meong, ēng kuanao: „Sa itja-sale'miow, ja irapimiow si meongku.” Kuano e sumengkot: „Itjasale'ami, ta'an sapa in toroami i maali isia?” Kuano i Anak i Tjolano: „Paaliniow eta' mange-wo.”

Siituoka indono-mai e sumengkot si meong. Moleo sera, mēmole-moleka sera, ja sera mailēko im punten. Siituoka sera sumuwa' ambitu. Sumuwa'o sera, ja sera mange a si Tjolano. Mangem sera, ja pēwueiēno i Tjolano, ēng kuanao: „Tonapa kamu?” Sumowato sera: „Am puntem balina-wo, wo sumuwa'-mai a si punten iasa.” Kuano i Tjolano: „Masale' kamu n tē'tēkangku?” Sumowato ka'i sera: „Masale', ta'an sapa n tawoiēn?” Kuano i Tjolano: „Mate se kawok am baleku; pa'pa'an ēn a si tana' iasa ja kēli tjawok, iaka-akar in da'itja toro kuman, mamaande-andetangkē' wo se kawok. Ta'an marengo-mange kamu-wo, tūmēna-tēnaoka-mai in sa aku kumano.”

Mangem tu'u sera, kumi'it in aitjua i Tjolano. Maio tu'u

in tjumano si Tjolano, ja mangem tu'u sera. Itjatëka'-mange sera, ja ipaompëro ng kanën i Tjolano. Ja si meong aira-pierao-mange, ta'an sinaputerakë'. Siituoka maja'o-mai se kawok wo iwëkarera-mio' si meong wo mërintju-rintju'ku'oka sia ë matangka' se kawok, akar im pinakaindo-indona se kawok am bale i Tjolano, se tani'tuo tu'u in tjakëli. Siituoka kalingaano e tow a si ro'ong iitu, ëng kuanerao: „Ja n a si Tjolano, kine, wawean meong!” Siituoka towano e tow a si ro'ong iitu se maali-ali si meong, wo sera të'tëkanera in si meong ja mindooka se kawok am baleera. Awoja tani'tu ë nimamuali, iaka-akar i marengo sera, ja sera weano të'tëk ra'io aipakasake a londei.

Itjatëka'o tu'u-mai an tana' pëngëna-ngëna'anera, sera ja iwe'eo tu'u ën aipatë'tëk si meong tani'tuo in tjakëli. Pailë-kënoka i Ito' i Anak i Tjolano m baja se itu, ja ng kuanao a si makaito' isia: „Sumere kua'a eta' e! se iana ja ra'itja pinarampas.”

31. Sisisilën an doro' i Toja'ang Kërok, sinisil i Abed Nedju Sarajar, Sulu'un.

Mamualio-mai tow si toja'ang isia, ja mëngame-ngame'kë'; mande ambitu si Inanga wo si Amanga e mëngame-ngame'kë', kaapa makan, kaapa mawaja-waja' e mëngame-ngame'kë' sia. A si makasa tintjasan i Inanga wo si Amanga i mange-mai tale'. Maja'o sera, rumojoro si Toja'ang isia wo mawaja-waja' mëngame-ngame' an unër in tëmbëran. Palinanoka i Tjolano, ja mare'eo si Tjolano wo ipëkitowa i Tjolano sia, ëng kuano i Tjolano: „E toja'ang iana! sapa ën ipëngame-ngame'mu?” Sumowato si Toja'ang kërok, ëng kuanao: „Akarao.” Wueiëno ka'i i Tjolano: „Nimawisa si Inangu wo si Amangu?” Kuanao: „Nimange-mai pongkolan-tumow.” Kuano ka'i i „Tjolano: „Sapa?” Kuano i Tjërok: „Nimange-mai pongkolan-tumow.” Kuano i Tjolano: „Sapa si ipakuamu: pongkolan-tumow?” Kuano ka'i i Tjërok: „Pongkolan-tumow tu'u ja!” Siituoka

pa'pa'an in da'itja kailėkan i Tjolano si ipasowat i Tjėrok, ja iru'ndu'nao sia, ęng kuanao: „E Kėrok, marengo!”

Marengo si Tjėrok, wo maame'o ka'i. Marengo-mai si Inanga wo si Amanga, ja ipėkitowao i Tjolano, kuanao: „Sapaka si anakiow si Tjėrok, pateno mata' eng kare'enoka ę męngame-ngame'.” Kuanerao: „Si Tjolano tu'u ja.”

Mando tu'u-mai iterewa'o a se tow ja im baja se tow lumowęng si Tjėrok kumali i lowęngan isia siow ngarėpa ęng kararėm. Palingano i Tjėrok im pateno sia, ja ng kuanao: „O Ina' wo Mama', kumi'it aku in ilowęngo, ja wean-ai meong aku wo pisow ęsa itjawalitju.” Siituoka ki'itano i Inanga wo si Amanga.

Pakakalin tu'u-mako e tow ę lowęngan isia, ja sia angeno-mai wo ilowęngo. Itjatėka'-mio' a lowęng sia, ja sia kumalio wo ng kuanao i makua a si Meong: „Kumo'kor, e Meong, iaku ę makali en da'ipe' winean im batu.” Siituoka kumo'koro si Meong. Kamang in tajango ęng kino'koranera, ja lumėtupo-mio' ęm batu aiwėkar ambitu, anaitu ra'itja kinauma'an im batu sera. Tani'tu mēmaja-maja' ęn ęndo e męngali-ngali si Tjėrok, mako'kor si Meong. Po'owo in sėrap si Tjėrok wo si Meong ęn an darėm in tana', ja kumėsoto-mange am bawo in tana' nirumoro' im bęngi.

Itjatėka'o-mange am bale i Inang wo si Amanga sera si Meong, kuanerao: „O si Tjėrok si a'i!” Kuano i Tjėrok: „Iaku!” Kuanerao ka'i: „Nitumambisa ko wo aitjawarenge'-mai?” Kuano i Tjėrok: „Iaku nimakali, si Meong ę nimako'kor, anaitu aitjawarenge'-mai.” Numuwu'o ka'i si Tjėrok, kuana: „Itėlės-ai roke aku, wo sapatu, wo kastor, sa itjasale'-miow.” Kuano i Inanga wo si Amanga: „Kaitu-itu ko mapales embai?” Kuano i Tjėrok: „Me'e weta'-wo.” Siituoka tu'u ki'itano i Inanga wo si Amanga, akar si Tjėrok i makara-karaioka in tjarai e wangko-wangko', wo mawaja-waja'. Mawaja-waja'oka sia pailėkėno i Tjolano, akar in aipėkitowana, kuanao: „Nitumambisa ko wo aitjawarenge'-mai, e Kėrok?” Sumowato si Tjėrok kuanao: „Sapaka aku ja manėsėloka

wo'o mareng-ai, ěnta'an airu'ndu'ke'-mai i Apo'mu wo si Inangu, ja in sapaka kine ko e Kolano, mio'-mai in tjaraimu. Waja se pĕkaraiĕngku anio' aiwe'eera-mai." Kuano i Tjolano: „Ulit na?" Kuano i Tjĕrok: „Ulit. Kailĕkan i Tjolano in ěsa, in si seio si makakarai tanu si a'i ambia?"

Mando tu'u-mai tumerewa'o si Tjolano, ĕng kuana: „Waja se tow kumalioka im baja'angku." Siituoka kumalio se tow. Ta'an si Tjĕrok(ĕ)kĕ' ĕ nitumuru' in tjinalian. Pakakalin-ako ja ilowĕngo si Tjolano, akar im binarengan sumama-sama'. An somoi-ai iitu mueio si pĕnana'an i Tjolano, ĕng kuanao: „E Kĕrok, ro'na mareng-ai kawisa si Tjolano?" Sumowato si Tjĕrok: „Ro'na mareng-ai in tjawuruk si sĕrap." Pangĕna-ngĕna'anoka mai, ra'io mareng-ai si Tjolano, maka-akar si makangaranoka in Tjĕrok ĕ nimaindo kolano a si ro'ong iitu.

32. Kukua an doro' e Rua Mĕtuari Ula, sinisil i

Paulus Mumu, Lĕilĕm.

Sapaka se rua mĕtuari anio' ja ra'itja wana pĕnamun. A si ĕndooka makasa, ja iru'ndu'o i Matu'a si Tuarina ĕng kuanao: „Ipangere-mai tjo'ko' tĕlĕsan kita." Siituoka maja'o si Tuarina mangere ko'ko' tĕlĕsan. Itjatĕka'-mange sia, ja mueio ko'ko' tĕlĕsan. Pa'pa'an in da'itja wana ĕ me'e ko'ko' tĕlĕsan, kua'a sia ĕ marengo-mange a si Tjaka'na. Itjatĕka'-mange sia, ja wueiĕno i Tjaka'na ĕng kuanao: „Nimakaereka-mai tjo'ko'?" Sumowato si Tuarina: „Ra'itja wana ĕ me'e." Kuano i Tjaka'na: „Ja en da'itja wana ĕ nime'e ko'ko' tĕlĕsan, ja mange ipangere-mai wulinga' tĕlĕsan."

Siituoka maja'o mangere wulinga' e ko'ko' tĕlĕsan sia. Itjatĕka'-mange sia, ja mueio wulinga'. Makaereo tu'u sia, ja siow ĕm bulinga'. Kua'a sia ĕ marengo a si Tjaka'na. Itjatĕka'-mange sia, ja wueiĕno i Tjaka'na: „Awoko, piraka ĕm bulinga' kinaereanu-mai?" Sumowato si Tuarina: „Siow." Kuano i Tjaka'na: „Iema'o-mio' wean im bulinga'; en iitu n siow, ja iema'-mio' siow, eken mĕkele ěsa. Tani'tu tu'u ĕ nimamuali.

Awoja ěnto-ěnto'anoka ěn an somoi-ai iitu, ja tumengeo-mai kawajokě'. Kuano e rua Mětuari: „O toro! wulinga'kě' tu'u ja nimamualio kawajo, kumarua sapi, kumatělu membe', kumaěpat wawi, kumalima ko'ko', kumaěněm gansa, kumapitu wewek, kumauwalu asu, wo kumasiow meong.” Kuano i Matu'a in tjumua a si Tuarina: „Naraměn im pasakean si tjawajo.”

Ja kini'itan tu'u i Tuarina. Makanaram-ako im pasakean, kua'a sia ěn iwa'kěs(ě)nao. Angenaoka wo'o im boondo ja niindoo i Tjolanoera. Siituoka ja mangelao itjua a si Tjaka'na: „Je, niindokě' re'e i Tjolano si tjawajo.” Kuano i Tjaka'na: „Tam-bisanta rake sia!” Mawěngioka-mio' a si ěndo iitu, ja marengo-mange si Tjawajo wo ng kuanao: „Tio'o minde-inde' kamu, ta'an kamu ja tumintjas a si ro'ong iasa.” Kuano ka'i i Tjawajo: „Maja'o kamu wo, en aku ja tumondongoka.”

Maja'o tu'u sera, ja itjatěka'o-mange a si ro'ong paange-amera. Ra'itja tu'u ure sera n ambitu, ja tumengeo-mai si Tjawajo. Kuano e rua Mětuari: „O toro! nitumondongka tu'u re'e-mai si Tjawajo.” Měnto'kě'-mio' tojo', ja maio se airu'ndu', mai-mange si Tjawajo. Kuano i Tjawajo: „Ra'io mange aku.” Siituoka kuano e airu'ndu'-mai i Tjolano: „Marengo kua'a tare kami!” „Itjatěka'-mange a si Tjolano sera, ja sera wueiano i Tjolano: „Ěnso' si Tjawajo mangemiow-ai?” Sumowato se airu'ndu'-mange: „Nitjumuaoka-mai in da'io mai sia.” Kuano i Tjolano: „Iwajao-mange sia.”

33. Kukua an doro' e Ambalesa wěrupe' nimamale wo si Sawurang wo si Sopit.

Sapaka se Ambalesa wěrupe' nimamale, ja niměwale an těmbir i lua'an i ěsa rojongam bangkěr wo kasawurangan. A si makasaoka ja tumana'o-mai si ěsa Sawurang, wo sia maja' nimantěr(ě)kě'-mai am bale e Ambalesa anio'. Ja am pagěroka sia, ja měta'upo wo si Sopit. Kěilěk(ě)kě'-mange i Sopit si Sawurang, ja sia mainde'o wo měsisipo wo'on an dukut. Janta'an pailěkěn-ako i Sawurang in sia i měsisipo, ja ng kuanao: „E

Sopit! tio'o mēnē-ēnēp an iaku, ra'itja kua'a re'e mētaranak kita?" Ĕng kuano i Sopit: „Tani'tuka ka'i n aitjua i ito'ku Liwang an iaku a si tjawisaona', ta'an aku ja mēnginde-nginde'kē' se itjamu in Sawurang." Ĕng kuano i Sawurang i mēwuei: „Ambituka se makawale in anio'?" Sowatēno i Sopit ĕng kuana: „A si tjawoondo si tuama ja nitumalun, e ni-maali-ali im pukēt, wo mawali-wali se asu; anae wajaoka si wewene n a mange mbitu."

Siituoka si Sawurang mēla'u-la'uso-mange a si Wewene isia. Itjatēka'-mange sia, ja malintēro si Wewene wo mētintjaso wo'o n am pēsiwona. Janta'an sia pinerokē' i Sawurang, ĕng kuanao: „Tio'o tumintja-tintjas, en da'itja kua'a tambisangku ko." Tani'tu sia mēniwo-niwokē'. Siituoka ng kuano i Sawurang i mēnow si Wewene itu: „Maio, angenta-mai tjupa." Ĕng kuano i Wewene: „Sama', ĕn ta'an si sei ē lumaput?" Sumowato si Sawurang: „Iakuoka ē lumaput." Jawo sera mangem. Makano in tjupa sera, ja ng kuano ka'i i Sawurang: „Iwe'emu-mai n sengkamu, wo iēpe'ku." Ja kini'itan tu'u i Wewene n iitu, iaka-akar ĕn sengkana aiwaleo i Sawurang ang kamana. Ipakawalena-mako n iitu, ja ng kuanao: „Kalo'or e! ĕn ta'an wiwine' ka'i ē lo'or ja! iwe'emu-mai ka'i n iitu-wo." Ja iwe'eo ka'i i Wewene n iitu. Jawo makaapu-mako ng kupa, ja ipēkiwareng(ē)nao wo'o se niiram i Sawurang iitu. Janta'an si pangilēkana iitu ja tinalakē' i Sawurang in ĕnow, ĕng kuanao: „Maio, mangeta indon tu'is." Kuano i Wewene: „Me'e weta' e na." Tani'tu mangem tu'u sera.

Ja sapaka si Sopit nitjumi'i-tji'it(ē)kē'-mange isera, ang karapi i maēnē-ēnēp an isera. Ja mangere-ngereoka tu'is sera, ja sera itjasumpako-mange an dangka' in tjēpal katu'isangka ka'i. Mēkembu-kembutoka in tu'is si Wewene isia, ja sia ipē-pēso-mio' i Sawurang in ipus(ē)na ang kēpal rararēman iitu, iaka-akar sia in aitjalēpok-io'. Kamang sia in aitjalēpoko, ja si Sawurang mērioro mareng-ange am bale i Wewene itu, en sia ja mangeo mangun in owa'na itji'itoka a gio i Wewene aiwilang(ē)na.

Malui-mako si Sawurang, ja marengo-mai am bale si Më-nana' a si aitjawilango. Ja am pa'pa' tu'u si Sawurang i nigumioo i gio i Pënana'an i tow isia, ja sia ra'itja katu'usana in sapaka re'e sia ja Sawurangkë', mande i ngëru m bow(ë)na. Ja a si tjátëluän ngando im bawa'andoo, in sera in dua i nimëwali-walio an tutuw ka'i i tuama iitu in ang karimbaim-bangan i mata'nei si Pënana'ana i mawowoka ngëru, ja tumengeo-mai si Sopit an dangka' in seip im baleera, ëng kuanao tana'i: „E Apo'! alian-ange api si Ene, en ailëpok ang këpal.” Siituoka itjaëmbowo i Sawurang si Sopit, wo sia përiorënao wo'on in dumintuk. Janta'an sapaka n aitenge i Sopit, ja pënigi-nigilënoka i Tow, iaka-akar in itjuanao a si Sopit: „E Sopit, sa ulit tanu ën aitjuamu, ja iwali-mange aku.”

Jawo tu'u sia mindoo-mai api wo sera mangem, si Tow ën an somoi, maki'it-ange si Sopit, i mënenge-nengekë' tanu in aitengena tarepe'. Itjátëka'o-mange ang këpal sera, ja mënenge-nengekë' si Sopit, wo sia muntëpo-mio' pëki'itën ka'i-mio' i Tuama ipawali-walina. Mëta'upo-mange sera in ambalesa, ja ng kuano i Wewene: „Ambia'i aku, janta'an marengo-mange ko-wo, wo mange paten si Sawurang. Nio' aku, en aiwiling(ë)nao.” Jawo mërioro tu'u-mange si Tuama isia i mange mate si Sawurang am baleera. Patena-mako sia, ja warengënao-mange i mange-mai si Pënana'ana.

Ja akaroka ka'i-mai iitu se ambalesa anio' marengo ka'i ang kaëlu-ëluän wo ng kasale-sale'anera tanu in dior; ja itu niange-mai in tjatawe'e reken wo ng katalësënan wo ng kataupusan i Sopit.

GROEP V.

34. Kukua an doro' i Ēsa Make'et wo si Lolok.

Sapaka si Make'et anio', ja ěm pake'etana a mange ěn dowa; ja kasusur im boondo wo ěm bawa'ando ja sia mange kume'et. Susur(ě)na i mange ja ra'itja wana ěm pe' mangena paalin-ai. Siituoka ěng kuanao: „En aku re'e ěn da'itja wana ěm pe' mai paindon am pake'etangu, ja maitju ěpe'an i lumukut mainde' sapa si maperas im pe'ku.”

Mando tu'u-mai ja sia mangeo lumukut, nitumo'tol i ma-moondo akar i mawawa'ando. Kamang tu'u im bawa'ando, ja serenaomange si tow an tu'ura im pe'. Kuanao: „O nange tu'u wona' si maperas im pe'.” A siitukě' pailěkěnao tu'u masosoro wo katu'usana in sapaka sia ja lolok, wo ěng kuanao: „Iwajape', iwajape'-wo, akar(ě)na in dumojor.” Ja pailěkěnao tu'u-mange i marojoro, ja sia ilukut(ě)nao an tu'ura in daran. Ra'ipe' aitjatěka'-mio' an tana' si Lolok e marojor, ja sia kěřěsěno-mange i Makaupė'. Siituoka mėkiampungo si Lolok ěng kuana: „Ampung, ampung!” Janta'an pasowatěngkě' i Makaupė': „O ra'itja, iitjoo si maperas im pe'ku.” Ta'an da'itja měna' si Lolok ě mėkia-kiampung, akar(ě)na in tjumua a si Makaupė': „Ampung; sa itjasale'mu, ampungan-ai aku, wo kita mėkarětukoka.” Siituoka ki'itano i Makaupė'. Kamang sia in tjini'itano, ja mueio si Lolok, ěng kuana a si Makaupė': „O po'ow, awean pulintja' ěng ka'kas(ě)mu ambia?” Sowatěnao: „Wawean.” Kuano ka'i i Lolok in sumowat: „Ja sama'. Sapaka ko ja mange-mai pukět, wo wawa'ando kita mai mamorapat, ta'an sapaka ko, ja makata'an-ako im pukět-

sa, ja mangeo rumu'ndu'-mai, en aku ja mēnto' am pukēt wo ilēkēnuoka kakēli e wio'o rumumpak, kakēli e patengku."

Mangeo tu'u rumu'ndu'-mai si Makaupē', siow se wio'o nirumumpak sinangawalitjē'. Palinano i makaka'kas ja nimē-walitjē' nirumēngkek. Io'onao, ja siow tu'u se wio'o nimate. Siituoka ja tumataro sera, wo ēng kuano i Lolok: „Sapaka aku, ja iindokē'-mio' tēkek am baja i giona a se wio'o iana, wo saputēn-io' wo iwe'e-mai iaku." Siitu tu'u ēng kini'itan i tow. Kamang si Lolok im bineano, ja ta'aranao si tow ēng kuanao: „E po'ow, sa ko mange a si pēnana'anu, ja tio'o mange ipakua-kua aku, eni! en tia' ēng kamangu mapo'-ow(ē)kē', pa'pa'an sa aku ra'itja mangemu ipakua-kua, ja sapaka ko itjomba'ku ang karapi i ngaran i Tjasuruangku wo si Tjasuruanu, sapaka ko ja ipatao-taor(ē)kē' ēm baja im pangusuiēnu, wo makaere, sama' ēng kanēn, sama' ēm pasē-ra'an. Wo itjuaku iitjo, kasiowan ngawēngi wo kasiowan ngando ja kita mai mēta'up ambia, eni!" Siituoka ēng kuano ka'i i Lolok: „E po'ow, masale'ka ko ēn ipakawalitju am baleku?" Kuano i tow: „Sama', sapaka aku, ja masale' mailēk im 'balemu." Tani'tu iwalio i Lolok sia wo ēng kuana: „Ja maio, kumi'it-ai iaku."

Maja'o tu'u sera; katare nimawaja'pe' an tana', kumarua nitumete am pondos, katēlu nimuntēp am palēmboian in dano, ta'an sia ē mawaja'-mange ambitu nitumete-mange am pondos, ja pauma'angkē' in tutune im pondos; kuanao in tjumua a si Lolok: „Pauma'angkē' aku, ra'itja re'e toro maja', e po'ow." Kuano i Lolok: „Lisuan-io' in tana' makatēlu ēng keitjei, wo mija'-mai." Kini'itan tu'u i Tow. Maja'o tu'u sera, ja ra'io patunen, mange ka'i am palēmboian in dano sera, kuano ka'i i Tow: „Malēsēngkē' re'en aku, e po'ow!" Kuano ka'i i Lolok: „Ramēsēn-itjo in dano ēn amo makatēlu ka'i." Tani'tu kini'-itana ka'i. Siituoka muntēpo tu'u-mio' ambitu sera, wo mio' an darēm in tana'. Ja mēmaja-maja'ka sera, sumosoro-mange am bale i Lolok. Siituoka ja ompērano kanēn sera, ēng kumano; ta'an da'itja nitjuman tu'tu', ja nimawēsuo si Tow,

winěsukě' in susuwa in tu'tu'. Siituoka mangilėko i marengo am baleera si Tow. Ki'itano i Lolok, wo ęng kuana: „O toja'ang, waja se itjamu rumakut in sėra' wio'o wo paalintamange a si po'ow.” Pakasaputėn tu'u-mako ęn sėra', ja sera mangem karapi e toja'ang tėlu nimio waja sėra'. Ta'an sera ę nimawaja'o, ja tina'aran i Lolok in tana'i: „O po'ow! sawo kita aitjatėka'o-mange am balemiow, ja tio'o ipakua-kua a si pėnana'anu aku, en tia' mara'itjė' ęm pangusu-ngusuiėnu, eni!” Akar(ė)kė' itu.

35. Sisil an doro' i Mėngange'et an Talun wo si Lolok, sinisil i Kumolontang, Sėndangan, Sondėr.

Kaindo-indono-mai ja wawean ęsa tow męngėna-ngėna' a si ęsa ro'ong a lawanan. Awoja sapaka si tow isia, ja męngange'et, janta'an ęm pake'etana ja an talun an tajang-ange in do'ong. Kasusur im boondo wo ęm bawa'ando si tow isia mange kume'et.

Maioka a si makasa in sia mangeo ka'i wo'o kume'et, ja sapa ę nimamuali? Pėke'etanao ęm pe', pailėkėna ja kine'etano. Tani'tu tare sia marengo am balena. Maio im bawa'ando sia mangeo ka'i kume'et, ta'an angena, kine'etano ka'i. Siituoka marengo-mange am balena sia. Tėlu ngando ęm pe' itu ęm pinėnge'e-nge'etan i sei. Siituoka ęng kuanao: „Tia'pe', wawa'ando si rombit isia mangeku ilukut.” Awoja maio tu'u i mawawa'andoo-mio', ja mangelao ilukut. Sia nirumi'ndir a si ęsa kaju ang kara'ter i a'kėl pake'etana. Ra'itja nimaureure, ja palingana waweano tu'u ę marintja'kas-ai. Serena-mako, ja lolok, am pa'pa'an sia ja kolėk pinangakaran, ja ęm bu'uk(ė)na rėnet, maose'oka an tana'. Sapaka sia ja mėporong im porong tėkek, ę giona o'lei tanu i lumut, wo sia mawulewuleng im binalu'. Itjatėka'-mange an tu'ura im pe' sia, ja isangat(ė)nao-mange an dererot si ra'un itu wo sia sumosoro-mange eng kume'eto. Makake'et-ako sia, ja rerotėnao-mio' ęm pe' wo sia rumojoro.

Matawio-mio' in tana' sia, ro'naoka rua a'mbanga wo an

tana'o, ja teroněno-mako i tow in tjuměřes si Lolok wo timboiana am bu'uk. Ra'itja sapa ęng kinala'us i tow i nimindo, ja nirumambus im porong, wo aipěrior(ě)na i musěk, pa'pa'an kailěkan i tow isia, sapaka ęm porong iitu ja wawean kětěra. Siituoka ęng kuano i Tow: „O inde', itjo tu'u re'en si manaram i mai marombit im pe'ku.” Sumowato si Lolok, ęng kuana: „Ja ulit, e kalo, ta'an sapaka aku ja aiparu'ndu'-mai e karapitju, am pa'pa'an in tarepe' iasa kaĩmi nimema' kasale-sale'an. Anae sa itjasale'mu, wean-ai ampung wo iwěkar-ai aku wo iwe'e-mai ęm porongku.” Sumowato si Tow, ęng kuana: „Ra'io kawisa si porong anio' wo iwe'ekupe' iitjo.” Siituoka ęng kuano ka'i i Lolok: „Sa re'e tani'tu, sa si tjalo masale', ja ko iwalitju-mange am baleami.” Sumowato si Tow, ęng kuana: „Sama'; oteo kita mangem.”

Tani'tu sera maja'o, maawo im bale i Lolok. Měmaja-maja'oka sera, ja sumumpak-ange a si ęsa kěpal im batu; awoja si tjěpal iitu wawean ęsa lěngkang těkek. Ituoka ęng kuano i Lolok: „E kalo, tumimboio-mai am palukaku, wo kumi'it-ai iaku.” Tani'tu sera muntěpo-mange a si lěngkang iitu. Ra'itja nimaja' rua ngarěpa, pailěkěno i Tow sapaka ęn ambitu ja ęsa lalam bangko' mēla'u-la'us a si ęsa kapajasam bangkěr. Sumumpako-mange sera, ja kěkėlian se masasau a lesar im bale. Siituoka numuwu'o si ęsa matu'a a uněr e kėli masasau itu, měwuei a si ipěngaru'ndu' upe', ęng kuana: „Kua'itu si tow anio'?” Sumowato si ipěngaru'ndu' upe': „Sapaka si tow anio', ja isiao si makape' si pěngaangengku-mai. Ta'an aku ja kinauma'ana, anaitu sia aipakawalitju-mai.” Kuano ka'i i Matu'a a si Tow: „E po'ow! sama' re'en eng ko ę nimai. Sa ko masale', ja tia'pe' mare-wareng tarepe'. Woondooka i mamoondo wo ko mange karapi i maange-mai upe'; tio'o ko m̄ainde-inde' in da'itja kuman.”

Tani'tu tu'u kini'itan i Tow, iaka-akar sia in tjumanoka ambitu, wo tumėkėloka ambitu a si wěngi iitu. Awoja woo-woondope' tu'u i mando-mai, ja si Tow wo si Lolok mangeo ka'i tjume'et. Sera ę nimaja', nisumalukě' si lalam binaja'anera-

mai tjaawi'i. Itjatéka'-mange an tu'ura im pake'etan sera, éng kuano i Lolok: „E kalo, iakuo én sumosor.” Sumowato si Tow: „Sama'.” Makake'et-ako si Lolok, ja sia rumojoro-mio' wo sera mëlép. Makaélép-ako sera, éng kuano i Lolok: „Sa itjasale'mu, e kalo, ja iwarengké'-mai an iaku si porong nian-det(é)mu.” Sumowato si Tow éng kuana: „Iupuso-mai an iaku si porong iitu, pa'pa'an aku ra'itja wana lalam balina ro'na kausuiangku porong tanu si a'i. Ko ro'nape' makaere porom balina, ta'an aku ja ra'itja; nimakaere weta' aku, am pa'pa'an an iitjo wo.” Siituoka si Lolok masigi-sigil, tambisa én do'na sia makaere im porong(é)na iitu. Makata'neio si Lolok, éng kuana a si Tow: „Sa ko masale', e kalo, ja kita in dua mēkara-karapio tare, kita ésaoka tawoién. Tio'o mainde-inde' in tjakaapuan, sapaké' si itjasale'ta karéngan itu ja kaerean.” Si pangilékan iitu ja nienan i Tow. Awoja a si éndoké' iitu, sera in dua mema' ésa lawi paénto-énto'an.

Mandoo tu'u-mai, éng kuano i Lolok: „E kalo! sapaka kita tarepe', ja mange an ta'asitj wo mamongkor.” Ririor in sera wo mange an ta'asitj, ja sera nituma'tak pondos alerén paséwénan se pongkor. Itjatéka'-mange an ta'asitj, sera tumi-nēpo an dano, ta'an si Lolok én an dior. Sera in an darém in dano, ra'itja makapéndam-ai i malésém, ta'an tanuké' i mawaja-waja' ang katana'an. An darém in dano, sera ménepa-nepa se pongkor, kakéli e pailékén, wo pēñwé-nēwénénera. Serenera in do'na akaro iitu éng kakétean i maali, ja sera marengo-mange a lawi, wo waja se pongkor itu témburanera. Se téla'u im pinaséra'era, ja mange ipawangker i Tow an do'ong. Ja makatēlu pitu ngando sera é nimēngulu-ngulur tani'tu.

Awoja pēdaméno i Lolok in da'itja re'e kaandetana ém porong, ja indonao-mai si ésa pagi' tékek wo éng kuana: „E kalo, indono tare ka'i-mange si pagi' anio', irapit-ange im porong ambana, wo ita'ar(é)ku an iitjo: sa ko wo manguma, ja tio'o tare itawangker, mande se karo'ong(é)mu wangker én uma, ta'an da'itja wana é makaindo in tjakéli im bene'

wo ɛn tandemu. Sa ko wo mamangker, patɛna-tɛnan-ange i makua ɛm be'ena, pa'pa'an tambisa si aitjuamu, ja ra'io itjareso. Sa ko wo mɛwawi, ja ra'itja ka'i wana ɛ makawawi tanu in tjɛkɛmɛl e wawimu." Siituoka indono-mai i Tow ɛm pagi', wo sia numuwu' ɛng kuana: „E Wa'ilan, kamang an iaku sawo tanu in ta'ar(ɛ)mu."

Kasomoian iitu ja sera mɛnsiri'ano wo mɛmbean in tjama wo ka'i mangilɛk kamang wo kalowiran a si ɛsa wo si ɛsa; tani'tu sera mɛtalitjuro, wo si Tow marengo-mange an do'ong(ɛ)na. Awoja si Tow anio' mangedo tu'u tumawoi, tambisa ɛn aita'ar i Lolok an isia. Maja'o tu'u ɛn ta'un, ulit nimamuali tanu i nuwu' i Lolok. Si Tow isia kɛkɛlian ɛm bene' wo ɛn tande, wo se wawina kumɛmɛ-kɛmɛlo-mai. Awoja se wene' wo ɛn tande wo se wawi itu pinɛmu'u-mu'un(ɛ)na iaka-akar sia ja kɛkɛlian ɛn doit. Ang kasomoian iitu ja si Tow isia nimaindo ɛsa Tow mamangker wo nimawa'ilan. Akar(ɛ)kɛ' iitu.

36. Kukua an doro' i Toja'ang wo si Sɛra'-Tow.

Sapaka si Toja'ang anio', ja nimakaere mɛsea', ja putusɛn-oka i Tjolano, ja ng kuano i Tjolano: „Sapaka ko, ja mangedo a si Sɛra'-tow. Sa sia wo kapandeianuka, ja ko ra'itja rantongɛn. Janta'an ko mangedo; ɛm paalinu-mangedo, ja waja in tatawai e matawai in tjaju, eng ko ja mangedo mema' im pumpunan isia."

Ja maja'o tu'u si Toja'ang iitu. Itjatɛka'-mangedo sia, pɛwu-eiɛno i tow Sɛra'-tow: „Sapa ɛm bawaja'mu?" Sowatɛnoka i Toja'ang, ɛng kuanao: „Sapaka aku, ja aɽru'ndu'-mai i Tjolano mai mema' im pitimu." Ja ng kuano i Sɛra'-tow: „Ja sama'." Ja pakaema'ana-mako ɛn iitu, ja ng kuano i Toja'ang iitu: „Jawo pinakaema'kuo ja!" Sowatɛno i Sɛra'-tow: „Ja sama'." Ja ng kuano i Toja'ang: „Janta'an waweane' tintja; ja mai mɛpe' ko, wo itjua-mai iaku se tintja wo itu rondorɛngkupe'." Mumpuno tu'u-mio' sia, ja kɛlɛwɛnao-mio', ja wueiɛna tu'u: „Awokoi si wisape' ɛn tintja?" Kuanao: „Kɛkɛ-

liane' re'e ja." Kuano i Toja'ang: „Tia'pe'-wo, wo ema'angku si anio'." Ra'itja si Toja'ang, e mapasa'o in du'una ĕpat. Pakapasa'ana-mako ĕn iitu ja ng kuano i Toja'ang iitu: „Ja-wokoi, e Sĕra'-tow! iitjoka ĕm pandei e aku?"

Ja si Sĕra'-tow iitu ja sija' nimangakar. Sapaka si Toja'-ang anio' ja an tana' sangawiwi; jawo indon i Tojaang iitu ĕ laseran paser wo itu isakena a si Tjawajo Rĕgĕs i Sĕra'-tow, wo isakena ka'i witu ĕm piti pinumpunan si Sĕra'-tow. Am pa'pa'an in aipakasakeo ja tĕpianao si Tjawajo, wo sia tumeron, ra'itja nimaĕnto-ĕnto' wo a mangeo ĕ lawanan. Jawo isakenao a londei ĕm piti pinumpunan si Sĕra'-tow wo ĕ laseran paser. Jawo tĕpianao ka'i si Tjawajo en iwarengkĕ'-mange. Marengo ka'i-mange a lawanan si Toja'ang wo moleo-mange. Sumuwa'oka-mange, ja pĕwueiĕno i Tjolano: „Jawokoi, ĕnso' si niangemu?" Kuano i Toja'ang: „Kua'a sia e, kinĕ-tĕp(ĕ)kuo am piti."

Ja ng kuano i Tjolano: „Ja sama' ĕnta'an ko mitjo-mai i laseran paser a mitjo m Paantangan i Ēndo." Siituoka moleo ka'i-mitjo sia. Mitjooka sia, ja nialinakĕ' ka'i-mai ĕn iitu, wo n iitu ituruk(ĕ)na a si Tjolano. Ja ng kuano ka'i i Tjolano: „Sapaka ko ja mako-mai tja'i i laseran paser am Pauntĕpan i Ēndo; sawo itu paalinuka-mai, ja iitjooka ng kolano." Ja makom ka'i si Toja'ang mako mole. Makooka sia, pailĕkĕ-nao, ja ra'itja wana ĕ mateir, wo si laseran iitu isakenao-mai a londei.

Moleo-mai sia. Itjatĕka'-mai a si Tjolano sia ja pailĕkĕno i Tjolano pinaalitjĕ' kai-mai i Toja'ang iitu ĕ laseran. Ja ng kuano i Tjolano: „Kumi'it in tinĕndĕkangkuo, ja iitjooka tu'u karu' ĕng kolano ja." Iaka-akar tu'u in si Toja'ang iitu in aitjaamboo in tjolano a si tana' iitu.

37. Kukua an doro' i Mawĕris wo si Mengkat, sinisil i Sem Umbo, Tompaso', Guru an Tombasian an Dangka'.

Kaindo-indonoka-mai sapaka n a si ĕsa ro'ong ja pĕngĕnto-ngĕnto'an e rua mĕkarĕtuk, si Mawĕris wo si Songko'. Sera

in dua ja mëkele rua ën anak. Si anak i Songko' ësa maka-ngaran i Mengkat, si ësa ra'itja kailëkan ë ngaran. Sapaka si Mawëris wo si Songko' ja nimënta'aran in sawo ësaan-ange an isera n dior mate, ja se ula karëngan teiran i mëno-now(ë)pe'. An somoi-ai iitu, ja mateo tu'u si Songko', karëtuk i Mawëris. Awoja lëképëno tu'u i Mawëris ën ta'arera, wo towanao si Mengkat wo si po'ow(ë)na. Anaëitu mangem tu'u sera am balena. Ja sapaka sera tineiran tumoro-toro i Mawëris, akaran in ure makaure sera kumëmëlo ëm patamun i Mawëris.

Makakëmël-ako se ula, ja mënuwu-nuwu' se Mawëris in ambalesa in tjarëngan sëra'ano se Mengkat i mëtuari. Ta'an ë nuwu'era pinalingakë' i Mengkat. Awoja sapaka m patëkëlan e Mengkat i mëtuari, ja ra'itja maera-era. Tani'tuka ka'i m patëkëlan e rua anak i Mawëris. Awoja a si wëngioka makasa pailëkéno i Mengkat si Mawëris nimindoo-mai im pupus, wo itu tununa. Siituoka ja itjawe'eo an atena ë nuwu' e Mawëris in ambalesa. Anaëitu an tutuw i Mawëris i mëtunu im pupus, ja përiorëno-mange e Mengkat i mëtuari i mangkai se anak i Mawëris wo mange itëkël am patëkëlanera. Wo sera sumawëlo-mio' in tumëkël am patëkëlan e anak i Mawëris.

Ra'itja tu'u nimaure-ure, kumësoto-mai si Mawëris maali-ali im pupus nimawa'ao, wo itupuna-mio' se rua anak(ë)na. Siituoka rakanëno se rua anak iitu wo sëra'anera. Lumukuto in tjuman, ëng kuano e Mengkat i mëtuari: „Tio'o solo-soloan, eng kami ng këmberën.” An tutuwoka i makan, ilëpoko-mio' e Mengkat an sale' ën sëra' nimëla'u-la'us an tana'. Siituoka maame'o se Mengkat wo sera iru'ndu' i Mawëris mio' mangere-mai in sëra' iitu, ta'an maali-ali tjekepe sera. Awoja sapaka si tjekepe iitu aiwa'kësera an ipus i wawi wo sera tumintjas. Pakaseren-io' i Mawëris ëng kekepe ipëngepe-ngepe, ta'an da'itja kailëkana in ipusoka i wawi ë makepe.

Tumintjaso se Mengkat nimëla'u-la'us-ange a si Tjolano, wo sera mënto'o witu. Sapaka si Tjolano makaanak rua m

bewene. Ra'itja ure se Mengkat ěn ambitu, ja měwěra-wěra'oka sia wo si ěsa Wawu' i Tjolano, makangaran Wulangkau'. Wo ang kasomoian sia pangilěkěno i Mengkat a si Tjolano. Awoja n iitu nienan i Tjolano. Janta'an kinuanan i Tjolano in tana'i: „Sawo kaangeanu-mai ěn tatawun paser i Mawěris, ja ro'na kamu tumane.”

Siituoka tu'u mangem si Mengkat wo tuměkěl an darěm im patěkělan i Mawěris. Tuměkělo si Mawěris, ja to'tolano i Mengkat i meso' ěn tatawun paser iitu. Janta'an sangaweso' i Mengkat, mapolo ka'i-mai si Mawěris. Am pa'pa'an tu'u makapirao weso'on i Mengkat, ja mio'o tumo'or-ai si Mawěris mangere si měmeso-meso' in tatawuna paser. Pailěkěnao si Mengkat re'en. Siituoka wa'kěsěnao sia wo ng kuana: „Tarepe' ko ěn sěra'angkuo.” Wo ng kuao i Mawěris a si pěnana'ana: „Tumu'uno-mange in darakanan ko, en aku mangepe'-mai tambělang nonoan.” Itu'un-ako i pěnana'ana n darakanan, ja si Mawěris mangeo wo'o tume'tel in tjaju. Janta'an ng kuano i Mengkat: „E Apo', iwe'e-mai iaku ěn tume'tel in tjaju ta'an ěngkasěne'-mai aku-wo, wa'kěsěnuoka ka'i-sa.” Pakaěngkasěn-ako sia, ja indonao-mai m pati wo ipongkol(ě)na-mange in do'kos i pěnana'an i Mawěris. Siituoka mangenao indon ěn tatawun paser i Mawěris, wo sia tumintjaso. Paalinao-mange n iitu a si Tjolano.

Jawoja ng kuano ka'i i Tjolano: „Aweane' ka'i ěn iru'ndu'ku iitjo, sa itu paalinu-mai, ja ko ro'na iwe'eku tumane a si Wulangkau'. Itjon-ai ěn Dano am botěl měrěga-rěga, a mitjo m Paantangan i Ĕndo.” Awoja ě mitjo-mai si rano iitu, ja karěngana sumake ang kawajo, e n iitu ro'na kaerean-ai sa itu pario-riorěngkě'-mitjo. An tutuwoka i Mengkat i měmasa-masa in tumambisa sia ě mitjo-mai in iitu, ja sia makata'neio-mai si tjawajo i Mawěris, rěpět nimangakar, wo ng kuana: „Isiakě' ěn sakeangku-mitjo.” Anaaitu sia mange rumombit-ai si Tjawajo Rěgěs i Mawěris. Janta'an si Tjawajo isia ja tumengekě' sawo indon e walina. Mangem tu'u si Mengkat. Makapira tu'u wo'o pěindona si Tjawajo, ta'an měnenge-

nengekë', anaeitu mëno'o-no'or(ë)kë' si Mawëris. Janta'an pëere-
 erena si mërombit, ra'itja kaereana, en sia maënëp(ë)kë'.
 Maioka ang kasomoian tumenge si Tjawajo, ra'io nitumo'or
 si Mawëris, am pa'pa'an itjua i Mawëris, kasale'angkë' i
 Tjawajo i matenge. Siituoka indono-mai i Mëngkat si Tjawajo
 wo sakeana i mitjo-mai in Dano am botël mërëga-rëga wo
 paalina-mai a si Tjolano.

Siituoka ng' kuano i Tjolano: „Ësape' kai ën indonu. Siitu-
 oka tu'u-wo. Sapaka ko, ja mange-mai si Mawëris, paalin-ai
 an iaku, am pa'pa'an sia ja talos lewo'." Siituoka pangereno
 i Mengkat ë lalan, wo ro'na si Mawëris tangka'ana. Mangem
 si Mengkat wo tumongkei in tjaju i Mawëris am patinanëmana.
 Matongkeioka iitu si Mengkat, ja mai si Mawëris. Ëng kuano
 i Mawëris: „A, nde'e! ambanao tu'u re'e si Mengkat." Ëng
 kuano i Mengkat: „Ra'itja iaku si Mengkat, janta'an si
 Mengkat nimateo. Ririor wo sia mate, ja aitjuana i mai
 itongkei in tjaju i amanga ema'an pangko'na." Siituoka ng
 kuano i Mawëris: „Sama' re'e en sia nimateo." Siituoka
 sembongano i Mawëris si Mengkat matawoi im pangko'.
 Pakaema'anera-mako n iitu, ëng kuano i Mengkat: „Pailë-
 këngku ja pute si Mengkat wo si Apo'. Anaeitu mëpe'-mio'
 tumëkël si Apo' wo këtëpëngku, itjua-mai iaku si wisa si
 tintja." Tumëkëlo tu'u si Mawëris. An tutuw(ë)na i makatëkël,
 ja mueio si Mengkat a si Mawëris: „Ambisa si tintja?"
 Ituru'o-mange i Mawëris. Si wisa n ituru' i Mawëris, siitu m
 ba'kësën i Mengkat. Pakawa'kësën-ako i Mengkat ëm baja
 se aituru' i Mawëris, wo rëpëto waja ng këwa'kës(ë)na, ja
 numuwu'o si Mengkat, ëng kuana: „Iakuo tu'uman si Mengkat
 ja, si pinësëra-sëra'nukë' wo'o. Janta'an ka'itje' ko nimamualio
 wetengku; ra'io kua'a itjakësot a si pangko' iana ko." Sii-
 tukë' ëm pinalinga i Mawëris, ja sia maëmbowo wo sia
 kumëtëro wo'o ë mëkësot, janta'an ra'io toro. Am pa'pa'an
 tu'u si Mawëris ja këtë-këtërën, anaeitu mato'o-to'oroka ëm
 pangko'. Awoja sangato'or-ai im pangko', sangatuke-mange
 Mengkat. Pinëngulu-ngulur i Mengkat tani'tu akar in itjaambo-

mange im bale i Tjolano. Ĕng kuano i Tjolano: „Isiao tu'u si Mawëris?” „E, isiao,” Ĕng kua i Mengkat, „janta'an tam-bisa wo sia ro'na pailëkëñ? Sawo sia wuka'ano ja sëra'anao tu'u waja se tow ambia.” Anaëitu Ĕng kuaerao: „Ja lutawëno-wo, wo wuka'an.” Siituoka tu'u ja lutawën. Mate-mako sia, ja wuka'ano. Pailëkëno tu'u ja si Mawëris(ë)ka re'e.

Awoja am pa'pa'an tinawoio waja i Mengkat Ĕn airu'ndu' i Tjolano isia, ja iwe'eo i Tjolano si Wulangkau' mamuali pënana'an i Mengkat. Akar iitu.

38. Kukua an doro' i Sëra'-Tow, sinisil i Servius Rawung.

Kaindo-indono-mai sapaka si Sëra'-tow anio' ja mëkarëtuk wo si ësa Kolano. Awoja maio a si makasa sera in dua mënta'aran ësa ta'ar si ra'itja ro'na mëntëla'uan si ësa wo si ësa. Ĕng kuano i ësaan-ange an isera: „Sa iaku n dior mate, ja angenu-mai si pënana'angku maindo pënana'anu, wo tani'tu, sawo iitjo n dior, ja karëngana si pënana'anu angengku ka'itje'-mai wo maindooka pënana'angku.” Tani'tu n ta'arera in dua.

Awoja maja'o pira ngasërap an somoi-mai iitu, ja mateo si Tjolano. Ja itji'it in ta'arera, ja karëngana si maësa-ësa itu maindooka pënana'an i Sëra'-tow. Ra'itja pira ngando an somoi-mai im pinatean i Tjolano, ja angeno-mai i Sëra'-tow si Maësa-ësa itu, maindo pënana'ana, wo karapi e rua toja'ang tuama ana'na ja ipakawalinao-mange am balena. Maja'o pira ngando an somoi-mai iitu, ja kakaapuano in sëra' si Sëra'-tow, wo anaitu ja itjaewenao ka'i in sumëra' se toja'ang toloatëkëna. Awoja sapaka n aipaturu'na tawoiën a se rua toja'ang iitu, ja mauwit kaju iparuruk ang kawali pëngara-kanana se tow itjasale'na sëra'an. Tani'tu ng kaju pëngauwi-tënera i mëtuari ja nimasu'uno.

Maio a si wëngi makasa, tu'tulëno i Sëra'-tow se rua toja'ang iitu kara-karapi e rua toja'ang ana'na. Ĕ ngaran i luluna a se anak toloatëkëna, ja Sebat wo si ësa Kebat. Sera kinaraian i Sëra'-tow in tjulo', ja se ana'na kinaraian im

buring. Sera ka'i pinētane n tinēkēlan, em pa'pa' se anak toloatēkēna ja aipaulun-onge, ta'an se ana'na ja aipaulun-eko. Tani'tu ng kētu'tul(ē)na isera. Ja kamang sera in aipakatē-kēl(ē)nao waja am buni ja sia kumēsoto-mange wo tumu'un in tjawali. Ja an tutuw(ē)nakē' i mētu'u-tu'un in tjawali ja aipakasawēlo e Sebat in dua ng karaiera a se kasundurera karapi in tinēkēlanera ja aipēsawēlerao. Tani'tu pailēkēn-ako i Sēra'-tow i makaluaro n dano, ja sia muntēpo-mange am buni wo mange mindo-mai si Sebat wo si Tjebat, ilēwu ang kawali. Ja sia nimatu'usoka im pēkaraiēn wo ng kētēkēlera; anae sia nimaange-mai se nimaaulun-onge. Itjuana-mako sera ja se toloatēkēna, ra'itja, en se ana'nakē'. Awoja maroro'-mako sera, ja isu'up(ē)na-mio' mēkele sangatatatar se toja'ang makatēkēl wo sia muntēpo-mange, mange tumowa-mai se toja'ang am buni. Kuana an isera: „Tumo'oro-mai, wo maio sumēra', e ana'ku!”

Siituoka tumo'oro-mai se rua toloatēkēna itu, wo mange mindo im betengera, ta'an sera ja ra'itja nisumēra', pa'pa'an kailē-ilēkanera in sapaka n iitu ja tow wo rakanēn. Anaitu ilēpokerao-mio' am bo'so wo kuanerao a si tumoloatēk isera: „Je, aitjalēpoko n sēra'ami! Wean de'e-mai api wo mio'amipe' itjepe in sēra'.” Tani'tu sera rumojoro-mio' an tana', maali-ali in tjekepe. Awoja sera ē nirumojor-io', ja ra'itja am pa'pa'an i mio'-mai in sēra', ta'an sera ja tumintjaso, pa'pa'an sera mēnginde-nginde'oka ē nimakasere se rua kasundurera in aipalēwu i amangera ang kawali. Ja a si wēngitjē' iitu sera nitumintjaso a si ro'ong iitu.

Mando-mai, ja se rua toja'ang itu mailēko sapaka sera ja an unēro in dēkat e tow an sangaro'om balina. Tani'tu sera mēmaja-maja' sumosor e mēros in tjuntung, muntēp an talun e kumēsot an talun. Awoja pirakē' wona' ngando an somoi-mai iitu, ja sera itjasumpako-mange si ēsa ro'ong; ja sapaka n a si ro'ong iitu pēngēna-ngēna'an i ēsa Kolano. Ambituoka sera, ja sera mēnuwu-nuwu'o ja in sapaka sera ja mangeo tumuang a si Tjolano ambitu. Tani'tu sera mangem a si Tjolano wo muntēp tow(ē)na. Awoja si Sebat nimakaere

tawoiën mateir a se kawajo, si Tjebat mēngauwit kaju ipa-ruruk. Ang kasomoian-ai im pira ngando sera sumisilo-mange a si Tjolano an doro' in sapa wo sera nitumintjas am bale i amang wo si inangera. Awoja palingan-ako i Tjolano n sisil an doro' i Sëra'-tow, ja ng kuana an isera: „O, waja in tawoiën i tow isia ja kailë-ilëkangku.”

Ra'ipe' ka'i ure n an somoi-mai iitu, ëng kuano i Sebat a si Tjolano: „Masale' si Tjolano n tumëlës kawajo ma-pa'ilong im paser?” Sumowato si Tjolano: „Masale', ta'an ambisao n do'na kaereanu kawajo tani'tu?” Sumowato si Sebat: „A mange m bale i amangku.” Kuano i Tjolano: „Sama', angeno-mai.” Tani'tu tumi'iro-mange sia. Awoja itjatëka'o tu'u-mange sia; kaiuntëp(ë)nape'-mange a lesar im bale i Sëra'-tow, ja tumengeo-mai si tjawajo an untëp i lalandangan. Palingano i Sëra'-tow ën tengena i tjawajo, ja ng kuanao an dekena: „Wona' përombitëno si tjawajo.” Anaitu sia rumojoro-mio' maali-ali in ëëla'b wo mængena ipëëla-ëla'b si tjawajo. Ja sapaka si Sebat ja nirumarëm(ë)kë' an darëm i lalandangan, anae sia ra'itja pinailëk i Sëra'-tow. Ja pailëkën-ako i Sëra'-tow in ambitukë' si tjawajo, ja sia marengo ka'i mange tumëkël. Pëindono wo'o i Sebat si tjawajo, ja nitumengekë' ka'i. Siituoka ja rumojoro ka'i-mio' si Sëra'-tow, wo mio' makepe-kepe kaapa maëla-ëla'b si tjawajo; pa'pa'an in ambitukë' si tjawajo, ja sia mainde'o tare ëng kuana am basana: „Wona' re'e wawean mu'kur mali'tji-li'tjir i lalandangan.” Anaeitu sia sumosoro-mange am bale wo mange ka'i tumëkël. Siituoka ja weso'ono-mai i Sebat si tjawajo, wo paali-alina mange a si Tjolano. Ja maindo-mako n tëlësera ja waerano i Tjolano.

Siituoka ng kuano i Tjolano a si Sebat: „Itjasale'ku wo'o sa si Sëra'-tow pailëkëngku.” Sumowato si Sebat ëng kuana: „Itu ra'itja ro'na mamuali, pa'pa'an sa ko wo mange an isia, ja ko mangelakë' sëra'an, ta'an sawo sia itjasale'mu i mailëk ja tarepe'kë' sia paalingku-mai an dior i Tjolano.” Sumowato si Tjolano, ëng kuana: „Sama'; sa sia wo mangemu ipakawali-

mai ambia, wo ko ra'itja sĕra'ana, ja ko maitjuoka tamberan sangawetengan a se waja in tjinaereangku." Tani'tu maja'o si Sebat wo mange. Awoja itjatĕka'-mange an tĕmbir i lesar i Sĕra'-tow sia, ja sia mitongo-mio' tonŏ wo itjusuna im baja in owa'na wo sia mange a si Sĕra'-tow. A mangeoka mbitu sia, ĕng kuanao: „Sapaka aku ja airu'ndu'-mai i Tjolano, mai makata'u a si Apo' in sapaka si Sebat, si mai nirumombit-ange si tjawajo i Apo' ja nimateo, wo anaitu sa, kine, itjasa-le'mu ja mangilĕke', kine, kaju ambia, ema'an pangko'na."

Awoja kĕlinganakĕ' si nuwu' iitu, ja sia mangaja'ka'o-mai ang karapi i masale-sale'; wo sera rumojor-io', wo mio' mema' im pangko'. Ja kamang im pinakaema'erao, ja ng kuano i Sebat: „Itji'it im pinakaema'tao, ja ra'itja tanu in sama' tumĕkĕl-io' ambitu si Apo', wo iwe'eku n tututuw, wo ilĕkĕngkuoka mainde'-mako waweane' ĕn tintja." Siituoka tumĕkĕlo-mio' sia, wo itutuw(ĕ)nao-mio' ĕn tututuw wo se rua kaju itu wa'kĕsĕnao pĕwali-walin. Ja an tutuw(ĕ)na i mawa'kĕs, ja sia mĕngua-ngua a si Sĕra'-tow in tana'i: „Tia'pe', tia'pe'-wo! tia'pe' maero-ero'-wo, em pailĕ-ilĕkĕne' wona' re'e waweane' ĕn tintja." Awoja kamang im pinakawa'kĕs(ĕ)nao, ja wulengĕnao-mai wo sia maja'o-mange a si Tjolano. Ja an sangkum(ĕ)na i mawaja' ja sia mĕngua-ngua in tana'i: „Iaku tu'uman si Sebat, iaku tu'uman si Sebat!" Palingan-ako i Sĕra'-tow wo kailĕkana-mako in sapaka sia ja pinandeio i Sebat, ja sia makĕse-kĕseioka, mĕwĕka-wĕkar in owa'na, ta'an mande sia in tani'tu, ja ra'io iwĕta' i Sebat ta'an sia pĕmule-mulengĕna-mange, iaka-akar in itjatĕka'. Itjatĕka'o-mange am bale i Tjolano sia, ja pangilĕkĕno wo'o i Tjolano sawo si Sĕra'-tow ro'na pailĕkĕna n amo. Janta'an ĕn iitu ra'itja kini'itana, pa'pa'an kuana a si Tjolano: „Sawo sia wuka'anta in da'ipe' pinate, ja waja itjita pakaindo-indonao." Siituoka tĕngkitjĕnerao-mio' im pupus ĕn do'kos i Sĕra'-tow, akar i nimate. Mate-mako sia, ja wuka'ano i Sebat ĕm pangko'. Ang kasomoian-ai iitu sia ilowĕng.

Kaindo-indono-mai a si tjapiraan ngando an somoi-mai iitu,

ja kalingaano e tow a si ro'ong i Sëra'-tow in sapaka si nima-kaindo si Sëra'-tow ja si Sebat. Siituoka sera in dua mëtuari angkaiënerao, maindo kolanoera. Si Sebat nimaindo kolano, wo si Tjebat ja niindoera kumarua si Tjolano. Tani'tukë'.

39. Kukua an doro' i Sangarangan, sinisil i Servius Rawung.

Kaindo-indono-mai, sapaka ën a si ësa ro'ong pëluku-lukutan i ësa kolano, ja wawean ësa wewene maësa-ësa makatoja'ang tëlú toja'ang tuama. Awoja si Tjolano ambitu ja makatoja'-angka ka'i tëlú toja'ang, ta'am bewene. Sapaka se wawu' anio' ja itjau-kaupus i Amangera, anaitu sera aiema'na ësa pëngalële'an am palëmboian in dano an da'itja wana tow ro'na mange makëmu-këmu malële' ambitu. Wo aita'ar(ë)na kasusurera i mange lumële', ja karëngan da'itja malangkoi a mapaso'o-mai si ëndo, ja sera nimarengo am bale. Tani'tu sera ë mange mëngalële'.

A si makasaoka im boo-woondope', ja sera in tëlú mëtuari mange ka'i lumële'. An tutuweraoka i malële', ja kumompo'-mai si ësa tuama pinangakaran in tjakolëk, wajakë' in sangarangan ëng karangka'na, mai nimindo-mange se tëlú Wawu' itu wo ipakawalina-mio' an darëm in tana'. Sapaka si Sangarangan, ja kakaja'ka'an muli-ulit am pa'pa'an sia mëngawaluwalui-mio' in owa'na, matëkek-ako-kolëk e mawangker-rangka' tambisakë' ëng kasale'ana. Ja kasusur(ë)na in sumosor-ai am bawo in tana', ja sia tumëkek-kolëk in owa'na, ta'an an sangkum(ë)nape' i mawareng-io' ang kakolanoana, ja n owa'na mawangker-ro-rangka'. Awoja rumangka'o-mai si ëndo, ja se tëlú Wawu' iitu ra'ipe' mareng-ange am bale. Siituoka ru'ndu'ano-mange i Tjolano ësaan-ange a se malukar, mange milëk-ai isera am palële'anera, mainde'-mako sapa ë nimange-mai wo sera ra'ipe' nimareng-ange am bale. Tani'tu ng karior si malukar itu mangem, ta'an mangelao pailëkën, ja ra'itja wana sera n ambitu.

Siituoka ipërior(ë)nao-mange in tjumua a si Tjolano in da'itja

wana m pinailëk(ë)na an isera. Këlinga i Tjolano in iitu, ja ipëkirintja'nao se tow an do'ong sumembong i mangere se Wawu' tëlu mëtuari itu. Ruao ngando sera ëm paere-eren, ja ra'ipe' kaerean. Ang katëluan ka'i ngando, ja ipëkiumungo i Tjolano ëm baja se tow a si ro'ong iitu, wo wueiana sawo waweane' ën an isera ën da'ipe' nimangere se Wawu' iitu. Awoja wueiano se tow ja wajaoka se tëlu toja'ang anak i Wewene maësa-ësaoka n da'ipe' nimangere. En iseraoka n da'ipe' nimangusui, ja ipëkiwueio i Tjolano sawo sera ro'na makausui se Wawu' isera. Mangeo pëwueiën sera, ja si Luluna e mëtuari nisumowat(ë)kë' in tana'i: „Pe'tare ro'na makaere isera ëm baja se tow ambia, ja wo'ope'ka-mai itjami in tëlukë', wo anak ka'i i malënge-lëngei! ta'an se tuaritju tu'u ja.” Wueiano si tjumi'it isia, ja tanukë' ka'i in sosowat i tjaka'na. Ta'an maioka a si Tjaakaran, ja sia sumowat ëng kuanao: „Ëpe'anamioka i mangere.”

Siitukë' ë nuwu'na, ja sera ipakawalio-mange an dior i Tjolano. An dioroka i Tjolano sera, ja sera wueianao ëng kuana: „Ro'na kaereaniow i mëtuari se ana'ku aitjatala? Sawo sera kaereaniow, ja ipakawali-mai an iaku, wo itjamuo in tëlu ën tumane an isera, wo si sei ë makaere isera an itjamu, ja isiaoka maindo kolano sumawël an iaku.” Sumowato si Luluna, ëng kuana: „Pe'tare ro'na makaere isera ëm baja se tow ambia, wo'ope'ka-mai itjami in tëlukë', anak ka'i i malënge-lëngei.” Sumowato ka'i si Tjaunëran, ja tanukë' in aisowat i Luluna. Ja maioka a si Tjaakaran, sia sumowat a si Tjolano ëng kuana: „E Kolano! ëpe'anamioka re'e, in tjaerean kaapa in da'itja.” Palingan-ako i Tjolano ën iitu, ja ng kuanao: „Sapa ng karëngana paaliniow, ja ro'na kausuan ambia.” Sumowato sera, ng kuanerao: „Sapaka ng karëngana paalinami, ja se anio'kë': tëwi' wo sëra' walunën, wo kure', wo pisow, pati wo tolu mëkele ësa.” Kailëkan-ako i Tjolano in sapa waja ëm paalinera ja pëla'u-la'usënao i me'e.

Siituoka sera maja'o mangere. Ën tino'tolanera i nimere, ja a mange si rano pëngalële'an e Wawu'-wo. Itjatëka'-mange

witu sera, ja ng kuano i Tjaakaran a si Luluna: „Ilëpok-io' ën toľumu wo ilëkëntape' sawo kita tumambisa ë maja'.” Ilëpok(ë)nao tu'u-mio' ën toluna, pailëkënerao-mio' ja ipëringi-ringin wo irojong in dano. Pailëkënera-mako si toľu itu iparojongo in danò, ëng kuano ka'i i Tjaakaran a si Tji'itëna: „Ja iitjope' ka'itje' ë lumëpok in toľumu.” Ilëpok(ë)na ka'i-mio' ja tanukë' ka'i i nimamuali a si Luluna. Kakaapuan ilëpoko ka'itje'-mio' i Tjaakaran ën toluna, ja pailëkënera ka'i-mio' tanukë' ka'i i nimamuali a se kaka'na. Siituoka sera maja'o sumalu si rojongan iitu. Ja ang kasiowan ngando in sera i nimasaluo si rojongan iitu, ja kalingaanerao-mange ën ërasa in sëmpa'. Awoja siituoka sera tumulio tumërung an tëmbir in dojongan, ënto'anera i mëkipondos. Ja woo-woondope' a si tjapulu'an ngando, si Tjaakaran karapi i Tji'itëna mangeo mëkipondos an talun, ta'an si Luluna nimënto' sumiwo in tjanën.

An tutuw(ë)naoka i mëpe'en, ja serena-mange si ësa tuama kukumbutan nimangakar, mange masalu'suk-ai in dano wo mëla'u-la'us-ai an tërung wo kuman in tu'tu' pëpe'enën. Pa'pa'an itu in tjaapunao, ja sia ipëtokolo i nisumiwo, ta'an da'itja kinawoleiana si Tjumbut. Marengo-mai se nimëkipondos, ja sisilëno-mange i Luluna an isera sapa ë nimamuali, ëng kuanao: „Sapaka aku tarepe' ja nimëtokol wo si ësa rombit si nimai tjumaa-kaapu in tu'tu', sia ja kumbut pinangakaran, wajakë' in sangarangan ëng karangka' ta'an ëm bu'uk ja paweso'on. Sia mio'kë' nisumalu'suk-ai in dojongan; marengo-ka'i sia nisumalukë'-mio' in iitu.” Numuwu'o si Tjumi'it isia, ëng kuana: „Woondo iakupe' ka'itje' ën sumiwo.” Tani'tu ë nimamuali. Mando-mai ja sia sumiwoo tu'u. Mëpe'enoka sia, ja serena ka'i-mio' si Sangarangan masalu'suko-mai in dano, wo sia mëla'u-la'us-ai tjuman in tu'tu', iaka-akar in da'io wana ë nimatëla'u. Siituoka sia ipëtokol(ë)nao, ta'an da'itja ka'i kinawoleiana. Marengo-mai se nimindo pondos, ja itjuanao-mange sapa ka'i ë nimamuali. Siituoka ja ng kuano i Tjaakaran: „Woondo ja iakupe' ka'itje' ën tumiro' wo sia ëpe'angkuoka.”

Mando-mai in se kaka'na i nimangem ka'i mēkipondos, ja sia mindoo pasēk wo ipasēk(ē)na a makali'tjir im patiro'an, wo sia tumiro'. Ja an tutuw(ē)naoka i mēpe'en, serena ka'i-mio' si Sangarangan maaio, wo pēla'u-la'usēna in tjuman ēn tu'tu'. Kinaroro'anakē' i makan, ja aipakawa'kēso i Toja'ang am pasēk ēm bu'uk. Mawēsu-mako si Sangarangan, sia mētintjas, ra'io toro. Siituoka sia pangkurēnao in dara'as aka-akarana in tawio wo'o mate, wo sia ēngkasēna, wo mangena irojong. Marengo-mai se nimindo pondos, ja itjuanao-mange an isera in sapaka si Sangarangan ja pinangkur(ē)nao wo airojong(ē)nao.

An somoi-ai iitu, ja sera maja'o, mio'om a lua'an in dojongan. Itjasumpak-ange i lawanan sera, mueio si Tjaakaran, ēng kua-na: „Itji'it im pailēkēniow tambisa si rojongan anio', marojong mala'u-la'usē-mange a laur, kaapa nisumēraro?” Sowatēnerao: „Ra'itja katu'usanami.” Siituoka ng kuano i Tjaakaran: „Sapaka itu, ja mala'u-la'us-ange an unēr i laur, anaitu kita kumakaja londei wo woleanta-mange.” Tani'tu itjakajaerao londei ēsa, wo sere moleo-mange. Ang kasiowan ngando sera itjasumpako-mange in dano mapulis, iaka-akar ra'io itjawole ē londei. Ambituoka sera, ēng kuano i Tjaakaran a si Luluna: „Tinēpēntao ambia sera, anaitu wa'kēsēntao an dere'enan ko, wo ko tuminēp, ta'an sawo ko ra'itja makatang, ja mero'-mai im pondos wo we'mbetēnamioka.” Pareke-rekenēn sangapulu' ngarēpa ng kararēm in tininēpana-mio', ja iero'nao m pondos, wo tani'tu sia we'mbetēn, en da'io makalēsēn. Itjakēsot-ange a londei sia, ja tuminēpo ka'i si Unēra. Pulu'o ngarēpa n tininēpana-mio', iero'nao m pondos, wo ka'i sia we'mbetēno, en da'io ka'i makalēsēn.

Maio a si Tjaakaran, ēng kuanao: „Sa ra'ipe' aiero'ku m pondos, ja ra'ipe' toro we'mbetēn.” Ja rua ngapulu' ngarēpa ng kararēm in tininēpana, ja sia mailēk ēsa tēmbēran lolo'oran. Siituoka iwa'kēs(ē)nao am pasēk ēm pondos, wo sia sumaluo-mange si tēmbēran iitu. Katare-tarena in sumumpak-ange, ja wale i Maēsa-ēsa. Wo sia pēwueiana: „E, Ra'a, ambisa m

bale i Tjolano ambia?" Sumowato si Maësa-ësa, ëng kuana : „Tonapa re'e ko, en da'itja makailëk im bale i Tjolano? Ëm bale i Tjolano ja mange wueiën a se mëndengkoman anu mange." Sumowato si Toja'ang: „Aku ja lumëlëme' am bawo in tana', ta'an sawo itjasale'mu, ja pëkiinangëngkuo ko." Numuwu'o sia, ëng kuana: „Masale'kë' aku, ta'an sapao ëm pëkiinanganu iaku, en aku tow malënge-lëngei?" Sumowato si Toja'ang: „Ëng kasale'angku iitjo, pa'pa'an si inangku ja tanu'kë' ka'i iitjo." Tani'tu ngarananao si Toja'ang wo iru'ndu'na-mange a se mëndengkoman. Mangeo mëwuei si Toja'ang, sinowaterakë': „Mange wueiën a se mëntëluan." Mangeo ka'i a se mëntëluan sia, sinowaterakë': „Mange wueiën a se mëëpatan." Mangem a se mëëpatan, mëlimaam, mëënëman, mëmpituan, mëuwaluan sia, ja nimëngulu-ngulur(ë)kë' tani'tu, ta'an mangeoka a se mënsiowan sia, sinowatera: „Ëm bale i Tjolano ja si anu mange."

Mangem am bale i Tjolano sia, wo mëwuei a se ata ambitu, sawo ambisa si Tjolano. Sumowato sera: „Sapaka si Tjolano, ja siowo ngando n sumakit, anaitu sia makatëkëloka a si wuni anu mange." Këwuka'na-mitjo im papalën, serenaomitjo se tëlu Wawu' paere-erena, ja makalukut nisumaru-meko si Tjolano. Wueiano i Tjolano sia, ëng kuana: „Sapa ë niaimu?" Sumowato sia: „Aku ja airu'ndu'-mai lumëme' si Tjolano." Siituoka ëng kuano i Tjolano an isia: „Sa aku wo kaema'-anu, ja tëndanangkuoka si tjawajoku mapa'ilong im passer ko, wo m pakakajaan wo se ko'ko' makailëk manani." Sumowato si Toja'ang, ëng kuana: „Sapaka ko ja karëngan eng kasama'-angkuoka." Kuano ka'i i Tjolano: „Sapa ng karëngan iundam-(ë)mu iaku?" Kuano i Toja'ang: „Ën ipakalëme'ku ja ra'itja wana n tow ro'na mailëk, anaitu, sawo itjasale' i Tjolano, ja paparojorën se tow ambia." Tani'tu rumojoro waja se ambitu karapi e tëlu Wawu'. Makarojor-ako waja sera, ëng kuano i Toja'ang a se Wawu': „Mangeo indon-ai si tjawajo wo m pakakajaan wo se ko'ko', paaliniow-ange am bale i Maësa-ësa, wo aku ënto'on-ange ambitu." Kamangera in tumintjaso, sumo-

soro-mange si Toja'ang, wo si Tjolano mangena pangkurën, iaka-akar(ë)na i nimate. Mate-mako si Tjolano, rumojoro-mio' sia ëng kuana a se ata ambitu: „Kasiowan ngando ja mange wuka'an-ange, en sapaka si Tjolaño ja nimaema'o.”

Tani'tu sia maja'o mangem am bale i Inanga, wo sia mangeo tumu'tul en sera sumosoro am bawo in tana'. Itjatëka'-mange a si pondos aiwa'kës(ë)na sera, ja sera mumpuno an sinangkong wo mëkiwe'mbeto. Ja itjakësot-ange am bawo i londei sera, ja sera moleo maawo-awo-mai in dano pinënga-lële'an e tëlu Wawu'-wo. Itjatëka'-mai an dano iitu sera, ja iindoo e anak i Maësa-ësa kulintam bu'nut wo pakulintangan e Wawu' ambitu. Janta'an se tëlu tuama isera ja mëngëñë-ngëñëp(ë)kë' an da'ter im pëngalële'an iitu, an tutuw e Wawu' i mënguli-ngulintang. Sawo wawean ë mange mëra'nda isera i makulintang, ja ra'itja iwe'eera pailëkën ën amo, ta'an ipasele-selengerakë'. Katu'usan-ako e tow in iserao se Wawu' i Tjolano, ja mangeerao itjua a si Tjolano. Këlinga i Tjolano in iitu, ja përiorënao i mëkialer se kawajo sakeanera-mange in ambalesa, ja kë'këpënerao-mai se Wawu' wo isakeera-mange a se kawajo.

Siituoka kumësoto-mai se Mëtuari anak i Maësa-ësa wo mai mëta'up wo se Kolano in ambalesa, wo ka'i sera isake-mange ang kawajo, kara-karapi e Wawu' wo mareng-ange am bale i Tjolano. Awoja am baleoka i Tjolano sera, ja itjuao-mange i Tjolano in sapaka sia ja ra'io kolano, en sinawë-lano i Tjaakaran e anak i Maësa-ësa, en se rua kaka'na nimaïndo kumarua i Tjolano. Tani'tu se Wawu' isera tinane-ano e Mëtuari, wo si Tjaakaran nimaïndoo Kolano a si ro'ong iitu. Akar(ë)kë' iitu.

40. Kukua an doro' i Rompas wo si Rompis wo si Sangarangan.

Kaindo-indono-mai, sapaka si Rompas wo si Rompis anio', ja pinontol i Tjolano i mangere si tjaakaran a se ana'na wewene, si aïtjatala wo ënto'o paere-eren. Awoja ta'arano i

Tjolano sera, sa si sei si makaere isia, ja isiaoka ng kolano sumawël an isia.

Maio i maja'o si Rompas wo si Rompis muntëp in talun, ja sera kinaialian lutaw. Mënuwu-nuwu'o sera, in sera ja mënsansawëlan é mere, si ësa é maja', wo si ësa é mënto' sumiwo. Katare-tare si Rompas é nimaja' mëlutaw, wo si Rompis ën sumiwo. Makasiwo-mako sia, ja sia sumangiro in sa'mbël. An tutuw(ë)naoka i masangir, ja maja'o-mange si Sangarangan, mapala'us ninumuwu' a si Rompis ëng kuanao: „E Rompis, pëtokolënta!” Ja si Rompis nimangaja'ka' é nismere si Sangarangan, am pa'pa'an sia kinala'us i Sangarangan in tumu'il. Ja tare sera wo mëmailëkan, ëng kuano i Rompis: „Ow! sa itjoo n do'on, ja maio!” Kuano i Sangarangan: „Ta'an sa aku kawoleianuka wo n do'kos(ë)ku itjatëndëk(ë)muka an tana', ja ra'itja kanëngku ën tu'tu' siniwomu, ta'an sa ra'itja, ja kaa-kaapungku ka'itje'.” Enano-mange i Rompis, wo sera mëtokol tu'u. Makaure sera é mëtoko-tokol, makalëmbi si Rompis, ra'itja kakëteana si Sangarangan. Kakaa-puan itjaturu'o in si Sangarangangkë' ën takëte, wo tani'tu kanëno i Sangarangan ën tu'tu' kinaa-kaapuna.

Awoja maio si Rompas, pangereano in tu'tu' si Rompis. Itjuao i Rompis in tjinaapuo i Sangarangan. Mando-mai ja si Rompis(ë)kë' ka'i ën aitéla'u sumiwo, em pëngatane' kine i Rompas mainde' ka'i maitjë' kaapun i Sangarangan ën tu'tu' pasiwona. Ja uli-ulit tu'u ën tu'tu' siniwona maitjë' ka'i kinaapu i Sangarangan. Kumi'it si ëndo iitu ja si Rompasoka é nimënto' sumiwo. Makasiwo-mako sia, ja sia sumangiro ka'itje' in sa'mbël. Ra'itja ure kumësoto-mange si Sangarangan kinala'us(ë)na ka'i in tjumua: „Pëtokolënta, e Rompas! Sa aku itjatëndëk(ë)muka an tana' ën do'kos(ë)ku, ja ra'itja kanëngku ën tu'tu', ta'an sa ra'itja, karëngan ën iitu eng kaapungku.” Mëtokolo tu'u sera. Makaure ra'io wo'o kakëtean i Rompas si Sangarangan. Siituoka sia mindoo in sa'mbël pinasangir(ë)na, wo iparak(ë)nao si Sangarangan akar in tjinaindoan i Rompas sia. Siituoka kuano i Sangarangan: „Itu eta' tuama, ta'an si Rompis ra'itja

kětër. Ja maio ki'itëno-mai aku, iwalitju ko mëngat si Wawu' kaakaran e Wawu' i Tjolano nirumu'ndu' iitjo."

Kumi'ito si Sangarangan si Rompas. Mëmaja-maja' sera tumbal-ange si rano wëwëlaram bo rararëman. Susuiano i Sangarangan si Rompas, pa'pa'an mainde'kë' wo'o sia ë lumëwët, ëng kuanao: „Tumimboitjë'-mai ang karaitju ko, ni! eng ko mainde'kë' re'e lumëwët. E, nange kua'a se wale anu mange, ku'kutënta kua'a i mëngat ën iitu, sapaka n iitu ja wale e Mawëris. Ta'an iitjokë' ë masosor, iaku ë maënto' an tana', wo sa ko paompëranera in tjakanën, ja masarukë'-mange in tëtëngoan, en ipalëtup-ai an iaku ën sëra'." Enano weta' i Rompas.

Awoja makalëwët-ako sera, ja sumosoro mange a si wale katara si Rompas, si Sangarangan nimënto'kë' an tana'. Si Rompas pinaompëran e makawale in sëra', kumano sia, aitji'-it(ë)nakë' an aitjua i Sangarangan, aipëlëtu-lëtup(ë)na-mio' ën sëra' wo pinënepa-nepa i Sangarangan. Tani'tu mëngera-ngera-mange sera. Mëngange-ngange, mëngange-ngänge, makakëli e makawangkër ën sëra' ipaompër a si Rompas. Maio a si wale kumasiow, ja si Rompas pamëra'ano in tje'ke'. Itjatëka'-mange am bale i Tjolano e Mawëris sera, ja ng kuano i Sangarangan: „E, sa ko mange ambitu, ja mëtokol-ange wo si Tjolano; sa ra'io kakëteanu, sumiwitj-ai, wo mangekuoka tawangën ko." Mangem si Rompas kinala'us(ë)na wo'on i mate si Tjolano wo si pënana'ana. Katara-tara si Tjolano n aipëtokol(ë)na, ta'an da'itja kaindoana en këlitjë' se nimange nimëtokol isia, nae sumiwitjo si Rompas wo tumarepe'kë'-mai ambituo si Sangarangan. Ja ipëtokolerao in dua se maënto-ënto' am bale i Tjolano. Ra'itja ure pinakapate-pateerao se ambitu.

Siituoka sera muka'o im buni-wuni; mangem a si tjumasiow, ëng kuano i Sangarangan: „Rompas, ëngatëno-mange ambana si pangere-ngerenu, sa ambana ja iwalio-mange sia." Ëngatëno tu'u i Rompas a se makarete ambitu, eng këkëlian kua'a re'e se wawu' ambitu. Serenao-mio' si paere-erena, wo sia towanao en sera ë mësäwëlo in sisim bo mareng. Marengo sera ja

sumakeoka ang kapal. Sapaka si Sangarangan nimēto'o a si ro'ong e Mawēris, isiaoka ēng kolano sawēl i pinateera si Rompas. Itjatēka'o-mange ang kapal sera, ja sera sumengkoto. A si makasa ja ng kapal iitu nitumuli ang katana'an. Kuano i Tona'as a si Rompas: „E Rompas, mange ang katana'an ko, angenu-mai si tjaju anu mange em paalintjupe'.” Mangem beta' si Rompas. Pailēkēno-mange i Tona'as in si Rompas ja ang katana'ano, ja sia mario-rioroka mapawaja' in tjapal en itintjas(ē)nao si Wawu'.

Ja sapaka si Tona'as, ja sinisilan i Rompas in si Wawu' karapina, ja Wawu' i Tjolano a si tana' ambitu, wo tambisa n aita'ar i Tjolano, in sa si sei ē mākaere si ana'na, ja isiaoka ēn tumane a si Wawu' isia, wo sia ka'i mindooka kolano isawēl(ē)na an isia. Itjatēka'-mange, ja si Tona'as mangem a si Tjolano, wo itjuana in sapaka si ana'na isiaka ē nimakaere.

Awoja si Rompas aitjatēla'uo a si tjatana'an pinapatumpaan i Tona'as isia i mindo si tjaju a mange mbitu. Kaindo-indono-mai si Rompas mailēk si wara' wo sia uwakēna ēng kuanao: „E Wara', weangku ka'itje' ēlēpēn ambia ko, ta'an itelew(ē)mu ka'itje'-mange a si ro'ong anu mange aku.” Sapaka si Rompas ja wawean ēm pinēkiinang(ē)na a mange mbitu, anaitu itelewo i Wara' sia, ipēla'u-la'us(ē)na-mange a si Inanga. Awoja mawawa'andoo-mio' ja si Rompas malingao in supera wo lutaw. Kalintērano sia, eng karapi tja'i in tjulintang wo tamor wo se tetengen da'io ipakakua ng kakēli mēgigioanoka. Kuano i Rompas: „E Ina'! ambisa si patengean in anu mange?” Sumowato si Ina'na: „O, mema' re'e kasale-sale'an si Tjolano, eng kinaereano si ana'na aitjatala-wo, ja sia taneano tarepe'.” Kuano i Rompas: „Angenta, e Ina', mangeta ilēkēn.” Sumowato si Ina': „Ore' si sei si mange ambitu!” Kuano ka'i i Rompas: „O, ra'itja, am pagēr(ē)kē' re'e ēn da'ndaanta-mange.” Kuano ka'i i Ina'na: „Ja mangem kua'a re'e ko e, ta'an tio'o itaure-mai, eni!” Tani'tu mangem si Rompas, mange makasere si Wawu' makalukut karapi i Tona'as. Kēilēk-ange

i Rompas si Wawu' ja sia rumu'ndu'-mange ěsa tow, ěng kuanao: „E anio'! iange-mai ělěpěn kita, iangekě'-mai si pakasarun i Wawu' anu mange, mange itjua-mai in tana'i: „Sapaka aku ja wawean ě nirumu'ndu'-mai, mai-mange si ěělěpěn pakasarun i Wawu'.”

Mangem si tow isia, wo paalina-mai a si Rompas si niange-na-mai. Kěělěpo-mitjo i Rompas si ěělěpěn iitu, kua'a sia ě miroto in sisim am bua'na in tjamana wo iwěta'na-mio' a niělěpana, wo ng kuana: „Mangem, e anio'! iwarengo-mange n anio', ta'an tio'o mangekě' iwěta'-mio' tani'tu, ituruk(ě)kě'-mange sia si Wawu', eni!” Mangem ka'i si tow isia, wo ituruk(ě)na a si Wawu', si paělěpan iitu. Kěsere-mio' i Wawu in sisim, ja tani'tu ng kataporak sia mio'o tumo'or-ai wo numuwu': „E, ěnso' si tow isia, si nirumu'ndu'-mai iitjo nimaali-mai in anio'?” Iwalio-mio' i tow isia si Wawu' a si Rompas. Itjatěka'-mio' ja iwalio-mange i Wawu' a si Amanga si Rompas wo sumisil in da'itja si Tona'as ě nimakaere isia, ta'an si Rompas. Am pa'pa'an iitu ja si Tona'as anio' aipěkipate i Tjolano, wo si Rompas tumaneo a si Wawu' iitu a si wěngitjě' iitu. Akar(ě)kě' iitu.

41. Sisil an doro' i Pojo' i Lěngei wo si Mawěris.

Makawangko'-mai si Toja'ang isia, ja ng kuanao a si Apo'na: „Milěke' asu těěsan aku.” Sumowato si Apo'na ng kuanao: „Sapao ndo'on ěn ipawe'emu pakaněnera?” Kuano i Toja'ang: „Awěse' tu'u aku ě mainu'oka am pakaněngku ja.” Kuano ka'i i Apo'na: „Itjokě' tu'u re'e ja.”

Siituoka mangilěko roit sia, rua roit, wo sia rumojoro mangere asu. Mawaja-waja'oka sia, ja pailěkěno i Tjolano; kuano i Tjolano: „Sapa m pawaja-waja'anu, e Toja'ang?” Kuanao in sumowat: „Maere-ere wo'on asu těěsan.” Kuano i Tjolano: „Sa ko maere-ere asu, ja mange milěk a se asuku.” Siituoka mangem am bale i Tjolano si Toja'ang isia. Kuano i Tjolano: „Kua'a se asu e.” Kuano i Toj'ang i mui: „Ta-

kura ěm pangilěkěn isera?" Kuano i Tjolano: „Ja karapitjě in upus(ě)ku iitjo, ja ěsa an isera roit(ě)kě' ěsa." Maero tu'u si Toja'ang rua ěn doit, wo iwe'eo i Tjolano a si Toja'ang se asu rua, wo sera irapio-mange i Toja'ang a si Apo'na. Ja itjatěka'-mange a si Apo'na sia, kuano i Apo'na: „Ore'! sa ko nirombit(ě)kě'!" Sumowato si Toja'ang, ěng kuana: „E, ra'itja ka'itare, itjami si Tjolano ě nimětělěs, ja.

Siituoka ja pěwangko'onerao se asu, ja nimakaakar an tanu membe' ěng kawangkěr. An somoi-ai iitu, ěng kuano ka'i i Toja'ang a si Apo'na: „Tumělěse' sondang aku." Kuano ka'i i Apo'na: „Si sei ndo'on ěn tělěsan?" Kuano i Toja'ang: „Mangěkě' tare ka'i a si Tjolano." Siituoka rumo-joro sia wo maja'o. Mawaja-waja'oka sia, ja pailěkěno ka'i i Tjolano, kuano i Tjolano: „Mawisa ko, e Toja'ang?" Sumowato si Toja'ang: „Maere-ere sondang tělěsan." Kuano i Tjolano: „Nio' kua'a ěn sondangku e; ta'an makawe'ena in satu rupia." Kuano i Toja'ang: „O, satu rupia ěm paalialintju." Kuano i Tjolano: „Indono re'e-mange ěn sondangku." Ja indono tu'u-mai i Toja'ang ěn sondang, wo waeranao satu rupia. Ja marengo-mange a si Apo'na sia, kuanao: „Kua'a tu'u ěn sondang e." Kuano i Apo'na i mui: „A si śeitja tu'u-wo?" Kuano i Toja'ang: „A si Tjolano-wo." Kuano i Apo'na: „O weta', ěn tawangan i Tjolano an iitjo!"

A si ěndokě' itu ěng kuano ka'i i Toja'ang in tjumua a si Apo'na: „Papo', woondo-sa ja irajak-io' aku im boo-woondo-pe'." Mando tu'u-mai irajako i Apo'na. Pakarajakěn-ako ja si Toja'ang iitu kumano in dajak; wo makakan-ako, ja sia tuma'ta'o-mai se asu wo maja'o. Maja'o sia, nimuntěp(ě)kě'-mange am pěngělěpan i Tjolano.. Itjatěka'-mange sia, kuano i Tjolano: „Mawisa ko, e Toja'ang?" ěng kuanao: „Měpe'pe' wo'o maja' se asu." Kuano i Tjolano: „Ja lumukut wo mělěp." Ja kělukut(ě)na-mio', ja sia pě'pěsano e kake'et i Tjolano im busěng, iaka-akar in ta'inaoka waja im pe' ěn owak i Toja'ang. Kuano i Tjolano i mero: „E, ra'itja re'e maupus kamu!" Kuano e mapě'pěs in sumowat: „Sapa ěn itjaupus isia, wo

sapa im pēsiri' isia?" Kuano i Tjolano: „Mai tјatu'u kuman ang karapitju, wo mēlēp." Sumowato si Toja'ang: „E, ra'itja tare manaram." Siituoka ja sia lēse'engke' i Tjolano, akar(ē)na i nitjumangke'. Makakan-ako, ja si Toja'ang ra'itja wean e make'et ēlēpēn. Kuano i Tjolano: „Mēlēp-ange katu'u am paēlēpēngku." Siituoka mēlēpo si Toja'ang. Makaēlēp-ako sera, ja mētalitјuro, marengo-mange am bale si Tjolano karapi e kake'et(ē)na.

Ja maja'o ka'i si Toja'ang mange an talun. Ra'itja ure sia ē nimuntēp-ange an talun, ja pailēkēnao se asu mali'tji-li'tjiroka in tu'ura in tambēlang. Kuano in atena: „Tēndakēngkupe', mainde' se isera se ipakua in tјawok." Tēndakēnao tu'u, kumēsoto se kawok wo indon e asu, iaka-akar in tјēkēlian se kawok niindona a si ēndo itu. Wo sia mareng. Marengo sia, nimaja'kē' ka'i-mai am pēngēlēpan i Tjolano. Itјatēka'o-mai am pēngēlēpan i Tjolano sia, ja ambituo si Tjolano. Kuano i Tjolano: „E, kakēli tu'u re'e ē niindo!" Kuano i Toja'ang: „Uanu tare ena, e Kolano, tununtao se kawok, wo indoanta iēlēp." Kuano i Tjolano: „Ja me'e ja, ta'an pora-porakēngke', ore kauma'an-ai e kake'et." Pakatunun tu'u-mako se kawok, ja sumisiro iēlēp. Makaēlēp-ako sera, kuano i Toja'ang: „Somoioka-mai, e Kolano, rumioro aku, ore ka'i mai pē'pēsan e kake'et(ē)mu." Kuano i Tjolano: „Sama', intao ko-wo, rumirioro."

Siituoka maja'o tu'u si Toja'ang, marengo-mai am bale. Itјatēka'o-mai sia, kuanao a si Apo'na: „Kua'a tu'u se kawok e!" Kuano i Apo'na: „O inde' tu'u re'e kakēli!" Kuano ka'i i Toja'ang: „Se anio' wu'unēn, se a'i pasēra'antaoka." A si ēndokē' ka'i iitu kuano i Toja'ang a si Apo'na: „Papo', woondo-sa ja itiro'-mio' kanēn se asu wo irajak-io' aku." Mando tu'u-mai, nialero i Apo'na ēng kanēn e asu wo n dajak kanēn i Toja'ang. Siituoka wa'umbanao se asu, wo sia kumano in dajak. Makakan-ako sia wo se asu, ja tuma'ta'o ka'i-mai se asu sia, e maja'o ka'i. Maja'o sia, nimaja'kē' ka'i-mange am paēlēpan i Tjolano. Itјatēka'-mange sia, kuano i Tjolano: „Mawisa

ka'i tjo, e Toja'ang?" Kuano i Toja'ang: „Měpe'pe' ka'i wo'o se asu." Ja ng kuano i Tjolano: „Lumukut wo mėlēp." Lumukuto-mio' si Toja'ang, pē'pēsano ka'i e kake'et i Tjolano im busēng. Kuano ka'i i Tjolano i mero: „Kua'itu si Toja'ang iana ra'itja pēsiri'iniow?" Kuanerao: „Sapa ēn ipēsiri' si Toja'ang iana?" Kuano i Tjolano a si Toja'ang: „Mai tjatu'u ambia'i wo kanēnta wo mėlēp." Kuano i Toja'ang: „E, ra'itja tare manaram." Ēnta'an nilēse'kē' i Tjolano, iaka-akar si Toja'ang i nitjumangkē' wo nimėlēp ka'i. Makaēlēp-ako sera mētalitjuro, mangem am bale si Tjolano wo se karapina. Mangem ka'itje' an talun sia.

Ra'itja ka'i ure mēmbe'-mai si tu'a ēn tinangka'ano e asu, iaka-akar i niindo si tu'a. Pakapaten-ako si tu'a, ja mangem ka'i am pēngēlēpan i Tjolano sia. Itjatēka'-mange sia, ambituo ka'i si Tjolano. Kuano i Tjolano: „Awo, nimindoka?" Kuano i Toja'ang: „Tu'a wangkēr si niindo e asu. Ta'an uanu wo'o ena, e Kolano, ipapaange wo'o-mai se kake'et(ē)mu si tu'a." Kuano i Tjolano: „Ipapaangeoka-mai, en sera ra'ipe' ambia." Ra'itja tu'u ure ambituo se make'et. Kuano i Tjolano: „E, angeniow kine mai si tu'a niindo e asu i Toja'ang anio'." Kuano e make'et: „Si Toja'ang iana lēngei, ja mindo tu'a!" Kuano ka'i i Tjolano: „Mangem, ulit kua'a ē nuwu' i Toja'ang iana." Siituoka mangem tu'u sera. Mangeera pailēkēn ulit tu'u. Ja wulenganerao-mange am pēngēlēpan, wo tatarēnera. Matataroka sera, ja sera palingano i Toja'ang in sera mēngē-wi-ngēwitoka in tana'i: „E karu', kita ja ra'itja mēsiri' si Toja'ang iana, pēngapē'pēsanta karu' im busēng, akar in ta'inaoka waja im pe'. Milēk karu' in tarepe', sumēra'o re'e tu'a kita." Pakatatarēnera-mako si tu'a, ja wetengano i Toja'ang sera wo si Tjolano. Pakawetengana-mako sēra', kuano i Tjolano: „Waja itjamu maali-mange in sēra' i Toja'ang, paalin-ange a si Apo'na." Siitu ēng kini'itanera.

Itjatēka'-mange sera, kuano i Apo'na: „Nimindoka tu'u re'en." Kuano i Toja'ang: „Tu'a si niindo. Ja se anio' wu'-unēn, se anio' pasēra'antaoka." Kuano i Apo'na: „Itji'it witu

ja." Mawawa'ando ka'i-mio' a si ěndo iitu, kuano i Toja'ang a si Apo'na: „O, Papo', ialer-io' kaněn tělu ngando aku, wo se asu, en aku ja lumantako-mange tana'." Mando tu'u-mai nialero i Apo'na se aita'ar(ě)na. Siituoka maja'o sia; ni-mangeoka an talun sangawiwi. Itjatěka'o-mange sia, ja sia mema'o těrung patěmburan in sěra.' Pakaema'ana-mako ěn iitu, ja maja'o sia. Mindoo sia ěn a si ěndo iitu lima ěm bio'o. Wo se wio'o isera paalina-mange an těrung wo se sěra' iitu těmburanao. Mando ka'i-mai, tani'tu ě niindo; mando ka'i-mai, tani'tu. Ja ang kaěpatan ngando sia marengo-mai am bale. Marengo-mai sia, niměngi'mba-ngi'mbaoka-mai in sěra', kumi'it in tjěkělian. Ja měmaja-maja'oka sia, ja sia itjawaja'o-mai am bale i Mawěris. Kuano i Mawěris in tumenge: „Ris, ris, wěris!" Siituoka sia tangka'ano i Mawěris, kara-karapi e asu rua, wo ipumpunao am balena. Pailěkěno i Toja'ang, se asuna ja ipapumpuno an tempa, wo pailěkěnao ka'i pawuka'ano ěm pumpunan isia, akar(ě)na in aipumpun. Pailěkěnao ja awean tuama ěn ambitu niindo ka'i i Mawěris, sia ja nitjuměmělo. A si ěndokě' iitu palinganao makua in tana'i si Mawěris: „Woondo si Tjěměl sěra'angkuo." Mawawa'ando tu'u-mio' a si ěndo iitu, ja patenao si Tjěměl wo mando-mai sěra'anao.

Makaure-mako si Toja'ang isia ěn an darěm im pinumpunan isia, ja kuměmělo. Kapěndamana-mako in sia ja nitjuměmělo, makata'neio sia: „E, ra'io ure wo aku sěra'an, en nitjuměmělo." Siituoka palinganao se asu měngiu-ngiungoka, ja ng kuanao i numuwu' a se asu: „Pojo'ku, sa aku niapo'miow(ě)ka, ja kě'kětěn-ange ěm pinumpunan itjamu." Siitukě' ěm pinalinga e asu, tumarepe'-mai sera nitjuměsei wo kě'kětěnerao ěm pinumpunan isera, iaka-akar itu i nimagogar, wo sera itjakěsot-ai. Itjakěsoto-mai sera, kuano i Toja'ang in tjumua: „Pojo'ku, sa kamu nimapo'ka iaku, ja to'orěn-eko in tjumaret si Mawěris, wo kita i měapo' tow(ě)pe'." Tumarepe' tu'u-mai ja se asu tumo'oro-meko, wo kumaret si Mawěris; ja am pa'pa' sia i nitjumili' iaka-akar(ě)na in siněra'oka-mako e asu. Siituoka

ka'i kuano i Toja'ang in tjumua a se asu: „Pojo'ku, sa ro'na, kē'kētēn-ai ĕm pinumpunan iaku.” Siituoka kē'kētēnerao ka'i ĕm pinumpunan si Toja'ang isia, akar(ĕ)na in aitjakēsot.

Itjakēsot-ai sera, ja pailĕkĕno i Toja'ang mangeo rumojor-ai pitu ĕm Bawu'. Kuanerao: „E Toja'ang! sapaka kami kumi'-ito iitjo em pinatemuo si Mawĕris; kamang en sia ja pinatemuo. Sapaka kami im pitu ja ra'itja makaro'ong ambia, ta'an pinaindokĕ' ka'i i Mawĕris tanu iitjo, ta'an tinĕla'u-mio' nima-siwo im pinakana, anae kumi'ito iitjo kami.” Sumowato si Toja'ang, kuana: „Sapa ndo'on ĕn itji'itiow iaku? sapaka aku ja Pojo' i Lĕngei.” Kuano e Wawu': „Mande wo, nta'an tio'o kami wo itjatĕndei. Waja in tjakajaan i Mawĕris pakaalialinta. Kuano i Toja'ang: „Ja maja'o kua'a kita.” Siituoka marengo-mai am bale sia kara-karapi e pitu Wawu'. Wo sera mĕmaja-maja', akar in sumumpako-mai an sĕndi im bale. Kĕilĕk e toja'ang maindo tu'is isia, kuanerao: „O tu'u, si Pojo' i Lĕngei kĕnun de'e!” Siituoka ja tumerono-mange sera, wo mangeerao itjua a si Apo'na, kuanerao: „E, si pojo'mu a mangeo mbia'i!” Kuanao: „E, pales ndo'on, ureo ra'io nima-reng-ako mai, ja!” Kuano ka'i e toja'ang: „Ulit ja. Kĕkĕlian ĕn ipawali-walina!”

Ra'itja tu'u ure serenaomange kĕkĕlian n tow, maaio tu'u si Toja'ang wo se pitu Wawu' ipawali-walina akar in aitjatĕka'o-mai am bale i Apo'na. Kuano i Apo'na: „Sapa tu'u ĕ nisumepĕ'd iitjo, wo aitjaure-mai?” Kuano i Toja'ang: „Sapaka tu'u aku ja niindo wo'o i Mawĕris, ta'an sumama' mawaliwali se asu.” Kuano i Apo'na: „Nitumambisaoka wo ko aitjakēsot?” Kuano i Toja'ang: „Kumili'o si Mawĕris, ja kuangkwo in tjumua a se asu: „O, pojo'ku, sa kamu nima-po'ka iaku, ja kumĕsei-ange wo kumĕ'kĕt-ange im pinumpunan itjamu.” Siituoka tu'u ki'itanerao, akar in aitjakēsoto-mai. Kumĕsoto-mai sera, ĕng kuangkwo: „To'orĕn-eko in tjumaret si Mawĕris.” Siituoka to'orĕnerao-meko, akar im pinateera wo sĕra'anera. Kuangkwo ka'i: „O pojo'ku, sa kamu nimapo'ka iaku, ja gogarĕn-ai ĕm binĕimbĕnan iaku.” Akar in ginogarera,

wo aku itjakēsot-ai. Itjakēsoto-mai aku, ja rumojoro-mio' se pitu Wawu' anio', niindo ka'i re'en i Mawēris-wo." Kuano i Apo'na: „Ja sama! misioka re'e kamu; kamang em pinateo e asu si Mawēris." Numuwu'o ka'i si Toja'ang, kuana: „O Papo', waja se pitu Wawu' aiwalitju-mai ja pawean-ange kanēm bo karai, en aku mereo pēnana'an." Kuano i Apo'na: „Sama', nta'an si sei ndo'on ēn indonu?" Kuanao: „Mangekē' i wuei si luluna e toja'ang i Tjolano." Kuano i Apona: „Sapa ndo'on ēn aitja-raimu an isia, e kawēlē-wēlē!" Kuano i Toja'ang: „Me'e weta'-wo, em baja in tjakajaan i Mawēris ja pinaalitjuo-mai."

Siituoka mangeo wueiēn i Apo'na a si Tjolano, kuanao: „Sapaka aku, ja airu'ndu'-mai i Pojo'ku, mui tjine wo'o si luluna e toja'ang(ē)mu." Kuano i Tjolano: „Sama', enangku, ta'an wueiēn a si toja'ang sa sia masale'ka." Wueiēno tu'u a si toja'ang, ja masale'. Kuano ka'i i Tjolano: „Kumi'it si Pojo'mu i masale' si toja'angku, ja waja si wale anio' wutan-ai in doko'." Siituoka marengo-mange sia, wo ng kuanao a si pojo'na: „Nimeno si Tjolano wo nimeno si toja'ang, ēnta'an aitjua i Tjolano, waja kine si wale i Tjolano wutanu in doko'." Kuano i Toja'ang: „Sama! tio'o mainde-inde', e Papo'. Waja itu mawutaoka." Rumu'ndu'o ka'i-mange si Apo'na si Toja'ang, kuana: „O Papo', mange itjua ru'ndu'ano-mai, mai-mange in doko'."

Siituoka mangelao tu'u itjua, akar in dinu'ndu'ano-mai i Tjolano, mai maēngkei-ange in doko'. Mēngēngke-ngēngkeitja wo nimawutao ēm bale i Tjolano. Siituoka mangaja'ka'o si Tjolano, kuanao: „O tjtjainde' kanimasija' re'e si Pojo' i Lēngei!" Ja marengo-mange si Apo' i Toja'ang, aita'aro-mange an isia, kapituan ngando ja sera kumaweng. Mai tu'u ang kapituan ngando, ja sera kumawengo, iaka-akar sera in tumowa se aka im banua. Makanoka se aka im banua, ja mēnuwu-nuwu'oka in tana'i: „E, kanimasija' re'e si Tampēngasun!" Makakan-ako se aka im banua, ja turukano i Tjolano in tjakolanoana si empona, iaka-akar i maindo kolano si empona, Pojo' i Lēngei.

42. Kukua an doro' i Tjombangan, sinisil i Sam Welei.

Uitgegeven in de Verhandelingen van het Bataviaasch Genootschap van Kunsten en Wetenschappen, Deel LVI, 3e Stuk.

43. Sisil an doro' in allalan i Matu'ao a se Rua Wewene Mëtuari.

Kaindo-indono-mai wawean Inang makaanak rua toja'am bewene, si matu'a-mai toloatëkënaoka, si wo'mbas-ai anak(ë)na ulit. Si ana'na im pusër talos itjau-kaupus(ë)na, ta'an si toloatëkëna iparitja-ritja wo ipare'e-re'ena tumoro-toro. Si wo'mbas palo'o-lo'orëna m pakaraiën wo m pakanën, pasiri-siri'inakë', ta'am beta' ëm baja-waja nimatëna si toloatëkëna, para'ira'iënakë'-mio', wo'o'pe' tare sa n tawoiën aipapatawoi isia ra'itja aipakaki'i-tji'it(ë)na, ja sia patëpiana wo pakumbitën.

Kaindo-indono-mai si toloatëkën aitiaëmbow(ë)na an tawoiën, siituoka sia papaasuna. Mindoo in aasu si toja'ang isia ang karapi i mëngame-ngame' wo mëros-io' an dano. An danooka sia, ja sia milo'o in tjaraina eng këmësana am parojongan in dano. Karë'ndëm(ë)na i makëmës, itjapilu'o ng karai pakëmësana wo itu pakatë'tërëna marojong, ta'an ën iitu panësë-lënakë', anae tondonganao. Mëmaja-maja' sia, maki'it im parojongan in dano masere-sere wo mëmare-mareng in somoi mainde' ën iitu nilangkoinakë', ta'an da'ipe' kinaki'itana. Tani'tu m binaja'ana nimakatajango. Siituoka sia mësungkulo ësa tow. Këilëk(ë)na si tow iitu, sia pamueianao: „O maësa-ësa, ra'itja pinailëk(ë)mu ng karaitju?” Sumowato si maësa-ësa: „Ra'itja e mene, ta'an mange wueiën a se marua-rua.” Mangem a se marua-rua sia, wueianao: „E marua-rua, ra'itja pinailëkiow ëng karaitju?” Sumowato sera: „Ra'itja, ta'an mange wueiën a se matëlu-tëlu.” Nimëngulu-ngulur-ange tani'tu sia tumbal-ange in itjaambo-mange a se mapulu-pulu'. Maio mui a se mapulu-pulu' sia: „E mapulu-pulu', ra'itja pinailëkiow ëng karaitju?” Sowatënerao: „Pinailëkami pinitong i Matu'ao maënto-ënto' a si wale anu mange, nae mange wueiën an isia.”

Mangem si Toja'ang iitu wo mangena wueiën: „E Apo', ra'itja nimailëk in tjaraitju ko?” Sowatënao: „Ore', nio' ën

iitu, pinitongku an dojongan tarepe', ta'an atasan-ai aku wo, mai wean do'kětēn se ko'ko'ku, wo wa'umban-ange se wawi, wo mai isiwo-mange tu'tu', e lēmbioka si Apo'mu." Tani'tu ng kataporak si Toja'ang isia ng kumēkek se ko'ko'; kēkiek(ē)na-mange, tumumpa-mio' an tana' se wara' wo rumo'kēt in tande aipawuras(ē)na. Itji'it si Toja'ang in ate sama' wo ra'itja kosero' kaapa manaram in tjosowat, ja sia ra'itja eta' mēngkut-ai ē makasere se wara' ipakua i Matu'a in tjo'ko'na. Pakaweana-mako se ko'ko', indonao-mai iwa'umb. Kētengkor(ē)na mange im bawa'umban, lumi'uso-mange se ula': ambitu se wai', se tumotongko', se kalumaan, se tambulinga', se wēwēngkalēn, se tampo'po' wo se waja-waja patu'ulēn ula'. Aitjakaja'ka' i Toja'ang isia i makasere se ula' anio' makan am pawa'umban, ta'an mainde'kē' sia ēn sumero'-mange. Pakawa'umbana-mako se wawi, kua'a sia ē mange sumiwo, mangena wueiēn a si Apo' sa ambisa ng kure' siwoan. Mio' ituru'-mai i Matu'a ng kure', ja aitjalintēr(ē)kē' i Toja'ang, pa'pa'an in takoitjē' ēn aituru'-mange i Apo'na. Mande in tani'tu, ra'itja ēngkutēna-mai, asal(ē)kē' sia wo makasere, wo mērior tumu'un in takoi, iaka-akar ēn iitu wēroiana tēwi'. Makasiwo-mako sia, ja sia mangeo kumua a si Apo'na i marengo wo'o. Kuano i Apo'na: „Sama' e mene! ta'an ko turu'angku lalan posokan, ki'itēn-ange n iitu en siitu n tawi. Ja nio' ka'itje' ēng karaimu, laleioka, ta'an pinanēsēl(ē)mukē'."

Siituoka sia tumi'iro en si lalan aituru' i Apo'na ng ki'itēna, mande itu in da'ipe' kailēkana. Mēmaja-maja' si Toja'ang isia karapi in ēlur wo masale-sale', pa'pa'an in tjinaereanaka ng karaina aitjarojong. Karē'ndēm(ē)na i mawaja', sia katampengan-ange kara-karai wo aroro' mēgigioan, karapi in totopok wo mandas wo ng kelana, pawiwingēn. Siituoka si Toja'ang isia makasale'o wo mamora-morako ē mawaja', em baja itu manganape' ituru' a si Inanga wo si tuarina. Itjatēka' tu'u-mange am baleera sia, ja ituru'nao, ta'an aitjuakē' i Tumolo-atēk isia: „Wona' re'e nirombit(ē)na se tanana iitu, kua'itu-itu sia nimakaereo se makawe'ena in tjēli?" An sangkum(ē)na i

mëma'a-ma'an im baja im popopos i Tumoloatëk isia an isia, ja n atena makawëndu-wëndu wo makatëku-tëkuro. Siitu-oka pakasisi-sisilënao sapa ë nimamuali an isia. Awoja ëm pinaëngkas(ë)na aipëme'e-me'e i Inanga an deken, akar im pinakasigi-sigil i Toja'ang.

A si ëndooka makasa sia tumena a si ana'na, ëng kuana: „E ana'ku, tëpiangku ko eni! Wo mio' irojong ëng karaimu, ta'an tondongan-ange n iitu wo mange a si Matu'a ambitu, siitu ko ë makaere ka'itje' se makawe'ena in tjëli.” Nienan i Toja'ang isia, wo tani'tu sia patëpiano i Inanga. Ja ulit sia aitjaulur tanu si tjaka'na. Ta'an kaindo-indono-mai mawe'eoka ro'këtën e ko'ko' sia, ja isero'nakë', ëng kuana: „Ere', e Apo', wara' re'e se ko'ko'mu!” Sowatëno i Apo'na: „Kosero' kua'a re'e ko.” Maio ka'i sia i mailëk se ula' se ipakua i Matu'a im bawina, sero'ona ka'i-mange. Tani'tu ka'i aisero'na ëng kure' i Apo'na, pa'pa'an takoitjë'.

Pakatawoiëna-mako se aipapatawoi i Apo'na isia, kua'a sia ng kumuao i mareng. Awoja si Toja'ang anio' tinuru'angka ka'i i Apo'na lalan, ta'an ra'io si lalam binaja'an i tjaka'na, tinuru'anakë' paposokan keke'osan wo lëläpoan, tutunëngan ulit wo këli watu. Itji'it sia in tinuru'an i Apo'na si lalan iitu, ja sia karëngana maja' witu. Tani'tu sia marengo, ta'an sangarambuna-mange, itjake'os, sangarambun itjake'os, iaka-akar sia katampengan i lëpo wo katunean ën amo wo ng kama, wo'ope'ka-mai ng keitjei ja kinapela-pela'ano. Kësere-mange i Inanga isia in tjainde'enoka m pakaseren-ange, kua'a sia ë mamueio: „O inde'! kua'itu-itu ko katani'tu?”

Sisilëno-mange i Toja'ang an isia sapa waja n tinawoina, wo tambisa m bawangunana a si Apo'na wo ë nimamuali an isia. Kailëkan-ako waja i Inanga in tani'tu, ja makata'neio sia, wo sina'uëna si ana'na in tana'i: „Sapaka m baja in iitu ja mamuali am pa'pa'an de'e ko in tjosero', ta'an si tjaka'mu ja te'es aiparu'ndu-ru'ndu'!” Akaro-mai iitu wo se mëtuari isera pinëngëpute-puteoka i Inangera. Akar(ë)kë' iitu.

GROEP VI.

44. Kukua an doro' i Rorong manguma, sinisil i Jakob Rorong.

Kaindo-indono-mai itji'it in tjanaramën e tow in dior sa mange maras uma wëru, ja karëngan mänge a se tona'as im pangumaan. Ja sapaka ë ngaran e tona'as isera, ja Wangkar wangko' si ësa, wo si ësa Wangkar toja'ang.

Tani'tu tu'u si Rorong tow lëngei anio' mangeo a si tona'as, wo kumua an isia: „Sapaka aku ja masale' mange maras uma wëru, ta'an sa aku mange maras, ja tambisa?” Kuanö i tona'as Wangkar toja'ang: „Eng ko re'e ë masale' mange maras, ja mangepe' mirang-ange-wo, takura ng kasale'anu parasën, ta'an sa ko mange mirang, ja kumakan, tio'o kuma'mbi-tja'mbiri.” Ja tani'tu tu'u sia marengo-mange am balena, wo sia kumua a si pënana'ana, ëng kuanao: „Sapaka kita, ja mangepe' maras uma.” Ja ng kuano i pënana'ana: „Ja mangeo maras, sapao ë mangemu pakanën, eng kita n da'io wana sapa-sapa n am bale?” Kuano i tuama iitu: „Waweane' re'e sende'en katuliangku-mange a lalan.”

Siituoka ja sia maja'o wo lumangkoi-ange in tinia', ja pailëkënao n sa'ut, ëng kuana: „Ra'itja nimako ambisa, sapaka n sa'ut ja pasende'en.” Siituoka po'owënao-mio' ën sa'ut sangarëpa ng kalambot, wo mangena pakanën. Tani'tu sia tumo'-tolo i mirang. Siowo ngarëpa m binirango-mange, ja sia mailëko si wëwëngkalën, wo sia patena-mio' wo iusëw. Ja ipakau-sëw(ë)na-mako sia, ja sia marengo-mai am bale, wo mange a si tona'as, ëng kuana: „Sapaka aku, ja mangeo nimaras, siowo ngarëpa m binirangku-mio', ja aku mailëko si wëwëngkalën. Ja nio' aku nimarengo-mai.” Kuano i tona'as im

pangumaan: „Ja sapaka ko, mapéli'ipe' woondo, ra'ipe' mange am paparasën tēlu ngando. Ang kaëpatan ngando ja karëngan ko ka'i mange.” Tani'tu tu'u a si tjaëpatan ngando ja sia mange ka'i am paparasën. Siowo ngarëpa m pinaras(ë)na-mio', mailëko ka'i-mio' si wëwëngkalën sia. Siituoka patenao-mio' sia wo iusëw(ë)na. Ipakausëw(ë)na-mako sia, ja sia marengo ka'i-mio', wo mai a si tona'as ëng kuana: „Sapaka ka'i aku nimailëk si wëwëngkalën.” Kuano i tona'as: „Woondo ko ja mapéli'ipe', ra'ipe' mange am paparasën, tēlu ngando n da'ipe' maange-ange. Si tjaëpatan ngando, ja ko ka'i mange. Ta'an sa ko mange wo tani'tukë' ka'i, ja pëngëwu-ngëwu'an-ange tēlu ngando, ja a si tjaëpatan ngando, ja ko ka'i mange, akar(ë)mu i makaparas.” Tani'tu tu'u akar(ë)na in tumo'tol wo akar i makaparas, ja makasiow mate wëwëngkalën sia.

Makaparas-ako sia, ja kumombo'o. Makakombo'-mako, ja musëwo tande sia. Kawëruano n tande, ja sia mai a si tona'as im pangumaan, ëng kuana: „Sapaka aku, ja nimakaparaso, kawëruano n tande, ja akar(ë)ku in tumo'tol i maras wo makakombo', ja makasiow mailëk si wëwëngkalën aku.” Kuano i tona'as: „Ja nimema'o lawi tjo?” Kuanao: „Ra'ipe'.” Kuano ka'i i tona'as: „Ja sapaka ko, mange mema' lawi siow ngaparas, ipakaunë-unër an umamu.” Ja tani'tu tu'u ng kini'itana. Pakaema'ana-mako ë lawi, ja kua'a sia ë mindoo ke'etan. Ja ra'io n tande, mapateo m bu'uka. Ja m'pe' limao ngalowas.

Makasa sia nimareng-ai am bale, nimaali-ali-mai upe' a si tona'as Wangkar toja'ang. Ja n a lawi tinëla'uana-mai tu'tu' wo upe'. Ja mangeoka sia im boondo, mängenao pailëkën ën tu'tu' wo m pe' ra'io wana. Pailëkëna ka'i n a lawi, ja wa-weano api. Mainde'o sia wo ng kuanao: „Wona' re'e maio pëpu'isën i sei aku. Tia'pe', tēla'uangkupe' ka'i-mio' pe' wo tu'tu' n a lawi.” Siituoka marengo-mai am bale sia. Mando-mai sia ka'i mangeo am pake'etan, ja mängenao ka'i pailëkën, kinano n tu'tu' wo niëlëpo m pe'. Makainde'o sia ëng kuana: „Sapaka aku, ja ang kandoan mindo wawi.” Tani'tu tu'u mindoo wawi sia, wo indona n ate, wo paalin-ange a se tona'as.

Katare a si Wangkar wangko'; ĕng kuano i tona'as iitu: „Sapaka ko ja makaere wene' wo roko' kĕli a si umamu iitu.” Ja kua'a n ate i wawi m paalinao ka'i-mai a si Wangkar toja'ang. Sapaka sia, ja wola; pĕndamĕna-mio' n ate, ĕng kuanao in tjumua a si Rorong: „Ja sapaka n aitjua i Wangkar wangko' an iitjo?” Sumowato sia: „Sapaka, kine, aku ja makaere wene' wo roko' kĕli a si uma iitu.” Kuano i Wangkar toja'ang: „Sere-seren-ai i Tjasuruan, wo aku kumua an iitjo: wawa'ando sia ja mate, pa'pa'an da'itja siitu n doro'on i ate anio', ja sia nitjumua an iitjo tani'tu.” Siituoka ja itjuanao n doro'on i ate iitu, ĕng kuana: „Sapaka sera ja a mangedo ĕ lawi; ureo kua'a sera n a mange mbitu, ta'an da'ipe' kauma'-anu-mange sera. Sapaka sera ja pitu. Woondo ja ko mange an uma, kauma'anuo-mange kua'a sera.” Ja tani'tu tu'u ĕ nimamuali; mawawa'ando-mako, ja palinganao-mange, ja nimateo tu'u si Wangkar wangko', pa'pa'an in aitiwa' i Wangkar toja'ang.

Ja wowoondope' tu'u i mando-mai, ja mangem ka'i si Rorong. Tajange' tu'u, ja serenaomange sapaka n a lawi, ja waweano tow. Makatawi-mange a lawi sia, ja kua'a se tow isera ĕ makantongoka-mai ĕ masungkul-ai isia. Kuanerao: „E apo', tio'o pate-paten kami! sa itjasale' i apo', ja mĕnto'o a si apo' kami.” Ja wueiĕno i Rorong sera, ĕng kuana: „Tow ambisa kamu wo mai?” Kuanerao: „Sapaka kami, ja a meko wo mai. Ja ra'io wana matu'tul itjami. Anae, sa itjasale', ja mĕnto'o a si apo' kami.” Kuano i Tow lĕngei itu: „Sama'!” Ja tani'tu tu'u nimĕnto'o an isia sera, wo matawoioka an isia, ĕn doro'on in iitu, nimaindo atana sera. Ja sapaka sera pitu, tuamakĕ' waja. Ja wona' pirao ngando sera n an uma, ja iwarengo-mai i Rorong am bale sera, wo sia mai mapĕli'i. Sia nimindo wawi, wo paalina-mange a si tona'as ĕn ate i wawi, wo itu iwe'ena a si tona'as. Pĕndamĕna-mio' ĕng kuana: „Ambituo tu'u re'e sera, intji?” Kuano i Rorong: „Sapaka sera ja wona' kapirao inania n a mange ĕ lawi, ja kua'a sera n ambiao.” Kuano i tona'as iitu: „Ja sama'!

sapaka ko ja mema' pēli'i siow ngando wo muma' siow em bawi tjantong, irages si Tjasuruam bangko' wo se Kasuruan a monge, a meko, a mako wo se a mitjo, pa'pa'an iserao' ē nime'e an iitjo si tjamam bangko' itu."

En doro'on in iitu, ja si tow mapendam talos lēngei wo tumawoi tjarapi in tjarē'ndēman, ja se Kasuruan aler wo me'e an isia kamam bangko'. Akar(ē)kē' iitu.

**45. Sisil an doro' i Pontiana nimawinson, sinisil i Narcissus
Lantang, Sulu'un.**

Kaindo-indono-mai a si makasa en a si esa ro'ong ja pinatean i esa wewene maowa-owak. Mawengi-mio' in sia in ailowengo, ja matengeo si Pontiana, susur im bēngi sia tani'tu. Sia ja mēngawalui tow. Jawoja a si wēngi makasa en a lesar i ro'ong iitu ja pawinsonan e tow. An unēreraoka i mawinson, ja itjakompo'-mai aweano wewene walina mawinson karpiera. Si wewene isia ra'itja katu'usanera, anaitu pētū'u-tu'usēnera; kasomoian katu'usanerao in sapaka sia ja Pontiana re'e. Siituoka wa'kēsēnerao in tinitjoi ēng karai i Pontiana an somoi. Makawinson-ako sera, ja mētalitjuro. Si Pontiana nimaja' nirumoro'kē'-mange am palowengan, wo se tow nima-rengo am baleera.

Awoja se nima'kēs in tinitjoi a si Pontiana mēna'ne-na'nei i mangeera ilēkēn woondo a lowēng en tinitjoi aiwa'kēs a si Pontiana. Makaendo tu'u-mai, ja mangem a lowēng sera. Pailēkēnerao tu'u en tinitjoi ja nimuntēp-io' a nilowengan si wewene maowa-owak wo mate, wo nimapontiana. Siituoka itjakuo am baja se tow ēng kaulitan, in sapaka sawo tu'u re'en aweam bewene maowa-owak wo mate, ja ra'itja mako ambisa, karēngan mamuali Pontiana. Akar(ē)kē' iitu.

**46. Sisil an doro' e nimetokol wo si Pontiana, sinisil i Karēwur
Lantang, Sulu'un.**

Kaindo-indono-mai a si makasa si esa ro'ong pinatean i esa wewene maowa-owak, anaitu sia nimapontiana. Awoja si

Pontiana isia lewo' nimangakar, iaka-akar se tuama ra'io toro mawaja-waja' wengi, pangi'i-ngi'itenaoka, pa'pa'an sia mangere-ngere si amang i tojaang. Sa tinimboiana si seitjé'-mange n tuama, wo sia ra'itja makakéte, ja karéngana sia e mateo wo iwalina-mange kara-karapina mēwangko' si toja'ang.

Maio a si sangawengi nilumangkoio kato'or im bēngi, sērap kere-kerew wo ura-uran, ja awean tēlu tuama a lawanan wo mai lumangkoi si ro'ong iitu. Kēuntēpera-mange a si ro'ong iitu, linganerao-mange si Pontiana mēsungkul-ai isera, mēnenge-nenge tana'i: „Ngek, ngek!” e pēnowa-nowatēn i tēkek: „sk, sk!” Siituoka kuaerao: „Ja male-aler, pangkurēn sa sia mai.” Ra'itja tu'u maure-ure, ambituo si Pontiana, sia mali'tji-li'tjir isera, tanu, kine, gansa sa sia sumusut-ai, sawo sia tumajang-ange itjawalui sapi tjulo' wo malui tanu sangakaju aroro' kulo' mio' mato'or-ai e sumimba-mai isera. Awoja sangasimbana-mai isera, sangapangkurera, iaka-iakar si Pontiana kinarangoano wo sia mēla'u-la'uso-mai tumangka' isera. Siituoka ipētokolerao, sia tinimboianera a si wo'so a litjur. Mēwēka-wēkar si Pontiana, ra'io itjawēkar akar in tumawio mando. Pa'pa'an i mēselapo-mai ém bena i éndo, éng kua'a si Pontiana mēkia-kiampungo, mangilē-ngilēk sa ro'na iwēkar sia, ta'an da'itja iwēkarera. Pa'pa'an i mandoo tu'u, malui ka'i si Pontiana makoro'mbar e matēpu'. Makaéndo tu'u-mai tēpu'oka sia. Awoja n tēpu' iitu ritjētanerao; én tēmbur(ē)na o'lei nimangakar, ém bow(ē)na sēngit nimangakar, mawow, kine, tow nimate. Akar iitu si sisil iasa.

47. Sisisilēn an doro' i Piri', Sulu'un, niuwit e mu'kur, sinisil i Narcissus Lantang, Sulu'un.

Kaindo-indono-mai an tutuw e Sulu'un i maupu', ja si Piri' sinampok in ampoi rēpēt. Awoja itji'it in tjanaramēn e tow i maupu', ja mawengi-mio' karéngana minson. Awoja maioka a si makasa si pētowēn i Piri' mange nimson, ta'an dirior wo sia mange, ja kinusi'anao sama' ém papalēm-bo, karapi in daran aiwē'tang(ē)na.

An tutuw(ě)naoka i mawinson, ja maio se mu'kur am baleera, mai muwit si Piri' sumakit. Awoja itji'it tu'u se mu'kur in tanukě' rěgēs, anaitu sama'erakě' waja ě maja' am papalēn kaapa am bo'so, ma'an itu tintjakě' tēkitj. Awoja uwitēnerao si Piri' aiwaja'era an tintja in di'ndir a mongena. Ja sia aiongeera an ta'mbe an dote. Ipēlapu-laputeraoka a si pangasa' a makona i lalan sia, ja sia mēntuto-mai. Itjaiēntut(ě)na-mai, mapala'us aiwēkar-io' e mu'kur sia. Wo sera mēngangko-ngangko' in tana'i: „Ra'itja karu' iaku, e tangkara' kēsol!” Awoja se mu'kur nimainde' pa'pa'an nilutaw kine i Piri' sera, anaitu sera mēngangko-ngangko' in tani'tu.

Mēngangko-ngangko'oka se mu'kur, ja palingano-mako e tow. Siituoka akonerao. Makoerao pailēkēn, ja si Piri' re'en ěn ipēngangko-ngangko' e mu'kur. Siituoka indono-mai e tow sia, wo iwaliio-meko am baleera, a lesaro im bale i Andrias in tarepe'. Akar iitu.

48. Kukua an doro' i Songko'.

Kaindo-indono-mai a si makasa ja wawean pira-pira tow nimangasin. Mawēngi-mio' ja sera tumēkēl. Mapoloo-mai sera, ja pailēkēnerao ra'io wana ro'kos si tjarapiera. Siituoka ja mangaja'ka'o-mai sera wo mainde', ěng kuanerao: „Ja pinongkolano i sei in do'kos si tjarapita, ra'io ambitu n do'kos(ě)na.” Ja siituoka sera mangēnto-ngēnto' in sapape' mamuali.

Awoja tumawio mando, ja pailēkēnerao, ambituo n do'kos. Kuanerao: „Ja songko' re'e si tjarapita! Ja tana'i: umungēnta re'e komang, wo ipumpunoka an isia, sa ka'i sia tumintjaso woondo im bawa'ando.” Ja mando tu'u-mai sera mumung komang. Mawēngio tu'u-mio' ja tumēkēlo ka'i sera. Pareke-reenēn kato'or im bēngi ja pailēkēnerao ja ra'io ka'i tu'u ambitu n do'kos. Tani'tu sia ja pumpunanerao tu'u se komang. Tumawio mando ja maio ka'i tu'u si songko', ja mēwale-wale sia paki'tji'ingķē' e komang. Siituoka si songko' masēko-mange a si nime'e komang an tolana. Siituoka ja si pinasēk(ě)na

mange mëkiu-kiupus a si songko', kuanao: „Sa itjasale'mu, ja indongkukë' se komang aipumpungku an tolamu.” Ja itjë-sot(ë)na tu'u-mako se komang an tola i songko', ja kua'a si songko' ë maleo ka'i tu'u-mio' an tolana.

Ja sapaka n ipatelew e songko', ja ate përa, ja si mënu'tu-nu'tu' ja ënda'. Siituo ë nimange-mai wo makakëli-tjëli se songko' ja paemanën e Alipuru; itjaitenge-maiera, ja sera kaapa se tow mangko': „Komangën, komangën.”

49. Sisil an doro' in tinambisa se Songko' wo lina'ungo.

Kaindo-indono-mai sapaka n a si ësa ro'ong ja wawean ësa tow makapënana'an si songko', ta'an dirior wo sera tumane, ja ra'ipe' kinailëkan i tuama in sapaka sia ja songko', anaitu si tuama isia nimasale'kë' ë nitumane a si wewene isia.

Awoja tambisa si tuama ë nimakailëk in iitu, ja tana'i: mapolooka-mai si tuama ën a si tjetëkëlera a si wëngi makasa, ja pailëkënao ra'io ambitu n do'kos i wewene. A si wëngitjë' iitu ja kailëkanao in sapaka si pënana'ana ja songko' re'e. Ja mandooka-mai, ëng kuano i tuama a si pënana'ana: „Sa itjasale'mu, ja aku masale' kumi'it iitjo wawa'ando.” Ta'an sumowato si pënana'ana, ëng kuanao: „Ja itjainde'kukë', pa'-pa'an sa ra'itja songko' wo mange am paumungan e songko', ja mangeerakë' sëra'an.” Ta'an sia sumowat, ëng kuana: „Mangeoka kumua an isera, sapaka aku ja masale' mamuali songko'.” Kuano i pënana'ana: „Sama'; ja tana'i: wawa'ando sa kato'orao im bëngi, ja tumimboi-ai am bu'uk(ë)ku.”

Mawëngi tu'u-mio' siitu ng kini'itana. Wo sera mange wo makatawi tu'u-mänge ambitu; tajange' sera, ja masënguto se songko', ëng kuanerao: „Waweano n da'itja songko' nimai.” Itjatëka' tu'u-mange, ja kua'a sia m pësëra-sëra'anerao wo'on. Ta'an sia kumua an isera: „Ja aku masale' mamuali songko', ta'an aku, sa itjasale'miow maindokë' mapatitj se mëngaali-mai sëra' wo se ra'itja.” Kuanerao: „Sama'.” Siituoka ja ipatitj(ë)nao ë ngara-ngaran e songko'. Ipakapatitj(ë)na-mako

waja, ja sera marengo. Itjatëka'-mange am bale sera, ja ipëla'u-la'us(ë)nao-mange a si Tjolano m pinatitjan i ngara-ngaran e songko'. Wo pinangilëk(ë)na a si Tjolano, sa ro'na se songko' ja paten.

Siituoka ja ipëkiumung i Tjolano m baja se songko'. Mau-mungo-mai sera, ja kuanan i Tjolano: „Sapaka kamu wo se po'o-po'owiow ja mange mema' kasale-sale'an a mange ng kapal, mange mëra' in dansa wo tengean im piola. Ta'an ë mëra' im piola ja se itjamukë' in songko'.” Awoja ririor wo sera mange ang kapal, ja mangeo nialer ën uwa ipumpun an darëm in tjalpal. Pakaalerën-ako m baja se itu, ja sera angeno-mai, mai mëra' ang kapal, karapi e tëlú tuang nitjumi'it an isera. Ja mawëra'oka sera, ja se tëlú tuang anio' nimaënë-ënëpoka wo tumumpa a londei wo sera tumintjas. Kamang in tajango, ja suwënganerao ng kapal, wo mëmbungo-mai, iaka-akar nimakaapuo se songko'.

50. Kukua an doro' i Marintëk.

Sapaka si Marintëk ja makaamange' wo makainang, ta'an da'io si inang nilumua' isia, makatoloatëkoka. Waweane' ka'i tuari sia, ta'an mëtuarioka an sangawiwi, an amangoka. Awoja si tumoloatëk isia ja maupu-upus këli se ailua'na ta'an si toloatëkëna itjaëmbo-ëmbow(ë)na wo itjare'e-re'ena wo itjaritjaritjana. Waja in tawoiën utër wo wëndu ipëngapatawoina si Marintëk, wo ng kakanëna para'i-ra'iëna tani'tu. Ëng kawaliana wo ipare'e-re'e i inanga tani'tu, pa'pa'an pakaserena si Marintëk ja palilin këli i amanga.

Kaindo-indono-mai sapaka si inang i Marintëk ja mangë'të-ngë'tëng in si Marintëk iwalinape' ang kawangkuran. A si makasa si amang i Marintëk ja mëwaja'-mange mangasu; janta'an diririor(ë)na wo tumalun aipata'ar(ë)na in si Marintëk tio'o wo'o para'i-ra'iën i pënana'ana. Ta'an sapa ë nimamuali? Maja'o si amang i Marintëk. Këwaja'na kua'a si pënana'ana ën sumiwoo kakanën numanam, nimindo ko'ko' wo nirumakam

bulinga'. Makasiwo-mako sia, ja towanao in tjuman se ana'na, ta'an si Marintëk ja pataela'anakë'. Siituoka uwakënao si Marintëk, iru'ndu'na masu ëlëpënerape', kine, in tjuman, ëng kuanao: „Nio', e Marintëk, mio' masu-mai, eni! Mario-rior(ë)kë'-mai, ta'am buta-wutan-io' ën aasu, wo tio'o maai-ai sa ra'itja nimakawuta, eni! Nio' ka'itje' ëm bulinga' mio'mū sëra'an an dano; ja mio'om!” Sapaka ën aasu paali-alin i Marintëk ja wino'soan i inanga im bukala, siitu si Marintëk ën da'io maware-wareng-ange; aita'ar(ë)na in tio'o mare-wareng-ange sa ra'itja nimakawuta ën aasu. Awoja ëm bulinga' aiwe'e-mio' si Marintëk ja wulinga' e tërioi. Sa, kine, ëm bulinga' e lumelempar isera pasëra'an an dano, ja pëngakawaluian tërioi si nisumëra' in iitu.

Mio'om an dano si Marintëk, itjatëka'-mio' sia iwangena am paasuan ën aasu, wo sia minamoo. Makainamo-mako sia, indonao-mai ën aasu; pëndamënao ën iitu, porak(ë)kë're'en, kua'a ën iitu iasunape'-mio' ta'an da'itja mautër-ai. Siituoka sia sumereo im bukala, ja wo'sooka re'en. Këserena-mio' in iitu im bo'sooka, ja sia mëngame-ngame' pa'pa'an mainde' i mange itjaëmbow i inanga; anaitu mainde'oka sia ë mareng-ange. Sapaka si Marintëk ja makakëpa a si watu an tampilira in dano. Këangkaina-mai in amona, serena-mange si ëndo makatilengo-mako, tawio mawëngi, wo sia itjatëngo mio' im bulinga'. Siituoka sia makapëndamo i maarëm wo kulitanao m bulinga' en sëra'anao. Kësëra'na in iitu, ja itjawaluio tërioi.

Pa'pa'an i makawëngio, ja si inang i Marintëk makata'neio in sia airu'ndu'na-mio nimasu. Ëng kuanao: „Mio'ta re'en ira'nda si Marintëk, mainde' ambitupe'.” Mio'na ira'nda, ra'io ambitu sia, kua'a sia ën ipaintjeru'na: „Ow, intjeru'na! weta' sia ra'io mareng-ange an iaku, maitjuoka itjua i nitumintjas.”

Mando-mai marengo-mai si amang i Marintëk. A si tjëwareng(ë)na-mai iitu ra'ipe' erena si Marintëk, em bona' airu'ndu' i inanga nimawisa. Ta'an mawawa'andoo ng kuanao: „E inang e toja'ang, ënso' si Marintëk?” Këwueinakë'-mio' in

iitu, palinanao si tērioi matenge a li'tjir i lawi, matana'i: „Intēk matērioi! Intēk matērioi!” Ēng kuano i amang i Marintēk: „Ow, kaitu-itu si lumelempar anio' makua in Intēk matērioi?” (En toka in ipakanuwu-nuwu' i „Marintēk”, makua ka'i in „Intēk”.) O inde' si ana'ku re'e wona', e inde'! E inang e toja'ang, ona' re'en pinapasēra'muo im bulinga' e tērioi sia, na? Siitu kua'a ndo'on ēn iitu! Ta'an nape' ka'itje' ko wo, ni! Ēnga-ēngatēnuoka ēn iema'ku iitjo sa sapa.”

Siituoka sia muntēpo in talun e mange mangusui wai'. Kēkaerena si wai', ja indonao sia wo siwon, en iitu lino'olo'or(ē)na, ninamur(ē)na im baja nanamur, kinuni'ana, nimari-saana wo nonon. Makanono-mako in iitu sia, ja marengo-mange a si pēnana'ana, ēng kuanao: „E inang e toja'ang! nio' ēn anio', sēra'; iindo-mai tu'tu' wo kita kumane'.” Mindoo tu'tu' si wewene isia, wo aiwoiwoinao sēra'; siituoka ja sera lumukuto in tjuman. Ēng kuano i tuama: „Ere', iitjooka ēn sumēra', mare'eoka aku eng kēlio ēn sinēra'ku.” Sumēra'o tu'u si wewene isia iaka-akar in iitu in tjinaa-kaapuna. Pakasēra'ana-mako ēn iitu ja sia me'kelo'; makawe'keloka sia, ja sia mau-la'o-mai. Itjaula'-mako sia, ja sia ula' kēre-kēretan wo kotongko' im baja-waja, anaitu sia ningaranan in tumotongko'. Awoja maio in isia i malojo-lojono, ja ku'kutēna in sumurip ēm baja in an du'u-ru'u i lawi, wo sia sumosor am buwungan wo makole-kolei ambitu. Kanatēn-ange i mēnana' an isia sia, ja ng kuanao: „Awo, tambisaka ko? Pē'ndisēnupe'-mange si ana'ku, aiwaluimu lumelempar, kua'a ka'itje' ko ē nimamualio ula' e! Mora-porak, tumintjas wana ko, mange an talun! Ang koso-koso' wo n an dango-rangow wo n an di'a-ri'ang wo n am palē-palēn, ambitu ēm balemu.”

Siituoka si ula' isia lumētupo-mio' wo sumondeko-mange an talun. Tani'tu si wewene, kine, isia ēn apo' e tumotongko'.

**51. Ĕngkasĕn an doro' im paemanĕn e rior a se Ngiung,
sinisil i Elisa Tengor, Sulu'un.**

Sapaka si Ngiung anio', ja ĕsa tu'us, ja in sa sia mai mĕngiu-ngiung am bale, kaapa an uma, ja sia mai mapokei in ĕsa tow an sangkum im bale, kumaapa an uma iitu ja i mateoka. Sa ra'itja an sangkum e waja se tow ambitu, ja ĕsaan-ange a se po'o-po'ow ang karo'ong kaapa po'ow a se ro'ong an tajang, kaapa ang katawi. Siitu ĕn ĕsa.

Wo sa ka'i si Ngiung mĕngiu-ngiung a lĕmbak i lalan, rumior wə sumomoi a si tow, ja m pasisilĕn an tani'tu, sia anio' ja kinĕ'kĕp i mu'kur kaapa i mĕnginde', kaapa i Mĕngangĕpe'. Ja sa sia tengeana: „Ngiung! Ngiung!” wo si tow iitu ra'itja mainde' ja tarepe' sia e mĕna' ĕ manginde-nginde'. Ta'an sa si tow iitu mainde'kĕ', ja tarepe' sia ĕn dĕpĕtana, iaka-akar(ĕ)na-mange sia en da'io wo'o toro maja', pĕngi'i-ngi'itĕna-mange tumbal-ange im bale kaapa in uma. Akaro iitu.

**52. Sisil an doro' i Sendow wo si Sokoub ana'na, wo si Mawĕris,
sinisil i Narcissus Lantang, Sulu'un.**

Kaindo-indono-mai a si makasa si tona'as Sendow, Wawa', manguma a mange ng Ko'kor. An tutuw iitu sapaka si ana'na makangaran Sokoub ja sumakit, ta'an a mangekĕ' ĕn uma pateiran i amanga. Awoja a si sangawĕngi pawasa-wasan ro'nao kato'or im bĕngi, ja lingan-ange i Sendow si Mawĕris matenge an tajang: „Ris, ris, wĕris!” maroro'-mai i lawiera. Siituoka sia tumarĕmo wulu'd siow ngalowas, wo si sumakit irarĕm(ĕ)na an darĕm i la'lir. Ra'itja tu'u maure-ure sumelendu'o-mai ĕn am bawo i lawi, iaka-akar i nimakure-kureo waja ĕn atĕp. Ĕng kuano i Sendow a si Mawĕris: „Nimai re'e ko?” Sumowato si Mawĕris: „Nimai, maipe'-mange si sumakit.” Siituoka ng kua'a sia rukino-mange i Sendow im bulu'd, ta'an da'itja ki'im i Mawĕris tumintjas. Awoja am pa'pa'an in da'itja ki'im(ĕ)na tumintjas, ja iindoo i Sendow marisa in tjokoak,

wo iruruk(ě)na an api. Kěwow(ě)kě' tu'u-mio' i Mawěris i marisa, ja tumintjaso sia.

Ja kamang in ~~ajango~~ ajango ěm binaja'an i Mawěris, ra'io palingan ěn tengena, siituoka si Sokoub wiono-mai i amanga wo iwalio-mai am bale. Awoja mėsoso-sosore' an daran im bale sera, tumarepe'-mai ambituo si Mawěris, ta'an nimėrioroka nimuntěp-ange am bale si Sendow. Wo sia rurukanera ka'i i marisa in tjokoak. Kawowan ka'i-mio' i Mawěris ěn salėin-sėnga in iitu, ja tumintjaso ka'i tumaja-tajang sia, wo ra'io nimaware-wareng-ai.

53. Sisil an doró e rua toja'ang aitjarojong-io' a Lelema'.

A si makasa ja awean rua toja'ang aitėla'u i inangera wo si amangera am bale, i nimange an uma. A si ěndooka iitu ja se toja'ang isera mėwėra-wėra' an so'so'. Siituoka ja itjarojong si pėwėra-wėra'anera, wo n iitu pangi'i-ngi'itėnera akar in iitu i nituma'up in dojongam bangko', wo sera itjarojong a si rojongam bangko' iitu. Mėrojo-rojongoka sera, ja sera mako itjasampel a Lelema'.

Ambituoka sera, ja pailėkėno i Maėsa-ėsa makangaran i Topowene'. Ja towanao se toja'ang iitu, ěng kuanao: „Maio katu'u, e itow, wo kita mąnge am bale.” Ja kumi'ito-mange se toja'ang karapi i mėngame-ngame'. Itjatėka'-mange am bale sera, ja sera pėlėpe-lėpeiėn se waja kakanėn rő'na wo'on itjalėpei e toja'ang, janta'an da'itja mėnėš sera. Kasiowanoka ngando sera ě mėngame-ngame', ja makata'neio si Topowene' ěng kuanao: „Ja mėnėšo e itow, wo iindokuoka wulinga' wo siwon ang kure' wėru, wo iindooka kakajo' wėru wo aasu wėru, wo siwoan in tjanėnta.” Siituoka ja se toja'ang mėnėšo.

Ja maio tu'u i mawėngi-mio' a si ěndo ito. Ja tumawio mando, kua'a ěn iitu n siwonao. Makasiwo-mako sia im bėngipe', ja polonao se toja'ang ng kuanao: „Tumo'oro, e itow, wo maio mindo im bulinga'.” Awoja an tutuw(ě)na i nimėsiwo ja ra'itja nimarintju-rintju'ku', ta'an nimaėti-ėtip(ě)kě'. Tani'tu

se tow kaper in tarepe' sawo n iitu ema'anera, ja sera ra'itja marintju-rintju'ku' wo itu ipëngatënaera in sa mawua'o m bene' susur in ta'un.

54. Sisil an doro' in tjinatu'uran i Mano'or-api, sinisil i August Tewutow, Lëllëm.

Sapaka si Wulansinde wo si Pakomalutu' a Lengko'am bo itjarojong. An unëra i marojong, kua'a sera n itjatuli a Lina'unan wo an Ērëngën wo an Ari'i. An somoi-mai iitu ja sera itjala'u-la'uso mio' a Lelema'. Ambituoka kua'a sera m pailëkëno i Wuntuambene'. Siituoka sera tontonano i Wuntuambene' im bowolei kompetanera, iaka-akar sera itjaënto'o. An somoi-mai iitu sera wueiano i Wuntuambene' in tana'i: „Sapa ëng kakanëniow?” Sumowato si Wulansinde wo si Pakomalutu' tana'i: „Sapaka ng kakanënam, ja tu'tu' wo wulinga', ta'an pakanënam ja pakanëngkë' a loto wëru, wo patiro'on ang kure' wëru, karapi in ääsu, kakajo', karëngan ka'i wëru. Ta'an kami anio' ja ra'itja kalimbongan.”

Anaitu sa se tow mano'or api, karëngan pëngamëngintjë', oreka se tow pëlimbo-limbongëngkë' ë mawelet. Am pa'pa' sa mano'or api, ja marages se rua ra'itja kalimbongan iitu. Akar(ë)kë' itu.

55. Kukua an doro' i Kariso wo se Anak(ë)na, sinisil i Winiwus Mondow, walian an Talikurang an Tompasso'.

Sapakëm si Kariso, ja makawale kara-karapi i ësa taranak(ë)na makangaran Woleambene', a si ësa tu'dana im bë'tës, kaerean a nimawale e Tompasso'. Mëngënto-ngënto'oka ambiitu seila in dua, ja kuanëm i Woleambene': „Wo Kariso, sapakëm ko ja tumanem, ta'an da'itja si sei ën taneanu, karëngan ko ë mangeké'-ma'i si anak i Karema, anak i Lumimu'ut, am bawo i langit, makangaran Untaiwene'.”

Ma'iëm si nunuwu'un i Woleambene' itu ja kini'itan ing

kasale'an i Kariso. Wo an somoi-a'i itu ja sumoso'dëm tu'u a langit si Kariso mange-ma'i si Untaiwene' māmuali mēnana' a isia. Rumojorēm-ma'i seila in dua, ja ma'i mē'bale a si tu'-dana ing kaju pēngēnto-ngēnto'an i Kariso wo si Woleambene'. An somoi-a'i itu, ja si Kariso wo si Untaiwene' makaere tēlu anak; ngaran e anakeila katare Wulansinde, kumarua Rorong Tino'or, kumatēlu Pakomolutu'. Sapakēm si Wulansinde, ja tinanean i ēsa tow mēngēnto-ngēnto' a mio' an do'ong i Lelema', ngarana Suwo'bene'. Ma'iēm si Rorong Tino'or wo si Pakomolutu', ja mēngēnto-ngēnto'pe' a si amang wo si inangeila.

Ta'an ma'i a si ēndo makasa, ja numuwu' si Untaiwene' a se rua anak(ē)na itu, kuana: „Wo, Rorong Tino'or wo Pakomolutu', mēnto'kē'-mange am bale kamo, am pa'pa' aku ja mokope'-ma'i kan-im-bawi an uma, kanēne' e wawi.” Maja'am si Untaiwene'. Ra'ipe' ure sia nimaja' ja kumi'i-ki'itēm-oko se rua toja'ang itu. Mekom bo'o lumēwēt in dojongan i Masēm seila in dua, ja aikarjong(ē)kē' am pa'pa' an tuitub itu si rojongan itu ja mano'so'. Ikarjongēm-onge se rua toja'ang itu, ja mio' ikasampel an tawi in do'ong i Lelema'. Ikasampelēm seila, ja pa'ila'an i Wulansinde, wo towa'ana-mange am balena an do'ong i Lelema'. Pē'bueiēnēm i Wulansinde seila, kuana: „Am pa'pa' in sapa kamo wo ikarjong in dano?” Ikua-mangeeila a si Wulansinde sapa si nimamuali a seila, kele si aikakua ririor. Jawo numuwu' si Wulansinde kuana: „In tarepe' iasa si inang wo si amang ja uli-ulit mainde' wo mangere-ngere ikamo in dua, anaitu karēngana ja mekoku ipakata'u-ma'i.”

An tuitub itu, ja iindo i Wulansinde kure' wēru karapi ing kēkēlēb wēru, wo iindona ta'um wo kuana a se rua tuarina itu: „Sapakēm kamo, ja sumiwo-mange a si kure' wēru anio' wo a si ta'um anio', ta'an sa kamo ma'siwom, ja sia'am ma'doma-roma', ta'an karapi im pēnēs, roro'na rumoma' ta'an karapikē' i ma'kē'bi-kē'bit. Sumiwo-mange in tumawi i mando.” Si tatawoi anio' ja nimamuali ēsa pēpēli'in makangaran „ma-

no'd api", patawoiën e tow kaper an tuitub i mangëtolëm ëm bene'. A si ëndokë' tu'u itu ja maja'am si Wulansinde meko a si inanga wo si amanga. Winaja'ana-meko, ja aitumete-meko a si uwe airëbana-meko akad in tëmpok i uwe itu, ja aitumëmpok-eko am bale i Kariso wo si Untaiwene'.

Ikatëka'am-eko si Wulansinde të'tërënam si Kariso wo si Untaiwene' ja mawëndu karapi i mëngame-ngame' am pa'pa' kinatalaan e anakeila rua itu. An tuitub(ë)kë' itu ja numuwu' si Wulansinde, kuana: „O Amang! O Inang! sia'am kamo mëngame-ngame', am pa'pa' se tuariku rua ja a monge am bale, seila pinitongku aikasampel a mio' an dojongan i Nimanga. Sapakëm seila in dua in tarepe' ja ma'siwo a si kure' wëru wo a si ta'um karapi im pënës.”

Siitukë' pina'linga i Kariso wo si Untaiwene', ja seila mënë-sëm ë mëngame-ngame', am pa'pa' se anakeila ja ambiitukëm tu'u re'e. An somoi-a'i itu ja marengëm-ongë am balena si Wulansinde, ja ita'arëm i Kariso wo si Untaiwene' a si Wulansinde, kuana: „Teiran-angë sama' se tuarinu rua itu, sia'am ipa'baja-waja.

56. Papëli'in e Kaper an tumëna in uma, Sinisil i Albert Walewangko' Rompas, Wuwuk.

Katare sera mapëli'i am bawi, ngaran i papëli'in itu mangu-sëw, sanga-sangawale mapëli'i am bale, mënsansawëlan, an unër(ë)kë' in sangasërap. Sa mapëli'io waja am bawi, waja se tow ja lumoango, se tona'as rumu'du' luminga wara' ipanguma. Katare tengena im bara' wesara in do'ong; tam-bisa itu kinaereano, rumu'du' ka'i se tona'as luminga wara' ipanguma. Sa itu pinalingao waja, mema'o ka'i si pëli'i ngarana mëkan. Paema'anera itu ra'itja an do'ong: se tona'as am pamoitan, an sëndi a mekona in do'ong, se tow am pëngëlëpan. Kumawus ka'i itu, mema' pëli'i mange ang kaju, karapi tumo'tolo maras sera. Sa nimakaparaso waja wo nimapërao ëng kaju mangereo ka'i si wara' kawëngian.

Makaereo ka'i pēli'i sumende' in to'ngaw, papēl'inera waja ja ko'ko' laka'.

Tumo'tolo mua' ēm bene', ja rumintuk se keker; keker ja sakit in dō'ong wo n uma. Tumo'tolo mupu', mema'o pēli'i wangko' kumaapa pēli'i manēmpo'. Kumawus manēmpo' mēli'io ka'i si pēli'i ipakua in tumumbal; a si tempo itu mangeoka tupun an uma si wawi. Marengo im bawa'ando, tēlu kumaapa akar i lima mangala'un mēkarapi maali-ali mēkele sangalawas tambēlang pēra pinumpunan im batuna in to'ngaw. Sera mēnto' an tana' an dior an darēm im bale wo sera matumbal si tambēlang itu an tana', awean papan patumbalan in iitu, wo sera manani:

Tumumbal, e mangaitje,
Eng kita ja tumembope'
Tumembope' se mangalei
Mangalei — Kam beru!

GROEP VII.

57. Sisisilën an dorō' in tjētani' in do'ong in Tjapoja, sinisil i Wolo Regar, Kapoja.

Kaindo-indono-mai si Asa' ja tow in Sondër wo sia mitjo mēros-ai an do'ong in Dumo'ong an dangka', nimēla'us-ai a si makangaran i Langkun. Itjatēka'o-mai, sia mēwuei a si Langkun, ēng kuana: „Ja po'ow! ra'itja wana ng kinaereanu ro'na tani'in?” Sumowato si Langkun: „Ja wawean, ta'an itjita in dua.” Sumowato si Asa': „Ja sama'.” Nimaindo-indoo tani'tu ē nuwu'era, akar i mitjoo maja'-mai sera.

Maja'-mange mēnto', maja'-mange mēnto' pa'pa'an kailina wara' lewo', mēnto' ka'i sera, kaapa posokēn i sapa-sapa, ē lalan pawaja'anera, mēnto' ka'i sera, iakar im bona' pira ngawēngi sera n a lalan. Awoja itjatēka'o tu'u-mai sera n a si pawalian-ai i Langkun isera, ja ema'anera rēna' wo tumo'oro tērung sera. Pakato'orēnera-mako ēn tērung, ja ng kuanerao: „Sapaka kita, ja ra'ipe' toro muntēp a si tērung anio'; sa ra'ipe' nimalina in sama' ē nuwu' e makatana'.”

An somoi-ai itu mawēngio, wo sera sumorino tu'u wara'. Makasorin-ako wara' sera, ēng kuanerao: „Ja mindoo-mai api pa'pa'an ja nienano e makatana' kita mēnto' a si tērung anio'.” Tanuo i mandoo-mai ja mēnuwu-nuwu'o, sera, ēng kuanerao: „Ja sumangiro im pati tjita, eng kita ja rumo'-ndoko.” Se kaju pinaro'ndokera ja wawean ēng kē'kēpen i lima ng kawangkēr. Wona' pira ngando sera ē maro'ndok, serenerao ja ro'nao to'oran lawi, pa'pa'an ja wangkēro m pēlas. Ēm pinakanera i nimaro'ndok ja towang, ēm pinasende' ja sa'ut im bolai. An somoi-ai iitu ja kombo'anerao ng kawang-

kër i niro'ndokera. Pakakombo'anera-mako itu, ja sumorino ka'i wara' makatëlu ngaatus si wara' wëngi, tani'tuka ka'i si wara' ëndo.

Makaapu itu ng kuanerao ka'i: „Ja tumo'oro lawi tjita.” Makato'or-ako i lawi sera, ja kuanerao ka'i: „Sapaka kita, ja tumawoipe' pëli'i, ja ë ngaran i pëli'i iitu: mapakukuk si tjo'ko'.” Makaapu siitu wueiëno i Asa' a si Langkun: „Sa kapopoantaka in dua in tumë'tëk panga?” Sumowato si Langkun ëng kuana: „Ja po'ow! nimakaapukë' a mapakukuk ën doko'ku.” Sumowato si Asa': „Pute kita nimakaapukë', anaitu tintjasantakë' re'en si tinani' iasa.” Sumowato si Langkun: „Ja maio, wo iwalitju-monge am Pinapalangkow, monge mangere-mai ësa tow sija'.”

Mongeo makaere-mai sera si makangaran Angkol wo sia mëwuei a si Asa' wo si Langkun, ëng kuana: „Sapa n itë'tëkiow iaku meko me'e in të'tëk panga?” Sowatënerao: „Ja kita in tëlu palukaran.” Sumowato si Angkol: „Ja sama'.” Nimaindo-indoo tani'tu ë nuwu'era in tëlu. Numuwu'o si Angkol, ëng kuana: „E rua, mekom kamu, meko tumo'or-ange wale, sa pinakato'oro, ja aiëno-mange aku.” Mongeo maja'-mai sera. Itjatëka'o-mai sera, ja tumo'oro wale. Pakato'orën-ako ëm bale, ongeno-mai si Angkol. Itjatëka'o-mai si Angkol, ëng kuana: „Ja itjono-mai se masusui an Sondër wo se tu'ur im bale.” Maio sera, mapëli'io si Asa' wo si Langkun wo si Angkol. Péwueiëno e masusui: „Pëli'i sapa n iasa?” Sumowato sera: „Ja të'tëk panga.” Numuwu'o se masusui: „Sapaka kamu ja mindo-mange siow ëm bowolei pakatu'u-tu'urën wo pakatëmpo-tëmpokën.” Awoja pakaindonera-mako se siow ëm bowolei iitu, ja ng kuano e masusui: „Sumëmpeo-mange kamu, eng kita mapëli'io.” Aisëmpe im boondo aipakawëngi-wëngi. Makaapuo m pëli'i, indoño e masusui se aroro' aisëmpe a se siow ëm bowolei, pa'pa'an itu ja tëndan a se masusui. Mawëngio itjallierao se lëntu' in tengena i wara' a si makapitu ngaatus karapi e tëlu n do'kos in tow pinu'is.

Maandoo-mai numuwu'o se masusui, ëng kuanerao: „Sapaka

kami ja marengo, ta'an ita'arami an itjamu sapaka m paindoan pamatu'an wo tona'as, ja itjamu in tēlu wo akar e pojo-pojo'miow. Ja eng kami mitjom, sapaka kamu ja lumoango-mange wo mangumao-mange, wo mindo-mange tona'as wo walian in uma, ta'an ita'arami an itjamu mindo-mange paru'ndu'an, katare n iru'ndu'miow isera ja mange mangusui-ai an dowar si tengena i wara': ke'ke' makasa, patu'ulēniow-ange si tje'ke' makasa iitu ja „wesaran im bale.” Maandoo ka'i-mai mange-mai si makapat ē lowas wo makasa ng ke'ke', wo a si ēndo itu waja se makasasa ja sumungkul-ange se paru'ndu'an an sēndi im bale, wo se paru'ndu'an ja mēmo'o-mo'ow-ange kaju taiapu wo itu pēnēlē-nēlētān-ange in araw, angen-ai e waja se makasasa. Kaitimboi e patu'ulēn makasasa, kumeret si ēsa wo si ēsa.”

An somoi-ai itu marengo se masusui. Ta'an dirior in tumi'ir, pēwueiēnera a se tēlu, a si Asa' wo si Langkun wo si Angkol: „Sa sapa ēn ingaran a si ro'ong iasa?” Sumowato sera: „Ja ē ngaran i ro'ong iasa ja Kapoja, pa'pa'an a si makasa, an tutuwami i maaipē', ja pinatean in api a mitjo m palēmboian i rano anio', wo kami mindo kaju makangaran kakapojāan, niindonanami api; anaitu si ro'ong anio' ja ngarananami in Tjapoja.” Waja se nitumani' in Tjapoja ja nimateoka waja ambitu. Akar iitu si sisisilēn an doro' in do'ong in Tjapoja.

Sapaka si Asa' ja nitjumēsot-ai an Sondēr an sangkum i Mama'it i makulu-kulu in tjapala an Sondēr. Jawo si Mama'it anak i Sumolang, wo si Sumolang anak i Tambuwun. Sapaka si Asa' nisumuru-mai si Sarajar, si Sarajar nisumuru-mai si Simbar, si Simbar nisumuru-mai si Sondak, si Sondak nisumuru-mai si Pariei, si Pariei wo si Su'ot nisumuru-mai si Wolo, ja isiao si maio i nimamualio Mēsehi, ningaranan in Derek Regar. Wo si Derek Regar kaapa si Wolo Regar nisumuru-mai si Israel Regar.

Ēn ipēwale e Kapoja ja si Manēmbir wo si pēnana'ana si Tumimperas. Ja m pēngēna-ngēna'anera a makona im bale e Kapoja a Masawukow.

**58. Sisisilën an dumoro' se tēlu Ro'kos in tow altjali an Tēmbir
in usēwan si Tumotowa karapi i lēntu' im bara',
sinisil i Androkles Su'ot.**

Talali' nimapēlaso si sinisirera lukutan i ipēro'ong, ja ng kuano i Langkun: „E po'ow(ē)ku Asa', sapaka kita ja mēweteng; iaku mēnto' tumu'tul im bara', iitjo ka'itje' mangere ro'kos in tēlu tow, wo itu mai pēwali-walin ang karapi i lēntu' im bara'.” Numuwu'o ka'i sia, ēng kuana: „Ēm pangereanta itu ja an sangkum(ē)ke' in siow ngawēngi ng kaure.”

Ja an iitukē' maja'o si Asa'. Ja maja'o sia, makaereo tow i Mongondow. Maio ang kasiowan ngando ja nimakaereo tēlu n do'kos in tow. Wo tani'tu ka'itje' nimatu'tulo m bara', wo itu pēwali-walinera an ēsa kure' wēru, wo itu saputēnera im pira-pira ngauli'pir ēm buna'kēl, wo itu itjaliera an tēmbir in usēwan si Tumotowa. Ja ng kinalianera si tjure' iitu makasiow mētumbal-itjo ng keitjei n a si Tumotowa wo mitjo.

Sapaka n doro'on in do'kos e tow pinu'is, ja n iitu maindo kētēra im pēro'ongan em pa'pa'an in dior(ē)wo ja linipute' im pēseke'an. Wo ka'i n an doro' i lēntu', ja n iitu maindo kētēra im pēro'ongan wō ng kamang e tow an do'ong, en tani'tu n sasanin i Langkun wo si Asa'-wo.

Awoja an somoi-ai iitu kēlian ē nimaki'it an sasanin i Langkun wo si Asa'. Em pa'pa'an sa si sei masale' sumengkot-ange an tana' walina, kaapa mange mangusui an arēna' e walina, karēngana sia mi'is sangapi'is ēn tana' ang kinalian in do'kos e pinu'is wo ē lēntu', en iitu maindo kētēr am pawaja-waja'ana wo kamang(ē)na am pangere-ngerean, ambisa-wisa-mange.

**59. Sisil an doro' i Tumotowa in tambisa n iitu an pinangero
e rior-wo, wo itu indonera ipēro'ong, sinisil i
Silvanus Mumu, Lēlēm.**

Sapaka ng katare-tare tawoiēn e tumani', ja mangere watu indon Tumotowa. Em baja im bara' e tumani' ja alero,

siituoka ja numuwu'o se mangaku mamuali tona'as a si ro'ong tani'in, ěng kuanerao: „Ja sapaka kita maja'o wo mangere si wara' i Tumotowa, ěn iitu lowas makapat wo ke'ke' makasa.”

Ja maja'o sera, mēmaja-maja' akar tu'u sera i makalingao si wara' pangere-ngerenera. Siituoka marengo-mai am bale sera. A maio m bale sera tumowa tow akar im pira se ro'na makakēte si watu indon Tumotowa. Ja si watu itu mangeerao tinu'usam-bo. Alero se tow, maja'o sera, wo sera maali roko', ěsa m pasolongan. Itjatēka'o-mange a si watu itu sera, numuwu'o si Tona'as, ěng kuanao: „Ja sapaka ko ja watu, ta'an ko indonami paragesēn, wo ko ngarananami in Dēwumbene' wo Pokalambene', anae nio' ěn doko' itēlēsami iitjo.” Iwēkarerao n doko'. Iwēkarera-mako itu, ja sera marengo ka'i-mai am bale. A lalanoka sera, kuano i Tona'as: „Sapaka kita mapa'a-pa'anoka in sama', wo sia aiēnta-mange.”

Marengo-mai am bale sera, mangēnto-ngēnto' pira ngando an somoi-ai iitu. A si sangawēngi sera maja' sumoring, sera mangere-ngere si wara' sama' iangeera-mai si watu; itu ja kitj makasa. A mangeo n dowar sera, ja sumoringo si maka-ilēk masoring an isera: ot, ot! Sumowato si wara': kitj! A'io itu, marengo-mai am bale sera, maio maler, en a si wēngitjē' iitu sera nimēla'u-la'us(ē)kē'-mai a si watu indon Tumotowa.

A mangeo mbitu sera, ja si watu itu saputēno sumama-sama' in doko' pasolongan, si pinaali-mai ririor. Pakasaputēnera-mako, itu ja wulenganerao-mai, paalin-ai a si tani'in. A maio mbitu sera, itjaliao itu, ito'or. Aitjato'oro itu wo pinakaēluro, ja numuwu'o si Tona'as ěng kuanao: „Sapaka ko, ja watu, ta'an ko indonami Tumotowa wo Tundēk im bale.” Wo sera ka'i sumoka'd-itjo, makasiow lumeak akar-itjo i Tumotowa; itjaliao witu si tjure' wēru sinaput i laka m ba'mba'na, si pinumpunan i lēntu' im bara' nialer mai itani'.

Makando-mai waja itu pinakaēluro. Siituoka se matu-matu'a tumo'tolo maras makali'tjir si Tumotowa, wo pēlasēn sumama-sama', ja siituo m patu'ulēn lesar. Ang kasomoian-ai iitu

mëngawë-ngawëso-mai ng kakëli e tow, atorëno m pëli'i. An sangkum in sangata'un se tona'as makatëlu mapëli'i a lesar. Ën iitu katare: mamü'mbur, kumarua: mapawua', wo kumatëlu: manëmpo'. Kasusur e peli'i tëlu anio' tawoiëm baja rua ngando, ta'an itu tu'ulëngkë' ësa. A si ëndo katare mindo wawi, a si wëngi itu waja se tow mai mindo pasil wo mange weletan am bale; wo a si ëndo kumarua se tona'as mindo ko'ko', se tow ra'io mai mindo pasil, ta'an si tona'as maka-ngaran masainsang, sia sumusur in sëra' am baja se tow a si ëndo itu.

60. Sisil an doro' in tjëtani' in do'ong in Tjlawa, sinisil i Lumëmpow Lumanaw, Kiawa.

Sapaka si masale' tumani', ja ririor i mange maras ja sia nimangere ësa tow a se makailëk matani' pëwalean. Awoja makaereo sia si makangaran i Mongkaren, Tonëlët, sia wineraan sampuri ësa. Ang këto'tol i maras ailinga wara' lowas makapat. Si ëndo këparas sangando itu, ja tëlu ngando, enetëno. Mangeo ka'i menet, ja luminga wara': lowas ka'i makapat wo ke'ke' makapat.

Pinakaparaso a si tjatëluan ngando, wo itu iënto' lima ngando wo enetën ka'i. Kalimaan ngando mangeo ka'i luminga wara'. Mange luminga wara' lowas ka'i makapat wo ke'ke' makapat wo këte makasa. Mënto' pitu ngando. A si tjapituan ngando ja makoo tumo'or lawi. Tumo'or lawi ruangapulu' wo lima ngaparas. Mando-mai a si tjëto'or i lawi ja maler im balun wo tumëlës ko'ko' laka' raindang wo ësa n siwei wuring. Si wëngi itu siituo ng këtëlës si ro'ong itu. Ën aiwe'e pulu' wo ënëm ngakai ën sampuri wo ëpat ngakai ëng kulo'. Mando-mai ja maja'. Si tjo'ko' laka', tuama si nimaali, si siwei, wewene si nimaali. Maja'o, ja patamoran wo patengkoran i momongan. Nimaja'-mako ang Kiawa. Luma'us-ako a si lawi tino'or. A si ëndo itu waja se mapërenta a mai n tu'ur im bale nimako waja karapi i tjapala wangko' wo se rua

kumarua, si Mangowal wo so Tololiu. A si ěndo itu sera wineane' ka'i. Si tjapala·wangko' wineane' ka'i rua n sampuri; se rua kumarua mēkele sangakai ng kulo'. Aiwe'eo isera itu, ja kumano. Makakan-ako, sera marengo-mitjo. Kumano se tow. Makakan-ako sera, ja kinaito'orano i lawi si ěsa wo si ěsa. Mawēngio rumu'ndu'o ěsa tow nisumosor-ongē ang kuntung ma'an si wara' makasiow ě manguni. Siituo ěn airtjēt api aisusur i lawi e tow.

Mando-mai mangere watu lumangkoi sitjun ěng karēnet. Mawēngio-mai' mangedo wulengan-ai ěm batu, maipe' iwēkar an sēndi im bale. Mawēngio-mio', ja ilinga wara' makasiow ě manguni. Ja si watu itjali, iwe'e ang kapēruaan im bale, ngaranano sia „Tumotowa.” Mando-mai waja se tona'as wo se walian nimamoondo i masu rano irano am pasil. Ja in sera mawaja'-mitjo an dano, ja nimanani. Katare ja tana'i:

„Ja Empung renga-rengan e!

Turu'an lalan karondoran.

Tia' ilampa-lampang a si lalan kaengkolan.”

Karua:

„Ja si lalan tumalitjuran wengkesan i laleindeng!

Lampanganami i mētuari ra'itja mēntantajangan!”

Itjatēka'o-mitjo an dano sera, mangel in aasu, wo sera minamo. Ja numuwu'o ng kuaerao: „Ja n sakit irojong-ako in dano. Sawēlan-ai in owak sama' kami im baja. Kami masu rano irano am pasil, eng kami manēwaso. Anae akar in tjaure-ure kami mēngasu-ngasu a si rano itjo.”

Ě ngaran in dano itu ja Na'nap. Marengo-mako, makoo numono im pasil. Siituo n to'tolanera i melet ěng kuaera: „Ja Apo' nimema' in tana'! mai tjuman-ange pasil! Kumi'it in aisusuimu a se apo-apo' rior wo tumumbal-ai in tarepe', kami marages itjamu in Tjasuruan. Anae pangilēkēnami: lowi-lowirēn wo sama-sama'an-ai ěn owakami im baja, wo kami sama' mērage-rages itjamu in Tjasuruan.”

Mawēngio iēma'o tēka'an se ko'ko', itēka'o sera isaru-mitjo. Tumēkēlo se tow, kumukuko si tjo'ko', ja mangedo teiran e

tona'as wo se walian. Kaitjukuk i tjo'ko' paki'itënera i manuwu'. Ĕn aipanuwu'era ja tana'i: „Aitjukuk i tjo'ko'ami se tow mai a si ro'ong iasa, ra'io mareng-itjo.” Susur i tjo'ko' in tjumukuk siitu m pëmare-marengën akar i mando. Makando-mai, se tow minson tanu se kuman im bene' wëru, akar-ange itu mëminso-minson akar in siow ngawëngi.

Rumu'ndu'o tëlu tow mange nisumoring wara', nimangilëk tenge i wara' makasiow ngapulu' wo lima. Ta'an sangatenge i wara' ja ilëntu', ipalëntu' rere wuring, ipaki'it in tenge i wara'. Anaitu siow ngapulu' wo lima ë lëntu'. Ja se tona'as nimange-mai, nimakawali ësa toja'ang tuama mange nimaali-mai i lëntu'. Itjatëka'-mai, luma'us-ai a si watu aitjali an unër im bale si tinu'ulera Tumotowa. Ambituoka sera mindo-mai tjure' wëru karapi in tjëkëlëw, wo pumpunanera i lëntu' wo itu iindoera wuna'kël sangata'tas, wo itu saputënera, wo itu soka'dënera a si watu ipakasiow-onge, iru'u in tana', aipaka-siow-onge ëng keitjei, ambituo ëng kinalian in tjure' winean i lëntu'. Siituo ng kinakaapuan wo sera mënto'o a si ro'ong itu. Si nitumani' si ro'ong itu, ja si Lumanaw. Pitu ngapulu' ën tow aipakawalina-mako.

61. Sisil an doro' in tjinatu'uran i ngaran in Tjiawa, sinisil i Lumëmpow Lumanaw, Kiawa.

Sapaka si makangaran in Ite', tow an Sondër wo mange mëwale a Motolin. Ambituoka, sia indono tona'as. An sang-kum(ë)na in tona'as, se Motolin ja maindo wene' këli, ta'an se Sondër ra'io nimaïndo wene'. Siituo wo sia angen-ai i makangaran in Ondang, airu'ndu' i tu'ur im bale makangaran in Tambuwun.

Angeno-mai sia, ja pulë-pulësan i manende', anaitu ra'itja wo'o ki'im(ë)na mai. Ta'am beanoka in tjelana paraindangan, makawaer im pitu sampuri, ituoka sia mai. Maio sia, ja nitjumembut-ai wene' sangatu'ur, wo itu saputëna in simbël. Maja'o-mai, ja kinawëngiangkë' a mai si lopa'na, a mongena

in dojongan tēkek patu'ulēn Lunoi. Ambituoka sia, tumo'or tērung ēnto'ana, wo iusēw(ē)nao si wene' sangatu'ur iitu. Ja makaapuo m pulēs i manende', wo mapēli'io si Ite'.

Kumi'it iitu sia mulēs i mapawua', katare-tare siow ngawēngi, kumarua pitu ngawēngi, kumatēlu lima ngawēngi, kumaēpat tēlu ngawēngi. Makaapu itu, sia tumo'or lawi sangaparas, tu'ulēnao itu: lawi im bene'. An somoi-ai iitu sia mapēli'i, mindo wawi. Kumi'it iitu sia mapēli'i a si tjo'ko'.

An somoi-ai iitu, sia mulēs i manēmpo', siow ngawēngi, kumi'it iitu pitu ngawēngi, kumi'it iitu lima ngawēngi, kumi'it iitu tēlu ngawēngi. Makaapu itu sia ka'i mapēli'i am bawi. Somoi-mai iitu sia mapēli'i mindo ko'ko'. Kumi'it iitu sia tumumbal nimindo wawi. Makaapu itu, upu'una si wene' aiusēw, wo itu iwe'ena a lawi tēkek, tinu'ul lawi im bene'. Kumi'it iitu sia ka'i mapēli'i mindo ko'ko', ja si pēli'i iitu tinu'ul maso'. An somoi-ai iitu sia majat nimindo ko'ko', si pēli'i iitu tinu'ul majat. Wo makaapu itu uwitēnao m bene' a si lawi pēngēnto-ngēnto'ana.

Kumi'it iitu sia musēw, nimindo wawi. Makaapu itu sia makoo lumo'ok-ai. Tu'ulēno si niēnto'ana itu ja Kiowa, am pa'pa' kiniowaana-mai in ta'una in a mange ē Motolin wo mai an Sondēr. Ja maiooka in an somoi-ai iitu in tani'ino i Lunanaw ēn ambitu, ja ngarananao si ro'ong iitu Kiawa.

**62. Sisisilēn an doro' in tjētani' in do'ong im Pinapalangkow
kaapa Kalewo'an, sinisil i Paulus Sinjal, Maliku.**

Kaindo-indono-mai si ro'ong itu ja ēsa ro'ong am balak in Sondēr. Sapaka si ro'ong anio', ēn iitu ja tinani' i Wumbene', anak i Silap wo si Litjēp.

Ja sapaka si Wumbene' nimēngēnto-ngēnto' an Sondēr-wo, janta'an a si ēndooka makasa sia maunē-unēr in talun, mēereere si lopa'na aitjua i Langkun an isia, si nilukutano in do'ong in Tjapoja in tarepe'. Itjatēka'-mako a si lopa'na itu sia, ja tani'tu ng karioi sia mareng an Sondēr, tumowa kara-karapina tumani' si lopa'na pinailēk(ē)nao. Ja rai'tja ure an somoi-ai

iitu, ja sera maja' mangereo si lopa'na pinailëk i Wumbene'. Ta'an maja'oka sera, ja aitjalewo'oka, ra'io pinailëkera si lopa'na itu, wo mailëko sera ësa lopa'na a lëwët-eko in dano, itjuaera-mako ën iitu si rano ang Kapoja. Awoja siituoka sera tumani'o im Pinapalangkow, kaapa Kalewo'an.

Ja si ro'ong anio' pëngatu'ulën ka'i Tjalewo'an, am pa'pa' i maio re'e si Wumbene' ë mai mëterang in tani'in, ja nisumea'kë'-mai, en dinu'ndu'an de'e wo'o-mai i Langkun isia ja a luku-lukutano in Tjapoja in tarepe'. Anaitu tani'in-ako i Wumbene' ëm Pinapalangkow, ja mulio-mange si Langkun. Mësungkulo-mange sera, ja ng kuano i Langkun: „Je, po'ow(ë)ku! uanu, ën ingarangku a si ro'ong iasa: Kalewo'an, eng 'ko nimio'kë' ang kalewo'an, kalewo'an kua'a ën iitu.”

Sapaka ë ngaran im Pinapalangkow, ja niange-mai in tana'i ë nimamuali ambitu-wo: A si makasa wawean ën Dumo'ongan-dangka' makangaran i Makarende nimangasu. Ja sapaka sera a mitjo n Tareran wo sumalu-mako in Tjëkëlor. Ja mëmaja-maja'oka sera, ja mangi'ito se asu ësa tu'a wangkër, wangkër këli, si patu'ulën langkow; pangi'i-ngi'itënoka e asu sia, ja makoo sembongan an ta'upan in Tjëkëlor wo n Sapalalum. Awoja masembongoka se asu, tawangëno-mai e nimangasu, ja tumura'o sera, tanuoka nimakëlor. Ja mënura-nura'ka sera, itjomp'o-mai matura'oka im batu, en si langkow ja kina-waluiano watu. Wo in tarepe' iasa, itji'it in sisil, ja n tola i langkow iitu pailëkëne' si aitjawaluio watu wangkër, wo m parangkei aitjawaluio watu a makona in ta'upan in Tjëkëlor wo n Sapalalum; ja n do'kos wo n sunge mako aitjasampel a si ipakua i Mangajojong.

Ja siituo ë nimange-mai am pa'pa'an im pinailëkan si langkow ën an susut i ro'ong anio' ja ngumarano an do'ong sera Pinapalangkow.

Wo am pa'pa'an in sera tanuoka nimakëlor ë nimatura', anae ngumarano a si rano a mitjona sera Këkëlor.

Wo am pa'pa'an se nimangasu nisumaluoka si rano a mongena ngumarano sera Sapalalum.

Wo am pa'pa'an ən do'kos wo n sunge nirumojong(ə)kə', ngarananerao si tjinasampelan in iitu Mangajojong.

Ja si tu'us in tjeitjei e nimatura' si langkow nitumə'təp a si watu təpe' a mitjona im pinatura'anera, wawean kine əng keitjei e matu'a, awean əng keitjei e toja'ang.

63. Kukua an doro' in tjinawalian in dojongan in Sondər wo patu'ulən Sondər, sinisil i Paulus Bintjap, Wuwuk.

Kaindo-indonoka-mai si makangaran in Dumondor, tow ang Kawangko'an, sia nimangasu wo sia itjawaja'-mange am pakəm-bu'an i əsa rano, jawo sia mailək se tumetelew patu'ulen songkəl mai maələp ambitu. Jawo itu weana ngaran „Songkəl.” Siitu ə ngaran i rano iitu katare-tare, itji'it im pinailəkana songkəl maələp ambitu. Janta'an əng kinawalian i rano itu wo ra'itja patu'ulen „Songkəl”, am pa'pa'an aiindooka-mai ə ngaran i ro'ong tinani'-mai ambitu. Ja ngaran i ro'ong iitu „Sondek.” Ja nimange-mai si ro'ong iitu wo ningaranan in Sondek, ja am pa'pa'an si ro'ong iitu sondekakə' in do'ong in Tjawangko'an, itji'it sera in Tjawangko'an wo tumani' ro'om balina. Ja siituo ng kinawalian i rojongan iitu wo si ro'ong iitu wo patu'ulən Sondek. Ta'an maioka i makaure, ja ipangereerao im pantər ən ipatu'ul si ro'ong iitu, akar in aieraoka an Sondər ən ipatu'ul si ro'ong iitu. Anaitu tumumbal-ai in tarepe' Sondər ən ipatu'ul si ro'ong wo si rano iitu.

64. Kukua an doro' im Pinəwetengan im balak in Tjawangko'an wo n Sondər, sinisil i Elisa Poluakan wo si Jusof Tiwa', Kawangko'an.

Kaindo-indonoka-mai ən tu'ur im bale e walak in Tjawangko'an ja makangaran Wolo, wo sia montol si ana'na makangaran in Tjaramoi wo tumani' in Sondər. Makaanako-mai si Tjaramoi, ja si Tjiwol, makaanako-mai si Tjiwol, ja si Legi, makaanak-ai si Legi ja si Tiwa', makaanak-ai si Tiwa', ja si Sorongan, makaanak-ai si Sorongan ja si Wilar. Itjawe'eo a

si Lengkong ě mapĕrenta wo si Mongilala wo si Tumbol. Ĕn tu'ur im bale e Kawangko'an, ja si Lengkong.

Indo-indonoka-mai ja si Tjawatu makaanak si Awon, si Awon makaanak si Pĕsitj. Si Pĕsitj anio' ja nimange an Sondĕr, mange nimaindo pamatu'an ambitu. Maio am bewetengan i Sarian, ja kawetengano se Kawangko'an limangapulu' ěm balak. Mĕnduo in tjaju ja pontolĕno waja se tow; mangeoka mĕndu, ra'itja mĕndu se Sondĕr. Ja maio i meso'-mange am Benang. Itjatĕka'-mange ja wueiĕno i Sarian, ěng kuana: „Ambanao waja ěng kaju?” Sumowato si Lengkong, tu'ur im bale e Kawangko'an: „Si ruangapulu' wo lima pinaalio-mai.” Siituoka wueiĕno i Sarian: „Tambisa ěn iitu, wo si ruangapulu' wo lima ra'ipe' pinaali-mai?” Sumowato si Lengkong: „Ipĕkito-kitowaku se sangaro'ong, ja ra'itja nimai mĕndu.” Mueio ka'i si Sarian: „Mĕtani' wisa se ra'itja nimĕndu?” Sumowato si Lengkong: „Se Sondĕr.” Kuano i Sarian: „Ja sama', ipĕkito-wakuoka si pamatu'an an Sondĕr.” Mueio ka'i si Sarian: „Si sei si pamatu'an ambitu?” Sumowato si Lengkong: „Si Pĕsitj.” Mangem tu'u a si Sarian si Pĕsitj, wo kuano i Sarian an isia: „Tambisa, kine, ko wo ra'itja nimĕndu in tjaju.” Sumowato si Pĕsitj, pamatu'an e Sondĕr: „Ja wawean ě nisumepĕ'd.” Wueiĕno ka'i i Sarian: „Tawoiĕniow(ĕ)ka ěn iitu?” Sumowato si Pĕsitj: „Tawoiĕnami!” Numuwu'o si Sarian a si Pĕsitj: „Marengo-mange wo mangeo mĕndu, pora-porakĕn-ange.” Maio tu'u mĕndu sera, pakawĕndun-ako ěn iitu, ja weso'onerao-mange am Benang, wo ituruko a si Sarian. Ja numuwu'o si Pĕsitj, pamatu'an an Sondĕr a si Sarian: „Ja eng kami n aisangawiwio e tu'ur im bale ang Kawangko'an, ja ra'io toro kami wo pawetenganerape', ta'an karĕngan kami in Sondĕr en sangawetengoka, eng kami n tinĕla'uanoka e tu'ur im bale ang Kawangko'an.” Sumowato si Sarian: „Ja sama'!”

Awoja an somoi iitu maio ka'i ěm bewetengan in tjaju, se Sondĕr sangawetengoka wo sangawetengoka se Kawangko'an. Ja akaro-mai iitu ja se Sondĕr ěm patu'ulĕnoka walak ěsa, walak in Sondĕr. Awoja mateo si Lengkong tu'ur im bale e

Kawangko'an, ja sia sawēlan i Tumiwa'; ipēkiwareng sia, sawēlan i Umbas; sawēlan si Umbas si Rondonuwu', sawēlan si Rondonuwu', ja si Tuju; mate si Tuju, sawēlan i Tjapantow; sawēlan si Tjapantow, ja si Tumila'ar; mate si Tumila'ar, sawēlan i Laurens; mate si Laurens, sawēlan i Alanus Waroka; mate si Alanus Waroka, sawēlan i Daniel Mambo'; mate si Daniel Mambo', sawēlan i Hendrik Waroka; mate si Hendrik Waroka, ja sawēlan i Jansen Waroka; mate si Jansen Waroka, ja sawēlan i Th. Gērungan, tu'ur im bale in tarepe'.

Ēn an Sondēr maindo tu'ur im bale ja si Pēsitiĵ. Makaanak-ai si Pēsitiĵ, ja si Pandei; si Pandei makaanak si Mangowal; si Mangowal makaanak si Wilhelmus.

Se makakua in anio', ja si pamatu'an an Unēr, makangaran Elisa Poluakan, wo si Jusof Tiwa', kapala wangko' ure ang Kawangko'an.

65. Sisil an doro' im Pinēwetengan e Sondēr wo se Kawangko'an, sinisil i A'tas, Sondēr.

Ē muali itu ja tana'i: wetengano-mai tawoiēn ěm baja se tu'ur im bale i mange magēr in saketa a mange m Benang. Ē mapērenta am Benang an tutuw iitu ra'ipe' patu'ulēn petor, ta'an sariane'.

Siituoka montolo si Mangowal, kapala ang Kawangko'an. Ja si Tumbol ě makawali wo tumuli-mai si Tjoitob a mange n Sondēr. Isia ěn duru'ndu'an i pamatu'an e Sondēr makangaran Tambuwun. Maio si Tumbol wo mui si sei ě makawali an Sondēr. Tumu'ulo si Tambuwun: „Ja si Tjoitjob, ta'an e masa'ape' im balun se Sondēr, anaitu ra'ipe' ipēwalimiow, ta'an somoioka sera.”

Mangem se Kawangko'an. Mangem, nimuntul(ē)kē'-mai im betengera sera. Marengo-mai sera, ja weano-mai tjarētas, ja in sapaka se Kawangko'an ja ra'itja nilumēkēp-ai im betengera. Siituoka iru'ndu'o-mange e Kawangko'an se Sondēr mange lumēkēp-ai im beteng e Kawangko'an, si aitēla'uera-mai se

Sondër. Mangem tu'u se Sondër. Mareng-ai sera, ja wineanoka-mai ësa karëtas sera, tani'tu se Kawangko'an. Siitu itu. Awoja an somoioka ka'i-mai iitu, ja karuano-mai i Sarian i me'e tawoiën ëm baja se tu'ur im bale, mëkele rua ëng kaju lambot indon. Ra'io; pëtulino ka'i wo'o-mai e Kawangko'an se Sondër. Maioka aitjuape' i Tambuwun: „E ra'ipe' maja' se Sondër, e mangalipe' kaka'is.”

Siituoka tintjasano ka'i-mange e Kawangko'an se Sondër. Mangem sera, mangekë' ka'i nimuntul-ai ësa wo mareng-ai, wo itëla'uo-mio' se Sondër si ësa. Marengo ka'i-mai sera, wo iru'ndu'erao ka'i-mange se Sondër, mange mindo si tjaju lambot ësa, aitëla'u-mai e Kawangko'an se Sondër. Mangem se Sondër mangeo tu'u mindo in tjaju. Marengo ka'i-mai sera, ja wineanoka ka'i-mai ësa karëtas sera, in iseraoka ë nituma-woi si tjaju ësa. Ngaranano i Sarian walakoka ësa se Sondër, tani'tu se Kawangko'an. Akaro-mai iitu ë mëwete-wetengoka ën tawoiën e Sondër wo se Kawangko'an, em pawetengënoka-mai i Tjompania; tawoiën ësa se Sondër, tani'tu se Kawangko'an. Siituo ëng kinawalian wo nimamuali tjapalaoka ësa se Kawangko'an, tani'tu se Sondër.

An doro' ka'i-mai i lalan papaparan, ja nimamuali tana'i: Sapaka si Sarian am Benang ja nimapaali-mai nuwu' am baja se tu'ur im bale, in sapaka sera ja sumungkul isia a la'mbak i lalan. Ja se akar-onge anio' taporak nisumungkul isia. Se Saroinsong am pakanatën-eko e Lota'; siituoka ja ng kuano i Sarian: „Akar iasa ëm paparasëniow.” Se Tomu'ung nimë-sungkul isia an Ëmpung; anaitu siitu ka'i ëm paparasënera. Se Tompaso' aipësungkul i Sarian a si talum bangko' a mekona e Saroinsong, anaitu ambitu ëm paparasënera. Se Kawangko'an aipësungkul a mitjo si Matënëm. Se Sondër aipësungkul(ë)kë' a mongena im bale; ambitu ën sinungkulan i Tambuwun si Sarian, anaitu se Sondër ën tawi pëngaparan i lalan.

66. Sisil an doro' i Tow niuma' am Pinēwetengam-bo, sinisil i Joel Lumēnta', Kanonang.

Kaindo-indono-mai se Mangaapo' nimēnuwu-nuwu'o i ma-umung e mēwetengo n ēnto'an in sangasuru wo n sangasuru; ja m paumunganera an tinokolan-onge i tjuntung Tondērukan. Si tjasuruan Kopero mange nilumukut a nisumiri'-monge an Tondērukan, an dangka'-meko im paumunganera. Ja ambituoka sia mēnēngo-nēngo-monge se maumu-umung wo mēme'e-me'e reken am paputusēnera. Si tjasuruan Muntu-untu maali-ali in taisi, nilumukut an tinokolangka ka'i-monge i tjuntung iitu an da'ter i watu wangkēr, wo a se pira-pira watu a makali'tjir isia ja nilukutan e paki'i-tji'itēn in sangasuru wo n sangasuru. Ja sangapuse' e mangamatu'a im panuwu'un ja itjarot i tjasuruan Muntu-untu in taisina iitu. Janta'an sa n iitu ra'itja nimēsoma wo n sinigil i Tjopero, ja n iitu peronakē' a si Muntu-untu, iaka-akar sawēlēnakē' in tjumarot ēng kawutulan in iitu. Awoja malēkēp-ako se panuwu'un e Mangaapo', ja ng kuano e tu'ura im paumungan: „Ririor kita wo mētalitjur, ja karēngana uma'anta ēsa tow, irages se kasuruan wo itu'us am pata'neian i ēsa wo si ēsa a se itjita in sangasuru wo n sangasuru, in sapaka kita ja mēkarētuk susut, mande i mēntajangano.”

Sapaka si matu'a wewene makangaran in Tombarian ja mēngēnto-ngēnto' an Tumara'tas, ja sia makaanak rua toja'ang tuama, makangaran im Porong-Takoi wo si Porong-Sulin. Si atana wewene ja makangaran in Tjaluli'an makailēk maundam. Awoja putusēno-mio' e tu'ura im paumungan itu, ja in uma'ano si ēsa tow, ja itjuaerao-mio' in si Porong-Takoi. Pakaputusēn-ako in si Porong-Takoi in uma'ano, ja maio an dior e maumu-umung si Tombarian ang karapi i mēngame-ngame', wo ng kuana: „E nimapo'o-po'owiowo in uma'ano si ana'ku, ja itjaupusai aku wo tio'o itia-tia' ēn du'i, ta'an itēla'ukē' wo'o waja-mai an iaku.” Ja kini'itan tu'u m pinangilēk(ē)na. Pakauma'an-ako si Porong-Takoi wo nimema'o tanu in aita'arera, wo kinaeke-

ano m baja isera ja itēla'uerao-mio' ēn du'i. Awoja mētali-tjuro mēla'u-la'us-ange an ēnto'anera se sangawawaja' wo se sangawawaja' tanu im pinanuwu'o.

Makatintjas-ako sera im baja, ja marengo-mai a niuma'an si ana'na si Tombarian, paki'itēn i Tjaluli'an wo si Porong-Sulin. Itjatēka'-mange ambitu sera, ja mindoo-mai in tjoro'mbar in tēnga' si Tjaluli'an wo lungka'ana si nimpisa, wo itu ia'li'na an tana'. Siituoka mangeo umungēn i Tombarian waja se ru'i-ru'i wo itu iēlur(ē)nao an aia'li' tanu in tjawangu-wanguna in dior an owak e tow. Pakaēlurēna-mako n iitu, ja sia sumoro'-monge, wo mēnētē-nētēr in tjaēlur in du'i iitu.

Ra'itja nimaure-ure lumojono-mange an du'i si wuring wo itu pēnila-nila'ana wo pēngewe-ngeweana, iaka-akar ēm baja in iitu ja nimētuluso. Mētulus waja-mako ēn iitu,* ja marengo si wuring. Kamang i nitumintjaso si wuring, ja sawēlēno-mange i Tjaluli'an wo mangena inga'nga' kēri'it wo wia'u pēwali-walin wo itu irēput(ē)na si ru'i iitu. Niange-mai in iitu ja ipakasa se ru'i iitu kasaputano-mai in sama'na. Kasaputan-ako in sama'na se ru'i-ru'i iitu, ja kuanano i Tombarian si Porong-Sulin: „Meko-mai rano mēnoi-now ko a meko n Dano Rumērēga.” Ja mekoo tu'u-mai rano mēnoi-now si Porong-Sulin, wo n iitu maina iwe'e si Inang(ē)na. Siituoka lēlē'en i Tombarian se ru'i sinaputo in sama'na iitu. Kailēlē'na in iitu, ja si owak iitu tumowo-mai sumawēl, wo mio'o tumo'or-ai si Porong-Takoi, tanu i giona in dior. Akar(ē)kē' iitu.

67. Kukua an doro' i Sowa am Pinewētengam-bo, sinisil i Joel Lumēnta', Kanonang.

Wawean ēsa wewene maēsa-ēsaoka makaanak ēsa toja'am bewene, tani'tuka ka'i si ēsa tuama maēsa-ēsa wo makaanak ka'i ēsa toja'am bewene. Ja sera in dua mamaleo sumawēl, ēnta'an iserao in dua. Sapaka sera mēngēnto-ngēnto' an do'ong in Tjaju Uwi. Ja si tumoloatēk wewene pinangakaran in tjalewo' wo kēte ate maisē-isēk(ē)kē'-mio' si toloatēkēna. Si toloatēkēna

pëpate-patenakë' in tawoiën, wo ra'itja ipëngëna' im bawa'mba'an. Awoja am pa'pa'an tu'u in da'io kalësënan i toja'ang iitu m bawangunan i inanga an isia, ja ilalitj(ë)nao a si amanga m baja in tjawënduana a si tjëwareng-ai i amang(ë)na in an talum bo mai. Sia anio' kinuanangkë' i amang(ë)na i malësë-lësën wo maki'i-tji'it an ipakua i inang(ë)na, mande im pailë-këna in taloso wëndu si ana'na.

Janta'an mangem an talun si amang(ë)na, wo sia mange tumangka' liwang, sopit wo se mëgigioan ula'. Am baja isera indoanao in ate wo to'tokën, wo n iitu nonona. Pakanonona-mako im bawa'andoo, ja sia marengo-mange am bale, maali-ali-mange i ninono a si pënana'ana. Itjatëka'-mange sia, iwe'ënao a si pënana'ana n iitu. Jawo sumëra'o si pënana'ana. Mawëngi tu'u-mio', ja tumëkelo sia. Makatëkëloka ja sia itjawaluio sowa wawangkëran, iaka-akar ra'io itjakua ng kainde'an e toja'ang ambitu. Sapaka si Sowa anio', ja laka'. Ja lumojono si Sowa in tawio mando nimange an dojongan an dano in Tjaju Uwi. Ambituoka sia mailek ësa wewene, tow ang Kaju Uwi makangaran in Senduk. Ja si wewene itu indon i Sowa wo sia paalina-mitjo an da'ter im Pinëwetengan.

A si makasa si Sowa mapato'or-ange rumangka-rangka' nimakar a Lawa', wo patëngo-tëngona ë makali'tjir. Matëngo-tëngooka sia, ja lumëpoko-mio' an tana' nimaparënet; ja n do'kos nimambo-mitjo in tëka'an an dojongan im Panasën. Siituoka ja ili'us(ë)nao-mitjo an do'kos ën ipus, tani'tu sia mënto'o ambitu. Am pa'pa'an iitu wo si tëka'an iitu patu'ulën Sowa.

Ra'itja nimaure-ure ja sia itjawaluio mamuali tow tuama. Siituoka sia mitjoo ang Ka'kas wo sia mitjo tumane a si ësa wewene a mitjo mbitu. Janta'an sia itjare'ekë' wo'on e Ka'kas ën tumintjas si wewene itu n ambitu, pa'pa'an im bawangunana ra'itja masoma. Am pa'pa'an in tani'tu, ja si pënana'ana ipumpunao an tintjo', wo ro'na sia itji'it e Ka'kas kumësot ambitu, en da'itja pailëkanera mëwali-wali si pënana'ana. Ja irapinao tu'u si pënana'ana mako a si tëka'an, pinaënto-ënto'-ana-wo, wo sera mënto'o ambitu.

68. Sisil an doro' i Senduk, itji't in sisil e makasisil an Tombasian an Dangka'.

Awoja, kumi'it in sisil e makasisil an Tombasian an Dangka', sapaka si Senduk ja tuama mengento-ngento' an Tombasian an Dangka'. Ja kumesoto sia n ambitu, ja sia mange mento' an Tanu-i-Nga'as. An tutuw(ë)na in ambitu, ja maio si Sowa, maento-ento' am Pinewetengam bo mai. Jawo irapio i Sowa si Senduk mai a Nimanga, wo sera mengi'ingit-ai si rojongan iitu, akar in itjateka'-mai a si esa koso'. Ambituoka sera sumalu si tjoso' iitu tumbal im Pinewetengan. Ja am pa'pa' in tani'tu wo si tjoso' iitu patu'ulën: Soinsong i Senduk.

69. Sisil an doro' im Pinewetengan, sinisil i Lumempow Lumanaw ang Kiawa.

Sapaka se tow an tana' e Maesa, ja an tana-tana' walina wo mai. Se walina an sangawiwi a makona wo mai, nisumuwa' am Batu Kapal; ja si tjapal itu nimamualioka watu akar in tarepe'. Se tow a si tjapal itu nimento'oka a si tana' anio'. Se walina ja a mitjona wo mai, nisumuwa' ang Kema. Sapaka sera ja an Timur, an do'ong makangaran Pangkei-Mariri. Maio ang Kema sera, ja sera maio mento' an Tombariri. Siituo ng kawalian wo sera ningumaran in Tombariri am pa'pa' sera am Pangkei-Mariri wo mai.

Se tow walina ja an Ambon wo mai, wo sera itjawenten-ai am Belang. Siituo ng kawalian wo n ambitu makangaran Wentenan, am pa'pa' sera aitjawenten-ai. Ta'an se walina mai nisumuwa' am Belang; sapaka sera ja an Saparua wo mai. Tani'tu se tow nimai a si tana' anio'. Ja em baja se tow anio' ure in ure sera ja mengeta'u-ta'upo an tana' anio', se nisumuwa' am Batu Kapal wo se ang Kema wo se nisumuwa' am Belang.

Meta'u-ta'upo sera, ja sera menuwu-nuwu' in sapaka sera ja maumung am Bulur Maatus. Ta'an diriorera i maumung,

ja sera niměnuwu-nuwu'o si ěsa wo si ěsa, si sei masale' maja' a mekona isia n sumaru-meko, si masale' monge, isia n sumaru-monge, si masale' mitjo isia n sumaru-mitjo. Maumungo tu'u sera ja niměnuwu-nuwu' ambisa ng kasale'an i ěsa wo si ěsa. Ja mětalitjuro sera. Si masale' nimeko isia si nimeko, si masale' nimonge, isia si nimonge, si masale' nimitjo, isia si nimitjo. Tani'tu se tow niměweteng katare-tare.

Ure in ure se tow niměweteng anio' ja sera makěli, wo sera měngěta'u-ta'up. Ta'an se tow nimeko a si tjěpaumung, ja ra'io niměngěta'u-ta'up wo se tow nimonge wo se nimitjo. Se nimonge wo se nimitjo isera se niměngěta'u-ta'up a si tana' anio'. Ja isera anio' niměnuwu-nuwu', sapaka sera ja maumung a mekona e Tompasu'. Ta'an se tow nimeko a si paumungan am Batu Kapal ja ra'io nimai maumung karapiera, iserao se Gorontalo. Tani'tu se nimaumung kumarua a mekona e Tompasu' mětalitjuro sera nimaja' ambisa ng kasale'an i ěsa wo si ěsa. Anaitu wo ambitu n tu'us im binaja'an e tow. Ta'an se walina ra'io kine aitjauma'-mai im paumungan. Tani'tu tumo'tol-ai a si piněwetengan anio' niměgio-gioano ě nuwu' e tow.

An somoi-ai itu se tow am Belang sangawetengan an isera nitumintjas, wo sera lumawan a mitjona, monge sumuwa' am Benang. Iserao se Wantitj; anaitu ě nuwu' e Wantitj wo se Belang měindoan tojo', kumaapa pute, wo ě gioera pute.

70. Ěngkasěn an dumoro' in Tjinatu'uran i ngaran in Tjaju-Uwi, sinisil i Kalangi' Wokas, Kaju Uwi.

Sapaka n dano in Tjaju Uwi wo ningaranan in tani'tu am pa'pa'an sia nirumo'kos-eko a si tjaju rangka' nimuwi-uwi-mio'. Nimaaliroka n iitu am pa'pa'an in aité'těk i Lěmpow Palit se lolondi, kumě'kět in uwina, kumaapa in a'muta, wo sia meko rumě'mba-mai nituměpok-onge an do'ongo i La'indong in tarepe'.

Ěng kinato'tolan in iitu wo aité'těk i Lěmpow Palit se

lolondi ěn dumě'mba si tjaju iitu, am pa'pa'an si pĕnana'ana nialuko. Pangere-ngereanaoka sia, ja sia kuanan i mangere im bua'na im paku-wo; sa kinaereanao m bua'na im paku, ja tare katĕrangana in si pĕnana'ana pailĕkĕnape' kumaapa in da'io. Tĕlu ngando sia ě mangere-ngere wo pailĕkĕna tu'u ěm bua'na im paku. An tutuw iitu ja mĕruto-mai n a mange ě langit; ěn iitu ja tu'us in si pĕnana'ana nialuko. Siituoka ng kuanao: „Am pa'pa'ano i tjaju rangka' iana parojoran-ai e maaluk se tow, anaitu si tjaju iana karĕngan en irĕ'mba.” Siituoka itĕ'tĕk(ĕ)nao se mĕgigioan pĕtotowĕn, ta'an da'itja wana ě makarĕ'mba si tjaju iitu. Itĕ'tĕk(ĕ)naoka se lolondi, ja kĕ'kĕ-tĕno e lolondi n a'muta kaapa n uwina, wo tu'u sia rumĕ'mba.

Ja akaroka-mai iitu, ja ěna'oka tu'u se tow en da'io pĕngaalukĕn.

71. Kukua an doro' in tjĕtani' in do'ong in Tintjĕp, sinisil i Nikolaas Ratu, Kuntung.

Itji'it in tjanaramĕn e rior, sa si sei roro'na wo masale' mamuali pamatu'an, ja tumuwar a si tjapala wangko' wo tare tumani'. Ja tani'tu ě muali i pamatu'an nitumani' in Tintjĕp.

Kaindo-indono-mai sapaka sera ja a mange m bale ure-wo a mange n Sondĕr; a mangeoka mbitu sera, maio tumani' im Bawa'. Am Bawa'oka sera, makarekeno-mai in tumani' im Pinaasu. Sapaka n ipakua im Pinaasu, siitu ja rano niasu-anera in itjatĕka'pe'-mai ambitu, anaitu wo itjuaera: „Kita ja tow im Pinaasu.”

Ja nimamuali pamatu'an a si ro'ong iitu, ja si Lĕnta', sawĕlano sia i Umbororing wo ng kumi'it isia si We'mber; anaitu sawo pareke-rekenĕn ja ěnĕmo ngapulu' in ta'um bangko' wo sera iru'ut-ai an Tintjĕp. Sapaka se nitumani' in Tintjĕp, ja Pinaasu, am pa'pa' ambitupe' sera maja'o-mai si To'alu nimanitjĕp wo mai mailĕk si rano iitu, wo ng kuanao: „Lo'or re'e paasun si rano iasa.” Anaitu wo makarekeno-mai si To'alu wo se kara-karapina wo ng kuaera: „Ja maita re'en tani'in

ën iasa, en sama' re'e ënto'an." Anaitu maio tumani' sera; ja si To'alu nimamuali pamatu'an. Ta'an diriorera i maja'-mai, ja ma'ano wara'-wo. Ma'ano wara' sera, ja makaatus si wara' ëndo, tani'tuka ka'i si wara' wengi, wo ipëlentu-lëntu'era in tjaju. Kumawus-ako itu, tumu'tulo sera, wo maja'o-mai, am pa'pa' nienano. Ja kumësot sera n am Pinaasu, maali-ali-mai si tjo'ko' laka' raindang wo si tjo'ko' siwei rëindëm. Ja itjatëka'o-mai sera, iusëwerao si Tumotowa nialerera in ure, wo ë lëntu' iusëwera an tẽmbir, tjang tojo' i Tumotowa.

Ipakausëwokaera se rua iitu, mindoo-mai si tjo'ko' laka' sera wo iwëkarera-mio' ang kara'ter i Tumotowa, wo ng kuanera: „Kumukuk, sumaru in Ondolan i Ëndo!" Ja kumukuko si tjo'ko', nisumaru-mitjo. Kumawus si itu, ëng kuano ka'i i To'alu: „Kumale'kew!" Kumale'kewo tu'u si tjo'ko', ja numuwu'o si To'alu: „Waja se tow makali'tjir itjita tinowamuo, am pa'pa' kinapeimuo wo mawës-ai an itjita." Kumi'it siitu, numuwu'o ka'i si To'alu: „Kumukuk sumaru-monge!" Kumukuk ka'i si tjo'ko', nisumaru-monge. Kumawus siitu, ja ng kuano ka'i i To'alu: „Kumukuk sumaru-mako!" Kumukuk ka'i si tjo'ko', nisumaru-mako. Ëng kuano ka'i i To'alu: „Kumukuk sumaru-meko!" Kumukuko ka'i si tjo'ko' nisumaru-meko. Ja tani'tu si tjo'ko' nitumowa se makali'tjir.

Ja makaapu-mako itu, ja mange a lawi sera, wo kuanuera: „Sapaka se itjita ja Tintjöp, am pa'pa' maasu si rano pinani-tjöp." Ja sa pareke-reenën, tẽlu ngapulu' wo uwalu ngata'un akar in tarepe' ën do'ong in Tintjöp ën tinani'.

72. Kukua an doro' in tjëtani' in do'ong in Timbukar, sinisil i Nikolaas Ratn, Kuntung.

Kaindo-indono-mai si makangaran i Lombogia wo si Mawuntu, si Tulung, si Suwu wo si Lapi'an an do'ong im Pinaasu. Ja sera masale-sale' maindo pamatu'an, wo se walina masale' in tona'as wo n tawoiëm balina, janta'an ra'io kawean e karõ'ongera. Anaitu ja sera i lima anio' mẽnuwu-nuwu'o in tana'i: „Ja eng

kita re'en da'itja makaere in tjasale'anta sa mēngento-ngento'kē' ambia, anaitu tana'i tjita, mangereka kinarekenan." Ja mētena-tenao tu'u sera sa maja'ka tambisa. Ēng kuanera: „Ja kita mapatalitjuran."

Maja'o tu'u sera, nitjumuakē' i mangere sēra' in talun. Janta'an da'itja katu'u re'en, en sera mangereo pēwalean. Maio tu'u makaere in tjasama'an do'na ěnto'an sera, ja ng kuanerao: „Ja ambiao n ěnto'anta, iwe'eta ngaran in ambia ja Timbukar, am pa'pa'am baweam batu paindon timbukar. Ja mēnuwu-nuwu'o ka'i sera ja in si sei ě maindo pamatu'an. Ēng kuano e walina: „Itjoo, e Lombogia; ěn tona'as si Mawuntu wo si Suwu, ja ng kumarua si pamatu'an si Lapi'an."

Ureo in ure tu'u sera n ambitu makakēlio, em pēngawē-ngawēsan-ai e tow a mako ng Kojansow. Akar in tarepe' ja se suru-suru-mai i Lombogia se paindoan matimboi im pamatu'an an do'ong in Timbukar.

73. Kukua an doro' in tjētani' in do'ong i Lēilēm.

Kaindo-indono-mai si makangaran in Tumbol sia ja kapala e sangapērua in do'ong in Tjuntung wo makaanak si makangaran in Dorimpandei. Am pa'pa'an si Rorimpandei in da'itja pēsiri'in i Ro'mbot, kapala e sangapērua e Kuntung, ja siituoka iru'ndu'o i amanga si Rorimpandei in sia karēngan mangere ro'ong tani'in, wo siituka makaere im paki'it-tji'itēn. Turu'ano i amanga tani'in sia, karēngan monge an Sitjēpēn. Siituoka mangeo ipakata'u a si tu'ur im bale e walak in Sondēr, makangaran in Tjēintjēm. Sumowato sia ěng kuana: „Sama', enangku ěn tumani' ro'ong, ta'an da'itja toro monge an Sitjēpēn; karēngan mangere a mase'se' se walak walina, wo a lalan i Tjompania."

Ja siituoka si Rorimpandei mangereo tani'in, makaereo sia a mitjo ě Lēilēm. Siituoka mangelao ka'i ipakata'u a si tu'ur im balak, ja nienana. Awoja tani'tu me'eo-mange roko' a si tu'ur im balak sera, ěn aiwe'eera-mange pulu' ngakai ě laka.

An somoi-ai iitu mitjom sera; katare-tareera i nimitjo, ja ěpat: si Rorimpandei, si Pontò', si Sěmbor wo si Timbuleng.

Maio tu'u ang kosomoian nimamualio tinani' ěn do'ong i Lěilěm, ja si Rorimpandei ě nimaindo pamatu'an, si Pontò' wo si Sěmbor kumarua, ja si Timbuleng sia nimamuali tona'as.

**74. Sisil an doro' in do'ong e Wuwuk, sinisil i
Albert Walewangko' Rompas, Wuwuk.**

Sapaka si nitumani' in do'ong im Buwuk, ja makangaran i Sage'. Wuwuk ja ěsa tu'ura ing kaju sěringana ja mow lo'or, anae itu pěngatunun, ipawow ing karai kumaapa n aroro'. Si kaju itu kinaerean a meko n sěndangan, ě ngaran ing kaju itu wuwuk, anaitu siituo niindoan ngaran i ro'ong itu Wuwuk.

Si Sage' sia ěsa tow matu'ao, anaitu sia mangilěk a si tu'ur im balak ing Kawangko'an ru'du'an maindo pamatu'an wo tona'as an do'ong im Buwuk. Ru'du'ano-mai i tu'ur im balak tanu si Walintukan wo si Rompas. Si Walintukan nitumimboi rua tawoiěn, pamatu'an wo tona'as, patu'ulěn: ketengěn ang kumaapa ki'itěn e tona'as. Si Rompas kumarua im pamatu'an wo kumarua in tona'as, patu'ulěn: mauwa' ang kumaapa matatar si wawi. Si tona'as kumatělu makangaran Egetěn, ěn tawoiěna ja masainsang, kumaapa ruru'du'an e rua tona'as, masuruk in těwi' wo ng ko'ko' wo ng kaju papěli'ianera a lesar.

Sapaka si patu'ulěn lesar, itu ja pělas ra'itja wana wale; an uněr i lesar itu kinalian i lěntu', si lěntu' iitu ja te'bena makapira tumenge si wara' aitan' in do'ong. Ja si kinalian itu tino'oranera rua watu rangka', si ěsa kolěk; ě ngaran e rua watu itu ja tumotowa.

Se pamatu'an in do'ong im Buwuk se měnawě-nawě-l-ai: si Walintukan, si Rompas, anak i Rompas ja si Rotulung, si Pangkei, anak i Pangkei, ja si Manginda'an, si Pinitong kaapa si Thomas, si Walewangko' kaapa si Petrus, si Jan Lumampow, si Thomas Pangkei, si Petrus Pangkei, si Lukas Rěmbět,

si Habel Salangka', si Petrus Lumi, si pamatu'an in tarepe' iasa. Sapaka se tona'as, ja si Walintukan, si Runtuwa'ilan, si Egetën, si Wange' kaapa si Ibrahim.

A si sëräp September, ta'un mariwu uwalungaatus tëlunga-pulu' wo uwalu ja tumo'tol winuka' ëm pasitjolaan Genootschap an do'ong im Buwuk. Sapaka si katäre mawali, sia si makangaran Hermanus Lintjewas, an Uwuram bo mai. Si mawali kumarua ja makangaran Adam Jakob, nitumow an Tanawangko', katëlu ka'i si Hermanus Lintjewas(ë)kë'. Si kumaëpat ja si Samuel Walintukan, si kumalima si Albert Rumëngan.

A si ëndo tëlu ngapulu' Augustus, ta'un mariwu uwalungaatus ëpatngapulu' wo tëlu, wona' tawi ruangapulu' ën tow linële', mamuali sarani. A si ta'un mariwu uwalungaatus ëpatngapulu' wo pitu, a si sëräp December, ësa tow wewene nimuntëp mamuali sidi im paumungan Mësehi.

Kato'tolan niema'an paumungan pata'neian in Ënda' wo n Owak i Apo'ta n ang gëreja im Buwuk, a si ta'un mariwu uwalungaatus wo limangapulu', a si sëräp December.

**75. Ëöngkasën an dumoro' in tambisa ëng kinarëngisan in Tjinilow
ja aiwoka'o-wo im pinësonsowatan i Tji'kis wo si Tangkalio-
liowan, siuisil i Elisa Tengor, Sulu'un.**

Sapaka m pasisilën an isera in dua, tana'i: Kaindo-indono-mai si ësa wewene mangala'un ang Kinilow nimëange wo'on an uma. Maja'o sia, ja mëuntëpe'-mange an sëndi im bale, ja palingana-mange si Tji'kis wo si Tangkalio-liowan mënenge-nenge. Si Tji'kis matenge: „Ki'kis! maki'kiso ën tana' in Tjinilow.” Tentuano i Tangkalio-liowan: „Ulit, ulit, Ki'kis, maki'kiso ëng Kinilow inania.” Wo tani'tu sera mënsowatan, siitukë' ëm paware-warengën.

Siituoka mainde'o si Mangala'un isia, wo marengo-mai am bale, ra'itja nilumo'ok an uma. Marengo-mai sia wo itu sisilëna a se tow, ëng kuana: „De', e de' aku! akar(ë)ku in tow ja ra'ipe' tanu mako makasa wo malinga in tanu im pinalingaku

i niměange wo'o an uma, wo ma'an ona' sia matu'ao, ja ra'ipe' mako tanu makasa wo malinga tani'tu." Siituoka maio se matu-matu'a mamuei an isia: „Uli-ulit, kine, ko nimalinga rua lumelempar nimanuwu'?" Sumowato si Mangala'un: „Uli-ulit, keta' itjamu! si seio si nisumangkum a se itjamu lumelempar sapa si pinalingamiow, si ěsa makua: „Ki'kis! maki'kiso n tana' in Tjinilow", wo si ěsa maulit ěng kuana: „Uli-ulit!" Ituoka kuano e Matu-matu'a: „Nae ro'na rumu'ndu'-mange, mange měngat-ai?" Sumowato si Mangala'un: „Mande! sa sera ra'ipe' nitumintjas ěn ambitu wo ra'ipe' niměna' ě měnson-sowatan." Sumowato se tow: „Ja ote, ipakawali."

Maja'o tu'u sera, ra'ipe' nimuntĕp-ange an sĕndi in do'ong, ja pa'anĕnerao-mange se měnson-sowatan. Pa'anĕno i Mangala'un ja nimerao kaapa kinaawĕsano ěm patu'ulĕnera, am pa'pa' si Tji'kis makua: „Ki'kis! mara'itjao ěng Kinilow, ja maja' tĕlu ngando wo n tana'miow maki'kis in api." Sumowato ka'i-mai si Tangkalio-liowan: „Uli-ulit, he, he, he, uli-ulit, makailango, he, he, he, ki'kisĕno in api, he, he, he, uli-ulit, ki'kis, maki'kiso. Uli-ulit, ki'kis, maki'kiso n tana' in Tjinilow." Uli-ulit an somoi-mai iitu ja puteoka si Tji'kis wo si Tangkalio-liowan ě manuwu'. Sa si Tji'kis kumua: „Ki'kis tana' Kinilow", kumua ka'i si Tangkalio-liowan: „Ki'kis uli-ulit!" Sumowato si Tji'kis: „Uli-ulit, ki'kis, uli-ulit." Tani'tu puteoka maulit wo mata'ar i maki'kis ěng Kinilow.

Ituoka mainde'o se tow, wo sera marengo wo mĕputu-putus akar in si ěsa wo, si ěsa kumua: „Sa ěn iana uli-ulit tani'tu, ja tumambisape' kita; ra'i-ra'i ěn iitu wo peronta, anae měngĕnga-ngĕngato tu'u kita-wo, akar i mai si ěndo iitu." Tani'tu tu'u maio ng katĕluan ngando, ja marĕngiso ěn tana' in Tjinilow. Akar(ĕ)kĕ' iitu ěn sisil anio'.

76. Sisil an doro' i Warĕso, sinisil i Alexander Walukow, Kuntung.

Kaindo-indono-mai a si makasa ja se ambalesa mitjo manguma a nisumangkum si watu makangaran im Barĕso. Sapaka ě

ngaran e ambalesa itu, ja si wewene Mintjering, si tuama Moring, si toja'angera Sompō.

Maio ē mēngure-ngure sera ē manguma ambitu, sera mēngusē-ngusēw se waja tinanēm; ja n aiusēw a makali'tjir i watu itu, ja kan-im-bawitjē' in ēsa. Si tjan-im-bawi iitu tauwi ulit. A si ēndooka makasa ja sera mange an uma. Maio in tjato'ora si ēndo, sera kumano. Makakan-ako sera, ja si toja'angera mangeo kumuku kan-im-bawi. Mēnguku-ngukuoka sia, mailēko in uwi i mēlentu-lēntutoka. Ja makakuku-mako sia, i makawawa'andoo, ja sia kumalio in uwi. Mawēngio, ra'ipe' rumeso sia, e maaruio i mēngali-mēngali in uwi, akaran in dinangatoka i Inanga; makaruao rangatēn i Inanga, ra'ipe' rumeso si Toja'ang; katēlu i Inanga in dumangat karapioka in sasalow: „Ko alukēn!” Ja si aisalow i Inanga itu aitjare'ekē' i Toja'ang i malinga.

Ja an iitu tari-tari'titj tampē-tampēl. Ra'itja tu'u ure ēn dinangat i Inanga, serenera-mange si Toja'ang muntēp-ange am batu. Mangeerao ēngatēn si Toja'ang, ra'io ambitu. Wo si Inanga mēngame-ngame' ēng kuanao: „Wuka'an-ai si Ana'ku.” Pasowatēngkē' im batu in tana'i: „Aitjua re'e iitjo ena, i mēnalo-nalow iaku?” Malingao in tani'tu si Inanga makawēnduo m pēreke-rekenēn. Ja an iitu wona' kato'orao im bēngi wo sera mareng a lawi. Mando ka'i-mai si Inang i Toja'ang mange mali'tji-li'tjir si watu iitu, karapi i mēranga-rangat si Toja'ang, ta'an da'io wuka'an. Awoja ningarananerao si Toja'ang iitu: Ukēpan, pa'pa'an kinusēp im batu.

76a. Rereindengēn an doro' i Warēso kaapa i Airēsow, rinei-ndeng i Tjaundiri Walukow, Kuntung.

1. He-e-e-e-e!
2. Gio Warēso rundeng, Warēso rundeng!
3. Rumēgēsō-mai,
4. Wo mai tumēnga' am bua' in tambarera.
5. Warēso rundeng!

6. Wo tumembo in ate le'os a si tio' in tambarera,
 7. Warëso rundeng!
 8. Wo tumëla'u kalowiran wo kasomböranera, paluim-
pungera,
 9. Warëso rundeng!
 10. Wo me'e wene' wo roko' lakër,
 11. Warëso!
 12. En sera itji'it a se Apo' pasawëlanera,
 13. Warëso!
 14. Wo itji'it a se nimaluimpung isera,
 15. Warëso!
 16. Wo ng kalowiran wo ng kasija'anera,
 17. Warëso!
-

GROEP VIII.

77. Kukua an doro' i Makarende.

Sapaka si Makarende ja tow a monge ng Kema; ja sera rua ë mëtuari tuama. Kumi'it in tata'ar an isera i mëtuari, ja karëngan si matu'a ën dior pendangën. Janta'an da'itja weta' si matu'a ën dinioran, ta'an si tuarinakë' ën dinioran i nimendang. Siituoka ja sia kumua a si amangera: „Ja aku in tarepe' iasa ja mangerepe' iru'kup a si tuaritju, e amangku, eni.” Jawo aitjaki'it tu'u ambitu. Siituoka sia ja mo'owo-mai a si tëla'uënera, wo sia mai a mitjo ng Ka'kas wo si watu itu iusëw(ë)na ambitu.

Ureoka in ure ja ka'i sia mëkom am Belang. Pa'pa'an in aweano ka'i tow ën ambitu, kua'a ka'i sia makom am Pontak. Awoja n ambitu pinëweteng ëm palële'an: se sija' malële' an dior, se lëngei an somoi. Ja si Makarende ja an te'mbena e tow sija'. An somoi-ai iitu sia aitjasea' ë nilumële'. Wo sia malawi' am pa'pa'an in aite'mbeoka tow lëngei. A si tjalawi' anaoka itu, ja sia tumintjaso wo mai a meko n do'ong in Te'ep, an Dumo'ong an Dangka'. Ja ambituoka sia mangasuo-mai an tinani'ano im Pinapalangkow in tarepe'. Ja mëmaja-maja'o sera, ja mangi'ito se asu, nimakasalu-mai in Sapalalum. Ja sapaka si pinangi'it e asu, ja tu'a. Maio sembongan e asu a mai n ta'upan in Sapalalum wo ng Këkëlor. Sapaka sera ë nimangasu ja rua-rua, wo pënura-nura'anera si tu'a. Mënura-nura'ka sera in dua, wo matura'oka i nimaindoo watu.

Siituoka ja ng kuanerao: „Ja maio tare, e kalo! eng kita ja marengo.” Marengo sera wo mëmaja-maja' nisumaluoka in

Tjekëlor, wo sera mitjo a Lu'uk. An iitu ja mauran kara-karapi i lalëindëng, wo sera rumi'ndir ambitu. Ja ra'itja nimaure-ure pailëkëno i tjarapina mëngua-nguangoka se asu, makakanatoka weta'. Siituoka ja ng kuano i tjarapina: „O kalo! ambanaka ko?” Sowatënao: „O weta' ko, e kalo! marengo-mange, en aku ja ambia'io. Mange itjua-mange a si ana'ku in sia maioka mënganguma ambia.” Ja itu mangena tu'u aitjua, iaka-akar tu'u si ana'na maio manguma ambitu. Maio manguma ambitu sia, ra'itja nimëngakaere kanën. An somoioka-mai iitu, ipapai-pio i amanga an isia: „Ja ana'ku tu'u ko, mitjo indon-ai si watu aiusëw(ë)ku a mitjo ng Ka'kas, tëlauën e apo'mu.” Wo sia sumowat: „Itjonoka-mai.” Mitjooka, ja ra'itja kaindoan. Siituoka ja marengo-mai sera, mainao itjua an tu'ur in tjaju pëngëna-ngëna'an i amanga, ëng kuanao: „O amangku! ra'itja kaindoan.” Kuano ka'i i amanga an ipiana: „E ana'ku! mai-mange in sondangku, mitjo ipo'ow-ai.” Siituoka tu'u maali-alio-mitjo in sondang sia, wo mitjona tu'u po'owën ëm batu wo itu paalinao-mai. Awoja akaroka tu'u-mai iitu ja sia mënga-kaereoka kanën.

78. Kukua an doro' i Makarende.

Sapaka si Makarende, ja mëtaranak wo si Ramapoli'i, si Pangerapan wo si Mailënsun. Indo-indono-mai ëng kuao i Ramapoli'i a si Makarende: „Sapaka kita, e Makarende, ra'itja toro wo mali'u-li'us(ë)kë' ambia, janta'an karëngan kita e mangusui ënto'an, iaku ë tumalitjuran, ja ko?” Sumowato si Makarende: „O ja tumimu aku.” Ituoka sumosoro-meko si Makarende, nisumumpak-eko i lour an du'una-monge, wo sia mënto'o ambitu. Am pa'pa'an sia in da'itja makausui kamang ambitu, ja mekom an du'una-meko i lour iitu sia, ja aitjasama'o sia ën ambitu. Ituoka sia kuma'kas in dëwo' wo sia musëw tumotowa a si tjina'kasana iitu. Ënto-ënto' sia ën ambitu. Ënto-ënto'oka ja ra'itja ka'i mënto' ambitu sia, ta'an tinë-la'uanao tow ën ambitu, wo sia mëros am Pasambangko'. Mëwaleo ka'i am Pasambangko' sia. Ta'an pailëkënao ja ra'itja

kēmēl ēn tinanēm ambitu, wo sia tumintjas ka'i ēn ambitu, tinēla'uana ka'i tow ēn ambitu. Ituoka sia makom am Pontak. Mēwaleo ambitu sia, ja nimēnto' ure-ure ēn ambitu, wo sia tumundēk an saroinson palēle'an. Aitane ēm palēle'an e sija', aitane ēm palēle'an e lēngei. A si makasa in sia mio' lumēle', ja sia nilumēle' am palēle'an e lēngei. Marengo am bale sia, ja sia nuwu'ano e atana: „E Apo', kua'a ko nilumēle'oka am palēle'an e lēngei?” Sumowato si Makarende: „Itjuaku re'e siitu ēm palēle'an e sija'.” Awoja malawi'o si Makarende, wo sia tumintjas ēn am Pontak nimareng-itjo wo meko sumosor-ai an Ēlas, wo sia maio mēwale an Te'ep.

Ambituoka sia, ja sia mau'bo asu kēli, wo sia mēngangasu-ngasu-mai. Ja a si makasaoka sia mangasuo-mai an Tareran. An do'kosaoka in Tjēkēlor ja mangi'ito si tu'a se asu, aipakawalintjo'ko' in dano si tu'a, wo pēruki-rukin i Makarende im bēngkow. Ngarananao si rano iitu Kēkēlor am pa'pa'an tanuoka i makēlor sia ē nimaruki si tu'a. Maio an ta'upan in Tjēkēlor wo n Sapalalum, ja sembongano ka'i ambitu si tu'a. Parukinoka i Makarende si tu'a, ja pailēkēnao kinawaluiano watu. Siituoka marengo si Makarende nisumaluoka in Sapalalum. A mitjooka ēn Tareran, ja sia mailēk in tu'ur im balantakan, niompēran in tētēnga'an, wo sia tumēnga'o. Makatēnga'-mako sia, ja rumangato-mai ēn am puru'na im balantakan: „Ja magirot! sumosor-ai!” Pailēkēno i Makarende ja wale ēn am puru'na i tjaju iitu. Siituoka ng kuanao: „Si sei tjo?” Sumowato si an dangka': „Iakuo si Paapo'an. Embai! masale'ka ko ēng kaawuku?” Sumowato si Makarende: „Ja masale'.” Siituoka ja muango-mai se asu ēn an tana'.

Awoja am pa'pa'an i nilumangkoio kato'or im bēngi, ja si Makarende in da'io mareng-itjo an do'ong, ja karintja'ano e tow a mitjo n Te'ep. Siituoka ja pamueiēno sa ambisa ēm pēngangasuana. Itjuao: „Ja a mako ēn Tareran.” Ja a mako re'e mbitu ēm pangerean isia. Maio pailēkēn e tow ja mali'tjili'tjiroka in tu'ur im balantakan se asu mēngua-nguang.

Ngarananerao si talun iitu Lu'uk, e nialukan si Makarende.

79. Kukua an doro' i Ramopoli'i, sinisil i Alfred Sarajar, Sulu'un.

Itji'it in sisil e matu-matu'a, sapaka si Ramopoli'i tow ang Kema, mëtuari wo si Sawulaon, ja si pënana'ana maka-ngaran Tete.

Ja sapaka si Ramopoli'i, tampëngasu. Makasa sia mapaaler walun wo mange mangasu an talun, uurean wo mareng-ai. Marengo-mai am bale sia, kuanano e karo'ong(ë)na in tana'i: „Sapaka si Mailengkei makaito' itjo, ja rae walina wo si pënana'anu, am pa'pa' susur im bëngi mëkara-karapioka sera in dua.” Siituoka maëmbowo si Ramopoli'i, akar sia mange numuwu' a si po'ow(ë)na im patenao si makaito' isia. Kumi'it siitu mangeo ka'i numuwu' a si makaito' isia siä, ng kuanao: „Malero-mange siow momongan ko wo iunsun an do'kos(ë)-mu, am pa'pa' kasiowan ngando ja wëntirëngkuo ko, eng ko ja rae re'em balina wo si pënana'angku.” Kasiowan ngando ja wëntirënao si makaito' isia. Aipapato'or(ë)na-mange, lumë-poko-mio' ën ëla'd, tumëna-mio' in do'kos, akar mateo si makaito' isia Mailengkei.

An somoi-ai iitu kumësoto ang Kema si Ramopoli'i wo pira-pira tow karapina, rumuru a mongena an tana' e Maësa wo sia mëngara-ngaran an dojo-rojongan in dano pinalangkoiera akar itjatëka'-meko an Dano i Apo' sera mënto' tojo' ambitu. Mandoo-mai a si ëndo makasa, lumële'o si Ramopoli'i an dojongan i Rano i Apo', sampelan-ako im bua'na in tjowal, pitongëna-mio' wo iwangkil(ë)na, makatëlu iwangkil(ë)na, mëmare-marengkë'-mange an isia. Pailëkënao si wua'na itu kinaretan, kuanao a se karapina: „Nio' ën anio'”, wo ituoka sepano-mio' e karapina.

Mando-mai a si ëndo iitu rumu'ndu' tow si Ramopoli'i, sumalu in dojongan in Dano i Apo' mangere in tu'ur in tjaju makawua'na n iitu. Marengo-mai se tow airu'ndu' i Ramopoli'i makata'uo an isia, kuanerao: „Ja ra'itja kinaereanami si tjaju makawua'na in iana, ta'an kami mailëk awean do'ong a mitjo wo aweam bewene kinanatami-mange an tungkas in atëp.

Sapaka sia, ja rinték wa'ang." Numuwu'o si Ramopoli'i ng kuana: „Woondo kita im baja mitjo maali tjo'ko' laka' ta'an kembutangké' im bu'uk.

Mando-mai mitjom sera. Itjatéka'o-mitjo, iwékarerao-mio' se ko'ko' wo mësakao se ko'ko' e tow ambitu, akar kinali'-muran-ai e tow kéli wo mërëga-rëgaoka in tje'ke', mailék se ko'ko' kinembutan mësaka-saka. Kuano e karapi i Ramopoli'i: „Nange kua'a si Rinték-Wa'ang pinailekami kaawi'i." Sumosoro a si wale itu si Ramopoli'i wo se karapina, kuana: „Tawea e ito' makawale; sapaka kami, mailék-ange tow a mange n dangka'." Sowatëno i Tariow makawale n iitu, kuana: „Sapaka sia ana'ku pakurungën, makangaran Rinték-Wa'ang." Pangilë-këno i Ramopoli'i a si Tariow, kuana: „Sa itjasale' i ito', irojoy-ai sia, en ilëkëngkupe'." Irojoyo-mio' si Rinték-Wa'ang, kuano i Ramopoli'i: „Ja itjo re'en nitjumaret a si tjowal anio'." Sumowato si Rinték-Wa'ang: „E ra'itja." Kuano i Ramopoli'i: „E iitjo kua'a, kua'a n tu'us im ba'ang tanu im ba'ang(ë)mu." Kuano ka'i i Rinték-Wa'ang: „Wona' re'en iaku, ta'an aku makan im bua'na in tjaju aiwangkil(ë)ku kawoondo ëm batuna." Kuano i Ramopoli'i: „Jawo iitjo tu'u re'en; sapaka si wua'na anio' ja sumampel-ako an iaku nimalële'. Ta'an tana'i: sa itjasale'mu, indongku masiwo in tjanëngku ko." Sumowato si Rinték-Wa'ang, kuana: „Sama', ta'an wueiën a si Mama'." Wueiëno tu'u a si amang(ë)na Tariow, kuano i Tariow: „Sama' ta'an ialer-ange iwe'e si Inang(ë)na. Sapaka ë ngaran i Inang(ë)na, ja Pondos."

Weano i Ramopoli'i roko' si Tariow këkëlian. Pëwueiën i Ramopoli'i si Inang i Rinték-Wa'ang, kuana: „Ën so' si Inang i Rinték-Wa'ang?" Kuano i Tariow: „Sa kamu maja'o-sa, ja pailëkënu sia se makawer im pëkaraiëniow, isia si Inang i Rinték-Wa'ang, paweano-mange roko'." Rumojor am bale i Tariow si Ramopoli'i wo si Rinték-Wa'ang mëlau-la'us-ako an tana' Mongondow. Anaëitu, kumi'it in sisil, sapaka se paindon kolano an tana' Mongondow suru i Rinték-Wa'ang wo si Ramopoli'i.

80. Kukua an doro' i Rintëk-Wa'ang, sinisil i Jan Runkat, Kapoja.

Indo-indonoka-mai sapaka si Ramopoli'i ja malële' an Dano i Apo'. Malële'oka sia, ja mitjo rumojong-ai ëm bua'na in tjowal, nirumoro'-mai isia. Ipëkawina-mako, ja makokë' mapurititj-ai. Ituoka ng kuano i Ramopoli'i: „Ow! si tjowal anio'!” Pitongënao-mio'. Pailëkënaoka ja kinaretan, ng kuanao: „Ra'itja kinaret im peret ën anio'! ja ra'io nimako ambisa em bawean tow ën an dangka'.”

Ituoka rumu'ndu'o se tow(ë)na sia, ëng kuana: „Mitjo kamu wo mitjomioiw ilëkën si Rintëk-Wa'ang. Ta'an en tia' sia ra'itja pailëkëniow ja maali rua ko'ko' laka', wo mitjo ipësaka, janta'an kembutangkë' im bu'uk.” Ituoka maja'o se mitjo milëk. Wo sera anio' mënuwu-nuwu' si ësa wo si ësa, ëng kuanerao: „En tia' sia ra'itja pailëkënta, ja sawo mësakao se ko'ko', ja se walina masere-sere, ra'itjakë' an tana', ta'an karapi in an dangka' ja sere-seren.”

Itjatëka'o tu'u-mitjo sera, nisumumpak-itjo si wale an tëmbir in dano, an susut in tu'ur in tjowal. Kuanerao: „Ja iëpe'o wia wo sumere-sere.” Ituoka ja ipësakao se ko'ko'. Maumungo-mai se tow, mai lumili se ko'ko' mësaka, wo sera mërëga-rëga in tje'ke', makasere se ko'ko' mësaka, kinembutan im bu'uk. Masere-sereo tu'u se airu'ndu' i Ramopoli'i, ja itjakanato-mange si wewene ësa maënto-ënto' a mange n dangka' im bale, makatungkas in atëp wo mënge'ke-nge'ke'-mange makatëngo-mai se ko'ko' mësaka. Ituoka kuano e nimailëk-ange: „Ja marengo kita en ambiaka re'e ëm balena.”

Marengo sera, wo itjuaerao a si Ramopoli'i: „Uli-ulit ambitu m bale i Rintëk-Wa'ang.” Ituoka ja tumu'tulo i maja' si Ramopoli'i, wo sia mitjoo-mai si Rintëk-Wa'ang, maindo pëna-na'ana. Marengo sia, ipakawalinao si Rintëk-Wa'ang wo sera mako a Mongondow.

An somoi-mai iitu makausuio anak sera: ja si Alowong, si Jauwang wo si Mamusung. Mawangko'-mai se toja'ang itu, ja mai itëla'u-mange i amangera a mai mbia. Si Alowong aitëla'u

an Tomu'ung, si Jauwang an Dëmbokën wo si Mamusung ang Kawangko'an.

81. Sisisilën an doro' i Uwe Randen, Anak im Pondos, sisisil i Thio Gim Sun, Kawangko'an.

Kaindo-indon-ai, kine, ja wawean dua tow mamale a mange n Tumara'tas kaapa Pinëwetengan; si tuama makangaran Kawulusan, si wewene makangaran Wuangi'. Apa se tow isera, ja tow ure mëngënto-ngënto' a mange n Tumara'tas wo ang kasomoian-ai sera ja nimaras-ai an do'ongo e Kawangko'an in tarepe'.

Ja si Tjawulusan wo si pëtowëna makatoja'ang lima ën tuama, ësa ëm bewene. Ë ngaran e toja'ang isera: Rumëngan, Kalangi', Lolombulan, Asa', Tiwow, wo si Tjere'sung po'owera wewene. Tani'tu tu'u se Kawulusan in ambalesa wo se toja'angera nimënto'o ambitu, ta'an ang kasomoian-ai se toja'ang iitu nimawangko'o, ja sera nimëtaneo wo nimaja'o-mange ang kasale'an ënto'an i tow ësa wo si ësa. Si Rumëngan sia nimaja'o monge wo nimënto'o a si ësa kuntung a mongena a mitjona in do'ong in Tjinilow. Si Tjalangi' nimëroso-mio' an duruan wo nitumani'o se ro'o-ro'ong makaruru in ta'asitj mako nimakar-ai an do'ong im Poijar wo ang kasomoian sia nimarengo-mai nimënto' an tongkeina im Batu No'ai am paawu'un in do'ong im Pondang wo Lopa'na. Si Lolombulan nimako, nimënto' a si ësa kuntung a mongena a makona in do'ong in Tjumëlëmbuai, akar si tjuntung iitu in tarepe' pënu'u-nu'ulën kuntung i Lolombulan. Si Asa' sia ja nimonge nimënto' an do'ongo im Benang in tarepe'. Si Tjere'sung, po'owera wewene, mitjo nimënto' an do'ongo e Ka'kas in tarepe'. Ja si Tiwow anio' sia ja nimawaja-waja'kë'-mio', manalun ambisa ng kasale'ana, akar ka'i sia nimakaere ngaran, kaapa ningarananoka-mako in Tiow. Wo ang kasomoian-ai sia nimëroso an duruan, an Uwuran, wo an duruanoka sia mësungkulo wo se pira-pira ka'i manalun, wo tinowanao sera

in tjumi'it isia, wo sia nimamuali mawali-wali isera kaapa tanu tona'asera.

Siituoka tu'u sera tumo'tolo mēwali-wali manalun nimaeko, wo sera anio' nimēngera-ngera-meko maema' rēna', en sera ra'itja nimēnto' lē'tēk an ēsa rēna', ta'an sera nimēngera-ngerakē'-meko. Wo itjatēka'o-meko a mekona in dano kaapa rojongan in Dano i Apo', an tinana' e Mongondow, a mitjona im pēnganguman e Rumo'om Bawa' in tarepe'. Ambitu sera nitumo'oro ka'i tērung kaapa rēna', o ambitu sera nimēnto'o ure-ure tojo'. Ja n an dior in dēna' tino'orera wawean ēsa tu'ur im pondos taisi; ja kanaramēn i Tiwow susur sia in tumo'or-ai im boondo mēla'u-la'us-ange mi'pi' a si tu'ur im pondos iitu. Tani'tu ra'itja takura ng kaure, pailēkēnao ēn tu'ur im pondos iitu nisumēgao, ta'an da'itja kailēkana sa sapa nimange-mai wo itu nisumēga. A si wēngi makasa, pareke-reenēn matawi-tawi mando, ja palinganao nirumare'et rēpēt si tu'ur im pondos an dior in dēna'era; ta'an da'itja kinailēkana ka'i sa itu sapa si nirumare'et. Maio ka'i tu'u nimakaēndo kaapa nimamoondo-mai tjumi'it in tjanaramēna sia mēla'u-la'us-ange ka'i mi'pi' a si tu'ur im pondos iitu, wo pailēkēnao si nisumēga a si tu'ur iitu ja nimakēnta'o wo paere-arena sa wo'o ro'na kailēkana sa sapa si nitjumēsot a si sumēga an tu'ur in iitu, ta'an da'itja kinaereana. Tani'tu sia mapaēluro ka'i in sēra' wo se sapa-sapa an darēm in dēna', en sera maja'o ka'i manalun. Wo kanaramēnera, sa sera tumaluno, ka'i ra'itja wana ēsa tow ro'na mēnto' an dēna', ta'an karēngam baja mange tumalun, anaitu sera ririor i maja', karēngan mēluro-wo in an darēm in dēna' wo palēnan sama', o tare sera maja'. Tani'tu kanaramēnera susur i maja'.

Kaindo-indon tu'u a si makasaoka si Tiow karapi e pawali-walina nimange i manalun, wo marengo-mai sera, pailēkēno i Tiow nirombitano sēra' am beteng(ē)na. Siituoka tu'usēnao sa sapa si maindo in sēra', o pailēkēnao kaapa katu'usanao tu'u ja wawean tu'us im ba'ang in tow an sēra' wo tu'us im ba'ang iitu ja talos rintēk nimarangket. Ang kasomoian-ai in iitu,

tuma'aro tu'u si Tiow a se pawali-walina, kuana: „Apaka kamu sa maja'o, palënan-ai sama', en aku lumukute' si marombit in sëra'ku.” Maio tu'u i maja'o se pawali-walina, ja mënëpo an untëp sia wo ipapapalënao sama'. Ra'ipe' tu'u nimaja' pira-pira ng kaure se tow i Tiow nimaja', rumare'et tu'u-mai n am pondos, kaapa an taisi an dior in tërungera, o pailëkëno i Tiow ësa toja'ang mangala'un nimëla'u-la'us nimuka' im papalën wo mëga in sëra'na; ituoka tu'u to'orëna wo'o-mai i masut wo ng kuana: „Itjoo re'e si mërombi-rombit in sëra'ku, ja mënto'o ka'itje'-mange, ko patengkuo.” Ta'an tani'tu ng karior si toja'ang iitu nimangko', ng kuana: „Ama'! tio'o pate-paten aku, aku ja ana'mu!” Sumowato si Tiow: „Itjatambisa ko kumua in ana'ku, tumo'tol(ë)kë'-mai i makailëk-ai aku, ja ra'itja nitu-manë-mako, si manalungkë' tawoiëngku; kua'a ko kumua in ana'ku, towo ko, karëngan ko patengku!” Sumowato ka'i si toja'ang: „Ama', tio'o pate-paten aku, ra'itja re'e ana'mu aku, sisilëngkuoka: aku anio' aipakaanak im pondos an dior in tërung anio', en tumo'tol(ë)kë' in tjëënto' e ama' ambia, ja susur im boondo mi'pi' a si tu'ur im pondos-iitu si ama', anaitu aku anio' ana'mu wo si tu'ur im pondos iitu.”

Siituoka tu'u pinalingana, ulitënao in ana'na wo sinepanao si toja'ang isia a si ëndo itu mënto' an isia. Tani'tu tu'u si toja'ang isia nimënto'o ang karapi i amanga wo pinëwangko'o karapi in sama', iaka-akar aiema' i amanga paënto'an an dangka' in dëna'era. Wo si toja'ang isia ningaranan i amanga in Uwe Randen.

Maio tu'u nimarengo-mai se tow nimanalun an dëna'era, ja nimangaja'ka' sera nimailëk im baweano ësa mangala'un nimangakar ëng kalo'or, makawa'ang in dintëk wo lo'or ang karapi i mawali-wali isera. Siituoka wueiënera a si Tiow sa sia si sei, o sowatënao: „Apaka sia, ja ana'ku”, wo sinisil(ë)nao ka'i tambisa itu nimamuali. Ra'io nimaja' pira-pira ng kaure sera n ambitu, sera merao ka'i-mange a mange matawi-tawi in do'kosa in dojongan in Dano i Apo', pareke-rekenëp rua ngapatëlu a lua'an wo sumosor, an do'ongo im Pontak in

tarepe'. Ambitu sera ra'io nimema'pe' rëna', ta'an sera nitu-mani'o ro'ong wo nimema'o wale, wo si Tiow isia nimamuali pamatu'anera a si ro'ong iitu. Ngaran i ro'ong iitu aingaranera Pinontakan, wo akar in tarepe' si ro'ong iitu mëno'o-no'ore'. Ja si Uwe Randen makala'us aiwëimbën ka'i i amanga an solimai im balena, en si toja'ang isia nimangakar ipau-paupus wo palilina, ra'itja ipawe'ena matawoi.

Kaindo-indono-mai tja'i wawean dua tow mëtuari a monge n tongkeina im Pulisan, ësa ën tuama, ësa ëm bewene. Si tuama makangaran Ramopoli'i, si wewene makangaran Dansawulaon. Ja si Ransawulaon anio' wawean ësa toja'ang mangalitow, makangaran im Batu Wangkai, kaapa Maiwangkai. Si Ramopoli'i anio' sia ra'ipe' nitumane, ta'an sia, tawea', mawe'eo nuwu' a si ësa mangala'un a monge mbitu, makangaran Tion. A si makasaoka sia nimange an tana' in Siaw; ja a mangeoka mbitu sia, kotitjanao-mai si paroma'ana, ja pailëkënao si ontol(ë)na palewo'ongkë' i Maiwangkai, makaito' isia. Siituoka sia tuma'ar, kuana: „Ilë-ilëkënaoka sa aku marengomange.” Maio tu'u nimarengo-mai si Ramopoli'i, ja sia ra'itja niluma'us-ai am baleera, ta'an sia nimënto'kë' a lawanan, wo sia rumu'ndu'-mange a se atana pasisirën, mange kumua a si Maiwangkai: „Apaka sia ja lumukut-ange a la'lir siow ngaliunsun, wo tumindung-ange in tuwung siow ngaliunsun, en sia wëntirëngkuo, am pa'pa'an sia malewo'kë' si paroma'-angku.” Tani'tu tu'u mangem se airu'ndu' i Ramopoli'i; itjatëka'-mange sera, itjuaerao tu'u-mange sapa si aitjua i apo'era. Sumowato si Maiwangkai: „Me'e.” Marengo tu'u-mange sera, ja itjuaera tu'u-mange nuwu' i makaito' isia. Siitukë' pinalinga i Ramopoli'i, ru'ndu'anape' ka'i mange kumua a si makaito' isia, kuana: „Awësane'-mange siow ngaliunsun pinaluan, wo sa nimalingaka ërut ang kato'ora, ja ténangka sia, ra'itja mëtowo aku, ta'an sa ra'itja mërut ën ang kato'ora, ulit aku mëtowo, en da'itja ténan sia.”

Siitu ka'i tu'u mangem se ata i Ramopoli'i a si makaito' isia, wo itjatëna-mange sera, itjuaera-mange nuwu' i apo'era.

Sumowato ka'i-mange si Maiwangkai, kuanao: „Mange itjua a si Ito', wëntirëno-mai, pinakatindungkuo se mai aipapakua iaku; aku ra'itja mainde' mai tjarapi i inangku, e mata'nei: kaeta' tu'u si wëntir iitu, wo itjaambo-mai iaku.” Mangem tu'u se atana, ja itjuaera-mange: „Ra'io, kini'itanao waja.” Siituoka tu'u iwëntir(ë)nao-mange ëm bëntir, aipapaange. Ja ang këwëntir(ë)nao, nimërut rëpët ën ang kato'ora, wo ra'itja tu'u ure palingana-mange si Ransawulaon maame'o, pinakatëna-tëna im bëntir an impuruan si Maiwangkai, nilumampat an tana'. Am pa'pa'am beta' im palingano-mange i Ramopoli'i si po'ow(ë)na maame'o, kua'a sia moleo, tumintjaso ambitu.

Maio a Manarow sia, mëlinga-lingakë'-monge in ame' i po'ow(ë)na, am pa'pa'an si Ransawulaon talos mawëndu im pinatean i ana'na, ja tinintjasangkë' ka'i i po'ow(ë)na, anaitu sia talos nimawëndu. Siitu ka'i nimange-mai si Ramopoli'i nimolekë' ambitu. Maio ka'i a Mandolang sia, makapa'a-pa'angkë'-monge in ame' i po'ow(ë)na, anaitu sia nimolekë' ka'i ambitu. Maiom a mongena in Dano i Apo' sia, am Bujungon, nitumuli nimënto' tojo' ambitu sia. A si makasaoka sia in ambituo, sia nimio' nilumële' an dojongan in Dano i Apo', wo malële'oka sia, mitjo rumojong-ai ësa wua'na in tjowal, nitumuli-mako isia, ta'an da'itja aiwe'ena an deken, o ra'itja ka'i ure nimarengkë'-mitjo an dior(ë)na si tjowal iitu; iituoka iwangkil(ë)na-mako si wua'na in tjowal iitu, ta'an pailëkënao ka'i nimarengkë'-mitjo an dior(ë)na. Siituoka tu'u indonao-mio' ën iitu, wo pailëkënao, wawean tu'us im ba'ang in tow ambitu wo kuanao: „Kua'a si wua'na in tjowal anio' wawean tu'us im ba'ang in tow! ra'itja wa'ang im peret ën anio', wa'ang in tow. E, wawean de'e tow ën an dangka'.” Siituoka ka'i itjuana a se atana maki'i-tji'it isia: „Apaka kamu woondo karëngan tumu'tul walun, kanëniow an darëm in tëlu ngando, tëlu ngawëngi, eng kamu iru'ndu'kupe' sumalu-mitjo si rojongan anio', em pa'pa'an kua'a ja wawean tow ën a mange an dangka' i rojongan anio', kumi'it im pailëkëngku-mio' an tu'us im ba'ang am bua'na in tjowal

anio'; anaitu karëngam bawean tow ën a mange an dangka'."

Marengo tu'u-monge am pëngënto-ngënto'anera sera, ja ipapatu'tul(ë)nao walun, walunën e atana iru'ndu'na-mange mangere ambisa pëngënto-ngënto'an i tow makatë'ndëla im ba'ang a si wua'na in tjowal iitu, em boondo sera karëngan maja'. Maio tu'u i maja'o se atana pinontol(ë)na i maja', aipapaalina mëkele ësa ko'ko' laka', em pa'pa'an tina'neio i Ramopoli'i si tow makatë'ndëla im ba'ang a si wua'na in tjowal anio', ja ra'itja ro'na kausuian ang karapi e tow walina, ta'an sia wona' anak e tow roro'na, si ipasë'sëk(ë)kë' an solimai im bale, anaitu kuanao a se atana: „Apaka kamu karëngan maja'o, wo sa kamu nimalëko ro'ong, kembutan-ange im bu'uk se ko'ko' an da'itja pailëkën e tow, o saputën-ange sama', tio'o pailëkëngkë' i sei, wo tare kamu ro'na muntëp an do'ong. Sa kamu nimuntëpo an do'ong, milëk(ë)kë'-mange im bale e pareke-rekenën tow roro'na, ambitu ën untëpaniow-ange, wo ipësaka-mange se ko'ko' a lesara im bale iitu, ta'an sa kamu mësakao se ko'ko', sere-seren-ange ën am bale kaapa n an dangka', sa si sei ngumingi kaapa kume'ke'; ilë-ilëkën-ange si makawa'ang rintëk kaotop a si wua'na anio', sa nimëkakeleo, isiao si makawa'ang in iitu, anaitu paalin-ange si wua'na in tjowal anio'. Wo sa sia kaereaniow(ë)ka, isia si indongku pëtowëngku, mamuali apo'miow, anaitu mangem kamu."

Tani'tu tu'u maja'o se tow i Ramopoli'i, nisumalu in dojonan, ta'an ang kasomoian in tëlu ngando, tëlu ngawëngi sera nimarengo-mai, ra'itja kinaereanera ambisa m pëngënto-ngënto'an i tow isia. Siituoka ka'i kuano i Ramopoli'i: „En da'ipe' kinaereaniow, karëngan kamu tumajange'-mange maja', anaitu kamu tumengame' walun kanëniow pitu ngando, pitu ngawëngi." Makatu'tul-ako im balunera sera, ja kua'a ka'i sera maja'o, ta'an malëkëp ka'i-mako pitu ngando, pitu ngawëngi, nimarengo ka'i-mai sera, ra'itja kinaereanera. Kuano ka'i i Ramopoli'i: „Kamu nimaja'o tëlu ngando, tëlu ngawëngi wo pitu ngando, pitu ngawëngi, ra'ipe' kinaereaniow, anaitu

karëngan kamu tumengame' ka'i walun, kanëniow an darëm in siow ngando siow ngawëngi, eng kamu iru'ndu'kupe' ka'i maja' tumajang-ange."

Maja'o tu'u sera a si tjatëlu iitu, ja a si tjasiowan ngando akarera nimaja' mailëko ro'ong sera, ta'an dirior sera i nimumtëp an do'ong, nitjumembuto im bu'uk a se ko'ko', wo tare sera mange an do'ong. Muntëpo tu'u an do'ong sera, kini'itan-
era ë nuwu' i apo'era, in sera karëngan sumisir kaapa milëk(ë)kë' im bale e pareke-rekenën tow roro'na, ja kinae-
reanera a si ro'ong iitu ësakë' ëm bale wangko' wo nilu-
mo'or-ai a se wale an darëm i ro'ong iitu. Tani'tu tu'u
sera tumulio a si wale iitu, wo aipësakaoera ambitu se ko'ko'.
Maio tu'u nimesakao se ko'ko', ja maumu-umungo-mai ambitu
se tow, mai nimilëk se ko'ko' ra'io wana wu'uk, mësaka,
iaka-akar tanuoka nimarintja' a si sangalëwu' iitu, wo ëng
ke'ke' e tow ra'io ipakakua. An unëro in se tow nimaumu-
umungo ambitu, ra'itja tu'u ure rumintja'kas-ai ën atëp a
mange n dangka', wo pailëkënerao tu'u-mange ësa mangala'un
nimangaka-ngakar ëng kalo'or, niruma'nda-mio' se ko'ko', o
pailëkënerao tu'u ëm ba'ang(ë)na ja kaotop in tëndëla im
ba'ang am bua'na in tjowal paali-alinera.

Siituoka tu'u sera marengo-mio' a si apo'era am Bujungon
ang karapi in tjasale'am bangko', ra'io ipakakua wo mio'erao
aitjua a si apo'era tambisa ë lalanera, iakar sera nimailëko
ro'ong wo kinaereanerao si tow makatë'ndëla im ba'ang a si
wua'na in tjowal kinaerean i apo'era ang këlële'na makasa
an dojongan in Dano i Apo', o aitjuaerao ka'i-mange apaka
sia ësa wewene nimangaka-ngakar ëng kalo'or, ra'itja wana
tow ro'na makaindo i giona. A si tjëlingakë' i Ramopoli'i in
iitu, ja sia talos nimasale' wo nimontolo se atana waja karë-
ngan maja' kumi'it isia, maali in doko'; winetenganaoka tow
mënto' nitumeir a londei. Makatu'tul-ako si Ramopoli'i, ja
sia maja'o paki'itën e atana tani'tu ëng kakëli, nimaute' im
paalin. Itjatëka' tu'u-mange sia am bale i Tiwow, ja itjuanao-
mange apaka sia ja mai mangilëk si anak i Tiwow, Rintëk-

Wa'ang, mamuali pětowěna, wo sinisil(ě)nao-mange tambisa sia nimakailěk isia in tjěpitong(ě)na in tjowal wo akar a si ěndo siitu. Ta'an si Tiwow sia ra'itja wana ěn aisowat(ě)na, iaka-akar si Ramopoli'i in ěsa kumua a si amang i Uwe Randen, kuana: „Tio'o ko mawěndu in ituruk(ě)ku an iitjo wona' pirakě'; ja tana'i: iotop isia ěn doko' ituruk(ě)ku an iitjo.” Siituoka tu'u sumowato sia: „Sama', sa tani'tu.”

Maio tu'u nimalěkěpo nuwu' wo aipakaturuko ěn doko', ja pangilěkěno i Ramopoli'i sa ro'na itjėsoto-mai si Uwe Randen, en sera maja'o. Siitukě' tu'u nuwu' i Ramopoli'i, ja itjėsoto-mai i Tiwow si ana'na, wo ituruk(ě)na ang kama i Ramopoli'i, o sera maja', ta'an si amang i Uwe Randen ra'itja nitjumi'it. Maio an talun tinowan i Uwe Randen sera, tambisa wo'o sera nimělangkoio si tu'ur im pondos inanga, awean-io' im pondos sera, o itjatala-mako ambitu si Uwe Randen; paere-erenera, ra'io kinaerean. Tani'tu si Ramopoli'i marengo ka'i-mange a si Tiwow empona, wo mangena niwuei sa si ana'na nimarengkě'-mai an isia, wo sinisil(ě)nao-mange ambisa ěng kinatalaan isia, wo sapa nimamuali an isia a lalan. An uněr sia i nimasisile', sowatěno-mange i empona: „O měsea'ku, ra'itja aitjuaku re'e an iitjo, apaka sia anak im pondos; mio' irangan-ange si tu'ur im pondos iitu.”

Siituoka ka'i meneto i lalana sia, itjatěka'-mio' a si tu'ur im pondos sia, ompěranao-mange roko' an tu'ur im pondos, wo tumarepe'-mai pailěkěnao-mange si pětowěna makatulung an tu'ur im pondos iitu měnge'ke-nge'ke'. Tani'tuo tu'u towanao sia wo sera maja', wo waja se tu'ur im pondos pinalangkoiera niirangana waja, akar sera in itjatěka'o-mio' a londeiera. Ra'io nimawaja' pira-pira ng kaure sera ěn ambitu, ja si Ramopoli'i meneto 'ka'i-mako mole, maere-ere tana' lo'or ěnto'an, ta'an an uněr ka'i sia nimawole, ja waja se pondo-pondos makaruru in ta'asitj nimaawe-mange a londei an uněr i laur, iakar-ange an tana' ěnto'anerao. Ja waja se pondos iitu pinakaira-iranganao.

Itjatěka' tu'u-mako an tana' im Bola'ang sera, sera aitja-

ěnto' ambitu. Ja waja se tongkeina, punte-punten, rojo-rojo-ngam bo susuwa'an akar-ako in tongkeina im Pulisam bo mako makar-ai in tana' e Mongondow, si Ramopoli'i ningumaran. A si ěndo in tjěuntěperao an tana' iitu, ja waweano tow měngěnto-ngěnto' ambitu, ja a si tjěilěko e tow ambitu si Ramopoli'i, waja isera nimai an isia, wo itjuaerao-mange an isia: „Suwun se wolai a si punten anu mange, em pa'pa'an se wolai isera ja masěra' tow; sa sera tumumpa-mai, kinai-alian ka'i papasut, maiera ipapasut se tow, anaitu kami ra'itja ro'na makěli wo lumo'or in do'ong. Sa kasuwuanu waja se wolai isera, itjoo mamuali kolanoami.” Ja m pangilěkan e tow isera nien i Ramopoli'i. Maio tu'u i makaěndo-mai, mindoo-mai im běntir(ě)na sia, si aiwěntir(ě)na si Maiwangkai, makaito' isia-wo, o sia tumo'tol měntir. A si sangando tojo-tojo' wo nimakaapu wo'o se wolai ambitu, nilěkěp(ě)naoka a si tjaruan ngando. Mai i makasuwu-mako se wolai sia, ja iangkaio e tow ambitu ang karapi in sisiri'am bangko' sia, nimamuali tjolanoera. Tani'tu tu'u sia nimamualio kolano a si tana' iitu.

Ang kasomoian im pira-pirao ngata'un sia i nimamuali tjolano a si tana' iitu, ja kotitjanao si po'ow(ě)na Ransawulaon a monge m Pulisan, ja an darěm in sakitan děpět, wo ituoka ru'ndu'anao-monge se atana monge-mai si po'ow(ě)na, wo ita'ar(ě)na-mange a se atana in tana'i: „Itjua-mange a si po'ow(ě)ku in ipapaaitju-mange sia, en si seipe' milěk isia? Si ana'na nimateo, anaitu ipapaaio ang karapitju, o iakuka milěk in owa'na sa tanu mamuali sapa.” Tani'tu tu'u moleo se atana, itjatěka'-monge sera a si Ransawulaon, itjuaerao-mange ěn aita'ar-ongė i apo'era. A si tjělingakě' i Ransawulaon i nuwu' aita'ar i po'ow(ě)na a se airu'ndu'na-monge, sia makala'us nimen wo nimasale' kumi'it isera. Moleo tu'u sera, ja nimolekě' an ta'asitj a mitjona, ta'an itjatěka'-meko an dojongan i Molompar sera, ja makaapuo ambitu ěn asěng i po'ow i apo'era. Wo tani'tu ng kario se ata isera měrior maja' mange makata'u a si apo'era tiněla'uanoka nitumeir a londei. Itjatěka'-mange a si apo'era sera, itjuaerao-mange, apaka si

po'ow i apo' nimateo, kinarëmbusan in asëng a mio' n dojon-
ngan i Molompar. Këlingakë' i Ramopoli'i si po'ow(ë)na i
nimateo, ja kua'a sia montolo maatus ën tow a se atana,
mio' lumowëng si po'ow(ë)na wo sera ipapato'or(ë)nao wale
ambitu, en sera ra'io mareng, ta'an sera mënto'o mateir a
lowëng i po'ow(ë)na. Si ro'ong tino'orera itu, ja ningarananera
i Muntoi, wo ang kasomoian sera nimerao-mio' am Belang.
Anaitu apo' e Welang suru e ata i Ramopoli'i.

**82. Sisil an doro' i Lumimu'ut wo se Suruna, sinisil i
Mentang Ménajang, Sondër.**

1. Kaindo-indono-mai lumëntut-ai ëm batu, sapaka m batu,
nisumaru-mitjo am paantangan i ëndo. Awoja mantango-mai
si ëndo, ja mapaso'o m batu ëm pasëndangan-ai, ja itu
lumimu'uto wo itu maumung ë lëwa'. An sömoioka-mai ja
makënta'o ë lëwa'. Makënta'o-mai, ja tow. Awoja si tow itu
isiao si Lumimu'ut.

Makaanako-mai si Lumimu'ut, ja si Muntu-untu kaapa si
Kumokomba'. Awoja mangeo sosoran i Lintjambene' si Muntu-
untu. Sumuruo-mai sera in dua, ja makasa siow se tuama,
makasa siow se wewene. Ë ngaranera ja: Pëli'ian, Kumai-
mboto, Ma'inturin wo se walina. Ëng kasaru i Wujalaka ja si
Tjasueian. Mëngëna-ngëna'oka si Wujalaka wo si Tjasueian ja
mailëko tow, isiao si Pëli'ian, wo sia pëwangko'onera. Ën ainga-
ranera an isia Sueiwene', sia ja anak i Muntu-untu, ënta'an
sia pinëwangko'oka i Wujalaka wo si Tjasueian. Mangeo
sosoran si Sueiwene' ja si Tjariso. Sumuruo-mai si Sueiwene'
wo si Tjariso ja si Tamuntuan, si Maengkong, si Sumpa', si
Suling (Mawëris), si Mararai, si Mamëntas, si Teterambun;
ja isiao si nimosok in Tutungën.

A Lengko'anoka si Tamuntuan, im pinëtalitjuran e po'ow(ë)na,
ja sia mema'o kaju sangkiow, ema'ana wewene, ja iserao ë
mëkasaru. Sumuruo-mai sera in dua ja si Auan, si Alowong.
Makaanako si Auan ja si Runtuwarow, si nimakaanako-mai

si Tiwow. Ĕng kasaru i Tiwow ja si Teteon. Si Tiwow ja tumalun wo sia mema' tĕrung. Ja susur im boondo sia tumia'-monge rano an tu'ur im pondos. Awoja susur in ĕndo sia munĕr in talun, ta'an susur(ĕ)na i mareng-ai im bawa'ando ja aweano tu'tu'. Ja siituoka ilukut(ĕ)nao sa si sei si mĕngasiwo in tu'tu'. Ja pailĕkĕnao ĕsa wewene, wo ng kuanao: „litjoo re'e si mĕngasiwo in tu'tu'." Sumowatoka si wewene isia, ĕng kuana: „Iaku! ana'mu kua'a aku, ra'itja kua'a mĕngato'or-onge an tu'ur im pondos ko?" Sumowato si Tiwow, ĕng kuanao: „E, ulit! ana'kuka re'e ko." Iwalio-mange i Tiwow am baleera si Uwe, aila'u-la'us-ange an solimai. Ĕn do'ongera ja Pontak.

2. Sapaka si Ramopoli'i mĕtuari wo si Langkai, sera ja tow ang Kema. Awoja moleo si Ramopoli'i nilumi'tjir-onge an Salimburing wo mako a Litjupang wo mako an Tinanĕman wo a Manarow, meko a Mandolang wo meko an Dona', wo meko ang Kumu, an Darakan, wo meko an Sondakĕn, an Suripĕn, an Tulap, wo mitjo am Popareng, wo mitjo a Nimanga, wo meko an Dano-tua'na, Sosongian, wo meko am Pĕntu', meko an Danomea', wo meko an Dano i Apo'. Ja ambitu ĕn tinĕrungana. A si makasa ja si Ramopoli'i lumĕle'; malĕle'oka sia, mitjoo rumojong-ai ĕm bua'na in tjowal, wo itu itjawina-mako an somoi. Pailĕkĕnao nimarengkĕ' ka'i-mitjo an dior(ĕ)na. Talali' mĕmare-marengkĕ'-mai an dior(ĕ)na si tjowal iitu, ja itu indonao. Pailĕkĕnao pinakaret, janta'an rintĕk ulit ĕm ba'ang, ta'an da'itja peret, anaitu ĕng kuanao: „Karĕngan si makawa'ang in iana en tow." Siituoka iru'ndu'nao se atana makaruru in dojongan, mangere-meko si makawa'ang nimakaret in tjowal. Awoja maja'o tu'u sera, mekoo mailĕk ĕsa ro'ong, wo pĕtu'u-tu'usĕnerao si Rintĕk-Wa'ang, ja ra'itja kaereanera. Siituoka ja sera marengo. Marengo sera wo sisilĕnerao a si apo'era ja in sera nimailĕko ro'ong, janta'an si Rintĕk-Wa'ang ra'itja kausuianera. Awoja siituoka ja ng kuano i Ramopoli'i: „Sapaka kamu ja maali tjo'ko' ipĕsaka, ĕnta'an sia ja kulatan sumama-sama'. Ja sa weta' kamu mĕsa-

kao se ko'ko', ja se walina makasere an dangka'." Mekom tu'u sera, aiti'itera a siitu. Marintja'o se tow ē mailēk se ko'ko' mēsaka, ja pailēkēno-mange si ēsa mangala'un paku-rungēn kaapa ipasē'sēk-ange nimakatēngo-mai. Pailēkēnerao, ja rintēk wa'ang.

Siituoka sera marengo-monge an tērung i apo'era. Awoja sisi-lēnerao sapa m pinailēkera. Siituoka ja ng kuano i Ramopoli'i: „Ja ipakawalio aku, wo paalino ēn doko' meko iirang.” Awoja itjatēka'o-meko sera, ja rumu'ndu'o-mange tow si Ramopoli'i mui a si makawale sa ro'na sumosor. Sumowato si makawale: „Ja sama'!” Mangem tu'u si Ramopoli'i nimēla'u-la'us an seip. Siituoka papalukutēno i makawale. Wueiano i Tiwow si Ramopoli'i: „Ja tow ambisa wo mai?” Sumowato si Ramopoli'i: „A mitjo ng Kema wo mai.” „Ja sapa m bawa'amu?” Sumowato si Ramopoli'i, ēng kuana: „Ja sapaka aku ra'ipe' wana masiwo in tjanēn, ja siituo m pinētutu'ku-mai, mai mui si anak i makawale.” Sumowato si Tiwow: „Ja wueiēn a si inanga.” Wueiēno a si Teteon, ja ng kuana: „Ja wueiēn a si toja'ang.” Awoja wueiēno a si toja'ang, ja masale'. Siituoka ja pangilēkēno i makawale, ēng kuana: „Ja muntēp-ai an untēp.”

An untēpoka sera, ja mēnuwu-nuwu'o in iirang. Kuao i Tiwow: „Sawo maui-ulit(ē)ka, ja waja'im pangilēkēngku ēn iirang ja ki'itan-ai.” Waja itu ja kini'itan i Ramopoli'i. Mamualioka m baja se itu, ja ng kuano i Ramopoli'i: „Ja sapaka kami ra'itja mēnto' ambia.” Ja ng kuano i Tiwow: „Ambisakē're'e?” Sumowato si Ramopoli'i: „Waja-wajaano in tjaēnto'an an akar-ako ia'i.” Awoja maja'o sera. Tuma'aro si Tiwow a si Ramopoli'i, ēng kuana: „Ja sa kamu maja'o maler-io' aroro', en sa kamu wo tangka'an in uwe, ja wean-ange aroro' itu, en sera ja po'ow(ē)na.” Maja'o tu'u sera, ja tani'tu nimamuali. Mēmaja-maja'o sera, itjatēka'o-mako a lua'an i Lombagi. Ēpe'anao itu, ja ng kuana: „Sia'io ēn salunta, en iasa ja palēmboian im paser.” Anaitu isiao ē nimakaere im paindoan im paser tumbal in tarepe'. Ja si Ramopoli'i nimateoka a mako ē Mongondow.

**83. Sisisilén au doro' i Tjasuruan Kalangi' wo si Tjasuruan
Manimporok, sinisil i Tjawatu Luménta', Kuntung.**

Kumi'it in sisil e makasisil, ja si tjasuruan Kalangi' wo si tjasuruan Manimporok sera ja tow an unér in tana', an Tombasian an Dangka'. Sera in dua ja mékarapi mémélili-angké'-mio'.

Ang kasomoian-ai si Tjalangi' méros an duruan, mio' nitu-mani' in do'ong akar-io' in tjuntung in Tareran, wo mako nimakar-ai an do'ong im Poijar wo ambituoka sia mako mareng-ai mai ménto' am Batu No'ai an tagas paawu'un in do'ong im Pondang wo Lopa'na. Tani'tu sia nitumo'oro wale wangko' ambitu, am pa'pa'an sia ménto'o lé'ték ambitu. Ja ang kéénto'nao ambitu, én témbir in ta'sitj ra'ipe' ambitu-wo, énta'an a makonape' im punten in Tatapa'am-bo. Janta'an kumi'it sia i makawawi se kuria', wo am pa'pa'an sia in taloso wéndu é mako mawau'mb-ai a se wawina, ja kua'a sia n tumi'ti'o se wawina, wo tani'tu ng kerior mako muntép-ai n ta'sitj, mai nimakar an témbir im balena. Nitumo'tolo-mai ambitu sia maéna'o-mai é mawau'mb.

Ang kasomoian-ai iitu, ja si Tjalangi' luméloo wo masale'o mailék si tjarapina Manimporok; tani'tu sia mitjom a si tjara-pina, méngénto-ngénto' a si tjuntung makangaran i Manimporok in tarepe'. Janta'an in sia n itjatéka'-mitjo, ja si Manimporok ra'itja am balena, e nimanalun; si Tjalongkopangké', pénana'-ana, n ambitu. Si Tjalongkopen anio' ja wewene lo'or nima-ngakar. Pailékéno i Tjalangi' in si Tjalongkopangké' n am bale, ja maio ng kaeweana lewo' an atena. Siituoka sia tumena a si wewene isia, éng kuana: „E Kolongkopen! kumi'ito iaku, aku ja tow sija'. Mailék kua'a-mio' ko e, éng kasija'angku: makata'sitj, makatalum bangko' wo makawale wangko' wo lo'or. Taan si ménana' an iitjo, si taluno tu'u, anaitu kumi'ito iaku.” Awoja kélingaké' i Tjalongkopen si nuwu' itu, sia ma-pala'us nitjumi'it-ako si Tjalangi'.

Ra'itja nimaure-ure sera é nimaja', ja marengo-mai si Ma-

nimporok, wo sia weta' mai mausu-usui si pětowěna ang karapi in ame' wo wěndu, ra'io ipakakua. Am pa'pa'am beta' sia i mēere-ere si pětowěna ra'io kinaerean, ja kua'a sia ē mangeo tumongkei in tjaju sangkiow, wo maina ētakan ema'an toitow, aitji'it(ě)na a gio i Tjalongkopan. Pakatawoiěna-mako n iitu, mangena ito'or a lalan an sela in do'ong, wo sia mēnēp an tēmbir i lalan. Ra'itja nimaure-ure n sia i nimēnēp, waweano tow lumangkoi ambitu, wo ng kuaerao: „E tu'u si toitow anu mange, toka tu'u wo'o si Tjalongkopan, ta'am baweang-kě' ē nisumea'.” Lumangkoi-mako se tow isera, kumēsoto-mai si Manimporok wo maina ētakēn si nisumea', wo sia ka'i mange mēnēp. Ra'itja ka'i nimaure-ure, waweano ka'i tow lumangkoi, wo ng kuaerao: „E, sa ra'itja tu'u nilewo' i anu mange, en toka tu'u wo'on i gio i Tjalongkopan.” Lumangkoi-mako sera, kumēsoto ka'i-mai sia, wo maina ētakan si nisumea', wo ka'i sia mange mēnēp. Ra'itja ka'i ure waweano ka'i tow lumangkoi, wo ng kuanerao: „E tjitjainde-inde' tu'u! si anu mange toka tu'u i gio i Tjalongkopan! Ra'itja tu'u wana ē nisumea' an isia.” Ituoka tu'u indono i Manimporok si toitow iitu, wo paalina-mange am balena, mangena ito'or an towan im balena.

Ang kasomoian-ai iitu ja sia sumiwo kaněna, wo ng kuana: „A, sumiwoo tare, si seipe' kua'a ndo'o si sumiwo.” Maka-siwo-mako, ja ng kuanao ka'i: „Kumano tare, eng ka'i aku ē maja'o, ja mareng ka'i-mai, ja mai ka'i re'e sumiwo.” Makakan tu'u-mako sia, ja sia maja'o ka'i manalun. Mawěngio tu'u-mio', marengo-mange am balena sia. Itjatěka'-mange am balena sia, ja mailěko in tjakanēn tinu'tulo am bawo i la'lir. Ėng kuanao: „E inde' e! si sei tu'u si nisumiwo in iasa? Kumano tare aku, wona' aitjaupus i sei mai nisumiwo.” Maka-ěndo ka'i tu'u-mai, maja'o ka'i manalun sia. Mareng-ai sia aisiwoo ka'i; ja siituoka kaateano sia, wo ng kuano in atena: „Wona' re'e si toitowo niema'ku, si masiwo wo matu'tul in tjaněngku; tia'pe'-wo, woondo i mamoono ja ilukut(ě)kuoka.”

Maio tu'u in tawi mando, ja ng kuana: „E mangeo tare

kume'et, em parioran-ai in sumiwo." Tani'tu mandeio i malën sia, wo me'tang in daran, wo sia mënëp an tēmbir im bale. Ra'itja tu'u ure pailëkēnao si toítow tumo'oro-mai, sumiwo. Siituoka sumosoro-mange si Manimporok, wo kaja'ka'ana, ěng kuana: „E tjitjainde' tu'u-mai ko e, iitjo re'e si masiwo wo matu'tul im pakaněngku! Ra'itja numuwu'-mai, wo mai wo mēwali tjuman ang karapitju." Ja ng kuano i Sangkiow: „Nao, apakě' kua'a ko wo ipasiwo wo ipatu'tul(ě)kuo kanën, ra'itja am pa'pa' in iakuo ě mamuali pětowěnu?" Tani'tu sera nimamualio tow ambalesa. Tani'tukě'.

84. Kukua an doro' i Manimporok, sinisil i Wolo Regar, Kapoja.

Sapaka si Manimporok, ja mēkalo wo si Tjalangi', sera anio' mēmpumpuli'an. Makasa si Tjalangi' ja nimuli'-mange a si Manimporok, nimange im bēngi. Mandooka-mai, ěng kuano i Manimporok a si pětowěna, makangaran in Tjalinowan: „Isiwo-mange kanën, wo iangeku-mai upe'." Siituoka mangem sia.

Marengoka-mai sia, ja aitintjaso i Tjalangi' si Tjalinowan. Siituoka mueio si Manimporok a si ana'na wewene ěng kuanao: „So' si Inangiow?" Sumowato si toja'ang iitu, ěng kuanao: „Ja niměngaja-ngajam(ě)kě' re'e aku, wo si Ina' itintjas i Tjalangi'." Tani'tu maio ka'i si anakera ěsa wewene si nimaja' kan-im-bawi, ěng kuanao: „E, nimaja'kě' re'e kan-im-bawi aku, mareng-ai tinajangano re'e i Ina', e palilin!" Tani'tu ka'i si anakera tuama mareng-ai, ěng kuanao: „Ja nimakokě' re'e nitjume'et aku, wo marengoka-mai ja tinajangano ndo'o re'e i Inangku."

Ra'itja maja' pira ngando, numuwu'o a se ana'na si Manimporok, ěng kuanao: „Ja mangepe' tare am pēngělēpan aku, talos wěndu ě mēngěna-ngěna' am bale." Mangem sia. Mēmaja-maja'oka sia, ja mailëk si tjaju sangkiow. Ěng kuanao: „Eña'-angkupe' tare si tjaju anio' itji'it a gio i Tjalinowan, wo aku tanuka mailëk-ange isia." Wo ema'ana tu'u. Pakaema'ana-mako n iitu, ja itu mangena iwékar an tēmbir i lalan, wo sia mënëp.

Ra'itja ure waweano tow lumangkoi, ěng kuanao: „Kaariman! sa wo'o niĕtakane' si amo sangawiwi, tanuoka tu'u wo'on si Tjalinowan, si aitintjas i Tjalangi'." Pĕma'a-ma'anĕn i Manimporok. Lumangkoio-mange si mawaja', indonao-mai ěn iitu, wo itu ĕtakana si amo sangawiwi, tanu in aitjua i mawaja', wo itu mangena ka'i iwĕkar ambitu, wo sia mareng ka'i mĕnĕp. Ra'itja ka'i ure waweano ě lumangkoi. Ěng kuaerao: „Si tjaindeinde' tu'u! si sei tjua'a si nimema' si tjaju anio'? Tanuka tu'u si Tjalinowan, ra'io nimĕnsea'an." Lumangkoio-mange sera, ja itu indono i Manimporok, wo paalina-mange am pĕngĕlĕpana. Itjatĕka'-mange, ja itu isalana an solimai, wo sia mareng-ange am bale. Ja ang katĕluan ngando sia mange am pĕngĕlĕpan. Mangeoka sia, ja pailĕkĕnao aisiwoo kanĕn, wo sia mangaja'ka', ěng kuana: „Si sei tjua'a re'e ě nisumiwo in iasa?" Wo sia kuman. Makakan-ako sia, marengo-mange am bale.

Mando ka'i-mai, sia mange am pĕngĕlĕpan. Pailĕkĕnao ka'i, aisiwoo, wo sia kuman. Makakan-ako sia, ěng kuanao: „E, marengo-mange am bale aku." Tani'tu n ipapali-palina. Ra'itja, en ilukut(ĕ)nao, ěngatĕna sa tu'u si sei si masiwo. Wo sia mĕnĕp. Ra'itja tu'u ure sia ě nimĕnĕp, pailĕkĕnao tu'u marojoro si an solimai. Ěng kuanao an isia: „O Ina'! si tjaju re'e niema'ku si mĕngasiwo in tjanĕngku." Siituoka teronĕnao-mange in tumimboi. Ěng kuanao: „O Ina' e! iitjoo tu'u re'e si mĕngasiwo in tjanĕngku." Sumowato sia, ěng kuanao: „Sapa kua'a re'e in toromu i nimema' iaku, sa ko wo ra'itja ipasiwoku?" Ěng kuano i Manimporok: „Ja uanu mangem am bale tare kita." Sumowato si Sangkiow, ěng kuana: „Ra'itja toro aku wo iwalimukĕ'-mange tanu iasa, karĕngana aku tuwaranu in doko', oreoka aku ipapalawi-lawi'mu."

Siituoka si Manimporok mange-mai roko' wo kulintang wo momongan, mai iwe'e si Sangkiow, wo sia ipakawali-mange am balena ang karapi im patuwungan wo pakulintangan. Siituo wo sia ipareindeng in tana'i: „Si Sangkiow kajukĕ'-wo, wo wangunĕn i Manimporok nimamuali tow." Akar(ĕ)kĕ' iitu.

**85. Sisisilën an doro' i Manimporok wo si Tjalangi', sinisil i
J. Rumokoi, Sulu'un.**

Sapaka si Manimporok wo si Tjalangi', ja mēkalo, se talos mēngēlēloan. Ta'an sera in dua ra'itja mēkaro'ong. Si Manimporok an unēr in tana', si Tjalangi' an duruan. Sa si esaan-ange an isera wo lumēlo si ēsa, ja sia lumēpu kaapa muli'-mange an do'ong i tjarapina. Sa si Manimporok ē lumēlo, ja sia mio' ang karapi i maali-ali-mio' wio'o la'usēn a si tjalonona Kalangi'. Sa si Tjalangi' ē lumēlo, ja sia mai maali-mai pongkor la'usēn.

Kaindo-indono-mai si Tjalangi' mai a si Manimporok. Ta'an maio sia, ja ra'itja am bale si Manimporok e nimangasu. Am pa'pa' in da'itja am bale si tjalonona, ja itintjas(ē)na-mio' si Tjaliwunan, pēnana'an i Manimporok. Marengo-mai am bale si Manimporok, mueio a si ana'na sia, ēng kuana: „O Kawatu, ow! ambisa si Inangu?” Sumowato si Tjawatu: „Je, ra'io ambia si Inangku, aiwalio i tjalomu.” Siituoka maame'o si Manimporok, ēng kuana: „Lumi'tjir in tana' wisa-wo aku, e memengku, wo aku mailēk tanu i gio i memengku!” Janta'an makata'neioka sia, ja sia mindo kaju sangkiow wo ema'ana toitow itji'it i gio i Tjaliwunan. Pakaema'ana-mako n iitu, ja itu iwēkar(ē)na an tēmbir i lalan, am pakasere-seren e tow malangkoi.

Lumangkoio tu'u se tow, ēng kuaerao: „O inde', toka tu'u si Tjaliwunan si anio'. Ta'an sawo si anu mange niindoane' tojo', ja ra'io wo'o nimēnsea'am bo si Tjaliwunan.” Am pa'pa' se tow in da'io ambitu, mangeo ētakan i Manimporok si aipaturu' e nimalangkoi, iaka-akar i nimakaki'i-tji'ito tu'u a gio i Tjaliwunan.

Indo-indonoka-mai ja lumēpuo-mio' a si tjalonona si Manimporok. Itjatēka'-mio' sia mamueio a se tow ambitu, ēng kuana: „Ambisa si 'tjaloku'.” Ēng kuaerao: „Nilumaur si tjalomu.” Ituoka itintjaso-mai i Manimporok si pēnana'an i Tjalangi'. Anaitu sera in dua ja nimēmēandetan se pēnana'anera. Siitukē'.

**86. Kukua an doro' i Manimporok wo si Tjalangi', sinisil i
Tani' Pangalila', Tintjép.**

Kaindo-indono-mai si Manimporok ja tona'as, mēngēna-ngēna' a si tjuntung an da'ter in tjuntung Sēmpo'. Si Tjalangi' tona'as(ē)ka ka'i, ja m pēngēna-ngēna'ana a mako m pēta i laur, wo m balena tinontajongkē' am bawo in ta'sitj.

A si makasa si Manimporok nimanalun wo makaere-mai sēra' tu'a wo m bio'o wo ng kalowatan. Marengo-mai am balena sia, ambituo si Tjalangi'. Ja wueiēno i Manimporok: „Tow ambisa ko wo mai?” Sumowato si Tjalangi': „Tow a mako aku wo mai.” Ēng kuano i Manimporok: „Sapa m pētutu'unu mai?” Sowatēno i Tjalangi', ēng kuana: „Mēpuli'tjē'-mai a si makawale.” Mueio ka'i si Manimporok: „Ja sapa ē ngaranu?” Sumowato si Tjalangi': „Kalangi' ē ngarangku.” Ituoka ng kuano i Tjalangi': „Ja sapa ē ngaran i makawale?” Sumowato si Manimporok: „Manimporok ē ngarangku.” An tutuw iitu mēsiwoo in tjanēn isakei si sakei si pēnana'an i Manimporok makangaran in Tjalongkopan. Numuwu' ka'i si Tjalangi': „Ja ambisa si makawale ēsa?” Ēng kuano i Manimporok: „Matu'tul in titjo'o.” Ituoka sera towano in tjuman, wo si Tjalangi' sakeiēn i Manimporok in sēra' in talun, tanuo-mai: tu'a, wio'o wo ng kalowatan. Masēra'oka, ja ng kuano i Tjalangi': „O inde'! ēn sēsēra'an ambia, kalanut re'en, mēlewo'kē' im ba'ang. Sa ko masale', mēkaloo kita, wo ko paaliangkuoka-mai a se sēra' pēngasēra'angku. Wo sa ko masale'ka, tēlu ngawēngi tjita mai mēta'up ka'i ambia.” Sumowato si Manimporok: „Sama'.” Kaēpatan tu'u ngawēngi mai si Tjalangi' maali-alio-mai in sēra' pongkor a si Manimporok, wo ng kuanaō: „Ambia'io tu'u aku, e kalo! mēpe'o tu'u-mange a se sēra' pēngasēra'angku, ra'itja lanut tanu in sēra' pēngasēra'an ambia.” Sumowato si Manimporok, ēng kuana: „Kanaramēnami tu'u i masēra' in sēra' ang katana'an, ra'itja tanu i masēra' im pongkor.” Numuwu'o ka'i si Tjalangi', ēng kuanaō: „Sapaka kita, e kalo, pitu ka'i ngawēngi tjita

mai mēta'up ambia." Sumowato ka'i si Manimporok: „Sama'."

Siituoka marengo-mako am balena si Tjalangi'. Mangem ka'itje' an talun si Manimporok. Ja tēlukē' ngando si Tjalangi' i nimareng-ako am balena, ja sia marengo-mitjo ka'i am bale i Manimporok, am pa'pa' sia maio re'e tumowo-mange si pēnana'an i Manimporok, eng kailē-ilekana in si Manimporok ja nitumaluno ka'i. Itjatēka' tu'u-mai am bale i Manimporok si Tjalangi', sia numuwu'o in tana'i a si Tjalongkohan: „Ja mēpe'o kua'a tu'u-mange an sēra' pēngasēra'angku, ra'itja makalewo'on im ba'ang; ta'an ēm pēngasēra'an ambia ja lanut. Wo n a mako m baleku, makalukut(ē)kē' am bale wo mapēsio' se pongkor; ja makēse-kēseipe' se pongkor ipalēwuo am pari'ndi'an. Anaitu tuma'nei-mange ko, sa masale' iwalitjuo-mako am baleku." Sumowato si Tjalongkohan: „Ja masale'kē' aku ē mako e nimalingao i nuwu'mu, i mapalē-palē'pēse' se pongkor ipalēwuo am pari'ndi'an." Siituoka ja sera tumi'iro-mako, ta'an se rua anak i Manimporok wo si Tjalongkohan, si ēsa tuama wo si ēsa wewene aitēla'uerakē', en sera n toja'ange'.

Ja si Manimporok mapulēs pitu ngawēngi wo mareng-ai am bale, ta'an da'itja nilumēkēp im pitu ngawēngi sia wo mareng-ai am bale, eng kinawara'angkē'. Itjatēka' tu'u-mai am bale sia, ra'io ambitu si Tjalongkohan, e nimakom ang karapi i Tjalangi'. Siituoka mindoo-mai im bēngkow wo m pisow si Manimporok, en sia ē mangi'ito si Tjalangi'. Itjatēka'-mako a lawanan sia, ja a mangleo ē laur si Tjalongkohan wo si Tjalangi'. Ituoka kumengkengo-mako si Manimporok, mangi'it isera. A mangeoka n unēr in ta'sitj sia, warengēno-mange i Tjalangi' in somoi, ja pailēkēnao-mitjo si Manimporok, mangi'i-ngi'ito-mai isera. Siituoka ipangilēko i Tjalangi' in dēgēs karapi in sēmpa'. Ra'itja nimaure-ure rumēgēsō tu'u karapi in sēmpa' rēpēt. Ja seren-itjo i Tjalangi' si Manimporok aitjatana'o, ipapintji-pintjiroka in sēmpa'. Itjasampel-itjo a lawanan sia, ja ng kuanao: „En aku n da'itja re'e makawo'o si Tjalangi' kaloku, ja marengo-mitjo aku."

Marengo-mitjo am bale si Manimporok, mēngame-ngame',

am pa'pa'an aitintjaso i Tjalangi' si Tjalongkopian. Wo sia mindo-mai in tēpe pēngatēkēlan i Tjalongkopian, wo m bujang, wo ng karai, en da'itja pinaali i Tjalongkopian, wo itu ku'-usēna, saluana i lēlo si pēnana'ana. Wo si Manimporok mawaja-waja'oka-mio' wo mēngame-ngame'. Wo sia mange an talun, mange mawaja-waja' ambitu a si tēlu ngando. Kaēpatan ngando sia n an talun, sia malinga si tjaju rondor mērare-rare'et. Tēlu ngando si tjaju iitu m palangko-langkoiēna, mērare-rare'et. Ja pailēkēnao-mange m baja in tjaju ra'itja wana ē mero'-mai, ēng kuana: „Aitjatambi-tambisa si tjaju anio' mērare-rare'et, en siitukē' in ēsa?” Wo n iitu tongkeiēna wo ituana: „Sa aku wo nienangka, ja tongkeiēngku si tjaju anio', en si tjaju re'e anio' makangaran in sangkiow. Sa itu tongkeiēngku wo rumē'mba-mitjo, ja nienangka aku.” Tongkeiēnao tu'u itu, nirumē'mba-mitjo. Po'owēnao itu an dua ngapokol, wo se rua ngapokol itu ētakana, ema'ana toitolow, aitji'it(ē)na an amo i Tjalongkopian. Pakaema'ana-mako itu, ja itu paalinao-mange am bale, wo itu mangena saputēn in tjapas lēme', wo iwangena an du'u im buni. Ambituoka sia, ja mangem ka'i an talun. Tēlu ngando sia n an talun, wo sia mareng-ai am bale. Itjatēka'-mai am bale sia, waweano kanēn siniwo. Siituoka wueiana se toja'ang, ēng kuanao: „Nisumiwo re'e kamu, e toja'ang?” Sumowato se toja'ang: „Ra'itja nisumiwo kami, itjamio wo sumiwo ra'ipe' makailēk.” Numuwu'o ka'i si Manimporok, ēng kuanao: „Itjatambi-tambisa ng kanēn anio' aitulir am bantang, ja paso'pe'? Ja maio tare re'e kuman kita, e toja'ang.”

Mawēngio-mio' a si ēndo iitu, ja mando ka'i-mai si Manimporok mange an talun. A si ēndokē' iitu sia marengo-mai. Itjatēka'-mai am bale sia, pailēkēna aituliro ka'i ēng kanēn. Siituoka sia mueio ka'i a se toja'ang, ēng kuanao: „Nisumiwo re'e kamu, e toja'ang? ēng kanēn anio' aiompēro am bantang.” Sumowato se toja'ang: „Ja ra'itja nisumiwo kami.” Numuwu'o ka'i si amangera: „Ja maio tare re'e kuman kita, e toja'ang.” Mawēngio ka'i-mio' a si ēndo iitu, ja mando-mai kumua si

Manimporok, mange ka'i an talun. Ra'itja re'e, e nimēnep, ruma'nda se tow masiwo in tjanēn. Ja mēnepo tu'u sia, ra'itja nimaure-ure mangeo, kumēsot-ai se rua wewene am buni. Ituoka ng kuanao: „Ja iserao tu'u re'e masiwo im pakanēn-ami i mēamang.” Makasiwo-mako sera, ja mangeo ka'i muntēp a si sinaput in tjapes lēme' sera. Ēng kuano i Manimporok: „Ja maio, e toja'ang, en aiompēro ka'i ēng kanēn.” Makakan-ako sera im bawa'ando, ja si Manimporok kumuao ka'i in tana'i: „Woondo aku mange ka'i an talun.”

Ja mando tu'u-mai, mēnepo sia, ra'itja ulit mange an talun. Ra'itja ka'i ure, pailēkēnao-mange se wewene rua nitjumēsoto ka'i-mai n a si sinaput in tjapes lēme'. Mēsiwooka sera, timboiano-mange i Manimporok, ēng kuanao: „Ja itjamuo re'e se masiwo in tjanēnami i mēamang mēndondo!” Sumowatoka sera, ēng kuaerao: „Kami aiwe'e-mai masiwo im pakanēn e Manimporok i mēamang, em pa'pa' si Tjalongkohan nia-ndet(ē)kē' i Tjalangi', anaitu kami indono kasarumu.” Siituoka m pinalinga i Manimporok, ēng kuanao: „Sapaka kita mapēli'i an siow ēng kantong, em pētimomoranta.” Awoja se pēnana'-am bēru i Manimporok, si matu'a makangaran im Binawai, si wo'mbas makangaran in Sangkiow. Si Winawai wo niindo matu'a, am pa'pa' isia n tu'ura, si Sangkiow isia n tēmpok i tjaju tinongkeina. Sapaka sera in dua, ja pinangakaran in tjakulo', iaka-akar ēm bēngi sera ra'itja mēngasolo, em pēngaslapengkē' in tjulo'naera in dua.

Ja mapēli'io tu'u sera a si tjaruaan ngando. Katēluan ngando towano i Manimporok si Tjalangi', mai am pēli'iera. Maio tu'u si Tjalangi', sia mēwuei a si Manimporok in tana'i: „Kua'itu kamu, e kalo, mapēli'i am bawi tjēli?” Sumowato si Manimporok: „Ja pinētimomorunami wo se Inam bēru e toja'-uro.” Numuwu' ka'i si Tjalangi', ēng kuanao: „Ja sa ko mēse'e, e kalo, muli' ka'itje'-mako am baleku waja itjamu.” Kuba si Tjalangi', e mēpande-pandeio ka'i re'e se pēnana'an i Manimporok. Itjasale'na ka'i wo'on iwalinao-mako am balena e pēnana'an i tjalona. Janta'an sumowatoka si Winawai, ēng

kuanao: „Ja ra'itja toro kami wo matintja-tintjas a si wale anio'.” Numuwu' ka'i si Sangkiow: „Ja ra'itja toro kami wo mako.” Ja si Tjalangi' ra'io rumeso, iaka-akar(ě)na-mange karěngan se wewene rua anio' ipakawalinao. Talali' si Tjalangi' ra'io rumeso, wo aitjuanao im paten si Manimporok, ja isě'sěko e pěnana'ana am buni si Manimporok.

Siituoka si Winawai numuwu' in tana'i: „Sa tu'u, e Kalangi', mēna'ne-na'nei i mate si mēnana' an itjami, tarepe' ko itjalěpok-io' n am pěluku-lukutanu.” En si Tjalangi' mėluku-lukut an do'kos in daran. Ra'itja tu'u nimaure-ure itjalěpokomio' si Tjalangi', iaka-akar(ě)na i makatěkěloka ambitu. Aiure-ureera wo sia nuwu'anera, em pině'ndisera, am pa'pa' si Tjalangi' uli-ulit tu'u re'e mēpatekě' si mēnana' an isera. Tumo'oro-mai si Tjalangi', ra'itja ka'i nimapě'ndis. Ta'an sia marengo-mako am balena. Mandoo ka'i-mai, makoo ka'i mareng-ai sia, maio ka'i tjumua se pěnana'an i Manimporok in iwalinao-mako. Aitjua-mange i Tjalangi': „Sa si tjaloku Manimporok wo ambia, tarepe' sia patengku.” Siituoka pinalinga i Sangkiow, ja itjuanao in tana'i: „En sia re'e m pėpatenu, tarepe' ko ra'io itjawareng am balemu.” Malinga-mako in iitu si Tjalangi', pětutu'unao i mangere si Manimporok. Si inde'oka e pěnana'an i Manimporok, ja numuwu'o si Sangkiow: „Tarepe' ko, e Kalangi', mawali-walintuangoka a lesar.” Siituoka tu'u itjawalintuango-mio' si Tjalangi', iaka-akar sia i mēkia-kiampung, ta'an da'itja nuwu'an e pěnana'an i Manimporok. Talali' tu'u tawio mate si Tjalangi', ja nuwu'anerao.

Mio' tumo'or-ai si Tjalangi' ja ng kuano i Winawai an isia: „Ko karěngan marengo-mako.” Ta'an mare'ekě' si Tjalangi' ě mareng, am pa'pa' ka'i re'e sia mēna'ne-na'nei ja in itjasale'na si Sangkiow wo si Winawai sa roro'na sera in dua iwalinao wo'o-mako. Am pa'pa'an si Tjalangi' in da'itja rumeso, ja ng kuano i Winawai an isia: „Ja sa ko ra'itja ki'im mareng, ko ja matekě'-mio' ambana.” Siituoka tu'u ja itjatěkělo-mio' si Tjalangi', nimateo. Ĕnto-ěnto'oka nuwu'anerao sia. Siituoka mio'o tumo'or-ai sia. Ĕng kuano i Winawai: „Ko marengo-

mako, nao ko mare-wareng-ai ambia, oreka ko matekě'-mio' ambia." Ĕng kuano i Tjalangi': „Towan-ai si tjaloku Manimporok, wo aku kumě'kěp in tjeitjeina wo mēkiampung, in da'io karuan en aku ě makom, wo maindoo-mio' tow mētuari tjita, e mēmumpuli'anoka." Janta'an si nuwu' itu ra'io nieman i Manimporok wo se pēnana'ana, en sia n da'itja tu'u re'e makaki'i-tji'it, taloso ate lewo'. Akar(ě)kě' iitu.

**87. Sisil an doro' i Manimporok wo si Mololewo', sinisil i
A. J. Najoan, Ka'kas.**

Kaindo-indono-mai sapaka in dior-wo ja awean ěsa tow mēngēna-ngēna' a si ěsa ro'ong am Pasan, makangaran i Manimporok. Sapaka sia, ja mēnganguma wo mēngangasu.

Maioka a si makasa, si Manimporok muntěp in talun, mēkiwio'o, mēkitu'a wo se akar iitu. Siituoka sia mapatu'tul walun si inanga, siow ěm bulinga' wo siow ngame'me' kaapa ngaěmpar ěn tu'tu'. Pakatu'tulēn-ako m baja se itu, ja sia kumēsoto an do'ong, wo maja' muntěp-ako in talun e kumēsot, akar in itjatēka'-mako a si talun paawo-awona-mako ang kuntung Lolombulan. Ambituoka sia tumo'tolo mangasu. Maja'o ěndo sia n ambitu, ma'an ěsa ra'itja wana ng kinaereana. Siituoka makata'neio sia mera an talum balina. Tani'tu sia maja'o.

Awoja si Manimporok mēmaja-maja' mēnguně-nguněr in talum bangko', sumosor-ako e mēros, iaka-akar sia itjatēka'-mitjo a Lengko'an. Ambituoka si Manimporok tumo'tolo ka'i mangusui sēsēra'an. Maja'o ka'i ěndo sia n ambitu, ra'itja wana ng kaereana, ma'an kawok ra'itja wana m pailėkēna-mai. Ang kasomoian iitu sia makasepa ěsa lumelěmpar. Itjaitangka'namange si lumelempar iitu, ja sia nuwu'ana-mai, ěng kuana: „E tow iitjo! sa itjasale'mu, tio'o pate-paten aku." Siituoka mangaja'-ka'o-mai si tow iitu, am pa'pa' i mualina i lumelempar iitu, wo numuwu'o si Manimporok, ěng kuana: „Kua'itu-itu ko wo ra'itja toro paten, eng ko ja lumelempar?" Sumowato si lumelempar, ěng kuana: „Tio'o aku wo pate-paten." Siituoka ja si

lumelempar iitu pakawotinën i Manimporok, pailëkënao, sapaka sia ja ra'itja lumelempar, ta'an ësa wewene, pinangakaran in tjalo'or. Wueiano i Manimporok si wewene iitu, ëng kuanao: „Si sei tjo?” Sumowato si wewene iitu: „Sapaka aku anio', ja makangaran in Tjalinowan.” Mueio ka'itje' si Tjalinowan, ëng kuana: „Ja ko, sapa ë ngaranu?” Tu'ulëno-mange i Manimporok ë ngarana. An iitukë' ja si Tjalinowan niindo i Manimporok pënana'ana.

Awoja sera in ambalesa rumesoo n ambitu, wo sera maja' wo itjasumpak-ange si lour kaapa linow a mitjona a mekona e La'indong, ja sera nilumële' ambitu. Ituoka maja'o ka'i sera, mareng nisumalu-mange si lalam binaja'an-ai i Manimporok, iaka-akar sera itjatëka'-mange an uma am pake'etan i amang i Manimporok. Awoja këkëlian se karo'ong i Manimporok make'et ambitu. Ja sera nisumale'oka-mai, am pa'pa' i nimailëko-mange si Manimporok nimateo-mai, wo'ope'ka-mai en sia ë makapënana'ano tanuo-mai si Tjalinowan. Ituoka pangilëkënera a se Manimporok in ambalesa i mareng-ange an do'ong karapiera. Ta'an si pangilëkanera itu ra'itja kini'itan i Manimporok, anaitu sera in ambalesa nimënto'kë' an uma iitu.

Tani'tu marengo-mange an do'ong se make'et isera, wo sisilënera-mange a si Inang wo Amang i Manimporok, in sapaka si Manimporok ja a mangeo n uma am pake'etan, wo sia ja makapënana'an si wewene sija', ra'itja wana ng kakelena a si ro'ong iasa. Janta'an si Inang wo Amang i Manimporok nimangaja'ka'kë' si sisil iitu, am pa'pa'an itji'it im basaera, sia ja aitjatalao kaapa nimateo an unër in talun, pa'pa'an tani'tuo ng kaure ra'io kinalingaanera-mako sapa-sapa n an doro' i Manimporok. Anaitu katatare-tare ra'itja niemanera. Maioka ang kasomoian, kailëkanera-mako in sapaka si sisil iitu ja ulit, tani'tu si Inang wo Amanga wo këkëlian se nitjumi'it-ange isera, mange mëta'up wo si Manimporok.

Awoja sera meta'upo-mange ang karapi i masale-sale' ra'io ipakakua, wo sera maame' am pa'pa' i lëlo. Siituoka sera mënuwu-nuwu'o in sapaka sera ja mareng an do'ong. Tani'tu

tu'u maio a si ěndo sama', sera an do'ong, wo itjatĕka'-mange ang karapi in da'itja wana nimasepĕ-sepĕ'd. Ja mĕnto'o ambitu se Manimporok in ambalesa ang karapi in arui.

Kaindo-indono-mai, a si makasa ja se tow a si ro'ong iitu nimema' kasale-sale'an, tanu in tjanaramĕn pĕngaema'anera kasusur in ta'un. Awoja a si ěndo itu kĕkĕlian ĕm bĕwĕra'an pawĕra'anera. An unĕr e mawĕra' wawean se maengket, anaitu riwu-riwu se tow nilumili. A si ěndo itu ja wawean ěsa tona'as a londei wĕru-wĕrupe' nitumumpa-mai n a londeina, nisumuwa'-mai an tawi i ro'ong iitu. Ja ĕ ngarana Mololewo'. Si tona'as iitu masale'-mai lumili, wo sia mai makateir mĕnere-nere tambisa n ipakawĕra' e tow a si ro'ong iitu, tanuo-mai se maengket. Kaaruiĕn muli-ulit. Tani'tu si tona'as iitu mawuta-wuta in aaruiĕn ĕ makasere se mawĕra'. Ra'itja nimaure-ure sia itjasere-mange si ěsa wewene lo'or pinangakaran, anaitu sia itjasale'nao. Siituoka pamue-mueiĕnao a se tow ambitu sa si sei si wewene iitu. Itjuao-mange e tow ja in sapaka si wewene isia makangaran in Tjalinowan pĕnana'an i Manimporok.

Awoja ra'io nimaure-ure se tow mĕna'o ĕ mawĕra' wo mĕtalitjuro marengo am bale i ěsa wo si ěsa. Tani'tu ka'i si Manimporok wo si Tjalinowan marengo-mange am baleera. Si Mololewo' kumi'ito in somoiera. Ĕng kawaliana masale' mange manangkei am bale i Manimporok. Mĕta'upo-mange sera, itjuao-mange i tona'as sapa ng kasale'ana, wo'ope'ka-mai sia masale' mĕkarĕtuk wo si Manimporok. Tani'tu tu'u si Manimporok wo si pĕnana'ana ang karapi in deken sama' ĕ nima'an i nuwu'na wo kini'itanera sapa ng kasale'ana, wo sia sinakeiera. Awoja si Mololewo' anio' maere-ere lalan lewo', tambisa wo'o si Tjalinowan ĕn itintjas(ĕ)na. Ta'an ĕm basana itu ra'itja weta' kailĕkan i Manimporok; anaitu sia ang karapitjĕ' i masale-sale' am pa'pa' im bawean karĕtuk(ĕ)na.

Maja'o pira ngando si Mololewo' n ambitu, ja sia kumuao a si Manimporok in tana'i: „E po'ow(ĕ)ku, sapaka aku masale' wo'o sumĕra' wio'o.” Ĕm pangilĕkan itu kini'itan i Manimporok, wo a si ěndokĕ' itu sia, karapi e tow(ĕ)na,

maja'o muntëp in talun mëkiwio'o. Makasepa-mako sera, ja marengo-mange am bale. Itjatëka'o-mange, mapala'us ipapasi-wona si pënana'ana n sëra'. Ra'itja ure ë nisumiwo, wo tu'u sera kumano mëwali-wali ang karapi i masale-sale'. Awoja maja'o pira ngando n an akar-ai iitu, si Mololewo' kumuao ka'i a si Manimporok: „E po'ow(ë)ku, sapaka aku, ja masu'uto ë mënära-nëra' im bio'o anio', anaitu sa wo'o itjasale'mu, ipangere-mai sëra' la'usën.” A si ëndokë' ka'i iitu si Manimporok wo se pira-pira ën tow karapina maja'o ka'i muntëpo in talun mange mangasu. A si ëndo iitu sera ra'itja wana ng kinaerean, iaka-akar sera winëngioka an unër in talun wo nimënto'oka ambitu. A si wëngi iitu si Manimporok ra'itja makaate in sama', am pa'pa' mëna'ne-na'nei-ange in an sangkum im balena. Wo'ope'ka-mai palo'okën-ako im pakuanan i ësa karapina tona'as, in tana'i: „Sa roro'na woo-woondope' woondo ja kita mareng am bale, am pa'pa' itji'it im pinalingaku am bara', ja wawean ë nimamuali ra'itja sama'.” Ana-itu makainde'o wo makapa'uso n ate i Manimporok. Wëngipe' tu'u, ra'ipe' nitjumukuk se ko'ko', ja tumi'iro-mai si Manimporok wo se kara-karapina n an talun, marengo an do'ong.

Itjatëka'-mai an do'ong sera, kalingaano i Manimporok, ja sapaka si pënana'ana aitintjaso i tjarëtuk(ë)na Mololewo', am pa'pa'an a si wëngi itu pailëkën-ako i Mololewo' in si Manimporok ra'io nimareng-ai, siituoka si Tjalinowan itintjas(ë)nao. Kailëkan-ako i Manimporok in tani'tu, ja sia mawënduo, iaka-akar itji'it im basana, awëse' tare ë mateo nta'an ë mamëndam in tjawënduan tani'tu. Akaro-mai iitu, ja ambisa-wisaoka m pawaja-waja'ana, sia mëpate-pate in owa'na, ta'an ën iitu ra'itja nimalëkëp. Siituoka si Manimporok pënuwu-nuwu'an i Inang wo si Amanga mëgigioanoka ë nunuwu'un sama', aaruiën, ipatala-tala in tjawënduan, ta'an mangeo-mai ra'itja emanëna.

Kaindo-indono-mai a si makasa ja si Manimporok lumaput a si ësa a'kël. Itjatëka'o-mange am puru'na, ja sia lumëpoko-mio' in owa'na, ta'an dā'itja kinara'i-ra'ian sapa-sapa, tanuo-

mai a se pira-pira ngando. Maio a si makasa si Manimporok muntép in talun, mange manempang. Tumempango sia wo mindo mëgigioan se lumelempar. Ang kasomoian iitu rumpakano i ësa kerut. Katangka'ana-mako si Tjerut, ja sia numuwu'o-mai, ëng kuanao: „E Manimporok, tio'o pate-paten aku, am pa'pa'an aku ja a si Tjalinowam bo mai.” Sumowato si Manimporok: „Sapa n tu'us in sapaka ko ja a si Tjalinowam bo mai?” Siituoka itjësoto-mai i Tjerut ën sisim i Tjalinowan, wo ituru'nà-mange a si Manimporok, wo siituo n sumairi in sapaka sia ja ulit a si Tjalinowam bo mai, am pa'pa'an si sisim iitu ja kailë-ilëkan i Manimporok an tutuwera in dua i mëwali-walipe'-wo. An iitukë' ja si Tjerut itu iwëkaro i Manimporok, en ita'ar(ë)na tëlú ngawengi ja mareng ka'i-mai.

Awoja maja'o pira ngando si Manimporok ë maënto-ënto' si Tjerut, ra'itja mai. Siituoka sia mangeo ka'i manempang. Mënepa-nepaoka se lumelempar marumpak-ai sia, ja sia makasepa ësa kerut. Numuwu'o si Tjerut iitu, ëng kuana: „E Manimporok, tio'o pate-paten aku, em pa'pa'an aku ja airu'ndu'-mai i Tjalinowan.” Siituoka ituru'o-mange i Tjerut a si Manimporok ën tètënga'an. Awoja si tètënga'an iitu mapala'us kinatu'usan i Manimporok, wo tare emanënao, in sapaka si Tjerut iitu ja ruru'ndu'an i Tjalinowan. Ja katu'usan-ako i Manimporok si tètënga'an iitu, ja ng kuano i Tjerut an isia: „Sa ko wo masale'pe' si pënana'anu Kalinowan, ja pa'anënuo-mange n ta'ar(ë)na-mai an iitjo, tana'i: „Sapaka ko ja maler-ange ësa londei sama' wo n ipakasa in am bu'mbu'na. Wo karëngana ko maler-ange agir wo ampetan, janta'an ko tio'o ruma'i-ra'i in sumepa-mange lamperan, waja se rëpët ipakaki'tji', tanuo-mai: lamperan dintëk, patiukan, saumean, patosëndang wo se akar iitu. Wo ko kumarai-mai i la'indong, wo n amo kusun in tonon. Wo waja se tatawoi uwasei lewo'oka, tanuo-mai im pagi', sondang, ke'ar wo m pati, waja se itu ja paalinu-mai. Awoja sa pinakaalero m baja se itu, ja ko kumi'ito-mai iaku, wo ambisa n tëka'angku, ja ambituo m pëngënto-ngënto'an i Tjalinowan. Ta'an sa ko wo mëta'upo wo si Mololewo', karë-

ngana ko mapailēnge-lēngeitjē'-mange in owa'mu, mulur(ē)kē'-mange tanu se ko'kos wo longon ēn an dior(ē)na. Wo sa pēwueiēna, kumuakē'-mange in sapaka ko ja mēkiema' in tatawoi, se lewo'oka itu."

Tani'tu n ta'ar i lumelempar iitu. Pakasisilēn-ako i Tjerut ēm baja se itu, ja masale'o-mai si Manimporok wo sia mapama'o ēsa londei wo tumu'tul im baja se aitjua. Awoja tani'tu tu'u ng kerior ja pinakaema'o ē londei, wo si Manimporok nitjumuao tow mole ang kara-karapina. Pakaalerēn-ako m baja se itu, ja moleo tu'u si Manimporok, kumi'ito si Tjerut iitu. Awoja mēmole-moleoka sera, ja si Tjerut itu tumēka'o-mange an doro' i ēsa ro'ong. Siituoka tumumpao si Manimporok, wo mamueio a se tow ipēta'u-ta'up(ē)na a si ro'ong iitu, ēng kuana: „Ro'ong sapa n iasa?" Sumowato se tow: „Sapaka n iasa, ja ro'ong i Mololewo'." Tani'tu n towo i Manimporok, oreka sia katu'usan e tow a si ro'ong iitu.

Siituoka pangerenao m bale i Mololewo'. Mēmaja-maja'oka sia, ja serena tu'u-mako si Mololewo' marentek in uwasei. Awoja si Tjalinowan da'itja iparesona, ipakalukut(ē)nakē' am pa'ana, itjainde'nakē' oreka itintjas kaapa andetēn e tow walina. Ta'an si Tjalinowan ja pela-pela'oka n owak, am pa'pa' im pērēsi-rēsitjēn in ta'ina in uwasei paso', sa si Mololewo' marentek. Awoja si Manimporok mapaturu'o-mange a si Mololewo' wo si Tjalinowan. Kēserekē' tu'u-mange i Tjalinowan isia, ja mapala'us kinatu'usana in si Manimporok. Ta'an si Mololewo' ra'itja makatu'us, am pa'pa' si Manimporok tanukē' tu'u se tow ko'kos wo longon ē nimai an diorera. Siituoka mueio si Mololewo', ēng kuana: „Sapa ng kawalianu wo mai ambia?" Sumowato si Manimporok: „Sapaka m paaiēngku ambia, ja mai mangilēk sa wo'o ro'na aku mēkiema'kē' se tatawoi lewo'oka, se paali-alintju-mai anio'." Ra'itja nimaure-ure ja si Tjalinowan mangilēko a si Mololewo', in sa ro'na sia iwēkare'-mai tojo'-wo, e makope' an sēndi. Tani'tu n towo i Tjalinowan. Ta'an kuano i Mololewo': „Ambanao, an dior(ē)kukē' ko ro'na sumēndi." Sumowato si Tjalinowan: „E, ma-

lawi'tjē' aku, em pa'pa'am bawean ē makasere. Sa wo'o ra'itja wana tow aitjagaet-ai, ro'na tanu i nuwu'mu."

Tani'tu tu'u am pa'pa' in da'itja akaran i Tjalinowan i mangilē-ngilēk ang karapi i mēlēse-lēse'kē', iaka-akar i nienangka i Mololewo'. Siituoka tumumpao tu'u-mio' si Tjalinowan ēn am pa'a i Mololewo'. Awoja tani'tu ng kario a si ra'itja kinapi'pitan im bēren mangeo kē'kēpēn-ai i Manimporok si Tjalinowan, wo iterona-mitjo, aila'u-la'us aisakena a londei, wo sera moleo maawoo in do'ong(ē)na. Pailēkēn-ako i Mololewo' in tani'tu, ja sia malero ēsa londei, wo tumowa tow kara-karapina, wo sera mangi'it si Manimporok. Ra'itja tu'u nimaure-ure, ja kangi'itanao-mange sera an unēr i laur. Ambituoka sera, ja sera mētokolo; awoja katare-tare ra'itja wana ē makawolei, ta'an mēmputeangkē'-mange. Ēnto-ēnto'oka sera ē mētoko-tokol, pailēkēno i Manimporok, sapaka se katokol(ē)na itu mala'leo. Siituoka to'tolano i Manimporok i mēkar se lamperan nialer(ē)na-mai, katare-tare a se ra'ipe' talos ēn ipakaki'tji'. Tani'tu se lamperan itu mangeo kumi'tji' se katokol(ē)na isera, wo sera tumo'tolo sumoro'. Ang kasomoian-ai iitu, ja iwēkar(ē)nao-mange m baja se lamperan paali-alina, wo se katokol(ē)na pēngi'tji-ngi'tji'inera, iaka-akar ēm bērēnera nima-wola wo ng karapi in owak nisumēgao. Awoja siituoka ja si Mololewo' tumo'tol matalo m pēreke-rekenēn; itjasiwa-siwak sia mēkia-kiampungoka, ta'an da'io nieman i Manimporok. Ang kakaapuan in iitu, ja si Mololewo' wo se kara-karapina nimateoka an unēr in ta'sitj. Tani'tu ng kinakaapuan i Mololewo'.

Awoja akaro-mai itu, ja si Manimporok maēna'o-mai n ate, am pa'pa' i nimateo si tjaseke'na. Ta'an mande in tani'tuoka, ja waweane' ē mawe'e kasumakitan an atena, em pa'pa'an si Tjalinowan mawuta-wutaoka im pela' n owak, iaka-akar itjari-tjaoka e tow i makasere. Siituoka ja si Tjalinowan lumēle'. Makalēle'-mako sia, ja tumarepe'-mai nimaema'o m baja im pela' wo ē giona aitjawaluioka tanu in dior. Ang kasomoian-ai iitu ja sera moleo, maawoo-mange in do'ongera, iaka-akar in da'itja wana nimasepē-sepē'd isera, wo itjatēka'-mange an do'ong

karapi in sama'. Awoja ang kakaapuan in iitu, ja si Manimporok wo si Tjalinowan in ambalesa mēngēto-ngēto' a si ro'ōng iitu, wo mēnoi-now ang karapi in ēna' wo ēlur. Tani'tukē'.

88. Sisil an doro' i Manimporok wo si Mondolewo'.

Sapaka si Manimporok anio', ja pojo' i Lumimu'ut wo si To'ar. Am pa'pa'an makaanako-mai si To'ar wo si Lumimu'ut ja si Mamantow-Roring, makaanako-mai si Mamantow-Roring ja si Manimporok. Ēn tinowan i Manimporok ja an Awuan, wo mēngēna-ngēna' ambitu akar(ē)na i mawangko'o.

Maio tu'u sia im bangko'o, ja sia kumēsoto an do'ong tinowana, wo maja' mangere ēna'an ang kasama'an do'na ēnto'ana. Awoja sia itjatēka'-mange a si tjuntung an tawi i La'indong. A si tjuntungoka iitu, sia tumumpao-mio' a lukulukutano in do'ong i La'indong in tarepe'. Ambitu si Manimporok nimēnto' ure tojo', wo mēndondo-mēndondo sia mēnempa-nempang. Ja mēgigioan se lumelempar am puru'na i tjuntung an tawi im paēnto-ēnto'ana. Ēn ipatu'ul si tjuntung iitu ja Tetempangan. Awoja nimamuali a si makasa in si Manimporok i matempang, ja sia makasepa ēsa kerut. Si lumelempar iitu ra'itja lina'u-la'us(ē)na i nimate, ta'an an unēr-(ē)na i mawarengo-mange am bale, ja sia manani in tana'i: „O Kerut, karu'ku'ungkuo n do'kos(ē)mu!” Sumowato si Tjerut iitu: „O Manimporok, tio'o pate-paten aku.” Siituoka mangaja'-ka'o-mai si Manimporok ē malinga si Tjerut iitu i manuwu'; anae m pangilēkana pina'an wo kini'itana, iaka-akar in tamunao si lumelempar iitu. Awoja siituo ng kinato'tolan-ai wo akar in tarepe' kēlian se matamu se kerut.

Ja si Manimporok ure-ure ē nimawaja-waja', mēere-ere ēnto'an wo manempa-nempang am puru'na e kuntung an tawi wo se an tajang, akar(ē)na i marengo ka'i-mai an do'ong tinowana, an Awuan. An Awuanoka ka'i sia, sia tumumpa-mio' am Parei, wo sia mema' ēsa londei wangkēr ambitu. Siow ngando sia ē nimema' si londei iitu. An tutuw(ē)na i nimaema'

si londei iitu, ja sia mēta'up am Parei ēsa tuama makangaran i Mondolewo', makailēk ulit marentek in uwasei. Awoja si Manimporok wo si Mondolewo', sera maindoo mēkarētuk susut, akar in si Manimporok i mangilēk a si Mondolewo' in tana'i: „E po'ow(ē)ku, sa aku itjaupus(ē)mu, ja iema'-mai agir wo waja se tatawoi uwasei aku, se ro'na indon tatawoi a londei paema'angku in tarepe'.” Ēm pangilēkan i tjarētuk(ē)na iitu kini'itan i Mondolewo'. Pakaema'an-ako i Mondolewo' m baja saliatam lo se tatawoi tambisa ng kasale'an i Manimporok, ja itu ipumpuno wo tu'tulēno i Manimporok am bu'mbu' i londeina, wo itjasaerao-mio' i mole, sa maio n dēgēs sama'.

An sangkum i maēnto-ēnto' in dēgēs sama', ja si Mondolewo' muntēp in talun mangasu, en si pēnana'ana makangaran im Pingkam-Panulu'an aitēla'una a lawanan ang karapi i tjarētuk(ē)na. Maja'o pira ngando sera ē maēnto-ēnto' si Mondolewo', janta'an da'itja mareng-ai. Awoja sia pangēnto-ngēnto'-onera akar im pitu ngando. Am pa'pa'an i nilumangkoio si ēndo ang kumapitu sia ra'itja mareng-ai, ja wasano i Manimporok wo si Pingkam-Panulu'an in si Mondolewo' wona' aitjawangkuro am pangasuan, wo nimateo an unēr in talun. Siituoka ja si Manimporok moleo wo si Pingkam-Panulu'an kumi'ito isia.

Lumangkoi rua ngawēngi sera ē nimole, ja si Mondolewo' marengo-mai a lawanan, maio mangere si pēnana'ana wo si tjarētuk(ē)na, janta'an da'io kaereana. Awoja si Mondolewo' mērioro-mio' mema' ēsa londei karapi in tatawoi wo waja in saliatan. Pakaalerēna-mako m baja se itu, ja sia moleo. A si tjtatēluan ngawēngi, ja kangi'itanao-mange ē londei i Manimporok. Ambituoka ja sera mētokolo, ra'itja nimapo'o-po'ow ēn ēndo wo m bēngi, akar im pitu ngando ng kaure. Ang kasomoian iitu pēndamēno i Manimporok in da'io ro'na makēnto'-wo, ja siituoka sia rumu'ndu'o si Tjerut mange a si po'ow(ē)na makangaran in Awuan, mange mangilēk in sa roro'na wo'o sia mai tumawang a si po'ow(ē)na Manimporok. Ra'itja ni-maure-ure maio tu'u si Awuan, tumawang a si po'ow(ē)na,

wo la'ungëna ë londei i Mondolewo'. Marëngis-ako ë londei i tjarender i Manimporok, ja maëna'o-mai sia. Ta'an si tjaëna'ana itu ra'itja nimënto' ure, em pa'pa' ë londeina itu aitjasëlar-ange am paawu'un in Sompini wo m Pulisan, aitjawaluio watu. Si watu itu ja ambitu tumbal in tarepe', wo n iitu ningaranan e tow: Pinangka'am batu.

Awoja si Pingkam-Panulu'an indono i Manimporok pënana'an, wo sera mareng a La'indong. Sia mënto'o ambitu, akar(ë)na i mate. Tani'tukë'.

89. Kukua an doro' i Mailënsun, sinisil i J. Regar, Kapoja.

Sapaka si Mailënsun anio', ja pojo' i ësa malënge-lëngei. Ja sapaka si nimëwangko' isia, akar(ë)na i makamatu'a-mai, ja si apo'na.

A si ëndooka makasa ja ng kuano i Mailënsun a si apo'na: „O apo'! isiwo-mio' kanën aku, wo walunëngkupe' i mange mangasu.” Siituoka ja kuano i apo'na: „E kawëlä-wëläs! itjoo tu'u si ro'na mangasu! ën so' se asu ipakawalimu?” Sumowato sia, ëng kuana: „Kumi'itoka tu'u se walina, ja.” Siituoka ja ng kuano i apo'na: „O ja sama', itu'tul(ë)kuoka walun, ta'an pira ngando wo ko mareng-ai?” „Pangënto-ngënto'ongkë'-mai, sa ra'itja mai a si tjasiowan ngando, ja ra'io mareng-ai.”

Jawo sia maja'. Ang kasiowan ngando ja sia sumumpak-ange in sangatu'ur ën tambëlang wo sia lumi'tjir in tu'ur iitu makasiow. Ja mailëko si sangarondoran nisumaru in ondolan i ëndo, wo itu tongkeiëna-mange; pinakatëluanao mange i nimarak, ja tare itjarë'mba, wo ng kërë'mba in iitu ja ni-monge an dano. Itjairë'mba-monge in tambëlang, ja tumarepe'-mai ë lalëindëng wo sia saputën in iitu. An unër(ë)naoka-mai i lalëindëng, ja sia mailëk se rua wewene wulawan, sera anio' ja mëtuari. Siituoka ja sera numuwu', ëng kuanerao: „Tio'o ko minde-inde', eng ko ja indonami wo miara itjami i mëtuari, ma'ang ko in tow rërëgësan.” Sumowato si Mailënsun, kuanao: „Sama', ta'an aku ja ra'itja wana kailëkan sapa-sapa.” Kuan-

erao: „Mande tani'tu.” Anaitu tumo'tol a si ěndo itu, ja sera mĕwali-walioka tanu ambalesa.

Siow ngando an somoi-ai itu, kuano e rua wewene wulawan: „Ja sapaka kita, ra'itja mĕnto' ambia, anaitu mindo kaju wasian wo ema'an londei, wo kita sumengkot-ange an Soangan.” Siitu kini'itan i Mailĕnsun. Pakaema'ana-mako ě londei, ja sera sumakeo, wo sumengkot nimapasĕndangan wo sumuwa'-mitjo an Soangan. Ta'an am pa'pa' im baweangkĕ' ě nimaĕmbow isera ambitu, ja sera sumengkoto ka'i-mange an Awuan. Ambitu ě niĕnto'anera. Siituoka ja kuano e rua wewene wulawan: „Waja in tawoiĕn e ambia, ja karĕngan tawoiĕnta.” Anaitu, akar in tarepe' ja sera anio' patu'ulen: kasuruan an Sĕndangan.

90. Sisisilĕn an doro' i Tjasuruan Mailĕnsun, sinisil i Thio Gim Sun Abid-el-Mĕseh, van Kawangko'an.

Kumi'it in sisil i makasisil, ja si tjasuruan Mailĕnsun ja tow an do'ong i Pasam-Bangko', tu'ur im bale e Pasang.

Kaindo-indono-mai a si makasa, ja sia lĕmbi-lĕmbi ěn owak, wo maio i mĕtilengo-mako si ěndo, ja sia mangeo wo'o tuma'-tak tambĕlang indon sintjom im pe'. Tani'tu tu'u sia maja'o-mange, wo sia nituma'tako sangarondoran tambĕlang, ja ěn iitu nirumĕ'mba-mako, wo pĕweso-weso'ona ra'itja maindo; ja an unĕr(ĕ)na i mĕweso-weso' in iitu, ja nimĕrut wo nitjumilat wo lumalĕindĕng ěn a si pĕngĕnto-ngĕnto'anao, akar sia in da'io mailĕk, am pa'pa'an in sinaputo i lalĕindĕng. Awoja tumarepe'-mai sia mailĕk rua mangala'un an unĕr i lalĕindĕng an dior(ĕ)na, wo ng kua e mangala'un isera: „E, ambisa ěm pĕngĕnto-ngĕnto'anu? Masale' ko ě mamuali kasuruan wo kasimbaluiami? Kami anio' ja kasuruan a mange n tana' i Londokan.” Kuano -i Mailĕnsun: „Masale'! Aku anio' ja tow a mange m Pasam-Bangko'.” Tani'tu tu'u iwalio e rua kasuruan mangala'un sia, a si rojongan makangaran Makalu, wo ambitu sia linaneio wo niwuwukerao, wo a si sangalĕwu' itu

ja nimangero' ən tana' wo nimərut, wo nitjumilat(ə)pe' ka'i, tani'tu sia nimamualio kasuruan.

Kasomoian-ai iitu ja sera mēroso-mio' an duru in ta'sitj, wo sera sumengkoto-mange ang karapi in tjalo'o-lo'oram bangko': pinatuwungan, pinakulintangan wo pinalutawan, akar sera in aitjatēka'o-mange an tana' Londokan. A si ěndo itu in sera in aitjatēka'o-mange ən a si tana' iitu, ja kuao e kasuruan ambitu: „Tambisa kamu, mēnto' ambia?” Sumowato sera: „O ra'itja, karėngan kami e mange mēnto' an tana' Naawuan.”

Siituoka sera moleo-mange, ang karapi in tjalo'o-lo'oram bangko', akar sera in aitjatēka'o-mange a si tana' iitu. Ja sera in aitjatēka'o-mange a si tana' iitu, ja sinungkul wo sinepao e kasu-kasuruan ambitu ang karapi in sisiri'am bangko', wo ng kuao e kasuruan mangala'un kasimbalui i Mailėnsun: „Kiro-kiroi e manuk, irė'mbo-rė'mbok e tio', iua-uang e kapuna'!” Siituoka tu'u, ja rumėgao kaapa kumukuko-mai se ko'ko', wo rumėngkoko-mai se wawi wo se asu ja muango-mai waja. Kuao ka'i e kasuruan kasimbalui i Mailėnsun: „Wua-wuatėne', popo-popoane' si wa'ilan Mailėnsun.” Kuao ka'itje' i Mailėnsun: „Rumeindeng(ə)pe', rumeindeng si wa'ilan Mailėnsun, kapira ən tanu iaku utu' im Pasam-Bangko'.” Kakaapuan, ja sera nimēnto'o an tana' iitu, wo si Mailėnsun nimamualio kasuruan ambitu; ra'itjakė' kasuruan tēkek, ta'an kasuruam bangko', kaapa kolano e kasuruan a mange n tana' Naawuan.

91. Kukua an doro' i Mamanua, sinisil i Kau'ndiri Walukow, Kuntung.

Kaindo-indono-mai si Mamanua ja nimusėw pola. Marangka'-mako m pola, pailėkėnao parombitėngkė' i sei. Siituoka kua'a sia n ilukut(ə)nao. Ra'itja tu'u maure-ure mange tumelew-ai si tjelang, janta'an tumumpaoka-mai an tana' sia, itjawaluio tow, wewene tare tumow.

Siituoka sia pėriorėno-mange i Mamanua in tjumėrės, wo

ng kuana: „Ja iitjoo tu'u re'e mēngarombit im polaku, intji?” Sumowato si wewene isia, ēng kuana: „O, iaku! Ta'an sa ro'na, itjaupus-ai aku.” Ja ng kuao i Mamanua: „Ja sama'! Ta'an ambisa ko wo mai?” „A langit wo.” „Sapa ē ngaranu? wo si sei si inang(ē)mu wo si amang(ē)mu?” Sowatēno i wewene isia: „Ē ngarangku Lumaluindung, anak i Tjumokomba' wo si Lintjambene'.” Ja ng kuao i Mamanua: „Ja sama'! Wo sa uanu, ja iitjoo ng kasaruku.” Numuwu'o si Lumaluindung, ēng kuana: „Sama' re'e. Ta'an pangilēkēngku, tio'o ka'itje' pakutu-kutuanu aku, en tia' m bu'uku karēmbusan wo palingan-ai i ina' wo si ama', oreka aku kailēkanerakē' in ambisa, wo aku ipapaitjē'-mange, am pa'pa' kēkailēkerakē' in aku in ambisa, ja aku aiēnerakē'-mange.”

Siituoka sera in dua mamualio ambalesa. An somoi-ai iitu sera makaereo toja'ang tuama. Ja am pa'pa' in tjēlio se kutu i Lumaluindung, ja sia lēse'eno i Mamanua in tjumutu. An unēroka im pakutuan, karēmbusano tu'u m bu'uk(ē)na. Kē-rēmbus(ē)kē'-mio' im bu'uk(ē)na, ja tumarepe'-mai ē lalēindēng, wo sera sapatēno-mange in iitu, iaka-akar sera in da'io mēmailēkan. Lumangkoi-mako ē lalēindēng, ja aitjatalao si Lumaluindung. Si toja'ang aitēla'unakē' a si amanga. Pa'pa' weta' si inanga in da'io nimareng-ai, ja si toja'ang mēngame-ngame'oka, iaka-akar in da'io kalēpeian i amanga. Ang kasomoian-ai iitu, mawēnduo si Mamanua am pa'pa' sia in da'io itjaēna' ē mēlēpe-lēpei si ana'na, janta'an da'itja kalēpeiana.

Makata'neio-mai sia, awēso si toja'ang ēn itondong(ē)nao-mange a si inanga. Wo sia mangereo tu'u ki'itēn. Mitjom a si ēndo, sia palua'bēnakē'. Siituoka ng kuanao am po'po': „Sapaka ko, ja ngaranangku po'po', janta'an sa ro'na, iambo-mange i langit aku.” Sumowato m po'po': „Me'e ja, lumaputo-mai, wo ko iēpe'ku iambo-mange i langit.” Ja lumaputo tu'u si Mamanua, wo sera ipēngange-ngange im po'po', ta'an kamang i matawio-mange i langit, itjarē'mbao-mio' ēm po'po', e nimakarangka'o. Merao ka'i-mange a la'indong sia, ēng kuana: „Sapaka ko, ja ngaranangku la'indong, janta'an sa

ro'na, iambo-mange i langit aku." Kamang ka'i i matawio-mange i langit, itjarë'mbao ka'i-mio'. Siituoka kua'a sia mëngera-ngerao a se kaju walina, wo mëngara-ngaran ambitu, janta'an da'itja wana n do'na makaambo-mange si Mamanua a langit; am pa'pa' kasusur in iitu nimakarangka'o ëm puru'na, ra'io kakëtean in dondora, iaka-akar nimërë'mbe-rë'mbekë'-mio'. An somoi-mai iitu sia mailëko si rongit leno, wo ng kuana: „Sapaka ko, ja ngaranangku: „Leno", janta'an sa ro'na, iwali-mange a si inang i toja'ang am bawo i langit aku." Sumowato si Rongit, ëng kuana: „Ja sama', ko karëngana mëngi'ingit-it-ai iaku. Wo sa ko masale' mëlëp rano, si wisa si ra'itja tinëka'angku-sa, siitu n do'na ëlëpanu. Wo n ësa, sa aitjatëka'o-mange-sa, ja si sei si tinëka'angku n tuintung, isiao si inang i toja'ang. En sapaka sera i mëtuari ja makarua siow, se wewenekë' waja, wo sera ja makalukut waja nisumaru-mitjo "

Tani'tu tu'u m baja i nuwu' i Rongit-leno kini'itan i Mamanua. Itjatëka'o-mange sera, ja sumosoro-mitjo wo sumere-meko se nilumukut makarua siow. Itjatëka'-mange i Rongit an tuintung i Lumaluindung, iwe'eo-mange i Mamanua an isia si toja'ang. An somoi-mai iitu si Mamanua nimënto'o-mio' ambitu. Jawoja weano kanën sia, kékëliangkë' ëng kinan. Siituoka kua'a n tina'ina n uwa'ano wo sawëlan im batu, siitu sia m pirakë' ëm pakanën, wo sia maindoka kasuruan.

An somoi-ai iitu si Mamanua mitjom an timu, wo sia maindo kasuruan in dëgës in timu. A mitjooka mbitu sia ngaranano i Manarinsing.

92. Kukua an doro' i Warongan.

An unëd e tow mëngënto-ngënto' a meko am Pinë'betengan ësa tow makangaran Mawati'. Maka'anak si Mawati' si Warongan wo pira-pira m po'ok(ë)na. Mawangko'om-a'i si Warongan, ja iru'du'um i amanga sia, kua i amanga: „E Warongan, sapa ko ja mangere-mange pange'etan, wo pënga'alian-ai aku upe'."

Siitukë' ëm pinalinja i Warongan ja sia tumo'dëm-a'i, wo

maja'. Sapakēm si Warongan ja nimonge ē nimaja'. Kataretare sia lumangkoi ēsa rojongan in dano, ngarananam si rojongan itu Nimanga. Kumarua sia monge ka'i lumangkoi ēsa rojongan, ngarananam ēn itu Munte, am pa'pa' si munte popontolēn pina'ali-alina aitjawoiwoi ambi'itu. Kumatēlu sia monge ka'i lumangkoi ēsa rojongan wo ngarananam ēn itu Rano Reindang. Ambi'ituoka si Warongan ja monge an Dano ing Kelang. Wo sia tumo'd tērung an duru a mitjona wo ngarananam si tino'dana in tērung Rano Ēsēm, am pa'pa' ē nanama i rano itu ēsēm. Ambi'ituoka si Warongan ja meiwel pusu' in a'kēl, wo musē'b pola, to'ngaw, lolitu'. Kasiowan ngando ja sia tumo'tolēm ē mange'et wo pa'ila'anam ēm pola ja ma'sa'bungēm, ēn to'ngaw ma'bua'am. An somoi-a'i itu si Warongan marengēm-eko am Pinē'betengan ma'ali-meko upe' a si amanga.

Sangando, rua ngandokē' si Warongan ēn a meko an do'ong(ē)na, ja sia mareng ka'i-monge an Dano ing Kelang, monge kume'et im pe'na wo mēngat in tinanēm(ē)na. Itjatēka'-monge sia kume'et; makake'et-oko sia, ja sia mēngat in tinanēm(ē)na. Pa'ila'anam ē lalaina im pola nima'pēku-pēku'um. Kua i Warongan: „Sia'pe' tu'u! ilukut(ē)kupe' si ma'i ma'pēku' i lalaina im polaku.” Si'ituoka si Warongan mēnēp, makaēnēpoka sia, ja serena-mange se kelang makatēlu siow a mange a langit wo mulis-a'i, wo tumumpa-mio' an Dano ing Kelang wo seila lumēle'. Ma'lēle'oka se makatēlu siow, mange ka'i mulis-a'i se kelang makasa siow, ma'i ka'i lumēle' ambi'itu. Ra'ipe' nimakalēle' seila, mange ka'i mulis-a'i se kelang makatēlu ēsa. Tē'tērēnēm-ange i Warongan ēm baja se kelang itu ja ra'itja re'e kelang, ta'an tow re'e. Milo'om ing karai se tēlu kelang sosomoi-a'i, ja ipasēmpe-mangeeila a lalaina im pola ēng karaieila. Malēle'pe' se tēlu itu, ja tumele'bēm se kelang makatēlu siow wo se makasa siow.

Ma'lēle'pe' se tēlu itu, ja ēti-ētipēn-ange i Warongan indon si karai aisēmpe an sēsēndi-monge, wo lēpētēna wo iema'na. Makalēle'-moko se tēlu itu, ja ma'iēm mangere ing karaieila.

Se rua nimakala'u-la-us-a'i kumarai, ta'an si ɛsa ja ra'itja, am pa'pa' ɛng karaina aiɛnɛpɛm i Warongan. Makakarai-oko se rua, ja seila tumele'bɛm, nimakelangɛm ka'i, wo se rua itu numuwu', kuaeila: „Ois, ois! wowoka-ma'i tontumuwu',” am pa'pa' seila ja makawow im bow(ɛ)na in tow. Itɛlɛ'uɛm-io'-eila si tuarieila. Si'ituoka ja pɛ'diorɛn-ange i Warongan in tumimboi si wewene itu, am pa'pa' de'en se kelang itu ja tow re'e waja wewene. Kua i Warongan: „Tow ambisa kamo kumaapa ko wo ma'i?” Sumowat si Wewene itu, kuana: „Kami, kumaapa aku, ja anak i tow a langit.” Pɛ'bueiɛnɛm ka'i i Warongan sumawɛl, kuana: „Anak i sei ko?” Sumowat si Wewene itu, kuana: „Aku ja anak i Mamarimbing.” Pɛ'bueiɛn ka'i i Warongan, kuana: „Si Mamarimbing sia ja ma'pɛrenta kumaapa ra'itja?” Sumowat si Wewene itu, kuana: „Si Amangku ja tona'as wangko' a langit.” Pɛ'bueiɛn ka'i sumawɛl i Warongan, kuana: „Sapa ɛ ngaranu?” Sumowat si Wewene itu, kuana: „ɛ ngarangku Wɛngkow.” Numuwu' si Warongan, kuana: „Karɛngana ko en indongku pɛnana'an.” Sumowat si Wɛngkow, kuana: „Ro'na, ta'an aku mangepe' mapakoitjot-a'i si Amangku, am pa'pa' pa'ila'angku-mange se po'ok(ɛ)ku ja pa'koitjotɛn i Amangku a lɛlɛwɛtan.” Numuwu' si Warongan, kuana: „Ra'io toro ko mange a si Amangu, ro'na mange ko, ta'an ɛng karainu ra'io iwe'eku.” Sumowato si Wɛngkow, kuana: „Sao makembut ɛm bu'uk, mandepe' ɛsakɛ' ɛ makembut, pa'linjangkɛ'-mange i Amangku.” Sumowat si Warongan, kuana: „Sia'am ipa'inde-inde'nu, tu'-tulangkuoka sumama-sama', o itu ra'itja wana ɛm bu'uk makembut.” Lɛgaiɛnɛm i Warongan i nunuwu'un tombal wo lɛme' si Wɛngkow aka-aka'dan tu'u si Wɛngkow mangaku mamuali pɛnana'an i Warongan. An somoi-a'i itu, ja seila in dua mekom am Pinɛ'betengan. Itjatɛka'-meko, seila in dua ma'pɛli'im, am pa'pa' seila in dua ja tumo'tolɛm im pamalean.

An somoi-a'i itu, ja si Warongan wo si Wɛngkow makaere ɛsa anak tuama. Kaloboinam si toja'ang itu, ja kakutuanɛm si Wɛngkow. Anaitu numuwu' si Wɛngkow a si Warongan,

kuana: „Kutuan-a'i aku, ta'an asi-asi'an en sa wawe'an em bu'uk makembut, am pa'pa' mandepe' esaké' em bu'uk makembut, pa'linjangké' i Amangku, karengan aku rangatën-a'i i Amangku wo mangena iusë'b sumawël si wu'uk itu.” Kutuanëm tu'u i Warongan si Wëngkow, ma'kutuoka si Warongan, ja pëtutu'una ing kumembut si esa wu'uk, am pa'pa' pa'ila-ila'ana sa tu'u uli-ulit ë nunuwu'un i Wëngkow kumaapa towo. Kapëndamanëm tu'u i Wëngkow ja kinakembutanëm tu'u esa wu'uk, anaitu sia numuwu', kuana: „Am pa'pa' tu'u kinembut(ë)nu si esa wu'uk, ja karengan aku marengëm-ange a si Amangku, am pa'pa' aku ja pa'towa'anëm-a'i i Amangku, ta'an si toja'ang anio' ja itëlë'ukuké' a itjo, tai-tairan-ange.”

Awoja maja'am tu'u si Wëngkow, nimonge ë nimaja' wo monge sumoso'd a si kuntung a mitjona e Tomu'ung, ambi'ituoka sia ja tumele'b-ange am bale i Amanga. Itjatëka'-mange sia, ja te'benëm i Amanga em bu'uk, ta'an da'itja kinate'bean am pa'pa' talus këli. Kasiowan ngando ën aka'd-a'i i Wëngkow i nimareng a si Amanga, ja si toja'ang mëngame-game'oka ipakandondo wo ipakawëngi-wëngi. Anaitu numuwu' si Warongan an atena in esa, kuana: „Mongepe' an Dano ing Kelang aku, mainde' rake moko si Inang i Toja'ang anio' wo ma'i ka'i lumële' an Dano ing Kelang keke in dior.”

Mongem si Warongan kara-karapi i anak(ë)na. Mongem ambi'itu seila se më'amang ja ma'ila' si Këleak. Kua i Warongan: „E Këleak, tëtëkangku ko!” Sumowat si Këleak, kuana: „Sumapa aku?” Sumowat si Warongan, kuana: „Itele'b-ange a si Inang i Toja'ang anio' kami i më'amang.” Sumowat si Këleak, kuana: „Sapa n iwe'enu iaku?” Sumowat si Warongan, kuana: „Sapakëm ën iwe'eku ko, ja ma'kan in tande rowar.” Sumowat si Këleak: „Sama'.” Awoja wionën tu'u i Këleak se më'amang, ta'an makatëluké' muri'kit-ange si Këleak, itjawareng-io' an tana', ra'itja kinawoleian i Këleak se më'amang.

Kumi'it itu si Warongan ma'ila' si Pëdit; kua i Warongan: „E Pëdit, tëtëkangku ko itele'b-ange a si Inang i Toja'ang

anio' kami i mē'amang, ən iwe'eku itjo, karəngan ko e ma'kan im bene'." Sumowat si Pëdit: „Sama', mio-ma'i a likud(ə)ku." Mio tu'u-mange se mē'amang a si Pëdit, makatëlukë' muri'kit-ange, mulis-io' sumawél an tana'.

Kumi'it itu si Warongan ma'ila' si Rongit O'lei. Numuwu' si Warongan a si Rongit itu, kuana: „E Rongit, tē'tékangku ko, itele'b-ange a si Inang i Toja'ang anio' kami i mē'amang, ən iwe'eku itjo sumeisəp i na'na' ing kupəs a likud(ə)ku." Sumowat si Rongit, kuana: „Sama', mio-ma'i a likud(ə)ku kamo i mē'amang, wo itele'b(ə)ku-mange." Mio tu'u-mange a likud i Rongit se Warongan i mē'amang, makatëlukë' muri'kit si Rongit, ipantër(ə)na tu'u-mange se mē'amang itu. Itjatëka'am-ange am bale i Mamarimbing seila, ja numuwu' si Rongit a si Warongan, kuana: „Si tēka'angku ən tuintung, ituruk-ange a isia si Toja'ang, am pa'pa' isia ən Inanga." Tumëka' tu'u-mange an tuintung i Wëngkow si Rongit, ituruk-ange i Warongan a isia si Toja'ang; kua i Warongan: „Susunëm-io' tu'u si Toja'ang, en sia ja pinapa'des(ə)nu in susu." Awoja numuwu'um se po'ok i Wëngkow kuaeila: „Ois, ois! wowëm ən tontumuwu'!" Peronëm i Mamarimbing seila, kuana: „Sia'am ipa'ois sia, am pa'pa' sia ja nimaïndom po'okiow ulit."

Ambi'ituoka si Warongan ja ngaranan i Mamarimbing, ən aingarana Manarinsim. An somoi-a'i itu, ja we'anëm i Mamarimbing pangkat si Warongan wo si Wëngkow, kuana: „Kamo in ambalesa ja ma'lukar am pa'kësotan in dëgës in Timu." Anaitu ən dëgës in Timu ningaranan e rior: „Rëgës i Manarinsing." Kele in Awa'at, rëgës a moko wo ma'i ningaranan e rior in: „Dëgës i Makaliwe." Awoja si Toja'ang, anak i Warongan wo si Wëngkow, ningaranan i Mamarimbing Mandolang, mitjo nimënto' an duru in ta'asik a mitjona in do'ong e Karor.

**93. Kukua an doro' i Se'e-Wene', sinisil i
Sam Welei, Kuntung.**

Kaindo-indono-mai sapaka si Se'e-Wene' ja anak e ambalesa lēngei. Jawoja toja'ange' si Se'e-Wene'-wo, wo patean i inanga. Ang kasomoian-ai iitu si amanga tumane ka'i a si wewene mačsa-čsa. Mamale tu'u-mako sera in dua, mēmpiaaraano se toloatēkēn. Kēto'tol(ē)kē'-mange im pamaleanera, ja si tumoloatēk si Se'e-Wene' masu'u-su'ut-io' isia, akar(ē)na i makawangko'.

A si makasa, matawio in tjuman, ja si Se'e-Wene' airu'ndu'o i Ra'ana mange-mai tjan-im-bawi an da'ter im pēngēlēpan. Makaindo-mako kan-im-bawi sia, ja sia mangeo lumēle' an dojongan. An sangkum(ē)naoka i malēle', mitjoo rumojong-ai m po'po' kinimbengo, wo ng kuana: „O kongko! mērepe' re'en im bu'uk; lewo'kē' ia wo nirombit!” Makalēle'-mako sia, marengo-mange am bale. Itjatēka'-mange sia, ēng kuao i Ra'ana: „Je! itaureo kua'a-mai, anae ra'io wana tu'tu'. Kumēruto re'e-mio' kanēn!” An sangkum(ē)naoka i makan, pailēkēno i Ra'ana nimalo'oro m bu'uk(ē)na wo ng kuana: „O ko topukēn! kua'a ko wona' nirumombito po'po' aiēre im bu'uk! Kua'a m bu'uk(ē)mu nimačreo sama'?” Si Se'e-Wene' nimēnē-mēnēs(ē)kē', e mainde'kē' sumisil.

Mando ka'i-mai in tawio kuman, sia iru'ndu'o ka'i i Ra'ana mange-mai tjan-im-bawi; lumangkoio im pēngēlēpan sia, pailēkēna-mange n tu'tu' sinaput i lulun aiweren ambitu. Mawawa'-andoo-mio' in sia i mange-mai im pe', langkoiēna-mange, ambitukē' ēn tu'tu'. Jawoja mangeo ka'i-mai tjan-im-bawi sia in airu'ndu' i Inanga i mando-mai, pailēkēnao ambitukē' ka'i n tu'tu'. Makaindo-mako kan-im-bawi sia, mangenao indon ēn tu'tu' wo ng kuana: „Kanēngkuo kua'a n tu'tu' e maarēmo aku. Mareng-ange am bale aku, wona' ka'i ra'io wana tu'tu'.” Makakan-ako sia, tumeintengo in tjan-im-bawi wo mangem am bale. Itjatēka'-mange sia, ng kuano i Ra'ana: „Je, itaureo weta' mai ja, anae ra'io ka'i wana tu'tu'! Kumēruto ka'i re'e-

mio'!" Tani'tu kasusur in ěndo, sa tawio kuman, iru'ndu'o sia mange-mai tjan-im-bawi, en da'io patěla'uan tu'tu' sia, janta'an sia měnga-nganoka si tu'tu' ipěmere-meren i sei am pěngělěpan.

Mamuali a si makasa, mawě'mběro in tjan-im-bawi sia, měras-ai si tumotongko' an tataliawan. Siituoka si Se'e-Wene' mangaja'ka' wo mětintjas. Wo ng kuao i Tumotongko': „Tio'o tumintja-tintjas, e Se'e-Wene'! ra'itja kua'a tambisangku ko, iaku si nime'e im po'po' aiěremu i niluměle', wo měngawe'e in tu'tu' pěngakaněnu měndondo am pěngělěpan ja! Iwe'e-mai wo iaku ě mě'mběr in tjan-im-bawi paalinu!" Wě'mběrěnao n iitu, wině'mběr(ě)na in aroro' lo'or, wo si Se'e-Wene' weana karai wěru wo wujam běru sawělěn. Jawoja mangem am bale sia, měkaraio wo měwujango im bujam běru. Itjatěka'-mange sia, ěng kuao ka'i i Ra'ana: „O ko topukěn! kua'a ko karae! nirumombito karu' ko en tanana! ambisa ana-wo?" Si Se'e-Wene makapěněs(ě)kě'. Jawoja tumo'tolo-mai ambitu sia n itjasu'u-su'ut muli-ulit i Ra'ana, iaka-akar in da'io pěsiri'in, kasusur in ěndo.

A si makasaoka si Se'e-Wene' airu'ndu' i Ra'ana mange-mai tjaju am pěngělěpan in tawio ka'i tjuman. Mělěntu-lěntu'oka in a'ngo sia, ra'itja kalěntu'an, anaitu sia mawěnduo. An iituoka maio ka'i si Tumotongko', wo ng kuana: „Iwe'e-mai iaku ě luměntu' in a'ngo wo mělur im paalinu." Jawo ělurěn i Tumotongko' ng kaju; se sěla tine'tel(ě)nao wo nilimpěrana sama', wo nilo'o-lo'or i nimě'mběr. Sapaka n aiwě'mběr, ja aroro' ka'i. Pakaělurěna-mako m paalin, ja si Se'e-Wene' weanao sawělěm bo pajung. Siituoka sera mětalitjuro wo si Se'e-Wene' ta'aran i Tumotongko' in tana'i: „Ang kasiowan ngando ja aku mai am balemiow, eng kita n tumaneo, sa ko masale' maitju pangilěkěn." Sumowato si Se'e-Wene': „Ja sama'." Ja marengo-mai am bale sia, ang karapi i masale-sale' ěn ate. Itjatěka'-mange sia, isalowo ka'i i Ra'ana, ěng kuanao: „O ko topukěn! kua'a tu'u ko nimakaraeo! Ambisa tu'u m parombitanu in iana?" Ta'an si Se'e-Wene' měměně-měněs(ě)kě'.

Maio ang kasiowan ngando si Se'e-Wene' mēluro im bale. Pailēkēno i Ra'ana, ēng kuanao: „Kua'a kendo'o ko maēluro im bale? Si sei si ipaēlur(ē)mu in iasa? Kendo'o si ene!” Ra'itja tu'u ure mērut tu'u-mai n ang kato'ora, wo tumarepe'-mai n sinangkong an dioro im bale. Kēilēk i Ra'a i Se'e-Wene' in iitu wo in si Tumotongko' nitumumpao-mai wo masosoro am bale, ja ng kuanao: „Kua'a ndo'o ko nimen a si Tumotongko'? o nganga' e nganga'!” Siituoka sera muntēpo am buni. Ra'itja ure sera ka'i in dua kumēsoto-mai. Kēilēk i Ra'a i Se'e-Wene' si Tuang', mangaja'ka'o-mai sia wo ng kuana: „Ore'! nimalui re'e wo, Tuan de'e wangko'!” Siitukē' ēm pinailēk(ē)na, ēng kuanao: „E Tuang! si ana'ku wo'o ē lo'or!” Sumowato si Tuang, ēng kuana: „Sa ko masale', waweane' kua'a, ta'an ialer-io' wuni, wo iuntēp-ange witu si ana'mu lo'or.” Muntēpo-mange si ana'na palilin, mangeo sumake an sinangkong se Se'e-Wene' in ambalesa. Sumakeo sera, wueiēno i Ra'a i Se'e-Wene': „Sapa ē ngaranu, e Tuang'?” Sumowato si Tuang: „Ē ngarangku ja Muntu-untu.”

Ure-ureo se am buni m pangēnto-ngēnto'on, ra'itja kumēsotai. Mangeoka ilēkēn i Inanga, ja sinēra'o i Tumotongko', asu i Muntu-untu, si ana'na. Kumawus-ako m baja se itu, sumosoro si Muntu-untu wo si Se'e-Wene', mange a langit. Mēwaja'o sera, ja mangko'o-mai si Ra'a i Se'e-Wene' ang karapi i maame' wo mēkiu-kiupus a si toloatēkēna, in sa wo'o ro'na ampungan sia, wo kumi'it si toloatēkēna. Mēkambi-kambil-ange in sinangkong sia, ja ra'itja toro, wo sapaka sia ra'itja niampungan. Tani'tu si Se'e-Wene' pinalēnge-lēngei i Ra'ana, aisosor-ange ang karapi e kasu-kasuruan a langit. Tani'tukē'.

94. Sisil an doro' i Se'e-Wene'.

Sapaka si Amang i Se'e-Wene', ja wuaja wo tē'tēr mēngasasu. Si Inanga nimate im bo'mbase' si Se'e-Wene'-wo. Awoja an somoi-ai iitu si Amanga tumaneco ka'i. Janta'an si tinaneana, ja rondoro in tjēte ate wo taēmbow a si toloatēkēna.

A si makasa, an tutuw i Amanga i nimaja'o ka'i mangasu, ja si Se'e-Wene' iru'ndu'o i Tumoloatëk isia mio' mindo kan-im-bawi. Mëroso-mio' ang koso' si Se'e-Wene'. A si tjoso' iitu wawean ësa so'so'an, ja an tëmbir i so'so'an iitu ë niu-mungan i Se'e-Wene' in tale'. Pakaumungëna-mako ën iitu, ja sia sumaroinsongo pëngalële'ana. Pakaema'ana-mako n iitu, marengo am bale sia. Awoja ra'itja ka'i ure ang kasomoian-ai iitu, an tutuw ka'i i Amanga i nimangasuo, iru'ndu'o ka'i i Tumoloatëk isia sia, mio' sumu'up-ai tjanën e wawi. Mio'om si Se'e-Wene', itjatëka'-mio' am pasu'upan in tale' sia, ja sia mangaja'ka' wo mainde' e nimailek in tinowano in sangatu'ur ëm po'po' pësëk im bua'na, kasale'en i makasere wo itjaewe in tjuman, ën an da'ter in saroinsong palële'ana. Makasu'up-ako in tale' sia, ja sia lumële'o an saroinsong. Mailëko im po'po' niruma'mbas a li'tjir im palële'ana sia, ja sia mitong ësa wo te'telëna. Si sangate'tel kinan(ë)na, si sangate'tel ailële'na. Makalële'-mako sia, ja sia mëluro in tale' sinu'up(ë)na wo unsunana se po'po' tëla'una, paalina-mange, lëlo si Tumoloatëk isia. Janta'an itjatëka'-mange am bale sia, ja sia mapala'us nimanësël in sia nimawëndu-wëndu a nimaali-mange im po'po'. Ja këilëk(ë)kë'-mange i Tumoloatëk isia, ja si Ra'ana mapala'us nimaëmbow, en si Se'e-Wene' ë nilumële'o wo nimëreo im bu'uk, wo ng karaina nimalo'oro. Wo ë nimakaëmbow-ëmbow isia, ja tinuru'an i Se'e-Wene' se po'po' pinaalina-mai, iaka-akar ën iitu niindona kakuku'an i maëmbow rëpët si Se'e-Wene', wo sia kumua: „Ambisa ë niindoanu se po'po' anio'?” Sisilëno-mange i Se'e-Wene' ëng këtow-ai i po'po' itu, si tjakaja'ka'an, an da'ter im pasu'upana in tale'. Janta'an sia ra'itja emanën i Tumoloatëk isia, ta'an sia aisalow(ë)nakë', ëng kuanao: „O ko topukën! ko ja towo wo rombit!” Wo si Se'e-Wene' luatana wo sia maame'.

Maja' pira ngando ang kasomoian-ai iitu, iru'ndu'o ka'i i Tumoloatëk si Se'e-Wene' sia mio' sumu'up-ai tjanën e wawi. Mio'om ka'i sia. Itjatëka'-mio' am pasu'upana kanën e wawi sia, ja sia mailëk ësa wewene makatulung an da'ter im palë-

le'ana, an tu'ura im po'po'. Pawasan i Se'e-Wene', isiao si makapo'po' in iitu, anaitu mainde'o sia wo ng kuanao an atena: „Ja itjaëmbow(ë)nao tu'u aku e niindoangkuo m po'po'." Siituoka tumintjaso sia wo mënëp, janta'an nirangat(ë)kë'-mange i Wewene itu sia, wo kapeiëna-mange oreka mëtintjas. Siituoka sumusuto-mai si marangat isia sia. Mueio si Wewene iitu, ëng kuanao: „Kua'a ko nitumintjas?" Sumowato si Se'e-Wene': „Aku nimainde', papa'an pawasanku itjaëmbow(ë)mu aku." Kuano ka'i i Wewene iitu: „Am pa'pa'am bo'on in sapa wo ko itjaëmbow(ë)ku?" Sumowato ka'i si Se'e-Wene': „Am pa'pa'an a se ëndo nilumangkoi ja pinitongangku se po'po' niruma'mbas." Kuano i Wewene iitu: „Tio'o mainde-inde' iaku. Iakuo si Lintjambene', inang i Tjasuruan Muntu-untu. Awoja m po'po' anio' ja po'po'ku, ta'an iitjokë' n do'na mëngindongindo a se wua'na iana, akaran in tjasale'anu. Sapaka aku, ja a langit wo rumojor-ai, mai mangere pënana'an i ana'ku Muntu-untu. Ja iitjokë' ën itjasale'ku mamuali pënana'ana. Masale'ka ko m pënana'ana?" Kuano i Se'e-Wene': „Iakuo m pënana'ana ja, iwalio-mange karapimu a langit aku. Taloso wëndu aku n ambia, mënëra-nëra'kë' in ate. Ja sa a mange mbana, karëngana aku en ëna'." Kuano i Lintjambene': „Nao mëndu-wëndu, eng ko ën iwalitjuo-mange a langit wo mamuali pënana'an i Muntu-untu. Ta'an mënë-pënës, tia'pe' ipakua-kua-wo, iakuoka in ësa ë mange a si Amangu, mange mangilëk iitjo."

Awoja pira-pirao ngando ang kasomoian iitu, lëkëpëno i Lintjambene' ën ta'ar(ë)na. Itjatëka'pe'-mai si Amang i Se'e-Wene' ë nimangasu, maio mangilëk si Lintjambene'. Ja nienan i Amang i Se'e-Wene' ëm pangilëkan i Lintjambene'. Enan-ako m pangilëkan i Lintjambene', ja sia marengo-mange a langit, mangeo maler se mëgigioan ëng kana'an iirang a si Amang i Se'e-Wene'. Pakaalerëna-mako n iitu, ja rumojoro ka'i ang ka'iomba'an sia, paki'itën-ai e tow a langit, maali-mai se kana'an iitu. Itjatëka'-mai, ja ituruko a si Amang i Se'e-Wene' ëm baja se itu. Indon-ako i Amang i Se'e-Wene' ën aairang iitu, ja akinëno-mai i Lintjambene' si Se'e-Wene',

e mangem a langit paki'itën e tow a langit. Maja'o sera nimange am Pinëwetengan. Itjatëka'-mange ambitu sera, lumaputo a si la'indong matu'ao wo rarangka'an. Am puru'na i la'indong iitu n sinosoranera a langit. Itjatëka'-mange a langit sera, ja iënëpo i Lintjambene' an sangkor si Se'e-Wene', wo n sangkor iitu këlëwan i Lintjambene' i ni'u, iaka-akar ra'itja wana ë makailëk si an sangkor iitu.

Ang katëluan ngando iwalio-mange i Lintjambene' si ana'na Muntu-untu a si sangkor iitu. Makatulungo ambitu si Muntu-untu, ja angkaiëno-mai i Lintjambene' ë ni'u aitjëlëw an sangkor wo ipapaserena si ana'na n an sangkor iitu. Siituoka itjësoto-mai i Lintjambene' si Se'e-Wene' wo iwe'ena a si Muntu-untu mamuali pënana'ana. Wo ë ngarana ieranao, ra'io patu'ulën Se'e-Wene', ta'an Niruntunanoka. An iitukë' si Se'e-Wene' patu'ulënoka Niruntunan. Awoja itji'it in sisil e matu-matu'a an Tombasian an Dangka', sera ja nimaja' a si talun kapëli'ian an da'ter im Bale Ure. Ambitu si wasian matu'a rarangka'am bo wawangkëran. Itjatëka'-mange a si tjapëli'ian iitu sera, ja sera lumaputo a si wasian iitu. Ja am puru'na iitu n sinosoranera a langit. Akar(ë)kë' iitu.

95. Kukua an doro' i Muntu-untu.

Kaindo-indonoka-mai si Lintjambene' anio' sia sumengkot lumi'tjir in tana' akar sia in aitjatëka'-mange a si ësa tana'. Ambituoka sia pailëkën i tuama ësa makangaran i Tjërito, wo si Lintjambene' iwalina-mange am balena. Sapaka si wale itu, ja lo'or ulit wo pateirangkë' e tow ën am pana'pa', iaka-akar in da'itja wana tow ro'na muntëp, sa ra'itja nimuei a se mateir. A si wale itu m binalian-ange i Tjërito si Lintjambene', wo sia indona pënana'ana.

Ra'itja ure si Lintjambene' ën ambitu, ja sia sumengkoto ka'i, marengo-mai an tana' tinowana, ja si Tjërito ra'itja nitjumi'it si pënana'ana, ta'an sia nimënto'kë' am balena. Sumengkoto tu'u si Lintjambene', aka-akaran sia in aitjatëka'-

mai a si tana' tinowana. Ra'itja ure n akar(ë)na in aitjatëka'-mai, sia makaere ësa toja'ang tuama. Mawangko'o-mai si toja'ang isia, ja sia iru'ndu'o i Inanga sumengkot-ange a si Tjërito. Ta'an dirior sia in sumengkot, ja kinuanano i Inanga in tana'i: „Sa ko aitjatëka'o-mange-sa, ja mëla'u-la'us am balena, wo tio'o mainde-inde' se mateir am pana'pa', ta'an mëla'u-la'us(ë)kë'-mange am bale. Wo sa ko nimailëko si tow ën amona sangawiwi watu wo si sangawiwi ja tanuka in amo e tow, ja isiao si Tjërito amangu. Wo kumua-mange: „Sapaka aku, ja anak i Lintjambene'.”

Ipakakua tu'u-mako i Inanga ën iitu an isia, ja mangem tu'u sia. Itjatëka'-mange sia, mailëko tu'u-mange si amanga, wo sia kumua-mange: „Sapaka aku, ja anak i makangaran i Lintjambene'.” Siitukë' ëm pinalinga i Tjërito, ja kuana: „Sama', sama'! eng ko tow(ë)ka re'e.” Wo sia timboiana-mai ang kama, wə sia kë'këpëna ang karapi i nimaame'. Ra'itja ure si toja'ang isia n ambitu, ja sia mangilëko i mareng a si Inanga, ëng kuanao: „Marengë' wo'on a si Ina' aku-wo, e Ama'! Ta'an dirior(ë)ku i mareng-ange a si Inangku, ja aku mangilëk a si Ama', sa roro'na ipapaali-mange nuwu' a si Muntu-untu wa'ilan Kasuruan si nimamuali in tana' wo ë langit wo paapo-apo'on e waja se paëmpungën.” Siituoka ja kuano i Tjërito: „Sama' tana'i, sa ko aitjatëka'o-mange-sa, ja linganuoka a si Inangu sapaka ë mangemu itjua wo sapa m pangilëkënu a si Tjumokomba', em papaaliangkuoka-mange nuwu' si Inangu.”

Marengo tu'u-mai a si Inanga sia. Itjatëka'-mai sia a si Inanga, ja sisilënao-mange an isia, tambisa n aitjua-mai i Tjërito amanga. Siituoka ja tenaano i Inanga sia, ëng kuana: „O itow! sapaka ko ja mange a si Tjumokomba' am pa'pa'an sia ja makomba'o ka'i in tarepe', ja ambitu këkëlian se maputus. Sa ko aitjatëka'o-mange-sa, ja mëla'u-la'us-ange an somoi i Tjumokomba'. Sapaka sia, ja sumaru im paantangan i ëndo, makomba', maali-ali in taisi. Ja lumukut-ange an so-moina, wo sa sia meso'o-mai in taisina, ja itënao-mange ëm

bërënu, wo ko maame' rumëpë-rëpët. Mande ko pëlëpe-lëpeiënera, ja tio'o mënë-pënës. Sangali tjo wineano i Tjumokomba' in taisina, ja ro'na ko mënës, am pa'pa'an isiao si amangu." Mangem si toja'ang isia, wo ki'itana tu'u sapa n aitjua i Inanga. Sapaka m pakomba'an iitu, ja a lesar im bale i Tjumokomba', ra'itja wana no'o sapa-sapa, ta'an lalë'nas(ë)kë' ëndo e wëngi. Ėm bale i Tjumokomba' ja siow karondoran wo siow kaengkolan. Ja n an darëm i wale iitu mëgigioan se tow: ambitu se maame', ambitu se masale-sale', ambitu se makulintang, ambitu se Kaper, ën ambitu se Sarani. Ja n am pana'pa' i wale iitu pakateirangkë' i tumotongko'.

Itjatëka' tu'u-mange ambitu si toja'ang isia, ja sia lumukut an somöi i Tjumokomba'. Makalukut-ako ambitu sia, meso'o tu'u-mai in taisina si Tjumokomba', wo itëna-mange ëm bërëna. Siituoka kaso'kelan tu'u-mange in taisi ëm bërëna, wo sia maame', akar(ë)na im pëlëpe-lëpeiënera i nimëgioanoka ng kakanën. Wo ipaindoera lumelempar, ta'an sia ra'itja mënës. Am pa'pa'am beta' tu'u sia i mapateo, ja ësa tow mai tju-mua: „E itow, mënës! sa ko ra'itja mënës, ja ra'itja iwe'e iitjo ën taisi i Muntu-untu Kumokomba'." Siituoka ja mënëso tu'u sia, wo iwe'eo tu'u i Muntu-untu Kumokomba' ën taisina a si toja'ang isia. Wo si toja'ang isia indono-mai i Muntu-untu Kumokomba', wo ilukut(ë)na ang kamana kakan, wo ipakata'uo am baja se an sinongkom i langit wo n tana'; sapaka ë ngaran i toja'ang isia ja Muntu-untu, kumarua si Tjumokomba', wo si Muntu-untu anio' kara-karapi i amanga Muntu-untu Kumokomba' ën am baja se patawoiëna. Anaitu sia pasiri-siri'in e waja se paëmpungën wo waja se tow tanu in ipakasiri' si amanga Muntu-untu Kumokomba'.

**96. Kukua an doro' i Lintjambene', sinisil i Kau'ndiri
Walukow, Kuntung.**

Kaindo-indono-mai sapaka si Lintjambene' ja anak i Lumimu'ut wo si To'ar, sera ë mëtuari ja makarua siow, siow ën tuama, wo siow ëm bewene. Mawangko'o-mai si Lintjambene',

ja sia itjasale'o i Muntu-untu, tuarina. An somoi-mai iitu pailëkëno i amanga wo si inanga si Lintjambene' ja maowa-owako. Siituoka sia wo'mbo'ono i amanga wo si inanga.

Tani'tu si Lintjambene' tumintjaso wo ng kuana: „Ja sumengkote' kua'a re'e aku.” Siituoka sia malero suraro ipakawali, wo sia maja'o karapi e surarona. Jawoja am Bulur(ë)pe' Maatus sia maëna'o-mai, tumowo si toja'ang, ja tanukë' kapitu. Pailëkën-ako i Lintjambene' in tanukë' kapitu si toja'ang, ja sia inga'ngaw(ë)nao-mange ang kaju. Wo ka'i sia maja'o. An somoi-ai iitu, sia mapaema'o ësa londei wangkër. Pakaema'an-ako n iitu, ja sia sumengkoto karapi e surarona. Janta'an si Lintjambene' ja nimakaraitjë' in tjarai e tuama. Ang kaso-moian-ai iitu sera itjassumpako-mange si ësa tana' matiru-tiruw in tinanëm wo pakateirangkë' e suraro n a lawanan. Siituoka si Lintjambene' sumuwa'o wo tumana'-mange. Maioka ang katana'an sia, ja sia maarëmo. Wo ng kuanao a se surarona: „Ilaput-ange kanën aku.”

Pailëkëno e suraro mateir a lawanan, ëng kuaerao: „Kua'itu itu kamu marombit im. bua'na in tinanëm i tuangami?” Sumowato si Lintjambene', ëng kuana: „Tinanëm(ë)ta n iasa en aiusëw i amangku wo si inangku.” Ja muevo se suraro mateir a lawanan, ëng kuaerao: „Si sei re'e ko?” Sumowato si Lintjambene', ëng kuana: „Sapaka aku, ja anak i Nimema' in tana'.” Tani'tu sia iwajaerao-mio'. Mawësu-mako si Lintjambene', ja sia maja'o. An unëroka in iitu sia itjassumpako-mange am bale i Tuang makasuraro se makateir a lawanan; si Tuang isia ja makangaran in Tjërito. Jawoja si walena iitu ja pakalukarangkë' e tow ën an to'tolan wo n am puruk in daran karapi in am pana'pa' im bale. Siituoka si Lintjambene' mangem. Itjatëka'-mange, sia ja mamuevo, ëng kuana: „Ro'na sumosor aku?” Sumowato se malukar, ëng kuaerao: „O, ra'itja toro, em pa'pa' si makawale ja ra'itja toro pailëkën e tow walina.” Jawoja am pa'pa' si Lintjambene' i mëlëse-lëse'kë' in sumosor, ja enano e malukar, ëng kuaerao: „Sama', ta'an sawo ko muntëpo-mange, tio'o makana-kanat-ange si maka-

wale, en sia ja makalukut an dangka' wo mēkarai in tjarai e tumotongko'." Tani'tu ē nuwu' e waja se malukar.

Muntēpo tu'u-mange si Lintjambene', ja sia ra'itja nimakanat-ange. An somoi-mai iitu, sia mēnto'o-mio' ambitu. Maio in isiwoo kanēn, ēng kuao i Lintjambene': „Sapaka n sesende'-engku sama', ja karowakē', anaitu sa ro'na isiwokē' tare-mio' karowa aku, ta'an tio'o kuku-kukun." Tani'tu isiwoo. Maio in sumende'o in tjarowa sia, mio'nakē' pinakeneng-ai an tu'ura, wo itondong(ē)na-mako am ba'mba'. Ja kasusur(ē)na i mukēritjo in sende'en, ja sia kumanat-ange si Tjērito makawale. Tani'tuo ē nimamuali. Ra'itja pira ngando n an somoi-mai iitu, si Lintjambene' mangilēko i mange lumēle' sera si Tjērito, ja kini'itan i Tjērito. Jawo mangeo lumēle'; milo'oka in tjairaina si Lintjambene', pailēkēno sapaka sia ja ra'itja tuama, ta'am bewene. Makalēle'-mako sera, ja marengo am bale. Siituoka si Lintjambene' pamajaano i Tjērito, wo sia maindo pēnana'ana. Tani'tu sera nimamualio ambalesa. Siow ngasērap ēn an somoi iitu, ja si Lintjambene' maowa-owako.

Ra'io ure si Lintjambene' mangilēko a si Tjērito i marengo an tana' tinowana. Jawo ki'itan i Tjērito, wo ng kuana: „Sama', janta'an sa ko makaereo-sa, ja kua'a n surat iwe'e-mange si toja'ang isia, sawo nimawangko'o." Jawoja marengo si Lintjambene', maali-ali in ēsa surat aiwe'e i Tjērito. Itjatēka'-mai an tana' tinowana sia wo luma'uso-mai a si Muntu-untu mēnana' an isia. Ja ra'io ure sia wo nimitongo toja'ang ēn an somoi-ai iitu; sapaka si toja'ang, ja tuama. Ngarananerao si toja'ang ja Kumokomba'. Tani'tu si Tjumokomba' pēwangko'onera in dua. Janta'an mio'o makawangko'-mai si Tjumokomba', ja ng kuao i Inanga an isia: „Ra'itja karu' si Muntu-untu n amangu ulit ja, e Kumokomba', ta'an si makangaran in Tjērito, isia n amangu. Siituoka ng kuao i Tjumokomba' a si Inanga: „Ja ambisa m bale i amangku, e Ina'?" Sumowato si Lintjambene', ēng kuana: „O, ēm bale i amangu ja a mange si ēsa tana'. Anaitu ko ja karēngana sumengkot, mangusui-mange si amangu, janta'an kua'a n surat aiwe'e i amangu iaku-wo,

iwe'e kine iitjo, sa ko nimawangko'o. Anae sa ko mangusui si amangu, ja karëngana si surat iana paalinu. Janta'an tana'i weta': sa ko wo nimailëko si tana' pakalukarangkë' e suraro ë lawanan, ja siituo n tana' paënto-ënto'an i amangu. Ja sapaka m bale i amangu, ja pakalukarangkë' ka'i e tow ën an to'tolan wo n am puruka in daran, karapi in am pana'pa' im bale. Ja sa ko mangem am balena, ja mande weta' ko pamueiën e malukar, tio'o maëngku-ëngkut, wo sa itjuaera i lutawën, ja mëmantë-mantër(ë)kë'-mange a si amangu. Wo sa ko aitjateka'o-mange a si amangu, ja tio'o maëngku-ëngkut wo mëla'u-la'us kumërës-ange in tjunduna. Ja ma'ang ko ipë-paso-pasot(ë)na in tjundu, ja tio'o mawëta-wëta'. Sa eta' sia makëpeo-sa, ja iwëkaro-mio' wo ituruko-mange si amangu n surat."

Jawoja pakanuwu'an-ako i Inanga si Tjumokomba', ja sia sumengkoto. Itjateka'-mange a si tana' pakaënto'an i amanga Kërïto sia, ja tumumpao-mio' ang katana'an. Ja pëwueiëno e suraro malukar a lawanan, ja sia ra'itja tu'u nimëngku-ëngkut, ta'an nimëmantë-mantër(ë)kë' tanu in aita'ar i Inanga an isia. Itjateka' ka'i-mange am bale i amanga, sia pëwueiëno e malukar am bale iitu, ja ra'itja ka'i nimëngkut; wo itjuaera i lutawën, ta'an sia nimëmantë-mantër(ë)kë' tanu in ta'ar i Inanga an isia. Siituoka sia muntëpo-mange am bale wo mapala'us(ë)kë' tu'u nitjumërës in tjundu i amanga, wo ipëpaso-pasot i Tjërïto in tjunduna, ta'an da'itja ki'im i Tjumokomba' mëta'. Makëpe tu'u-mako si Tjërïto ë nimëpaso-pasot isia, ja si Tjumokomba' mëta'o wo tumuruko-mange in surat a si amanga. Siituoka ng kuao i amanga Kërïto: „O! iitjoo tu'u re'e si ana'ku, intji?" Sumowato si Tjumokomba': „Iaku, e Mama'." Wo ng kuao ka'i i Tjërïto: „Ja sapaka n aingaran i amangu wo si inangu an iitjo?" Ëng kuao i Tjumokomba': „Ën aingaran i amangku Muntu-untu wo si inangku an iaku ja Kumokomba'." Siituoka ng kuao i amanga Kërïto: „O ja këlïtjë' re'e tawoiën ko; ënso'kë' ko ë makomba' im baja-waja. Anaitu sa ko pandeitja, ja ko mange mësawël ë ngaram bo si amangu

Muntu-untu; itu ko m pira tawoiën, asalo wo mëgiro-girot. Janta'an tana'i weta': sa ko nimarengo-mange-sa, ja ko mange mawio-wio-mio' a litjur i amangu Muntu-untu, sa sia magirot, wo patutu'un-ange i makuru-mio' am paso'kelën-ange in taisina m bërënu, wo sa kinaso'kelano-mange, ja ko masuro-mio' wo maame' rumëpë-rëpët. Ja sa lëpeiënera, tio'o mapënë-pënës, mande ra'io nimaësa ng kakanën numanam, wo mande se lumelempar lo'o-lo'or ipëlëpe-lëpeiëra iitjo. Sa weta' itjuaera im pësawëlëno ë ngaraniow wo si amangu Muntu-untu, ja tare ko ro'na mapënës-io' tojo'. Sa tu'u ë ngaraniow pinësawëlërao-sa, wo n taisi i Muntu-untu aiwe'eerao iitjo, ja ro'nao mënës tu'u-mio' ulit."

Tani'tu n ta'ar i Tjërito a si ana'na Kumokombo'. Jawoja pakanuwu'ana-mako im baja se itu sia, ja sia marengo-mai a si amanga Muntu-untu wo si Inanga. Itjatëka'-mange sia, ki'itanao m baja in aita'ar i Tjërito an isia. Magirotoka tu'u si Muntu-untu, ja mangeo pawio-wioan-io' i Tjumokomba' ë litjur. Wo m bërëna patutu'una i makuru-mio' am paso'kelën-ange i amanga in taisi. Siituoka ja kaso'kelano-mange m bërën i Tjumokomba'. Këso'kel(ë)kë'-mange im bërëna, ja sia masuro-mio' wo mëngame-ngame' rumëpë-rëpët. Jawo sia lëpei-ëno e kagirot i Muntu-untu. Em pa'pa' si Tjumokomba' in da'itja mënës, ja pëlëpe-lëpeiënerao in da'io nimaësa ng kakanën numanam; janta'an da'ipe' ki'im(ë)na mënës. Siituoka ka'i ja sia lëpeiënerao im baja se lumelempar lo'o-lo'or, janta'an sia ra'ipe' ka'i tji'im mënës. Ure-ureano n an somai-mai in sia nimëngame-ngame', wo aipakalëpeio isia m baja se ro'na ilëpei, ja ng kuao i ësa: „Mainde' ë ngaranera si amanga Muntu-untu pësawëlëno ja.” Jawoja këlinganakë' tu'u si nuwu' iitu, ja sia tumo'tolo mapënës tojo'. Siituoka ng kuanërao: „Jawo! ra'itja tu'u siitu n itjasale'na?” Anae pësawëlëno ë ngaranera: ë Muntu-untu ingarano an isia, wo ng Kumokomba' ingarano ka'itje' a si amanga. Jawoja mapo'ow tu'u-mako ë nuwu', ja mënëso-mio' sia ë maame'. Tani'tu ë ngaran i Muntu-untu aingarano a si ana'na Kumokomba', wo n taisina

aiwe'eo si Tjumokomba' é ngarana-wo. Ja ka'itje' ng Kumokomba' aingarano a si Muntu-untu-wo. Tani'tu é ngaranera wo n tawoiënera pinësasawëlo.

Jawoja si Muntu-untu anio' ja isia si paapo'an e tow Kaper wo se nisumaranio. Em pa'pa' m baja se tow ja timboiënakë' waja, Kaper wo n Sarani.

97. Kukua an doro' i Marëndor wo si Lintjambene', sinisil i Joel Lumënta', Kanonang.

Sapaka si Marëndor, ja mëngënto-ngënto' a mitjo m pinëku'kupan in tana' wo é langit. Sangapërua in owa'na ja kasuruan, sangapërua tow. Si sangawirang ambituo waja é giona e am bawo in tana' wo a mange é langit. Si sangawirang mëngawuruk, akar i maroja-rojasoka, janta'an kaselap(ë)kë'-mange i sangawirang, mapala'us nimasama'.

Kaindo-indonoka-mai, sapaka si Lintjambene' ja maowaowako. Panë'sëkëno i inanga wo si amanga si sei é makatatawoi in iitu, ja sinowat(ë)kë' i Lintjambene' im pangerenape'. Siituoka rumojoro-mai si Lintjambene' wo mangem a lawanan, mapala'us nimësungkul si ësa Pongkor wangko'. Siituoka sumakeo-mange a si Pongkor iitu sia, wo itintjaso-mitjo i Pongkor, wisao ng katatintjas in dëgës en tani'tu ng katatintjas i Pongkor iitu. Ra'itja tu'u ure itjatëka'o-mitjo a si ësa punten sera, ta'an da'itja ambitu si Marëndor. Siituoka me'eo ka'i-mitjo si Pongkor, akar in itjatëka'o tu'u-mitjo a si punten pëku'kupan in tana' wo é langit. Wueiënao-mange sa si Marëndor ambitu, itjuao-mange isia: „Ambitu.” Ëng kuana ka'i: „Itjua-mange aku, sa aku ro'na mëta'up wo si Marëndor.” Iwarengo tu'u-mai é nuwu': „Ro'na kine mange.”

Mangem tu'u si Lintjambene'. Pailëkënao n an tana' im bale i Marëndor tumbal in daran ja mawuta-wuta e lumolojon. Sumosoro-mange sia, wueiëno i Marëndor: „Sapa n iaimu an iaku?” Ëng kuano i Lintjambene': „Sapaka aku ja maowaowako, pëwue-wueiën e matu'a si sei é makatatawoi in iasa, ja sinowat(ë)kupe', im pangerengkupe'; awoja siituo wo aku

nimai, maali-ali-mai si sisim anio', en anio' aiwangkil(ě)na-mange iaku maindo ěsa tu'us." Ĕng kuano i Marěndor: „O, sisim(ě)ku kua'a ěn iana, janta'an da'itja kua'a toro ko n sumusut iaku." Kěnuwu'na-mai in iitu, ja tare kailěkan i Lintjambene' in isiao re'e si Ĕndo, ja tinelang(ě)nakě' re'e-mange si Lintjambene', wo sia maowa-owako. Siituoka rumo-joro-mai si Lintjambene', wo sia marengo nisumake ka'i-mai a si Pongkor. An somoi-ai iitu makausuio anak si Lintjambene', wo sia ngaranana in Tialo. Akar iitu.

98. Kukua an doro' i Soputan, sinisil i Winuwus Mondow, walian an Talikurang, Tompasso'.

Aitondei ing kukua e mangaapo', sapakěm ěsa a se anak i Lumimu'ut wo si To'ar ja makangaran Marěndor; sia ningaranan Marěndor, am pa'pa' sia airu'du' i Inanga wo si Amanga mitjo mě'bale am paantangan i ěndo. A mitjooka ambi'itu sia, ja sia masale'em tumane kumaapa tumowa' ěsa pěnana'an; ngaran i wewene tinowa'na: Lintjambene'.

An darěm im pamaleaneila in dua ja seila nimakaere pira-pira anak, si ěsa makangaran Soputan, si ěsa makangaran Muntu-untu, wo pira-pira m balina. Makawangko'om-a'i si Soputan akad in doro'nam n tumane, ja numuwu'um si Marěndor wo si Lintjambene' a si Soputan, kuaeila: „E Soputan, karěngana ko ja tumanem, kumaapa tumowa'am ěsa wewene mamuali pěnana'an, ta'an da'itja si sei n towa'an, karěngan mokokě'-mai si ěsa mangala'un, anak i Karende wo si Kěmbu'-ambene' mě'bale a moko an du'u in tana' a mongena, ě ngaran i mangala'un itu Sawumbene'." Si nunuwu'un itu ja sinepa i Soputan karapi in ate sama' wo rondor, wo sia numuwu', kuana: „Sama', e Inang wo Amangku."

An somoi-a'i itu ja maja'am seila i mě'amang wo mě'inang kara-karapi e pira-pira tow maali-ali in irang. Itjatěka' tu'u-moko seila im baja, ja si Marěndor numuwu' a si Karende, kuana: „E kaloku, sapakěm ěm bawa'a'-mai in tarepe' iasa an dior e kalo in ambalesa ja ma'i mangila' sa wo'o ro'na

itjasale'miow si anaka'i makangaran Soputan mui si anakiow makangaran Sawumbene' mamuali pënana'ana." Sumowat si Karende, kuana: „Sama' nimakasama-sama', ta'am bueiënoka a si Sawumbene' sa sia masale' kaapa ra'itja. Awoja wueiënëm tu'u i Karende si Sawumbene', kuana: „E Sawumbene', masale' ko towa'an i Soputan mamuali pënana'ana?" Sumowat si Sawumbene', kuana: „Sama', e Amangku, sapakëm aku ja masale' towa'an wo mamuali pënana'an i Soputan." Ilampatëm i Karende a si Marëndor, kuana: „Sapakëm si Sawumbene' ja masale' mamuali pënana'an i Soputan." Siitukë' ë nilinja i Marëndor, ja sia tumurukëm in iirang, wo karapi i mëpëli'i seila in dua ngatowan kumi'it ing kanaramën e tontumuwu' ë ma'tane se anakeila.

Awoja i nimakawu-kawusëm ëm pëpëli'ineila, ja towa'anëm i Soputan si Sawumbene' wo maja' kara-karapi i Inanga wo si Amanga mitjom am baleila. Janta'an mëmaja-maja'oka seila, ja itjatëka'-mange a si ësa kuntun darangka'an. Ambi'ituoka seila, ja numuwu' si Marëndor a si Soputan, kuana: „E Soputan, karëngana kamo in ambalesa ja mënto' wo më'bale am puruk i kuntung iasa." Ngarananëm i Marëndor si kuntung itu, „Soputan", aitondei i ngaran i Soputan. Ang kasomoian itu ja maja'am si Marëndor wo si Lintjambene', wo si Marëndor tuma'ar a si Soputan, kuana: „E Soputan, karëngana ko e mangere-mange tawoiën, wo itu kamo ja ra'itja ma'ki'i-ki'it im belën a se rënga-rënganiow." Awoja maja'am tu'u si Marëndor wo si Lintjambene', itëlë'uëm-io'eila ambi'itu, se Soputan in ambalesa.

An somoi-a'i itu ja mangerem in tawoiën si Soputan; ja ën itjasale'na patawoiën ma'ema' in uwasei, ma'dentek. Awoja siitu ng kawalian sa si Soputan wo ma'ema' in uwasei, kumaapa ma'dentek in uwasei, ja kumësot am puruk i kuntung itu m batu wo n dangi'ngis. An tuitub itu ipakua e manga'apo', kuaeila: „Mabe'em ka'i si Wa'ïlan, ioko, ioko, e Wa'ïlan, e apo'!"

Akad in anio' ëng kukua a si Soputan.

99. Kukua an doro' i Mokointěmpai.

Kaindo-indono-mai sapaka si Mokointěmpai ja nimakalinga-mange si Mamarimbing i nimateo. Siituoka sia mema'o sondang aitji'it an sondang i Mamarimbing, tani'tu ka'i ěn sompoi, wo sia maler ěsa wawi wo těwi' paalina-mange isakei an dumoro' im pinatean i Amanga.

Mangem sia nisumosor a si ěsa kuntung. Itjatěka'-mange sia ja lumutawo an sela in do'ong. Siituoka mangaja'ka'o se anak i Mamarimbing, wo palinganera-mange wawean ě maame'-mai, tanuo tu'u si Mokointěmpai nimaio am bale i Mamarimbing, wo sia mawile-wilei an tana'. Ěng kuano e anak i Mamarimbing: „Ka'itu-itu ko měngame-ngame'?” Sumowato sia: „Am pa'pa'an si Amangku ja nimateo re'e.” Ěng kuano e anak i Mamarimbing: „Ta'an ko ja ra'itja ana'na.” Ěng kuano i Mokointěmpai: „En tia' aku itjuamiow(ě)kě' in da'itja anak i Mamarimbing, ja sumereo-mai in sondang mio' aitěla'u-mai i Amang(ě)ta an iaku, sa itu ra'itja kakele in sondang i Amang(ě)ta, wo sumere ka'i-mai in sompoi, sa itu ra'itja kakele in sompoina.” Ilěķěnerao tu'u, ja uli-ulit tanu in sondang wo n sompoi i Amangera. Ěng kuano e anak i Mamarimbing: „Itjo tare re'e ěm binean i Amang(ě)ta in sondang wo n sompoi.”

Maio in se anak i Mamarimbing i mětalitjuro, ja ng kuano i Mokointěmpai: „Ja karěngan ěm běndu i Amang(ě)ta ěm betengěno, eng kita ja mětalitjuro re'e. Jawoja kini'itan tu'u-era im betengěno ěm běndu i Amangera. Metengo sera, ja si Mokointěmpai nimare'ekě' nimindo sapa-sapa. Siituoka ng kuano e anak i Mamarimbing: „Ja sapakě' re'e ěn itjasale'mu; mindo ko'ko' ko'?” Ěng kuano i Mokointěmpai: „Ja weano-mai isera aku!” Jawoja marengo tu'u-mai si Mokointěmpai am balena, wo mapala'us aiwěkar(ě)na se wara', wo se wara' isera tumintjas.

Sapaka si Mokointěmpai anio' ja makaata tělu ěn tuama, wo sera iru'ndu'na mangasu kumi'it se wara'. Maja'o sera ja

nimindo tu'u wio'o, wo sera mailëk ësa luak, wo se wio'o niindoera tatarënera ambitu. Sumi'si'o an tina'i sera ja paro'-këtëngkë' e pilëk. Siituoka indoanera wo ëpe'an in sumëra' se pilëk, sera ja tinunuera. Sumëra'o sera ja se pilëk iitu ë numanam e se wio'o niindoera. Marengo-mai a si apo'era sera wo ng kuanerao: „Kami nimailek ësa luak, wo kami nisumi'si' ambitu, ta'an pinaro'kët(ë)kë' e sapa wona'. Wawean ë niindo-ami, wo niëpe'anami in sumëra', ja isera ë numanam e se wio'o.” Kuano i Mokointëmpai: „Weanoka mateir ambitu.” Sapaka ë ngaran e ata i Mokointëmpai, si ësa Mailangkai, sia ja Saroinsong, si ësa Auwang, sia ja Rëmbokën, si ësa Lowang, sia ja Sondër. Awoja se tëlu ata anio' ë nimakaere i Linow.

100. Sisisilën an doro' im Bene', sinisil i Jan Runkat, Kapoja.

Kaindo-indono-mai sapaka si Tumilëng ja nitumo'oro wale. Ëm bale tino'or(ë)na ja siow ngaparas. Numuwu'oka se tow: „Lo'oro tu'u si wale iasa, janta'an sawo n iasa tuli-tuliran in sangkor mawuta-wuta im bene', ja nimakalo'o-lo'ore' wo'o-mai.” Siituoka ja ng kuano i Tumilëng: „Ja mangepe' ang Karondoran aku, mangepe'-mai wene'.”

Ja mindoo-mai in tjelana tëlu ngalolon sia, wo sia tumowa karapi si makangaran Kaluasan, wo sera sumosoro. Itjatëka'-mange, ja mamueio im bale i tona'as: „Ambisa m bale i tona'as?” Ituru'o e makawale: „Si anio'.” Ë ngaran i tona'as itu ja Pasiowan. Luma'uso tu'u witu sera. Mawëngi-mio', ja sera weano kanën. Makakan-ako, ja turu'ano tëkëlan si Tumilëng, ang kantil. Janta'an sia ra'itja toro tumëkël, mëli'li-li'lis(ë)kë'. Siituoka wueiëno i Pasiowan, ëng kuana: „O Tumilëng, kua'a ko ra'itja tumëkël, mëli'li-li'lis(ë)kë'?” Sumowato si Tumilëng: „Je, ra'itja toro kumili', këli re'e leka' n ambia'i.” Siituoka ng kuano i Pasiowan: „Ja mawokë' tare mange am bawo in sangkor.”

Këlingakë' i Tumilëng in iitu, ja masale'o sia wo ng kuana: „Mangeo kua'a witu.” Tumëkëlo sia, ja ogarënao ëm bulu'kun

wo itu itjēmuna im bene'. Kapëndamanao in tjinasuripano im bene' em bu'uk, ja itu wulu'kunēnao. Ja wēngi-wēngipe' tumo'oro sia, wo polonao si Tjaluasan, en sera maja'o. Awoja sapaka, kine, em bene' a mange mbitu, ja pate'mbengkē', en iitu ja sēla tanu wua'na in tjēliat. Anae a lalanoka si Tumilēng, ja tumo'oro si Pasiowan. Ilēkēnao ja ra'io wia si Tumilēng. Milēko ka'i in tinēkēlan, ja nimawungkasano en tēpe, aiēmpar am bawo im bene'. Siituoka ja ng kuano i Pasiowan: „Je, ra'io wia si Tumilēng, ja kinawungkasano em bene', wona' kinaina'ano. Ja pangi'itēn si Tumilēng, en da'io nimako ambisa sia ja nirumombito wene'.”

Pangi'itēno tu'u, iaka-akar in tjinangi'itan. Kuano e nimangi'it i mēwuei: „Nirumombito wene' kamu?” Kuano i Tumilēng: „Ja mai ilēkēn.” Ilēkēnoka em baja im paalin, ja ra'itja wana. Siituoka ng kuano e airu'ndu' i Pasiowan: „E ja owarēn em bulu'kun.” Owarēnoka, ja ruma'mbas tu'u-mio' m bene'. Kuano i Tumilēng: „Ja ra'itja tu'u pinētutu'ku itu, ta'an en iitu ja aitjasēlēt am bu'uk, in aku nimēnēkē-nēkēl; ja ra'io ka'i nimilēk aku wo mulu'kun. Ja tio'o tu'u itjua-kua in dombit aku en ambitu.” Siituoka marengo-mange am bale i Pasiowan sera, wo kumua tanu si aitjuana tarepe'.

Kuano i Tumilēng an darēm in atena: „Tumambisa re'en aku wo makaindo? Ja tia'pe'?” Mawaja-waja'oka sia, matowotowo i mawangker, ja muntēpo-mange an sēndi sia, wo sia rumērēt am palar in tjeitjeina. Maunē-unēroka im bale sera, mēta'upo wo se mangi'i-ngi'it si tjo'ko', wo sia sumembong karapiera. Siituoka mailēko im bene' ipēwēlar. Unēranao-mange em bene', isu'su'na-mange ēng keitjeina, iaka-akar si nirērētan kinasēlētan im bene'. Kapëndamanao in tjinasēlētano, ja nimēla'u-la'usoka nitumintjas sia. Wo sia mange mēros-ai a si tjuntung Tutungēn. Mapērosoka-mai sia, ja kailēkano ka'i in tjinaina'ano m bene' ipēwēlar. Wo ka'i sia pangi'itēn, ta'an da'io kinangi'itan, en sia ja mēpēruao-mai i mapēros. Pa'anēnao-mange, ja mērēga-rēgaoka se ang Karondoran, makua: „Nio' kua'a tu'u sia, porakēn!” Makapëndamoka si Tumilēng

im bona' kangi'itangkě', ja sia mēkitawang si po'ow(ě)na makangaran Sumanti, ěng kuana: „Tawangěn aku, e po'ow-(ě)ku, posokěn si tjuntung anio'.” Ituoka ng kuano i Sumanti: „Ja sumoro'.” Po'owěnao itu, ja itu itjaposok-ongē a mongena. Ilěkěna ka'i in tawitjě' luměse'-mai se an dangka', ja itu pakasaanape' ka'i i mosok, ja itjara'ter(ě)kě' a si pinosok katare, iaka-akar se pinosok iitu nimaingo rua kuntung toja'ang.

Awoja milěko in da'itja toro mēros-ai se tow an dangka', ja pailěkěnerao-mio' si Tumilěng wo patura'anerao-mio' sia, tanuoka uran ěm binowong wulu'd, ěm pa'kaju wo m binaluian. Pa'pa'an sia in da'io ure wo tēnan, ja sia sumaluo in dojongan i Malalajan. Siituo wo n ambitu kěli m bulu'd. Milěk, kine, in tawitjě' roro'on im binowong sia, ja sia sumurip an darēm im batu. Siituoka mēna'o se matura', ěng kuanerao: „O nimateo tu'u si Tumilěng, en sia da'io wia.” Tani'tu marenego se tow.

Ilěkěno i Tumilěng in da'io wana m binowong matumpa, ja sia maja'o-mai niměla'u-la'us am pēwaleanera an Tombasian an Dangka'. Itjatěka'-mai am bale sia, ja ilulumbonao m bene' an tu'ura im poporong. Wo iaka-akar in iitu i mēnuru-nurumai in tjěli. Kumělio m bene', ta'an da'itja toro kaněn. Ěng kuanao: „Tambisanta in tjuman ěn iana, en da'itja toro kanan sa ra'itja nirages.” Siituoka ng kuano i Mokointěmpai: „Ja iakupe' ka'itje' ě mange-mai si wara'.” Ja mindoo-mai im bēngkow wo lutaw wo n sompoi sia, wo sia maja'. Sapaka n an tutuw iitu, ja wěrupe' nimate si makawara', si makangaran i Mamarimbing. Itjatěka'-mange an těmpok im bale sia, ja tumo'tolo sia ě mēluta-lutaw wo mēngame-ngame', makua: „Ama', e Ama'! ra'io pinailek i ana'mu ko, e Ama' e Ama'!”

Siituoka, kine, kalingaano-mange e mētuari sia ě mēngame-ngame'. Ěng kuaerao: „Sungkulěn kua'a-mange, wo wueiěn-ange sa sia si sei.” Pēwueiěno sia, ja sia ra'itja kumua in sa sia si sei, e mēngame-ngame'kě'. Itjatěka'o-mange am balē e pinatean sia, ja tare sia mēnēs ě mēngame-ngame'. Siituoka pakawue-wueiěno e mētuari sa sia si sei. Sumowato sia, ěng

kuana: „Sapaka aku, ja anak i tona'as Mamarimbing. Aku ja luluna e itjita i mētuari, ta'an toja'ange' kamu, wo aku iwali-mio' i amang(ě)ta an darēm in tana'. En tia' ra'itja emanēniow, ja milěk(ě)kě'-mai in sompoi wo m bēngkow aitēla'u-mai i amang(ě)ta an iaku. Itjēsot-ai ēn sompoi wo m bēngkow i amang(ě)ta, sa ra'itja pute wo m bēngkow wo n sompoitju.” Itjēsot tu'u-mai ja pute, ra'itja nimēnsea'an. Siituoka ja ulitēno e anak i Mamarimbing, ēng kuanerāo: „O uli-ulit tu'u re'e sia po'ow(ě)ta!” Wetengēno ēn tēla'uēn. Weano rōko' sia, ja ra'itja ki'im(ě)na. Wueiēno sa sapa n itjasale'na, kumuāo sia: „O weangkě' tare-mio' a se ko'ko' anio' aku, se lambot ipus; wean-io' laka' wo siwei, wo se luma'indong kolěk ipus. Ta'an itjua-mai sa sera patambisan. Isusui-ai n an doro' im pangumaan.”

Itjuaerāo: „Sawo tumo'tolo im pangumaan, ja katare-tare mangēnow. Awoja n an tutuw iitu, ja si tona'as ēm parei-ndengan. Wo kumuā se toja'ang iru'ndu' (siow, kaapa: pitu, kaapa: lima), wo sera kuanan i tona'as im bara', ēng kuana: „Eng kamu ē maja'o-mange ja ma'an-ai i~~n~~ bara' lowas makaēpat, wo ke'ke' makasa. Wo sa sia nitumēka' a si tjaju la'indong nimakapuru-puruk, ja isia n indon, ta'an sa sia nitumēka'kě' ang kaju walina, kaapa nimasēpitjě', kaapa si nirumo'kēt(ě)kě' in sapa, ja ra'itja sia.” An tutuw iitu se tona'as sumēkēr im bale, makua im bara' pinalinja e paru'ndu'an a si tjaawi'i wo kailēkan e tow ē niange-mai e paru'ndu'an.

Kumarua i maja' se paru'ndu'an, ja sera mange-mai ke'ke' makaēpat, wo lowas makasa.

Kumatēlu i mange-mai ja ke'ke' makasa ito'or am pamoitan.

Ja kumawu'o. Waja se tow ra'io mawaja-waja' ambisa. Rumu'ndu'o ka'i se tona'as, en tumēkano im baja se tow, mange-mai lowas makaēpat, wo ke'ke' makasa. Kumi'it iitu tumo'toko se tona'as mio' an dano. En se paru'ndu'an a si tjēto'or im pamoitan, ja nimangusui ru'i i wuring wo itu ipumpunera an tambēlang wo mio' iweren a lalan in dano.

Wo itu li'tjirënera in tawa'ang wo lolowëng wo ng këlet wo pasëkan in tjaju. E mio' mareng-ai se tona'as ë nilumële', ja tumulio-mange tumo'tok a si tjaju aipasëk. Itjatëka'-mai am bale sera, ja ra'ipe' lumo'ok kaapa lumalitj am bale e mapapëra-përape' am bu'uk. Mando-mai, ja tumo'toko m baja se tow. Mando ka'i-mai mëkan. Se wawean pëngëlëpan mange mapëli'i am pëngëlëpan. Se tona'as ja mange mapëli'i am pamoitan.

Kumi'it iitu, ja kumawit i ninono, mange-mai lowas makaëpat wo ke'ke' makasa. Mando ka'i-mai, mange-mai ke'ke' makaëpat, wo lowas makasa. Mando-mai mangeo-mai in tjëte makasa. Mando-mai ja ra'io maja' se tow, en se tona'as ja me'e ëlëpën, kaapa manëwas i mamoondo. Mando ka'i-mai ja mange-mai si tjawok. Iterewa'o e tona'as i mando-mai: „Ja mëkitumbalan, kaapa mangere si ula' wuring!” Mando-mai lumupa; ra'io maja' se tow e me'e ëlëpën (manëwas); ëm baja se nimindo si ula' wo se tona'as mapëli'i ang ko'ko' wuring. Tumo'tolo i mando-mai se tow ë mawaja', ta'an da'ipe' toro wëngin.

Kumi'it iitu ja rumu'ndu'o ka'i se tona'as, wo ësa n tona'as masoring, mange sumoring-ai wara' wëngi. Katare manguni makasiow. Mangeo mareng-ai sera ja luma'us-ai a lesar, en sera n sungkulën i tona'as ambitu. Wo sera wurasan i tona'as in tëwi' ambitu. Wo sumëmbung wo munër im bale, matu'a wo n toja'ang. Tumo'tolo-mai witu n sama'o parëga-rëgaan ën an unër im bale wo makasalu i lalan.

Maja' tëlu ngando ja itowa; se tona'as tumowa se toja'ang tëlu, wo mange tumowa a si tumotowa. Ën itowaera, ja tumowa in tumunu im pulintja'. Mando-mai ja ra'io wana ë maja'. Iterewa' i tona'as im bëngi-wëngipe' in tana'i: „Ja ra'io wana ë maja', en aitulung e matu'a!” Tumo'tolo se tona'as ë maali-mange atëp an uma, to'orën lawi, wo kure' wo n dara'asan.

Maja'o ka'i lima ngando itowa i mange ang kaju. Mando-mai, ja mapëli'i m baja se tow, mange mapëli'i an uma, ipakua i maja' ang kaju.”

101. Kukua an doro' i Pamagian, sinisil i Elisa Tengor, Sulu'un.

Kaindo-indono-mai si Pamagian anio', sapaka sia ja susur im bēngi mange minson, am pa'pa'an ēn a se ēndo-ēndo iitu ja se tow nimawinson. Susur i minson ja si Pamagian ēm pēnganonomoiēn mēminso-minson.

A si wēngioka makasa in tjakaapuaneraoka i minson, ja si Pamagian aitjasomoi ka'i tanu i mēndondo. Ja si Pamagian mēmare-mareng im baja wiwinsonēn. Ta'an si makakēli-tjēli paware-warengēna, ja si matana'i:

„Itongkoro-mai e Wa'ilan, e, e!”

Tumawio mando, ja marengo-mange am bale i inanga wo si amanga sia. Itjatēka'-mange sia, ja nime'tango in daran sera. Siituoka ja sia rumangat, ēng kuana: „O Ina' wo Ama'! tontonan-ai raran aku!” Sowatēn i inang wo si amanga: „Mange tumēkēl a se kaka'mu!” Siituoka ja sia mange a se kaka'na wo rumangat: „O Kaka', tontonan-ai raran aku!” Sowatēno i tjaka'na: „Mangeo tumēkēl a se Ito'!” Siituoka sia mange, wo rumangato ka'i: „O Ito', tontonan-ai raran aku!” Ēng kuano i ito'na: „Mangeo tumēkēl a se ra'amul!” Sia mange ka'i wo rumangat: „O Ra'a, tontonan-ai raran aku!” Kuano i ra'ana: „Mange tumēkēl a se apo'mu!” Siituoka ja mangem ka'i weta' sia wo rumangato, ēng kuanao: „O Papo', tontonan-ai raran aku!” Kuano i apo'na: „Tumēkēlo-mange ang karapi e asu!” Sumowato si Pamagian: „Paki'tji'intjē' e wuratok!” Ja ng kuano ka'i i apo'na: „Tumēkēl-ange ang karapi e wawi!” Sumowato ka'i sia: „Paso'sokēngkē' e wawi!” Siituoka kuano ka'i i apo'na: „Tumēkēl-ange ang karapi e membe'!” Sowatēno ka'i weta' i Pamagian: „Pasungengkē' e membe'!”

Am pa'pa'am beta' in da'io tontonan daran si Pamagian anio', ja sia marengo ka'i-mange a lesar wo sia mēminso-minson ka'i ambitu. Mēminso-minsonoka sia, ja rumēsek-ai ēn sinangkong an dior(ē)na, wo sia lumukut ambitu. Ra'io; ni-mantango ēm bena. Siituoka ja sia we'mbetēno i Tjasuruan.

Pailëkëno e inanga wo se po'ow(ë)na wo se ito'na wo se ra'ana, in sia im pawe'mbetëno-mange, ja maame'o sera. Sapaka si Pamagian ëm bine'mbet, ja ra'itja aipakala'us-ange i Tjasuruan an dangka', ta'an katara-tara ja ro'nape' wo'o ambon-ange e tow. Ja si inanga wo si amanga wo se po'ow(ë)na makakanat waja-mange, ang karapi i maame' wo mërangarangat-ange: „Mareng, mareng-ai, e Pamagian!” Tani'tu waja isera ja makakanat si Pamagian im pawe'mbetën i Tjasuruan ipaange a langit. Kuanerao ka'i in dumangat: „Mareng, mareng-ai e ene! mareng-ai e ene! wo kita mapëli'i an siow ëng kantong; mareng-ai wo sumëra' in ate i wawi tjantong wo n ate i tjo'ko' laka'.” Pasawatëngkë'-mio' i Pamagian in tana'i: „O ra'itja! iange, iange katu'u aku, e Wa'ilang Kasuruan! Am pa'pa'an aku ja aitjaritja i inangku wo si amangku wo se po'ow(ë)ku wo se ra'aku wo se apo'ku. E Wa'ilan, we'mbetën, we'mbetën katu'u aku, e Wa'ilan!” Siituoka si Pamagian rumura'-mio' wo ng kuana: „Si rura'oka anio' ën iwe'eku itjamu wo si tana' tinëna-mange in iitu ja iema'miow-ange sumama-sama' ën iitu, en siituoka ëm patu'usaniow iaku!” Langem tu'u am bawo i langit sia.

Itjatëka'-mange si Pamagian, ja iru'ndu'o i Tjasuruan lumële', wo mareng-ai sia ë nilumële', ja aitengamo i Tjasuruan wulinga' pasomaan in tjakulo', wo isomao-mange an isia, ja ra'ipe' tanu in tjakulo' im bulinga'. Anaitu iru'ndu'pe'-mange. Marengo ka'i-mai sia, ja tani'tukë', wo sia iru'ndu'pe' ka'i-mange, akar i makasiow, wo ën ang kumasiow, ja tanuo tu'u im bulinga' ëng kakulo'. Siituoka ja ita'tako i Tjasuruan laitjitj ia'li' wo tëkëlan i Pamagian. Ja pinapakili'ana sia, wo sia to'tokëna ambitu nrintë-rintëk, iaka-akar in tanuoka tini'titj. Siituoka, ja iparuto i Tjasuruan a langit sia. Ja ëm bërën nimaindo ëndo, ën amo nimaindo sërapi. Ja se akar itu nimaindo waja sumëndot. Akar iitu ëng kukua a si Pamagian.

**102. Kukua an doro' i tjuntung Lolombulan, sinisil i
W. Kéintjém.**

Sapaka é ngaran i tjuntung iitu in tjatare-tare ja ra'itja Lolombulan, ta'an Kapasanan; ja kasomoianoka-mai itu aitjaera, aka-akar in tarepe' pënu'u-nu'ulënoka Lolombulan. Ën itu ja nimamuali tana'i:

Kaindo-indono-mai, sapaka é Lolombulan itu, ja ësa ngaran in tow: ngaran in tuama. Awoja sapaka si Lolombulan anio' ja ësa kasuruan an tana' im Balanda, anak i ësa kasuruam bangko' a mange mbitu, si makangaran Muntu-untu. Si Muntu-untu anio' ja mëngënto-ngënto' a si ësa wale wangko' siow ëm buni; ja ësa wo n ësa a se wuni iitu, ja ambitu ëm pangartian. Sapaka an ësa wo n ësa, itu ja pailékana im paapo'an; en sia ja maapo' an siow ngagigio. Si Muntu-untu isia ja wajakë' in dua n toja'ang, si ësa ja si Lolombulan wo si ësa makangaran in Tjërito.

Awoja sapaka si Tjërito ja tinurukan i amanga ësa tawoiën, tanu masembong an tawoiëna, masusui in tjailékan a se tow ambitu. Janta'an si Lolombulan ra'itja wana tawoiën sapa-sapa. Siituoka sia sumigil sapa n do'na tawoiëna, pa'pa'an sia mënere-nere si po'ow(ë)na in aweano tawoiën. Kuanao an dekenan: „Kumi'it si po'ow(ë)ku in aweano tawoiën, ja ka'itje' aku mema'pe' ësa londei wo aku ro'na sumengkot mangere tana' walina.” Tani'tu nimamuali. Pakaema'ana-mako n iitu, ja sia mumungo walunën, wo sia ka'i mangere ësa tow mole karapina; wo sia makaere si makangaran in Sinonsaian, sia tinurukana tawoiën a londei, tanu ësa mawowuling, siituoka sera moleo.

Ja mëmole-moleoka sera, ja itjasumpako-mai in dojongan in Dano i Apo'. Ambituoka sera, ja ng kuano i Lolombulan a si tjarapina: „Sapaka kita ja sumaluo wo'o si rojongan anio', janta'an ra'itja toro, em pa'pa'an ën iasa ja pawolean i londei i Apo', anaitu kita molepe'-mako.” Mëngako-ngakooka sera; an dioro-mange in dojongan im Pananapean, kuano i

Lolombulan a si tjarapina: „Sapaka ě londei itěla'utao ambia, eng kita sumosoro a si tjuntung anu mange, en ambia ja tawitjě' ěm baja'anta-mai sa kita masale' mangere sěra' a mai lawanan.” (In tarepe' itu ja patu'ulěn: Tongkeina im Batu Kapal). Siituoka sera maja'-mako; itjasumpakoka-mako in dojon-
ngan im Poijar, kuano i Lolombulan: „Sapaka kita ja sumaluo si rojongan anio'.” Tani'tu sera maja', měnalunalu si rojongan iitu. Itjasumpakoka si rojongan těkek sera, ja sume'pango, kumi'it siitu maawo si tjuntung Kapasanan. Itjasumpako ka'i-
mange a si ěsa kuntung sera, ja itěla'unao ambitu si Sinon-
saian, wo sia měla'u-la'us a si tjuntung paawo-awona-mange. Itjatěka'-mange am puruk i tjuntung iitu sia, pailěkěnao in sapaka n tana' ambitu ja lo'or pěwalean; siituoka ja sia měnto'o měwale ambitu.

Ambituoka sia ja mamangke-mangker maakar a si tjuntung Wulur Maatus. Kaindo-indono-mai mamuali a si makasa sia mange i mawangkar a si tjuntung iitu, ja sia niměta'up wo si ěsa wewene makangaran i Lintjewulan anak i Lumimu'ut. Kěpailěkěnape' si wewene itu, ja sia masale'o tumane a isia. Siituoka mangenao pěwueiěn a se matu'ana, sawo itjasale'era si anakera ěn taneana. Awoja pangilěkana itu sinungkulera ang karapi in sama', aka-akar sera in dua nimamuali tow ambalesa; wo sia iwali-mai i Lolombulan am pěwaleana a si tjuntung Kapasanan itu.

Kumi'it ka'i-mai siitu, si Lolombulan mamangker akar in Tjotawunan; ja ambitu ka'i sia nimailěk ěsa wewene gio lo'or makangaran Lěngkaram Paser, wo ka'i sia tumane a si wewene isia, akar in aiwalio-mai a si tjuntung pěngěna-ngěna'ana, ang karapi i Lintjewulan. Aneitu si Lolombulan, ja rua pěnana'an. Tani'tu sera niměngěnto-ngěnto' niměwale a si tjuntung itu.

Awoja makaure an somoi-mai iitu ra'io pinatu'ul in Tjapasanan si tjuntung iitu, ta'an patu'ulěnoka: Kuntung i Lolombulan, tumbal-ai in tarepe' iasa. Aneitu, tani'tu nimamuali wo si tjuntung iitu ningaranan Lolombulan.

**103. Sisil an doro' i Tengker wo si Tjawulusan, sinisil i
Servius Rawung.**

1. Kaindo-indono-mai si Tengker wo si Tjawulusan sapaka sera in dua ja mēkalo. Awoja si Tengker sia ja tow sija', ta'an si Tjawulusan tow lēngei. Ja kasusur in ēndo si Tjawulusan mange mēnere-nere im bēndu i Tengker tani'tuo in tjakēli, iaka-akar sia nimawēndu, wo matape ēm pēreke-rekenēna, pa'pa'an sia tuma'nei in owa'na talos lēngei.

An tutuw i tjawēnduana iitu ja sia mēnigi-nigil, in sapa ēn do'na tawoiēna wo sia ro'na masija' tanu si tjalona. Maka sigilo tawoiēn sia ja mamēsi.

Maio a si makasa am pa'pa'an sia ra'itja wana pēsi ipamēsina, sia tumo'oro-mai wo mange miram pēsi a si Tengker, ēng kuana: „Sawo itjasale'mu, wean-ai aku pēsi iramēn, en aku ja mangepe' wo'o mamēsi.” Sumowato si Tengker, ēng kuana: „Sapaka ko ja weangkuoka si pēsi ipaupu-upus(ē)kukē', ta'an sawo itu italamu, ko mareng-ai maindooka ataku.” Tani'tu iwe'eo i Tengker ēm pēsina.

Wo an somoi-mai itu tumi'iro-mange si Tjawulusan maawo-awo-mange i laur. Itjatēka'-mange a lawanan si Tjawulusan, sia moleo-mange tojo' a laur wo tumo'tol mamēsi. Awoja katারে-tare in do'kētēn ēm pēsi, makala'us nirumēmbus ēm ba'kēs iaka-akar ēm pēsi aitjatalao. Sapaka si nirumo'kēt im pēsi ja ra'itja pongkor ta'an sia ja ēsa Kolano an darēm in tana' wo mai.

Siituoka tu'usanao ēsa tu'us ēn an doro' in tjinarēmbusan im pēsi, wo sia marengo-mange a si Tengker. Itjatēka'-mange a si Tengker sia, ēng kuana: „E kalo! sapaka ēm pēsi ja aitjatia'o, ta'an sawo itjasale'mu, wean-ai kēntas wo mangekuoka ēpe'an i mangere mainde'-mako wo itu ro'nape' kaereangku.” Sumowato si Tengker: „Sama', ta'an sawo itu ra'io kaereanu, ja mareng-ai ko maindooka ataku kamu in ambalesa, tanu si aita'ar(ē)ku an iitjo.”

Tani'tu si Tjawulusan marengo ka'i-mange a lawanan wo

mange mangere im pësi, an doro' in tjinarëmbusan kaapa kinatalaan' in iitu. Itjatëka'-mange ambitu, sia tuminëpo. Awoja kaindo-indono-mai, pareke-rekenën sangapulu'o wo lima ngarëpa ëng kararëm, sia mailëko ësa raran nia'mbangan. Siituoka sia rumojoro kumi'ito-mio' si raran iitu. Makarojor-io', sia kumi'ito-mange si tëmberan tino'tolan-io' in daran itu. Kataretarena in sumumpak-ange ja wale i maësa-ësa; ambitu sia pëwueiëno i Maësa-ësa, ëng kuana: „E kalo! ambisa ko wo mai, wo sapa ë ngaranu, wo ambisa ëm paangeanu?” Sumowato si Tjawulusan: „Sapaka aku, ja tow am bawo in tana' wo mai, ë ngarangku ja Kawulusan, ta'an sapaka aku, ja lumëlëme', anaitu wo aku nimai.” Numuwu'oka si Maësa-ësa, ëng kuana: „Aku ra'itja sumakit, anae mange saanu mui a se mënduaan.” Siituoka si Tjawulusan mangem a se mëndengkoman, wo sia pëwueiënera sawo sia tow ambisa wo mai, wo sapa ëm pëtutu'una. Sumowato si Tjawulusan: „Aku ja tow am bawo in tana', ta'an aku ja lumëlëme'.” Numuwu'o se mënduaan: „Kami ra'itja sumakit, mange mui a se mëntëluan.” Awoja se mëntëluan ra'itja sumakit, anae si Tjawulusan iru'ndu'era mange a se mëëpatan, janta'an sia sinowaterakë' tanu in sosowat e mëntëluan, anaitu sia ka'i mange a se mëlimaan wo kumi'it iitu a se mëëñëman wo se mëmpituan wo se mëuwaluan, ja sia pinënowa-nowaterakë' in tani'tu. Mangeoka mëwuei a se mënsiowan si Tjawulusan, ja sinowatera: „Sapaka in tarepe' iasa si Tjolano ambia ja sumakit, ta'an sa ko ulit lumëlëme', ja sa itjasale'mu mange lëme'en si Tjolano.” Mangem am bale i Tjolano si Tjawulusan, sia mëwuei a si ësa suraro, ëng kuana: „Ambiaka si Tjolano?” Sumowato si suraro: „Ambia, sapaka sia, ja sumakit, anaitu sia makatëkël am buni.” Numuwu'o si Tjawulusan: „Sapaka aku, ja lumëlëme', anaitu sa 'itjasale'mu, iwali-mange a si Tjolano aku.” Siituoka iwali-mange i suraro a si Tjolano si Tjawulusan, wo ambituoka sia wueian, ëng kuano i Tjolano: „Tow ambisa ko, wo sapa ë nimange-mai wo ko nimai?” Sumowato si Tjawulusan, ëng kuana: „Aku ja tow am bawo

in tana' wo mai, sapaka aku, ja mai malēme' se tow sumakit ambia, wo aku masale' ka'i lumēme' si Tjolano, anaitu pēwueiēngku sa sapa ēn sakit i Tjolano?" Siituoka ēng kuano i Tjolano: „Ēn sumakit an owa'ku, ja kēro'ang, ra'io toro lo'motan, anaitu aku wēnduo muli-ulit." Siituoka lēme'eno i Tjawulusan si Tjolano, wo indona si pēsi aitjasa'ngal ang kēro'ang(ē)na. Ja siitu si pēsi paere-eren' i Tjawulusan.

An somoi-ai itu si Tjawulusan maja'o sumero in do'ong, ja an tutuw(ē)naoka i masero-sero, sia mailēko sangatu'ur in sa'ut, punti wulan, wo sia mangilēk ēsa se'ena a se tēkek wo itu paali-alina i mēere-ere lalan mareng-ai am bawo in tana'. Mēmaja-maja'oka sia, ja sia itjata'upo si Ēndo wo ng kuanao a si Ēndo: „Sawo ro'na, wion-ange am bawo in tana' aku." Numuwu' si Ēndo, ēng kuana: „Ro'naka ko makatang in tjapasoku, wo ra'itja marēngis ēn owa'mu? Ta'an sa ko mētutu' ipēwalitju, ja karēngana ko mindo-mange siow mēliantēw ēn sa'ut pinuntian, iri'ndir am paawunta in dua, en tia' ko marēngis, wo ang kasiowan ngando ja ko tulintjuo-mai." Awoja ang kasiowan ngando ēm baja itu nimatu'tulo wo an somoi-mai itu, si Tjawulusan tulino-mai i Ēndo; sia winio-mai i Ēndo, akar i mantango-mai am bawo in tana'. Makaantang-ai am bawo in tana' si Ēndo, ēng kuanao a si Tjawulusan: „E Kawulusan, ambisa si ro'ong pēngēnto-ngēnto'an?" Sumowato si Tjawulusan: „Sapaka ēn do'ong paēnto-ēnto'angku itu ja am puruk i tjuntung Wulur i Maatus." Numuwu' si Ēndo: „Tuma'ne-ta'nei, e Kawulusan! sa an doro'o i tjuntung iitu-sa, ja kumua-mai wo ko ilēpok(ē)kuoka ambitu." Tani'tu sera mēmaja-maja'. Ja pareke-rekenēno am puruk i tjuntung itu sera, si Tjawulusan ilēpoko i Ēndo, wo sia winean ka'i i Ēndo in tjala' aipumpun ang kalula. Itjatēka'-mai am bawo in tana' si Tjawulusan, ja pailēkēnao, sapaka si sa'ut pinaali-alina-mai itu ja aweano se'ena. Siituoka mitjonao iusēw si sa'ut itu an do'kos in dano am pēngalēle'an i tjalona Tengker, wo ng kuana: „Tēlu ngando ko maitju pailēkēn, ja kēlio lalaina."

Awoja an somoi-mai itu si Tjawulusan mangeo mēta'up wo si Tengker, ang kara-karapi i maali-alio-mange im pēsi, wo ng kuana: „O kaloku! sapaka ěm pēsime si mange niereku itu ja kinausuiangu, anaitu ambia'io.” Numuwu'o si Tengker, ěng kuana: „Sama', kamang an iitjo, e kaloku, en si pēsi aitalamu itu kinausuianukē', wo kamang an iitjo pa'pa'an ko ja ra'itja maindo ataku, tanu in ta'ar(ě)ta, ta'an kita ja ma-indokē' ka'i tanu tow mēkalo.” Tani'tu si Tjawulusan ra'itja nimaindo ata i Tengker.

Tēlu ngando an somoi-mai iitu, rumojoro toja'ang se Tengker in ambalesa, pa'pa'an si pēnana'ana, makangaran Wujalaka, ja wērupe' nimakaere toja'ang. Ja itji'it in tjanaramēn sa wo rumojor toja'ang, karēngana si toja'ang isero-mange am palēmboian. Awoja pareke-rekenēno i Tjawulusan in do'nao malēle' se Wujalaka i mēinang, sia numuwu' ěng kuana: „Ra'itja re'e winela si Tjawulusan, sa ra'itja tumumpa-mai ěn uran im batu akaro itu ěng karēpēt.” Ja ra'itja tu'u nimaure-ure, tumarepe'-mai tumumpao-mai si uran im batu akaro itu ěng karēpēt, iaka-akar se Tengker in ambalesa karapi i toja'ang nimarunuto. Awoja, upusoka i Tengker i nimatēnēmo in uran si toja'ang, ja ita'tak(ě)nao-mange ěsa lalaina in sa'ut an sa'ut i Tjawulusan wo isimbēl(ě)na a se mēinang, wo sera marengo-mako am bale. Lumangkoio-mako im bale i Tjawulusan se Tengker in ambalesa, tēngonao-mio' sera mēsimbēl i lalaina in sa'ut. Siituoka rumojoro-mio' sia, wo kumi'ito-mako isera. Ja am baleoka i Tengker sia numuwu', ěng kuana: „O si tjaninde'ku tu'u-mai, e kalo, aitjatambi-tambisa kamu wo nituma'tak-ai i lalaina in sa'ut paēme-ēmengēngkukē'? Sumere kua'a kamu sawo si seio ěn tow makasa'ut am baja in am bawo in tana' tanu iaku, ta'an en tani'tu, kamu in ambalesa karēngana maindoo ataku.” Sumowato si Tengker, ěng kuana a si Tjawulusan: „Kumi'it re'en in itjawēndumukē', ja iwarengkukē'-mitjo.” Numuwu'o si Tjawulusan: „Sama', ta'an sawo itu ra'io ipakaki'i-tji'it(ě)mu, kaapa itu ra'io tumow, ja karēngana kamu e maindooka ataku.” Ja iwarengo tu'u-

mitjo i Tengker ẽ lalaina in sa'ut, wo itu mitjona topokẽn wo itulus(ẽ)na a si tina'takana in iitu. Wo si Tjawulusan marengo-mange am balena. Ja kamang si Tengker nilumang-koio-mako, ẽng kuano i Tjawulusan: „Ra'itja re'em binela aku, sawo ra'itja sumẽdang-ai si sẽndang rẽpẽt!” Ja itji'it im pangilẽkan i Tjawulusan, ra'itja nimaure-ure sumẽdango-mai si sẽndang rẽpẽt, iaka-akar i nilumẽngkangoka ẽn tana'. An somoi-mai itu, mitjoo pailẽkẽn i Tjawulusan si lalaina in sa'ut si pinaali-ali-mitjo i Tengker itu ja nimawẽlẽso, wo itu kembu-tẽna-mai wo paalina-mako a si Tengker. Itjatẽka'-mako sia, ẽng kuana: „Serenu-mai ẽn anio', e kalo, sawo itu ra'ipe' nimapẽra! Ẽn iitu en da'io aipakaki'i-tji'it(ẽ)mu, ja tumo'tol in tarepe' kamu in ambalesa ja atakuoka. Ta'an eng kamu ẽ lumẽkẽpe' im pẽli'i, ja weangkupe' kẽntas siow ngando, wo sa nimalẽkẽpo ẽn siow ngando, kamu maio ang kamaku.” Nimapo'o-po'owo-mio' in se Tengker in ambalesa ja ataoka i Tjawulusan. Makaapu-mako ẽn siow ngando, se Tengker in ambalesa timboiẽno e Kawulusan ataeraoka.

2. Sapaka ẽ ngaran i pẽnana'an i Tjawulusan itu ja Pinantula. Pira-pira ngando an somoi-mai iitu, ẽng kuano i Tjawulusan a si pẽnana'ana wo se atana: „Sapaka kita, ja mamangker(ẽ)pe', anaitu kita sumosor(ẽ)pe'-mitjo am Pẽlas.” Tani'tu sera maja'o wo ng kalula pinumpunan in tjala' iwe'eo i Tjawulusan pawion i Tengker. Awoja ang kapẽruaano i lalan maange am Pẽlas sera, palingano i Tjawulusan ẽn an untẽp in tjalula ja aweano ẽ maame', ta'an itu ra'itja iwe'ena an deken. Ja itjatẽka'-mange an Ẽlas, sera mailẽk sapaka si tjuntung iitu ja talos karẽgẽsan, iaka-akar ẽ lalaina in tjaju ruma'mbas ra'itja itjaẽnto', ta'an mẽla'u-la'us ipatelew in dẽgẽs.

Tẽluo ngando sera n ambitu, pa'pa'an in da'itja makatang in utin, sera tumintjaso n ambitu, wo mẽros-ongẽ. Sumumpak-ongẽ si ẽsa rojongan sera, ja sera mẽnto'o ambitu, wo wuka'an i Tjawulusan si tjalula pinumpunan in tjala'. Pailẽkẽnao sapaka n ambitu ja awean ẽsa toja'ang tuama. Awoja si toja'ang iitu ra'ipe' kinawẽrẽnan, tanupe' se kawok

tēkek. Siituoka sia itjēsoto-mai i Tjawulusan, wo sia saputēna in aroro'. Ngārananao si toja'ang iitu ja Kariso, pa'pa'an si toja'ang iitu ja limu'ut(ē)kē' in tjala' i mēriso-risor in tjalula wo mamuali. Ngarananao ka'i ēn ambitu ja Winērēnan, pa'pa'an ambituo ng kinawērēnan i Tjariso. Se Kawulusan in ambalesa wo se toja'angera kara-karapi e ataera nimēnto'o nimēwale ambitu. Ja mawangko'o-mai si Tjariso, kamang sia in do'onao matawoi, sia mapaema' kaapa mapaindo sēngo ipēnganēngona. Katare-tare aiindo i Tjawulusan sēngō wulu'd, kumarua sia nimapaema' si Tjawulusan ēsa sēngo uwasei.

Sapaka si Tjariso, ja pinēwangko' i Tjawulusan karapi e anak(ē)na ulit, anaitu sia nimaindokē' tanu kaakaran e anak(ē)na i mētuari. Awoja ēng kakēli e anak e Kawulusan in ambalesa karapio i Tjariso ja uwalu ēn tuama wo ēsa ēm bewene. Ē ngara-ngaran e tuama itu ja: Maengkong, Pēra-ta'sitj, Tēmu-wa'tang, Tēmu-a'kēl, Tēmu-watu, Kaparang, Kariso wo si ēsa tuama ra'io kailēkan ē ngaran. Ē ngaran i wewene itu ja Sumpawene'. Ja ēn tawoiēnera i mētuari ja tumalun, wo n ipatangka'era se sēra' in talun ja nga'ngak, iserao ē nimaindo tanu asu ipēngangasuera.

3. Kaindo-indono-mai a si makasa se Maengkong i mētuari nimuntēp in talun, ja sera mēta'up wo si tona'as e Manarow am puruk i tjuntung i Lokon. Ja ambituoka, sera welesēn i Tona'as, ēng kuana: „Sapao ēng kaakoaniow i maunē-unēr in talun, ēng kamu n da'itja wana sapa-sapa paali-alin?” Sumowato se mētuari: „Ulit, kami ja ra'itja wana sapa paali-alin, ta'an sawo pangambutēnu, ja tarepe' itjaturu' a mitjo sapa si ipēngatangka'ami se sēsēra'an.” Numuwu' si Tona'as, ēng kuana: „Sawo tani'tu, ja ituru'-mai an iaku sa sapa si ipēngatangka'miow se sēsēra'an.” Siituoka iru'ndu'erao se nga'ngak ipawali-waliera rumagit im baja se asu ipawali-wali i Tona'as e Manarow. Pailēkēna-mako se asuna im pinakaragito wo pinakapateo e nga'ngak, ēng kuanao an isera: „Mēkiampung tani'tu kawangko' an itjamu i Mētuari, pa'pa'an waja se asuku ja pinakapateo e nga'ngak ipawali-walimiow.” Wo ng kuanao

ka'i a se Mětuari: „Sa itjasale'miow i Mětuari, ja mēkaloo tare kita.” Sumowato se Mětuari: „Sama'!” Siituoka ěng kuano i Tona'as: „Ang kasiowan ngando ja kamu im baja monge am baleku, wo kamu weangkuoka sapa-sapa a se wěnduku maindo tu'ura im pēkaloanta.”

Makaapuo-mako m baja se nuwu' itu, ja sera mētalitjuro. Tani'tu ang kasiowan ngando se Maengkong i mētuari tumi'iro wo monge mēta'up wo si Tona'as e Manarow. Awoja itjatēka'-monge an do'ong sera, ja nimēla'u-la'us(ě)kě' a lesar, ra'itja nimēla'u-la'us am bale i Tona'as. Ja si Maengkong sia nitjumaraitjě' si tjarai ipěngauntěp(ě)na in talun, karai la'indong. Ja si tjarai pinēkaraina in sera i nimēta'up wo si Tona'as itu, ja aiwe'enakě' kinarai i Pěra-ta'sitj. Ja kailėkan-ako i Tona'as sera i Mětuari ja a lesaro, sera angenao-mai. Mangeo-mai si Tona'as ja nimindokě' si Pěra-ta'sitj, pa'pa'an isiakě' ě mēkarai in tjarai lo'or, wo se akar iitu aieke i Tona'as am baja se tow; ja si Maengkong aitjawe'e-mange am bale i maěsa-ěsa. Ambituoka sia ěng kuanao a si Maěsa-ěsa: „Sawo si Ra'a masale', ja pēkiinangěngkuo tare ko.” Ĕnta'an sumowatoka si Maěsa-ěsa, ěng kuana: „Itu ja ra'itja ro'na mamuali, pa'pa'an sapao tu'u ěm pēkiinangěnu iaku, en aku n tow malěngelěngi.” Sowatěno i Maengkong ěn iitu, ěng kuana: „Ra'itja sapa e Ra'a, ta'an asal aku aweangka pěngala'usan-ai sawo aku masale' mai ambia.” Siituoka ki'itano i Maěsa-ěsa ěm pangilėkan i Maengkong. Ja makanoka sera im běngi, si Maengkong mui a si Inang(ě)na, ěng kuana: „E Ina'! sapao ěn tu'ura in tjasija'an i Tona'as ambia, iaka-akar sia akaro itu ěng kasija'?” Numuwuo'o si Inang(ě)na, ěng kuana: „Ĕng kinato'tolana-mai wo masija', itu ja kala'.”

Rua ngando an somoi-mai iitu, ipēkiumungo i Maengkong ěm baja se tuarina, wo ng kuana: „Wawa'ando kita ja mange luměle', janta'an kinaialian-ange in tjaraina lo'or si ěsa wo si ěsa.” Tani'tu mawawa'andoo-mio' sera i Mětuari mangeo luměle', wo makalėle'-mako, sera sumawėlo lumo'o-lo'or, wo sera marengo am bale pěngěnto-ngěnto'ana si ěsa wo si ěsa.

Ja itjatëka'-mange am bale i Inanga si Maengkong, ja ng kuano i Maësa-ësa an dekena: „Sapaka re'e si mëngënto-ngënto' am baleku ja wona' re'e ësa kolano; eng ka'itu-itu sia mëkarai im bateng?” Numuwu'o si Maengkong: „O Inangku! iakuo si mëkalo wo si Tona'asiow i Manarow, ënta'an sapaka si Tona'as ja nimësea'kë' ë nimai i makin-ange iaku a lesar, sia nisumere' si mëkarai i lo'or, anaeitu sia nimakintjë'-mange si Përa-ta'sitj.” Siituoka mangeo itjua i Maësa-ësa a si Tona'as, ja in sapaka si tjalo i Tona'as ja aitjawe'ekë'-mange am balena. Ja palingan-ako i Tona'as si nuwu' itu, sia manga-ja'ka'o-mai, wo si Maengkong angenao-mai, wo ipakawalina-mange am balena.

Awoja ang katëluan ngando kamang se Mëtuari i maumu-umung am bale i Tona'as, ja si Maengkong numuwu', ëng kuana a si tjalona: „O kaloku! ituru'o-mai in tarepe' ëm baja se mamuali pëkalointa in dua!” Ja siituoka tumo'tolo ën si Tona'as tumuwar im baja se wënduna iwe'ena maindo tu'ura im pëkaloinera si Maengkong; ënta'an mande in tani'tuo in tjakëli ën aiompër, si Maengkong mëngure-nguresekë', ëng kuanao: „Sa itjësot-ai i tjalo si tu'ura im bëndumu ro'na kami rumeso ambia.” Am pa'pa'an in da'itja iwe'e i Tona'as ëng kala', ja ng kuano i Maengkong a si tuarina: „O Përa-ta'sitj, ote, iëpe' mainde' kita winelaka, ja isonop-ai ë laur akar se wale anio' in itjalëntut!” Siituoka ëng kuano i Përa-ta'sitj: „Sa aku wo winelaka, ja tarepe' sumonop-ai ë laur, se wale-wale anio' itjalëntut!” Awoja ra'itja nimaure-ure an somoi-mai iitu makoo sumonop-ai ën ta'sitj iaka-akar waja im bale ja mawole-woleoka. Pailëkën-ako i Tona'as in sera ja mara'itjao, ja itjësot(ë)nao-mai ëng kala', wo ituruk(ë)na si Maengkong.

Siituoka iwarengo i Përa-ta'sitj ën sonop wo waja im bale ja aitjawareng am paënto-ënto'an i ësa wo si ësa. Makaapu n tëlu ngando an somoi-mai iitu, ja se Maengkong i mëtuari marengo an do'ongera, ta'an sera nimaja', nitjumi'itoka i lawanan. Maio an dojongan Sariow sera, ja si Maengkong

mitong ɛsa watu, pinatitjan gio rua amo. Sumumpak-ai i lua'an in dojongan in Dano-wangko' sera, ɛng kuano i Maengkong a si watu pinitong(ɛ)na: „Sapaka ko, ja itɛla'ukuo ambia, maindo paapo'an e tow ambia!” Pailɛkɛnao-mio' si watu iitu ja nitjumuresekɛ'.

Siituoka sera maja'o wo maawo-awo-meko in Uwuran. Ja iserao ɛ ningumara-ngaran-eko a se pinɛlangko-langkoiera-meko, tumo'tol an Sondakɛn wo se ngara-ngaran akar-eko itu. Itjatɛka'-meko an Uwuran sera, ɛng kuano ka'i i Maengkong a si watu rua amo: „Sapaka ko, ja itɛla'ukuo maindo paapo'an e ambia.” Makaapu ka'i-mio' ɛ nuwu'na ja pailɛkɛnao-mio' ɛm batu nitjumuresekɛ'. Siituoka sera sumosoro-mai, kumi'it-ai in dojongan in Dano-wangko'. Awoja itjatɛka'-mai am pɛsupuan in tana' e Sondɛr wo se Kawangko'an, sera makalingao wara' sama' ambitu, anaitu sera mɛnto'o mɛwale ambitu; ja si watu rua amo itu ipasɛkerao ambitu mamuali paapo'anera, si amo ɛsa aisaru-meko, si ɛsa aisaru-monge in tana' e Sondɛr. Ja ɛ ngaran i pɛwaleanera itu Tombara'an. Maja'o pira ngata'un sera ɛn ambitu, ja sera sumosoro-mange a mongena in do'ong e Kinali, wo sera musɛw kan-im-bawi ambitu, en se wawiera ja wau'mbano ambitu. Awoja si ni-usɛwanera in tjan-im-bawi, ja ningaranan e tow tumbal-ai in tarepe': Pakaimbawian. Awoja waja se pɛnamunera ra'io nitjumi'it isera ja nimaindooka-mako sɛra' in talun. Se wawi nimaindo wio'o, se meong nimaindo meong i lulu, se asu nimaindo laku, se sapi nimaindo tu'a. Sumoro'o sera n ambitu, ja sera mange nitumo'or wale am Bawona.

Awoja, kaindo-indono-mai sumosoro am bale wɛru si Maengkong, sia tumowa im baja se po'ow(ɛ)na kuman mɛwali-wali am balena, ta'an ma'an ɛsa an isera ja ra'itja nimange. Ja siituoka ɛng kuano i Maengkong an atena: „Itji'it kamu in tani'tu, ja pailɛkɛniowoka.”

Awoja sapaka si rano pinangaasuera am puruk i Lengko'an, ɛ ngarana Rano i Mokei, ɛn iitu rano kɛli muli-ulit, malɛmboi a nisumaru-mako. Si rano iitu ningaranan in tani'tu,

pa'pa'an iitu pinokeitjé' i Maengkong ang karapi in ésa nuwú', wo itu lumēmboi. Maio a si makasa si rano iitu aité'tép' i Maengkong rior(ě)na wo tumintjas ěn a si pinēwalean itu. Awoja mate-mako si rano iitu, sia mulengo-mai si warang wo mēros-itjo; ja n an di'it i momongan wo n tamor winerenanao mēkele sangapokol in tjaju wo mēnēngko-nēngkor in iitu, iaka-akar pēmasa-masan e po'ow(ě)na sia mēngēnto-ngēnto'kē' ambitu, pa'pa'an sera ja mēlinga-lingakē' in tengena in tamor wo momongan. Ja itjatēka'-mitjo an tēmbir i lour sia, ja pailēkēnao, sapaka si tuariera wewene maki'i-tji'it(ě)kē' an somoina. Siituoka kuanao an isia: „Sapaka ko ja ra'itja toro maki'i-tji'it iaku, ta'an mēnto'kē'-mio' ambia.” Ta'an sowatēnao sia, ěng kuana: „Ra'itja tani'tu, ta'an iwaja-mai aku é mēngi'ingit in somoimu.” Siituoka ěng kuano i Maengkong an isia: „Indono-mange ěng kala'ku, iwe'ekuo iitjo, asal ko wo mēnto'kē'-mio' ambia.” Tani'tu sia mēnto'o-mio' ambitu, ja isiao é makasuru-mai se tow i Rēmbokēn. Wo si Maengkong sumakeo-mange a si warang wo moleo. An unēr(ě)naoka i mawole, ja pailēkēnao-mio', sapaka si warang pasake-sakeana, ja niulērano. Siituoka ěng kuana: „Waja se ulēr itjamu ja maindo waja witjo'.” Anaitu, é lour in Tondano ja pēngaindoan se witjo'. Itjatēka'-mitjo am paantangan i ěndo sia ja musēw in tawa'ang wo ng kēri'it im beñe', itu ipēngatowana in dēgēs wo n uran in daki.

Kaindo-indono-mai, pailēkēn-ako e po'ow i Maengkong in sapaka sia ja nitumintjaso, ja sera tumintjaso ka'i ěn am Bawona wo mēros-ako. Ngarananerao ěn iitu: Tinajonan, kumi'it in aiweren kaapa aitajon i Maengkong wo sia tumintjas ěn ambitu. Itjatēka'-mio' a lopa'na sera ja ésaan-ange a se pēnana'an e po'ow i Maengkong nimakaere ésa toja'ang wewene. Siituoka sera masēngo ambitu. Kamang si toja'ang iitu i mio'o luma'un-ai, ja sera rumesoo ambitu wo mako. Ngarananerao si niasēnganera: Nila'unan, kumi'it in si toja'angera i nimala'uno ambitu, am pa'pa'an sera in ure-urean nimeñto' ambitu. Ra'itja tajang ěm binaja'anera-mako, ja sera

mënto' wo mema' lawi. Kamang i nimaarëngo ën tëtëmburan, ja sera rumesoo ambitu wo mako. Ngarananerao si niakoanera iitu: Ērëngën, kumi'it i lawiera in tia'kë' in da'itja nimaarëng wo sera rumeso n ambitu. Nitumi'ir(ë)kë'-mako tojo' sera, ja mënto'o ka'i wo kumua i mema' wale. Awoja wajape' in dua ën ari'i watu niema'era, ja sera rumesoo ambitu wo makoo. Ngarananerao ka'i si niakoanera iitu: Ari'i, kumi'it se rua watu aipasëkera ambitu. Mëmaja-maja'o-mako sera, ja mailëko sangatu'ur in tjaju tēkek, wo itu indonera wo iusëw. Kamang si tjaju iitu i nima'muto, ja sera rumesoo ambitu wo mako. Ngarananerao si a niusëwanera si tjaju tēkek iitu: A'mut, itji'it si tjaju tēkek aiusëwera ambitu in tia'kë' in da'itja nima'-mut wo sera rumeso n ambitu. Makom an tumëngoo-mio' i Nimanga, ja sera mënto'o wo kuman, ta'an maere-ereoka rano inamoan sera, ja ra'itja wana. Sapaka n ambitu, ja watu waja. Siituoka indonerao-mai ëng kala' paali-alinera wo itu tondëkënera-mio' in tutune, wo ng kuaerao: „Karëngan a si watu iitjo tarepe' kumësot-ai ën dano.” Siituoka kumësot-ai ën dano a si watu itu wo nimakaele-eleitjë'-mio' i nimakainamo waja sera, si rano masëring iitu mëtio-mio'. Ngarananerao ën a si tjinananera iitu: Niamoan, kumi'it in sapa ë nimamuali ambitu. Tani'tu sera meneto im bawa'ja' kaapa i lalanera wo mëngako-ngako, akar in tuma'up i lawanan wo sera nirumuru ka'i-mako i laur, iaka-akar iserao ë mako nitumani' wo ni-maindo tow i Mongondow. Ja iserao ë ningumaran-eko a se ngara-ngaran makaruru i lawanan tumo'tol am Benang akar i Mongondow. Nimakaapuo.

104. Kukua an doro' e rua Mëkalo.

A si makasa ja si ésa nimange an umana, an tëmbir in talun. Itjatëka'-mange sia, ja munëro in uma, pailëkënao ën an tëmbir in sëndi niindoano e wio'o ën tande. Awoja wëndu-naoka i niindoano e wio'o ën tande, ja marengo tare sia.

Am baleoka sia, kata'neianao in sapaka si tjalona ja makakolowit. Siituoka ja mangem a si tjalona sia, wo ng kuana:

„E, kalo! wean-ai iramën kolowit aku.” Sumowato si tjalona ng kuana: „Ro’na makaere, ta’am bo’o italamu, en sa itu italamu, ja ma’an pira ën isawël(ë)mu ambitu, ja tio’o aku, ta’an ko ja itjaatao an iaku.”

Awoja paalinao tu’u ng kolowit, wo sia ra’io nitumuli-mange am bale, ta’an nimëla’u-la’usoka an uma; kinauma’anao-mange se wio’o ë maindo in tande. Siituoka pilotanao si ësa. Mangenaka ilëkën, ja nimaja’kë’. Aipangënto’naoka i mando-mai wo ki’itan. Mando tu’u-mai, ja ki’itanao. Am pa’pa’an in tajango ëm binaja’an, ja sia marengo am bale, nimëla’u-la’us-ange a si tjalona. Sumisilo sia ng kuana: „Mangekuo tu’u pinilotan kawëngi si wio’o, ta’an nimaja’kë’, ja airapinao ng kolowit.” Sumowato si makakolowit, ëng kuana: „Mande ën iitu aitin-tjas(ë)nao, ja ra’itja mawëndu aku, em pa’pa’an ën ta’ar(ë)ta ja karëngana ko atakuoka. Ta’an ko ja weanguke’ ëndo mange mangere in iitu. Sa n iitu ra’io kaereanu, ja ra’io mareng-ai am balemu ko, ta’an mëla’u-la’usoka-mai an iaku.”

Siituoka mangenao tu’u ki’itan, pëngi’i-ngi’itana akar in itjasumpak-ange im pulisan. Pailëkënao ja nimuntëpo ambitu si wio’o, ëng kuanao an atena: „Karëngana sia em pëtutu’ungku i muntëp-io’ ambana.” Muntëpo tu’u-mio’ sia, ra’itja ure sia ë nimawaja’-mio’, ja itjaleako-mio’ an tëmberan. Mëmaja-maja’oka sia, ja mailëko i lumet in tow. Siituoka sia makata’nei im bona’ re’e tow(ë)kë’ si tinura’na. Mëmaja-maja’oka sia, ja sumumpako-mange im bale i maësa-ësa, wo pëwueiën i Maësa-ësa: „Tow ambisa ko wo?” Kuanao: „Tow a mange n Dërëgësan.” Ëng kuano ka’i i Maësa-ësa: „Masale’ ko ëm pëkianakëngku?” Sumowato sia: „Masale’.” Awoja aitjaki’it tu’u tani’tu nimaindoo anak i Maësa-ësa sia.

Ambituoka sia, ja sia malingao-mange si maangko’, ëng kuanao: „Si sei si maangko’ anu mange?” Kuano i Inanga: „Si anak i Tjapala pëkembu-kembutan in tutune.” Mueio ka’i sia: „Ro’na mange milëk aku?” Kuano i Inanga: „Ro’na, ta’an sa pëwueiën ja kumua-mange in tow a mange n Dërëgësan.” Mangem tu’u sia, pailëkëno i Tjapala wo pë-

wueiëna: „Tow ambisa ko wo?” Kuanao: „Tow a mange n Dërëgësan.” Kuano i Tjapala: „Sapa ën aiënu ambia?” Sumowato sia: „Mëkitë'tëk.” Mueio ka'i si Tjapala: „Masale' ko ën të'tëkangku?” Kuanao: „Masale', ta'an mangepe' muei-ai a si Inangku aku.” Mangem tu'u sia, wo itjuanao a si Inanga en sia m pëtë'tëkan i Tjapala. Kuano i Inanga: „Sawo ko pëweanera aroro', ja tio'o indo-indon, en iitu sa a mange n Dërëgësan, ja lalaina in tjaju.” Siituoka mangem tu'u sia, wo pëwueian ka'i i Tjapala sa sia masale'ka ën të'tëkan. Sumowato-mange sia i masale'. Janta'an kuanao: „Sapa ën iwe'e i Tjapala iaku?” Kuano i Tjapala: „Sawo kakembutanu si nitumune si ana'ku, ja itjamuo in dua ë mëkasaru.” Mangena tu'u kembutën. Pailëkënao tu'u ja si tjolowit aipilot(ë)na, wo itu iema'na. Tani'tu sera in dua mëkasaruoka.

Nimaja' ta'un wo sera makaere anak. Kamang in do'nao iwaja si toja'ang, ja sera kumuao a se po'owera in sapaka sera ja mapuli'-mange an Dërëgësan, mange milëk-ai se po'ow ambitu. Wo sera kumuao rua tuama maali-mange in tëwi'. Siituoka ja sera mio'o tumi'ir-ai wo si toja'angera wiono-mai i Inanga. Itjatëka'-mai am ba'mba'na im pulisan sera, ja mëmbuso-mai si wewene isia wo së rua tuama maali-ali in tëwi'. Mailëkoka si Inanga si Toja'ang, ja sia rumëngkeko wo kumësei ën am pawio-wion i Inanga, akar in aitjawëkar. Awoja sera nimaindoo wio'o. Wëndunaoka in si ana'na wo si pënana'ana nimaindokë' wio'o, ja iangko'nao-mange in tana'i: „Milë-ilëk-ange sa mawaja', sa malinga se maangko', ja maja'-mange an isera, tio'o maja-waja' an da'itja paangko'an, en ambitu m ba'kës.”

Jawoja ën tëwi' pinaali-ali e rua tuama nimaindoo paser. Indonao-mai ëm paser iitu, wo sia mangem an do'ong, nimë-la'u-la'us(ë)kë' mange a si tjalona, ang karapi i maalio-mange in tjolowit wo m paser itondong, en ureo. Janta'an si makakolowit ra'io ki'im mindo in tjolowit, ta'an masale'o tare muntëp atana, en sia nimasija'o. Awoja aitjaki'it tu'u tani'tu, in si makakolowit(ë)kë' ë nimaindo ata, akar(ë)na im bo' mate.

105. Kukua an doro' i Maengkong.

Awoja si Maengkong wawean tĕlu po'ow(ĕ)na. Sapaka sera ja nimaema' pĕli'i nimĕngki'i-tji'itan. Ja si Maengkong pinĕnowa-nowaera nimalili im pĕli'iera. Lawi'oka i Maengkong in sia im pinĕnowa-nowaera am pĕli'iera, kua'a ka'itje' sia ĕ mapĕ-li'io wo towana se po'ow(ĕ)na lumili im pĕli'ina. Janta'an da'itja wana se po'ow(ĕ)na ĕ nimasale' nilumili. Siituoka kuano i Maengkong: „En aku n aitjaritjakĕ' re'en e po'ow(ĕ)ku, ja tumintjaso ka'itje' re'en aku. sumengkoto.” Siituoka indonao-mai si warang pinapĕli'iana, wo sakeana in sumengkot. Sapaka si Maengkong ja makawale a Lengko'an. Moleo sia ja nimitjo; a mitjooka ng Ka'kas sia, ja mawuruko si warang pasakeana wo niulĕrano. Jawoja ruma'mbaso se ulĕr, ja nimawitjo', ĕn ate pĕra nimawatu.

Mĕsungkulo sia wo si Watu-Wilĕs wo sia mĕnto' am balena. Am pa'pa'an si warang i makawuruko, ja ng kuano i Watu-Wilĕs a si Maengkong: „Ko karĕngan tumintjaso wia!” Kuano i Maengkong: „En aku m papatintjasĕnukĕ' re'e wia, ja karĕngan tumumpa si uran dĕpĕt.” Ra'itja tu'u ure tumumpao-mai si uran dĕpĕt, akar in sinonop ĕm bale i Watu-Wilĕs. Siituoka mĕkia-kiampungoka a si Maengkong si Watu-Wilĕs, ĕng kuana: „Ampung, e Po'ow(ĕ)ku, mĕnto'o kua'a-mio' am-bia.” Siituoka ja mĕna'o n uran wo si Maengkong mĕnto'o ambitu. Siitukĕ'.

106. Sisil an doro' i ngaran ipakua im Binolean i Maengkong.

Sapaka si Maengkong in tumo'tolo mole, ja sia nimindo kaapa nitumu'us ĕsa patu'usan a langit. Si tu'us pĕngasereana itu si tjulo-kulo' tanuoka kambung nirumĕnet-eko ang kato'ora, pĕngailĕkĕn in tjumĕrĕm. Ĕn iitu pĕngatu'usana kaapa pĕngasereana tana'i: sawo itu katu'usanao-mange, kaapa pailĕkĕna ka'i-mange, ja sia moleo, wo sa ĕn iitu nimuntĕpo, ja sia mĕnto'o ka'i ĕ mawole. Siitu ĕng kakuku'an wo si tanu kambung anio' patu'ulĕn: Winolean i Maengkong.

**107. Sisil a si wa'ilan Talimpongo, sinisil i Wilhelmus
Piri', Sulu'un.**

Kaindo-indono-mai sapaka si Talimpongo ja nimanguma wo makaere wene' kēli. Am pa'pa'an tani'tuo in tjakēli im bene' kinaereana, ja sia mēkisembong se tow sangaro'ong tumango im bene'na. Siow ngando se tow ē nitumango im bene', ja ra'ipe' pinakatango, iaka-akar se pinēkisembong ra'io ki'im. Siituoka si Talimpongo tumowa se sērēm tē'tēkan; weana si wawi tjantong, wo tangonera ēm bene'na. Awoja tangono e sērēm ēm bene' aité'tēk isera. Ja siow(ē)pe' ka'i ngando wo itu pakatangonera. Pakatangonera-mako ēm bene' iitu, ja iwe'eo i Talimpongo si tjantong a se tinē'tēkana wo sia sēra'anera. Ja sumēra'o se sērēm, ra'itja kinawean se walina. Wo sera wean i Talimpongo pe', siow ēm binalu'. Mēlēpo sera, ra'itja ka'i kinawean se walina wo makaapuo. Mangilēk(ē)pe' wo'o se sērēm, ja ra'io wana n iwe'e i Talimpongo. Am pa'pa' in da'itja nimakawe'e in tē'tēk si Talimpongo, ja maēmbowo se sērēm iaka-akar sia sinēra'era.

Sia'io ē niupu'an-ai wo se tow, sa maumung im bene' am paupu'an an uma, ja maangko', makua in tana'i: „Awēsane'-mai wene', e wa'ilan Talimpongo, en ambituo se wawi patenami.”

**108. Kukua an doro' i Wuwun Sewe, sinisil i Joel
Lolowan, Tonēlēt.**

A si makasa ja si Wuwun Sewe mawaja-waja' an tēmbir in dojongan. An tutuw(ē)naoka i mawaja-waja', ja sia mailēk in sangatu'ur ēm bulu'd makato'or mawaja-waja' an dano. Numuwu'o si Wuwun Sewe an atena, ēng kuana: „E si tjaininde'! kua'a itu si wulu'd anio' maulu-ulur tanana. Sapaka kua'a re'en ēn ilē-ilēkēn in iana?”

Siituoka pētutu'unao i milēk kumaapa in duma'da. Manga-ja'ka'o-mai sia, em pa'pa' pinailekēnao-mio', sapaka si wulu'd mawaja-waja' iitu, ja nitumow a litjur i sawurang, wona' aitura'

i sei-wo, wo itu tumow. Maio ěn upus an ate i Wuwun Sewe, iaka-akar im pinětutu'na, kumaapa pinangimbaliana i nitju-mebut ěm bulu'd a si sawurang iitu. Ang kasomoian-ai iitu am pa'pa' si sawurang měndamo in tjasama'an tinawoi i Wuwun Sewe an isia, ja sia tuma'ar a si Wuwun Sewe, ěng kuana: „Sapaka ko wo se surumu, ra'io pěngatongko-tongko'an e sawurang akar inania wo mange. Ita'ar(ě)ku an iitjo wo se surumu tana'i: sa ko, kumaapa se surumu, luměwět in dojongan, kumaapa mamongkor, ja ririor wo tumumpa an dano karěngana kumua-mange in tana'i: sapaka aku, ja anak i Wuwun Sewe, kumaapa tana'i: sapaka aku, ja suru i Wuwun Sewe, luměntut-ai, en aku ja luměwěte'.”

Itji'it in sisil, ěn iitu ja ulit nimamuali, ja in sa se anak, kumaapa suru i Wuwun Sewe luměwět in dojongan, ja sera numuwu' tanu si aita'ar i sawurang a si Wuwun Sewe, wo tani'tu ěng kerior luměntut-ai se sawurang, wo iseraoka ě mamuali teteera.

GROEP IX.

109. Kukua an doro' i Lumimu'ut wo si To'ar, sinisil i Winuwus Mondow, walian an Talikurang (Tompaso').

Kumi'it ing kukua e makakukua, ɛsa watu unei am pɛta i laur; kawangko' i watu unei itu kele wale wangko'. Sɛmpa'-anɛm in sɛmpa' si watu unei itu ja mamuali ɛsa lumelempad makangaran kokoak. Lumimu'utɛm si watu unei itu, ja mamuali ɛsa tow si limu'ut i watu unei itu. Ngaran i tow itu Lumimu'ut, am pa'pa' sia limu'ut(ɛ)kɛ' i watu wo mamuali-ma'i tow. Jawo si Lumimu'ut tumulung an dangka' i watu unei itu. Makatulungoka a si watu unei itu sia, ja sia ma'ila' si kokoak ma'tele-tele'b maali-ali in a'ngo pɛla. Jawo si Lumimu'ut mɛ'buei a si Kokoak, ɛng kuana: „E Kokoak, am-bisa si a'ngo iana wo indonu?” Sumowatoka si Kokoak, ɛng kuana: „Niindoku a mange an Taure.” Siitukɛ' m pinalinja i Lumimu'ut, ja sia numuwu', ɛng kuana: „Sa itjasale'nu, ipaka-wali aku a si tana' itu.” Sumowatɛm si Kokoak, ɛng kuana: „O ja kumi'it-a'i iaku.” Maja'am seila in dua, mange a si ɛsa tana'; kawangko' i tana' itu ja kele ni'u, si tana' itu ja aitumow an unɛd in ta'asik. Ambituoka seila in dua, ja numuwu' si Kokoak a si Lumimu'ut, ɛng kuana: „Ja si anio' si tana' niindoangku si a'ngo pinaali-aliku, ngaran i tana' anio' ja Taure.” Siitukɛ' ɛn ainuwu' i Kokoak, ja sia tumele'bɛm, itɛla'unam ambi'itu si Lumimu'ut.

An somoi-a'i itu, ja si Lumimu'ut kumompol sangakompol ɛn tana', wo sia maja' mareng-ange a si watu unei kinamualiana. Itjatɛka'-mange ambi'itu sia, ja iwɛkar(ɛ)na-mio' si tana' pina'kompo-kompol(ɛ)na. Tɛ'tɛrɛnam ɛm binɛkarana si tana'

itu, ja ro'na tempa in sangapulu' ngarëpa. Mando-ma'i kinaa-wësanëm ëng kawangko' i tana' itu. Wo mando ka'i-mai kinaawësanëm tajang ëng kawangko' i tana' itu, wo itu mënga-wë-ngawës ëng kawangko'. Malëkëp ën siow ngando ja makadëm si tana' itu ë ma'bangko', am pa'pa' si tana' itu ja airumi'itëm moko, monge, meko, mitjo i langit. Të'tërënëm i Lumimu'ut ën ipakasa am bawo in tana' ja tangkelas(ë)pe', anaitu sia ja mareng-ange a si tana' kinompolana si tana' itu. Mangem ambi'itu sia, ja sia kumompol ka'i-mio' sangakompol ën tana' wo si tana' itu aiwuras(ë)na an ipakasa am bawo in tana' anio'. Tumowëm si aiwuras(ë)na itu ja se waja tu'dana ing kaju wo waja im baja pa'ila'an am bawo in tana'. Pa'ila'anëm i Lumimu'ut se waja im baja itu, ja sia mema' ësa kuntung a meko an do'kosa in Dano i Apo' makangaran Wulud Maatus. Jawo si Lumimu'ut sumoso'd a si kuntung itu, wo sia mange tumulung am puruk i kuntung itu. Ambi'ituoka sia, ja sia sumaru-moko in dëgës a moko wo ma'i, wo si Lumimu'ut makapëndam in owak(ë)na ja owakoka lewo', kumaapa wa-atënëm. Anaitu ën dëgës a moko wo ma'i ningaranan awa'at am pa'pa' si rëgës itu ja nima'at si Lumimu'ut.

An somoi-a'i itu ja si Lumimu'ut makaanakëm ësa anak tuama, ngarananëm i Lumimu'ut si toja'ang itu To'ar. Sapa-këm si To'ar ja ipa'sandokë' ëng kapatow(ë)na. Mamatu'am-a'i si To'ar ja sia nuwu'an i inanga, ëng kuanëm: „E To'ar! mangere-mange pënana'an ko.” Siitukë' nilinga i To'ar a si Lumimu'ut, ja sia maja' lumitji'd in tana'. Marengëm-a'i si To'ar a si inanga, ëng kuana: „O Inangku, aku ja ra'itja nimakaere pënana'an.” Sumowat si Lumimu'ut, ëng kuana: „E To'ar, tëwasën-ange si tu'is anio' wo rimpëran-io' ën tu'da wo n tëmpok wo isoka'd-a'i a iaku ng kalambot i tu'is iana, wo ka'i ko maja' lumitji'd in tana', kumakan ko maja', ja aku kuma'biri. Sa ko wo mësungkul ësa wewene kagioku ë giona, ja soka'dën-ange i tu'is anio'; sawo soka'dën-ange wo si tu'is(ë)kë' anio' ë lambot, ja ra'itja iaku, karëngan isia si mamuali pënana'anu.” Ja maja'am tu'u seila in dua, kumaapa

mëtalitjurëm seila; kuma'biri si Lumimu'ut, kumakan si To'ar ë nimaja' lumitji'd in tana'. Ja mëmaja-maja' tu'u si To'ar ja sia mësungkul ësa wewene, pa'ila'anam si wewene itu ja kele i gio i inanga. Ta'an soka'dëna-mange i tu'is pinaali-alina, ja si tu'is(ë)kë' ë lambot e si wewene itu. Si Lumimu'ut kua'a si wewene itu, ta'an si tu'isoka ë lambot, am pa'pa' si tu'is itu ja ailumulungkë' sumawël ën tëmpok, mandepe' nirimperan sumama-sama'. Pakasoka'dën-oko i To'ar si wewene itu, ja numuwu' si To'ar, ëng kuana: „Ja iitjo tu'u re'e si wewene aitjua i inangku indongku pënana'an, am pa'pa' ja si tu'is anio' ë lambot e ko.” Ja a si ëndokë' itu seila in dua mamualim ambalesa, kumaapa tumo'tolëm ë mamale. Jawo seila mareng-ange am Bulud Maatus; ambituoka seila ja ma-kausuiëm anak makatëlu siow. Isusudëm i Lumimu'ut wo si To'ar ën ënto'an i ësa wo si ësa a se anakeila in dua, wo n tawoiën i ësa wo si ësa.

1. Si Kumokomba' ja mange nimënto' ang kapëpëduaan in tana' bo langit. Tawoiëna ja makomba' se tow mamuali malëngei kumaapa mamuali masija', wo se tow pogo' kumaapa lowid karëngan ikomba' i Kumokomba'.

2. Marëndor.

3. An dangka'-mange i Kumokomba' ja si Lintjambene'.

6. An dangka'-mange i Lintjambene' ja si Tantumoitow. Tawoiëna ja ma'tointok se tow ipakaanak(ë)pe'-ma'i. Ësa kine toja'ang mamuali, ja katara wueiën i Tantumoitow si toja'ang itu, ëng kuana: „E! ambisa n ikasale'nu tointokangku itjo?” Sa si toja'ang sumowat kela'i: „Itointok-ange a mangena”, keleitukë' ëng kerior ja itointok-io' i Tantumoitow an tu'da ing kaju, ta'an sa si toja'ang sumowat kela'i: „Itointok-io' a mio'-na”, keleitukë' ëng kerior ja itointok-ange i Tantumoitow a mangena. Uanu itu: sa itointok an tu'da, ja pogo', ta'an sa itointok an tëmpok, ja si tow itu lowid. Anaitu se ikita in tow ja ra'itja toro wo mindo ing kasale'an in ësa.

5. An dangka'-mange i Tantumoitow, ja si Maruaja. Sapa-këm ën tawoiëna, ja ma'susui a se mamuali walian, ma'deindeng.

7. An dangka'-mange i Maruaja, ja si Karema. Ĕn tawoiĕna ja pute wo n tawoiĕn i Maruaja.

8. An dangka'-mange i Karema, ja si Mawati'. Ĕn tawoiĕna ja ma'bati' kumaapa ma'sani se tōw.

9. An dangka'-mange i Mawati', ja si Makaoro. Ĕn tawoiĕna ja tona'as ma'susui a se mamuali tona'as, ta'an sia ja ra'ipe' isia n tona'as wangko', sia ja tona'as ma'seising.

4. An dangka'-mange i Makaoro, ja si Mamarimbing. Ĕn tawoiĕna, ja tona'as wangko' kumaapa tona'as wawarangan. Anaitu isia si tu'dana ma'susui a se mamuali tona'as.

10. An dangka'-mange i tona'as Mamarimbing, ja si Mangantes.

11, 12. An dangka'-mange i Mangantes, ja se rua makangaran Manembo wo si Manalinga. Se rua anio' ja nimĕnto' a mange ang kawuwungan, a mange an aisumungkarĕm i langit. Ĕn tawoiĕn i Manembo ja mĕnĕ'tĕ-nĕ'tĕr se tow ma'dombit wo se tampĕmu'is wo se mĕmaja-maja' matawoi ing kalewo'an, kumaapa se kokĕre, se rampas. Waja se tow itu ja pĕnĕ'tĕ-nĕ'tĕrĕn i Manembo, ĕndo wo m bĕngi, wo matĕ'tĕr ka'i se tow matawoi ing kasama'an. Ĕn tawoiĕn i Manalinga, ja sia mĕlinga-linga, kumaapa mĕma'a-ma'an se ma'nuwu' i lewo' wo mĕlinga-linga se ma'somo-somoi i nuwu' lewo' a si kakelena tow. Kelekĕ' kine kinarĕmbusan in ĕsa wu'uk ĕng katatenge, ja palingangkĕ' i Manalinga.

Akadĕm e sangapulu' bo rua anio' ĕn aiwe'e-mange i Lumimu'ut a mange an dangka'. Ta'an se anakeila walina ja aisusudeila a ma'i am bawo in tana', wo a mio' an dĕrĕm in tana'.

13. Si Soputan nimĕnto' kumaapa nimĕna' a si ĕsa kuntung makangaran Soputan, itji'it i ngaran i Soputan; si kuntung itu ja a mekona e Tompasso'.

14, 15. Si makangaran Tineintĕman wo si Rampa'-bene' ja nimĕnto' an do'ong in Tombasian an Dangka'. Seila in dua ĕn ipĕ'bale e Tombasian.

16. Si Rumĕngan monge nimĕnto' a si ĕsa kuntung nga-

rananëm si kuntung itu ja Rumengan, itji'it i ngaran i Rumengan.

17, 18. Si Mandeï wo si Lumalënei ja kara-karapi i Rumengan.

19, 20. Si Mamarinsing wo si Watu Wilës ja mitjo nimënto' a mitjona e Langowan.

21, 24. Si Makaliwe wo si Manopo ja moko nimënto' a moko an sëndi in tana'. Seila in dua ma'be'e-ma'i in dëgës a moko wo ma'i.

23. Si Lolombulan ja nimënto' a si ësa kuntung ngarananëm si kuntung itu ja Lolombulan, itji'it i ngaran i Lolombulan.

22. Si Kalangi' ja nimënto' a mio' an duru in ta'asik a mongena e Pondang. Si Kalangi' kine matiei in ta'asik.

25. Si Kopero ja nimënto' am Pinë'betengan.

26. Si Pangemanan ja mitjo nimënto' a mitjo ang Kema.

27. Si Ritjekean ja nimio' nimënto' a mio'na in tana', kumaapa an darëm in tana'.

110. Sisil an doro' i Lumimu'ut, sinisil i Winuwus

Tumbol a Lëilëm.

1. Sapaka si Adam wo si Ewa tow katare, ja sapaka sera makaanak ëpat, tëlü ën tuama wo ësa m bewene. Se tuama itu ja si Tombalanda, si Tonsina, si Tompapua wo si wewene Lumimu'ut. A si makasa si Adam wo se tëlü anak(ë)na tuama nimange am pake'etan. Maja'o sera, ja itjatëka'o-mange am pëngëlëpan, ja iru'ndu'o se kume'et. Ja lumukuto si Adam, wo mangënto-ngënto' se nitjume'et. Maio sera, ja tumò'tolo mëlëp. Mëngëlë-ngëlëpo sera iaka-akar i malanguò si Adam. Awoja in sera ë marengo am bale, ra'io ki'im maja' si Adam, ta'an sia nimapaangkeoka a se anak(ë)na. Siituoka se mëtuari mënuwu-nuwu' sa tambisanera si amangera. Numuwu'o si Tompapua, ëng kuanao: „Iakuo mio-wo.” Sumowato se po'ow(ë)na: „Sama'.” Siituoka wionao-mai si amangera wo sia mëpe' maja'. Mëwaja'o sia, ra'itja aitjati'ir, pa'pa'an in utër. Am pa'pa'an sia in da'itja makakëte, ëng kuanao: „Ja itja-

**111. Sisil an dorō' i Lumimu'ut, sinisil i Lumēmpow Lumanaw,
tona'as ang Kiawa.**

Sapaka n dior ja ra'ipe' wana sapa-sapa, wajao in tana' wo se tu'u-tu'ur in tjaju wo se pēto-towēn wo se lumelempar matele-telew am bawo in tana' wo ē laur, ka'i se rojongan wo se sēsēra'an an sāngkum iitu, se sama' pasēra'an wo se ra'itja pasēra'an.

Awoja mamuali a si makasa, sapaka n ta'sitj ja mērēgē-rēgēs akar i masēmpa-sēmpa' rēpēt wo mēlēwa-lēwa'. Siituoka ja tumanako ē lēwa' nimamuali tanu wulinga' i tjo'ko' akar itu in tanuo nilukutan. Am pa'pa' itu in tawio mēte', ja sumēmpa'o-mai rēpēt ēn ta'sitj, ja itjatana'o-mange an dangi'ngis si lēwa' itu a si ra'io kaamboan-ange in sēmpa' ja mēte'o ambitu sia wo sia mēmile-milei ambitu akar i mako'-koro ēn dangi'ngis. Siituo n tanu patawunēna akar in sia in do'nao lumojon. Am pa'pa' sia i malojono, ja sia lumojono-mange a si linoindong i ēsa tu'ur in tjaju. Pailēkēnao ē ngelu' ja matari'ndi' wo itu pēnēpa-nēpana im ba'mba'. Siituo ē nimamuali tanu susu aipēwangko' isia, akar sia i maampeto. Jawo mēngangai ēn ēndo wo makaawēso ng kawangko' wo ng kētēr(ē)na. Ja mawaja-waja'o sia, ja sia mailēk im pinēte'ana, ja in iitu lēwa'; siituo wo sia ningumaran an owa'na Lēwa'. Sapaka sia ja wewene. Ja mande sia i mawaja-waja'o wo malawa-lawano, janta'an mawarenge'-mai an dēna'na.

Kaindo-indono-mai a si makasa sia nimange a lua'an i ēsa rojongan in dano tēwang wo sia masēngo ambitu. Ambituoka sia, mare'omo wo sia mēpe' mēlēp; ēpe'anao ēn ta'sitj ja maasin, si rano tēwang ja tēwang. Ēng kuanao: „Sia'i re'en ēn do'na paēlēpēn.” Ja mēnto'o ambitu sia. Ēm pakanēna ja se pongkor an tatagasan, mēnisi-nisir se tēpu', akar sia i marēna'oka ambitu. Ambituoka sia, ja maio ēn sēndang in timu wo mala'ung si ēsa kuntung wo makatawi-mai isia. Pailēkēnao kinaritjētano si ēsa wa'tang wo sia sumusut-ange ambitu. Makasigilo sia, ng kuana: „Wona' re'en sama' se pongkor ēm

patunun e sĕra'an." Siituoka ja tununao se pongkor wo ĕpe'-ana ja nitumĕpu'o-mai wo ninumanamo-mai. Akar-ai in iitu ja patununaoka se pongkor pasĕra'ana. Maĕnto'oka ambitu sia, ja malawa-lawano am tĕmbir in ta'sitj wo sia mailĕk rua watu mĕngero-ngero' paero'on in sĕmpa' wo mĕmĕrisoran wo mĕlimu-limu'ut. Ja pailĕkĕnao si makalengket am batu ĕsa tow nilu-mengkete' am batu ĕm pusĕr wo indona ĕm bombonga in simbĕl wo ipo'ow(ĕ)na im pusĕr, wo sia iwalina-mange an tu'ur i tjaju kinawangko'ana. Awoja sia ka'i maĕlĕp a si ngelu' pinaĕlĕp i Lĕwa', akar ka'i sia i makawangko', si Lumimu'ut, wo akar in do'nao mawaja-waja'. Am pa'pa' si Lumimu'ut i mawaja'o ja sia iwalio-mange i Lĕwa' am parĕna'ana a lua'an in dojongan in dano tĕwang. Ierao i Lĕwa' ĕ ngaran i Lumimu'ut ja To'ar am pa'pa' sia tino'or i Lĕwa' wo pinĕwangko'na.

Awoja makaure makaawĕs ĕng kamatu'a wo ng kĕtĕrera in dua. Ja makata'neio sera wo ng kuaera: „Sapaka kita ja sumalu in dojongan." Siituoka sera maja'o. A mangeo ĕ lĕ'mbak in dojongan sera mailĕko ĕsa lopa'na sama' wo sera mĕnto' ambitu. Ambituoka sera ja mĕmito-mitong in sampel, wo ipĕ-me'mbe-me'mbelera im bombonga in simbĕl wo sa nimalĕme'o, ja itu pĕmo'o-mo'owĕnera ka'i im bombonga kĕte, wo se lalaina in simbĕl itu ema'anera tĕrung paĕntoan. Ureo in ure sera ĕ maĕnto' ambitu, ja mĕnuwu-nuwu'o sera, ĕng kuanerao: „Itjitaŕ tare in dua ĕ mamuali mĕkasaru." Ja tani'tu sera in dua mĕwali-walio, wo mĕnuru-nuru-mai se tow kĕli.

**112. Kukua an doro' i Anak i Ĕndo kaapa Anak i Lĕwa',
sinisil i Lumĕmpow Lumanaw, Kiawa.**

Kaindo-indono-mai mualin-ako i Tjasuruan ĕn tana' wo ĕ langit wo ĕ laur, ja itow(ĕ)nao-mai m baja se kaju-kaju wo n duku-rukut, am bawo in tana'. Nimamuali a si ĕndo makasa i nimatimu, ja n ta'sitj sumĕmpa'o. Jawoja an sangkumoka iitu ja awean sangali'us ĕ lĕwa' maojo-ŕow an ta'sitj. Kasomoian-ai iitu n sangali'us ĕ lĕwa' itendelo-mange in sĕmpa' an dangi'ngis a lawanan. Ure makaure ĕ lĕwa' iitu ipĕne'se-

ne'se'-mange in sěmpa' ang katana'an. Ja kasusur in ěndo ě lěwa' iitu pěněnda-něndangan. Siituoka kua'a ě lěwa' iitu maero-ero'o, wo mēmuri-murir-io' an dangi'ngis. Kasomoian-ai iitu n a si lěwa' sangali'us iitu kamualiano ěsa toja'ang tuama.

Katare-tare si toja'ang iitu ra'ipe' niměngakan sapa-sapa, wajape' i niměngaělěp i ngelu'. Anaitu sawo sia maarēm kaapa mare'om, sia maame'o wo tumindo'sar wo ingangana m ba'-mba'na. Siituoka mangeo tumari'ndi'-mai ě ngelu' a lalaina i ěsa kaju an da'ter(ě)na, wo itu tuměna-mio' im ba'mba'na wo lo'motěna. Měna'-mako n de'om(ě)na, wo ka'i sia niwěsuo, ja sia mēněso ě maame'. Jawoja kususur(ě)na i maarēm kaapa mare'om, ja sia maame'o wo tumindo'sar-ai, wo m ba'mba'na ingangana wo ti'isan-io' i ngelu' a lalaina i tjaju an da'ter(ě)na.

Tani'tu sia niměngulu-ngulur tani'tu, akar(ě)na in do'nao matulung, kětěrěno mawaja-waja'. An tutuw iitu, itji'it in tjasědangěn, ja awean ěsa wa'tam bangkěr an da'ter im paěnto-ěnto'ana kinaapian. Pědaměna-mako ěm paso' ěn an da'ter im ba'tang kinaritjětan iitu, kua'a sia n duma'tero-mange in iitu wo ngumenge. Ureo tojo' ěn an somoi-mai iitu, si toja'-ang iitu mawaja-waja'o a lawanan. An uněr(ě)naoka i mawaja-waja' pailěkěnao awean ě maero-ero' ipasěmpa'-mai in sěmpa' an dangi'ngis. Siituoka sia mēmto-mitongo isera, wo sera irapina-mange isuwa' an api. Kasomoian-ai iitu sera ka'i indona wo sěra'ana. Ĕpe'anao marae kanumanam pasěra'an. Wo sia mēmto-mitongoka se pongkor ipasěmpa'-mai in ta'sitj patunum bo pasěra'ana. Tani'tu sia niměngulu-ngulur tani'tu, akar(ě)na i nimawangko'o wo nimakětěrěno.

A si ěndooka makasa sia maja'o nitumaja-tajang-ange. Mawaja'oka sia, itjasumpako-mange i lua'an i ěsa rojongan kě-kěliam batu. Ambituoka sia makalingao ěsa toja'ang maame' an uněr e watu-watu kěli. Siituoka sia mēmto'o-mio' mēpa'a-pa'an mainde' ambisa si toja'ang maame'. Makatulungoka sia, ěng kuanao: „Wona' re'e awean tow měngěnto-ngěnto' ambia.” Siituoka pangusuiěna si toja'ang maame'. Pailěkěnao ja ěsa toja'am bewene ailimu'ut im batu, em pa'pa' ěm pusěr(ě)na

makatampenge' am batu. Wo itēwa'na tētēwa' wo isu'up(ē)na im pusēr i toja'ang ailimu'ut im batu iitu. Anae siituo ng kawalian, sawo se tow mitong toja'am bēru, tētēwa'kē' ēn ipapo'ow, kaapa ipasu'up im pusēr.

• Jawoja makaapu-mako m baja se itu, ja si toja'am bewene kē'kēpēno-mai i Anak i Lēwa' kaapa i Anak i Ēndo wo iwalina-mange am paēnto-ēnto'ana, wo pēwangko'ona akar i nima-wangko'. Ngaranano i Anak i Ēndo si wewene iitu ja Lumimu'ut, em pa'pa' sia ailimu'ut(ē)kē' im batu, kaapa ka'i Kariso, em pa'pa' sia nimamualitjē' am batu nimēmēndisoran. Ang kasomoian-ai si Lumimu'ut niindoo i Anak i Ēndo mamuali pēnana'ana.

113. Kukua an doro' i Lumimu'ut, sinisil i Joel Lumēnta' ang Kanonang.

Kaindo-indonoka-mai si Lumimu'ut sia ja limu'ut(ē)kē' im batu wo mamuali-mai tow. Makawangko'o-mai sia, ja sia mēere-ere tow kakelena, janta'an da'itja wana ēng kaereana. Siituoka sia lumi'tjirō in tana'. Makali'tjir-ako in tana' sia nisumampēto-mai an tino'tolano i nimaja', ra'itja ka'i nimailēk tow sia. Siituoka sia sumaruō in dēgēs in awa'at. An somoi-ai iitu sia makapēndamo in owa'na ja wa'ato. Wo sia tu'u makausuio-mai ēsa anak tuama, janta'an kētow(ē)nakē'-mai mapala'us aitjatala. Anaitu sia ngaranano i Lumimu'ut in Tumēndoring am pa'pa' sia nimamualitjē'-mai tani'tu an owa'na, ra'itja tinawoi in tow, wo sia ka'i mapala'us(ē)kē' aitjatala, en isiao re'en si Apo' nimema' in tana'.

Awoja am pa'pa' si Tumēndoring sia aitjatalakē', siituoka sumaruō ka'i in dēgēs in awa'at si Lumimu'ut. An somoi-ai iitu sia makausuio ka'i anak. Ngarananao sia To'ar. Mawangko'-mai si To'ar, ja itjasale'o i Lumimu'ut in isiao maindo mēnana' an isia. Siituoka iindoo i Lumimu'ut saraw kēlet wo ituruk(ē)na a si To'ar, ēng kuana: „Sapaka ko ja lumi'tjir in tana', sa ko mēsungkul ēsa tow wo mēwēka-wēka'ka ka'i in tanana, ja isiao ē maindo pēnana'anu, indono-mange sia, wo ipakawalio-

mai." Siituoka tu'u ja mǎja'o si To'ar nitjumahan ẽ nimaja'. Kamang in sia ra'io pailẽkẽn-ange, ja indono ka'itje'-mai i Lumimu'ut si saraw kẽlet aiema'na kapute i paali-alin i To'ar. Wo sia mǎja' nitjuma'mbiri ẽ nimaja'. Ra'itja tu'u nimaja' pira ngando, ja sera mẽsungkulo. Pailẽkẽn-ange i To'ar si mawẽka-wẽka' in saraw kẽlet, ja ng kuana: „litjoo tu'u re'e si maindo pẽnana'angku." Indonao-mai sia, wo ipakawalinao-mai am balena.

Mamaleo tu'u si To'ar wo si Lumimu'ut, makausuio-mai anak sera ja makasiow siow. Katare-tare n anakera ja si Tu'ur, si Tjalat, si A'mut, si Tjawangkalan, si Limbawa, si Sumimbawa, si Simbawa, si Pongilatan, si Tjila-kilatan. Se siow anio' ja wajakẽ' in ẽsa ẽ nimaingo tow, si Tjawangkalano isia, se akar iitu nimaingo waja kasuruan am bawo in tana' wo a mange ẽ langit. Ẽ muali in iitu ja tana'i: Sapaka sera i mẽtuari ja aiema' e matu'aera kakanẽn pẽwali-walianera in tjuman, niakiro waja n tu'tu', karapi in sẽra' aiompẽro waja, mawowoka-mai numanam. Rumempoto-mai sera i mẽtuari, si Tjawangkalan mapala'us nimukẽr, se po'ow(ẽ)na wajakẽ' i makatẽintẽng. Ẽng kuano i Tjawangkalan: „Kua'itu kamu ra'itja kuman?" Ẽng kuano e po'ow(ẽ)na: „Pailẽkẽnu kami ra'itja mawẽsuo!" Pẽngẽtẽ-ngẽtẽrangkẽ' i Tjawangkalan in da'itja makan sera, sera kua'a re'en pawẽsungkẽ' im bow(ẽ)na in tjanẽn. Janta'an maẽmbowo si Tjawangkalan, ẽng kuana: „Tina'kongon kua'a re'en aku!" Siituoka ng kuano i amangera: „Ko, e Kawangkalan, maindo tontumuwu' rumarages se po'ow(ẽ)mu, ta'an dumẽ'ndẽ-rẽ'ndẽm ka'itje' ẽn am baja-waja, eng ko pawangkalan-ai e po'ow(ẽ)mu in tjamang."

An somoi-ai iitu maindoo tu'u kasuruan se po'ow(ẽ)na, en si Tjawangkalan sumuruo-mai se tow am bawo in tana'. An somoi-ai tja'i iitu makausuio anak si To'ar wo si Lumimu'ut, siow: si Manembo, si Tjumokomba', si Manalinga, si Mapatitj, si Muntu-untu, si Makarawis, si Pasiowan, si Tantumoitow wo si Maroaja. Makapitupe' siow se anak i To'ar wo si Lumimu'ut, ta'an da'io kailẽkan ẽ ngaranera. Ja an sangkumera kausuian si Marẽndor wo si Lintjambene'.

114. Sisil an doro' i Lumimu'ut, sinisil i Albert Mamésa, Sondër.

Sapaka si Lumimu'ut, ja ra'itja tow a si tana' iasa, janta'an sia tow a mange ën Sina. Sapaka sia ja anak i Ramonatas, sera ja uwalu ë mëtuari, pitu n tuama, ja isiakë' ëm bewene. Makaere waja-mako tawoiën se po'ow(ë)na tuama ja itjatëla'uo-mio' ang kama e matu'a sia. Awoja siituoka sia kumuao a se matu'a in tana'i: „Iema'-mio' londei aku, en aku ja mangerepe' tawoiën.” Sowatën e matu'a, ëng kuaerao: „E, ra'itja toro, em pa'pa' wajao iitjo ëm bewene, anaitu ambisa tare m pate-anami, ambitu m pateanu.” Sumowato ka'i si Lumimu'ut, ëng kuana: „Sa aku wo wera'aniow ang kasale'angku, ja ra'io tare kailëkaniow ëm pateangku.” Siituoka ki'itano i amanga ng kasale'ana. Aneitu iema'nao londei.

Talali' pinakaema'o ë londei, ja itjuao a si Lumimu'ut, wo sa sapa waja se itjasale'na isake a londei. Sumowatoka si Lumimu'ut: „Ja ra'itja wana n isake a londei, wajakë' se titinanëmën.” Awoja ipakasake waja-mako se itu, ja sia moleo-mai.

Katare-tare n sinumpak(ë)na-mai ja a mange n Ambong, ta'an pailëkëna-mako im baweano tow n ambitu, ja sia mëla'u-la'uso-mai an Tarinate. Sia ra'itja ka'i nitumuli ambitu, em baweano ka'i tow. Siituoka sia mëla'u-la'uso-mai a si tana' iasa. Ja sumuwa'o-mai sia a mitjo n Tutungën wo sia sumosor ambitu im boondo. Ambituoka sia, ja sumere in am bawo in tana' iasa, pailëkënao ra'ipe' wana tëmbur mio' makësot-ai, tu'us in da'ipe' wana tow. Rumojoro sia n ambitu, ja lumi'tjiro-mako a mongena. Sumumpako-mako sia ja Manarow, wo sia lumi'tjir iitu. Pailëkënao tékek(ë)kë' ënto'ana. Siituoka sia moleo wo sia sumuwa'-meko a Lua'an. Ambituoka ja itumpanao m baja se a si londei iitu, wo sia musëw waja se tinanëm pinaalina-mai. Pailëkënao ën tinanëm ja mëgigioan, siituoka sia tuma'nei, wo ng kuana: „Karëngan em bawean ë nimema' im baja se anio'.”

Awoja siituoka ja ng kuanao: „Sa uli-ulit awean ë nimema' im baja-waja rumangka'-mange an iaku, ja wean-ai tjasaru aku.

Ta'an ěn iitu pangilěkěngku, iwe'e-mai mamualitjě' an iaku, wo ipapaipi-mai sà aku sumaru tambisa." Siituoka mangipio sia ja sumaru-mako in děgěs. Siituo wo n děgěs a makσ patu'-ulěnta in awa'at. Awoja siitu tu'u ng kini'itana; ja kapěnda-manao tu'u nimamualio. Makaanako-mai sia ja tuama. Ngara-nanao sia To'ar. Siituoka ja sia mangeo pěwangko'on i inanga a mange ě Manarow. Mawangko'o sia ja sera merao ka'i-mai a Lua'an. Ambituoka sera, ja si Lumimu'ut mindoo saraw rua, pinasio-siow ngalowas, wo ng kuana a si ana'na: „Ja si ěsa anio' kulunu, wo kita lumi'tjir in tana', ta'an sa ko maja', ja ipěno'to-no'tol in tana' ěn saraw. Tumalitjuran ko, iaku ěn suměndangan; awoja sa ko měta'up tow, ja isoka'd-ange ěn saraw pawěka'anu, en sa ra'itja niměpute, ja tow walina, janta'an sa niměputekě' ja iakukě' sia."

Awoja maja'o sera. Ja m piněsungkulanera ja a mako m Bulur i Maatus. Awoja měsungkulo tu'u sera, ja isoka'do i To'ar ěm běka'na, ra'itja niměpute wo m běka' i wewene aipěsungkul(ě)na. Siituoka ng kuano i To'ar: „Ja itjoo re'e si aita'ar i inangku maindo masiwo in tjaněngku." Sumowato si Lumimu'ut ěng kuanao: „Ja sama' re'e. Ja ambisa n ěnto'anta?" ěng kuano i To'ar: „Kita ra'itja wo měna' ang kapaso'an, anaitu kita mangekě' ang karěgěsan." Siituoka ja sera sumo-soro am Bulur i Maatus. Awoja sumuruo-mai sera in dua ja makarua siow, siow se tuama, siow se wewene. ě ngara-ngaranera ja:

- | | | |
|----------------|-------------------|-----------------|
| 1. Soputan. | 7. Ruměngan. | 13. Panulu'an. |
| 2. Rugian. | 8. Pinonto'an. | 14. Ginaringan. |
| 3. Manarinsin. | 9. Kariso. | 15. Kirai. |
| 4. Makaliwe. | 10. Lintjambene'. | 16. Wujalaka. |
| 5. Lolombulan. | 11. Maroaja. | 17. Sinendeman. |
| 6. Kalangi'. | 12. Rumintuwu'. | 18. Tumatular. |

Mawangko'o-mai sera, ja sera merao-mai a meko n tu'ur in tjuntung i Soputan. Ambituoka sera, ja ipěkiema'o i To'ar wo si Lumimu'ut siow ěn saroinsong, wo sera luměle' ambitu marua-rua. Awoja se měkalěle' iserao in dua ě maindo ambalesa.

Siituoka ja sera mēwetengo. Se Soputan nimēnto'o-mio' a si tjuntung iitu, se Manarinsin nimeko, se Kalangi' wo se Lolombulan wo se Makaliwe nimako, se Rumengan wo se Pinonto'an nimonge, se Kariso nimitjo, ja se To'ar nimarengkē-monge a Lua'an. Awoja an somoioka itu sera mēnguma-nguma, wo mēta'ne-ta'nei ra'itja kailēkanera sa si sei ēm paapo'anera, ja siituoka tumo'tolo ēm pēli'i sangawawaja' wo n sangawawaja', kumi'it im basaera. Siituo wo ipakua in siow mēruru ēn susui.

115. Kukua an doro' i Tow ailimu'ut im Batu, pinēngasisil i Mandei, Kiawa, a se pojo'na.

Kaindo-indono-mai si Watu ja nilumimu'ut ēsa tow. Sapaka sia ja tuama. Ja ēn ēndo sia mali'tji-li'tjir am bisa-wisa-mange wo mēnere-nere im baja, ja maio i mawēngi, ja sia mēna'o, wo tumēkēlo. Ja mandooka ka'i a si makasa in sia nimapoloo, ja sia mailēk ēsa wewene makatulung an da'ter(ē)na. Ja ra'itja ure sia makapēndamo in sala'sak(ē)na sangawiwi ja wineso'ano ēsa. Siituoka pēnigi-nigilēnao an doro' in iitu, wo ng kuanao an atena: „Sapaka re'e si tow anio' ja wona' sala'sak(ē)ku wo ema'an.” Ja mēpa'a-pa'aro sia wo si Wewene isia, ēng kuanao: „Ambisa ko wo mai?” Ja ng kuano i Wewene itu: „Aku ja aiwe'e-mai tjarapimu.” Sumowato si Tuama: „Sawo tani'tu, tambisa re'e kita?” Ja ng kuano i Wewene itu: „Sama' ēn tana'i: karēngana kita mindo mēkele ēsa ēn saraw wo pēputen ēng kalambot. Wo kita mētalitjur lumi'tjir in tana'. Sawo kita mēsungkul, ja am pinēsungkulanta, ambituo n taneanta wo n ēnto'anta.”

Jawo sera mindo saraw, pinēpute ng kalambot, wo mēta-litjuro sera lumi'tjir in tana'. Si Tuama nitjumahan, si Wewene nitjuma'mbiri. An unēroka i lalan, ja po'owano i Tuama ēn saraw(ē)na, wo sera makoo mēsungkul. Ja mēsungkulo-mange sera, ja pēputenerao n saraw wo pailēkēnoka ja ra'io pute. Ēng kuanerao: „Mande ra'itja itjita in dua nimēnta'aran,

ja itjitao in dua ẽ mamuali mēkasaru." Wo sera mēnto'o ambitu. Ja tani'tuo nimamuali ja in si ailimu'ut im batu nima-timomoro wo si Wewene sala'sak(ẽ)na wo ema'an.

116. Kukua an doro' i Tjarema.

Kaindo-indon katare-tare ja ra'ipe' wana n tow am bawo in tana'. A si ẽndooka makasa ja si Wa'ılan mapalimu'ut-ai si wewene ẽsa am batu. Ẽ ngarana ja Karema. Si Tjarema ja katare-tare i Wa'ılan i nimema'.

Awoja makailẽko-mai sawẽl si Tjarema wo si Rẽgẽs, ja si Tu'ur, kaapa Tu'd, kaapa To'ar. An somoi-mai iitu sera in dua mētalitjur. Si Tu'ur winean i Tjarema im bẽka' saraw sangarẽpa, wo maja' kumakan. Si Tjarema kuma'mbiri. Mētalitjuro sera, ja ng kuao i Tjarema: „Sa aku mēsungkul tow ẽsa maali-ali wẽka' saraw wo nitjumolẽk-ai a si sangarẽpa, ja sia ra'itja ana'ku." Tani'tu mētalitjuro tu'u sera. An sangkumoka i Tu'ur i mawaja', ja pungkutanao-mio' ẽm bẽka'na. Jawoja mēsungkulo tu'u sera am Bulur Maatus, wo soka'dẽn ẽm bẽka' i Tu'ur, ja nitjumolẽko-mai a si sangarẽpa. Ja ng kuao i Tjarema: „O ra'itja ana'ku ko! Itjitao tu'u re'e in dua se maindo mēkasaru." Jawo mamuali tu'u tani'tu, wo sera mēnto' am Bulur Maatus.

Makailẽko-mai sawẽl sera in dua, ja sumuru-mai se kěli. Ja kuměli-mako sera, ẽng kua'a sera mangereo ẽnto'am balina. Siituoka ja sera maja'o. Mēmaja-maja'oka sera, ja tumumpao-mai a lopa'na wangko' ang kalipētẽkan in tjowal wo n simbẽl. Itjatẽka'o-mai ambitu sera, ja tara'takoka n simbẽl, patẽn an in tjowal mara'mbas. Wo n ambitu ningarananera in Tumara'-tak. An tutuwera in ambitu, ja sera mawaja-waja', tumalun, mēlitag wo mamukẽt.

Jawo sera nimẽngawẽ-ngawẽso. Siituoka ja sera rumu'ndu'o ruru'ndu'an mangere ẽnto'am balina. Sera mange am Pinalin mēla'u-la'us ang kuntung i Soputan, wo tumumpa-mai ang Karondoran. Ngaranenerao n ambitu Kalawakan, en an da'ter in Tjalawakan in Soputan. Ẽn ang Kalawakan anio' ja

pəngənto-ngənto'an e kasuruan makangaran in Tjalawakan. Se Kalawakan anio' ja iserao se mawe'e-mai im baja-waja pausu-usuiən e tow am bawo in tana'. Sapaka se nimawali-wali an iitu, ja si Lolombulan, si Sopotan, si Manembo-nembo wo si Ruməngan.

Ure-ureanoka sera n ambitu, ja merao an Tumara'tas, ang kakəliangka ka'i in tjowal wo rangi'ngis mara'mbas. Ambituoka sera merao-mai a Linukutan i Ēndo. An somoi-mai iitu ja sera mēwetengo. Si Pana'aran nimənto'kə' an Tumara'tas, si Paəmpungən nimonge ang Kinilow, si Lintjambene' nimongemitjo ang Kema.

117. Sisil an dumoro' in tjinamualian in tana' i Maəsa, tanu in sinisil i Pangkei Ra'u, tona'as wangko' an Sulu'un.

Kumi'it in sisil e makasisil, sapaka se tow ang katare-tare ja awean təlu anak. Ēsa an isera in təlu ja si makangaran i Lumimu'ut. Ja a si makasa an tutuw(ə)na i mēwəra-wəra' ja sia nimindo in takoi, wo itu pumpunana in tana' akar i nima-wuta. Ja a si tana' iitu usəwano i Inang wo si Amanga i mēgigioan əm batuna in tinanəm, tanuo-mai im bene', tande, sesende'en, wo m bua'na in tjaju wangkər. Pakausəwanera-mako im baja se itu ən a si tana' iitu, ja iwəkarerao an takoi si anakera wo sia irojongera a laur. Awoja ure in ure si takoi iitu ə marojo-rojong a laur, pakoja-kojawən in dēgəs wo patako-takoiənoka in səmpa'.

Awoja angen-ai in dēgəs wo n səmpa' ja suməgao ən takoi, wo itu makaure makawangkər, makaənte' wo makautər, iaka-akar in iitu in da'io marojo-rojong am bawo in dano janta'an ən iitu makaəna'oka-mio' tani'tu, ra'io mareso-reso. Wo itu makawangkər, akar i nimaindoo əsa tana'; ja si tana' iitu ja tana' i Maəsa.

Awoja makaro'mbis-ako si tana' iasa, ja si Lumimu'ut sumoro'o n an tēmbir in tana', wo sia mange a nirumangka'-mange, mangere-ngere ənto'an an sama', akaran i mange mənto' am Bulur Maatus. Ambituoka sia, ja manəkəlo i maparəgəs-ako.

Tani'tu kaipolona-mai, ja ipaparëgës(ë)na-mako ën owa'na tanu im pinanëkël(ë)na. Siituo ng kinawalian wo sia mitong toja'ang tuama, wo sia ningaranana in Tumëndorin. Ja iserao in dua ë nimaïndo mëkasaru, wo sera nisumuru-mai se tow këli.

Ja sapaka se aisuruera-mai, itu ja katäre se makasiow siow, wo aisuruera ka'i-mai ja se makapitu pitu, wo kumi'it iitu, ja se makalima lima. Ja ng kumi'it ka'i isera, ja se makatëlu tëlu, wo ng kakaapuan, ja si Pëli'ian. Awoja isiao ë nimeke im pëpëli'in a se mangaapo'.

**118. Sisil an doro' e Suru i Ëndo, sinisil i Tjalangi'
Wokas, Kaju Uwi.**

Sapaka se nimasisil in anio', ja se mëngaeres tanuo-mai: si Momongan wo si Tajü' an Sondër; ën ang Kawangko'an ja si Wowor wo si Mondoringin, wo ën ang Kaju Uwi ja si Nua. Awoja kumi'it im pinasisilera an dumoro' e Suru i Ëndo ja tana'i:

Sapaka se tow katäre-täre a mai m bawo in tana', ja ng këmualiera itu ja ra'itja tanu in tjanaramën in tow, janta'an sera nimamualitjë' ang karapi i makakaja'ka'an itji'it in tinawoi i Ëndo, tanuo-mai:

Si Rarang; isiao n tow ang katäre-täre, wo sapaka sia, ningaranan in tani'tu, am pa'pa' sia ja rinarang(ë)kë'-mai i Ëndo wo mamuali tow.

Ja makaanako-mai si Rarang, ja si Lëwa'. Sapaka sia ja ningaranan in tani'tu, am pa'pa' sia ja lëwa'kë' in ta'sitj wo mamuali-mai tow, am pa'pa' in dinarang i Rarang.

Makaanako-mai si Lëwa' ja si Range; n doro'on i ngaran iitu ja wuaja; nunuwu'un e wuaja ja matana'i: „Sarurange i mata'." Sawo sera numuwu' in tani'tu, ja majat si tjarender. Awoja akaro-mai i Range wo mëngangai, ja se tow ra'io mëngamuali ang karapi i makakaja'ka'an, janta'an tanuoka im pëngakatow in tarepe' iasa.

Makaanako-mai si Range, ja si Siow-wean; isiao si mëngawe'e in tjëli.

Ja makaanako-mai si Siow-wean ja si Sosowela; isiao si soso in tjamang, soso im buaja wo soso in tjanən, winelakē' waja sia.

Makaanako-mai si Sosowela, ja si Tjila'pong; isiao si tampē-mu'is wo sēra'-tow.

Makaanako-mai si Tjila'pong, ja si Tombuku; isiao si mawuku im pēli'i, ipaēlēt sangando.

Makaanako-mai si Tombuku, ja si Wēros.

Makaanako-mai si Wēros, ja si Majun.

Makaanako-mai si Majun, ja si Molampai.

Makaanako-mai si Molampai, ja si Ērungan

Makaanako-mai si Ērungan, ja si Sambow.

Makaanako-mai si Sambow, ja si Tjoro'.

Makaanako-mai si Tjoro', ja si Runtu.

Makaanako-mai si Runtu, ja si Impurung.

Makaanako-mai si Impurung, ja si Pa'atēran.

Makaanako-mai si Pa'atēran, ja si Tende-liwun.

Makaanako-mai si Tende-liwun, ja si Tinaweng.

Makaanako-mai si Tinaweng, ja si Tjalangi', isiao si Adriaan Wokas.

GROEP X.

120. Sisil poarui kaapa poke'ke' an doro' e Rua Nimanamoi, sinisil i Ro'bot Rumokoi, Sondër.

Kaindo-indono-mai awean dua mëkarëtuk nimanamoi, ja makaereo sera tëlu n a'ngoan sëla. Ja mangeoka mëweteng serä, ja ra'itja kinawetenganera a si sangando, am pa'pa'an ësape' ë nimatëla'u. A si ëndo itu, ja wetengënera-mako e pëkëmun, pinaware-warengera tani'tu a si sangando, ra'itja kinawetenganera.

Maio i mawawa'ando, ja rumo'ango-mai si ësa tow, ja ng kuanao: „Sapa si pëwete-wetengëniow?” Kuanerao: „Ja ulang, ra'itja kawetenganami. Mainde' kami ro'na tawanganu.” Ja sera sowatëna: „Intjeru' saanu, ja tana'i: iitjo si anio', isia si anio', iaku si anio'.” Kuano e rua mëkarëtuk: „Ja, sa re'e wo'o ko nimai rior, ureo re'e wo'o nimareng kami.”

Ën doro'on in iitu: Tani'tu se longon, ëna' lëngeiën.

121. Kukua poarui kaapa poke'ke' an doro' e Rua Nimamësi, sinisil i La'o.

Kaindo-indonoka-mai se rua mangalitow mange nimamësi an tëmbir i Nimanga. Ja tëlu m pinësiera, tunturam baja. Ja rangka'o si ëndo, wo itjasale'era am baleo, wo mai ng kato'ora si ëndo ka'i sera tajango m binaja'an, anaitu mëna'o sera mëwetengo im pinësiera.

Awoja metengo si ësa, ëng kuanao: „Iaku si ësa, iitjo si ësa, si sei si ësa?” Siituoka ng kuano i ësa: „Iakupe' ë meteng.” Ja metengo sia, tanukë' ka'i si rior. Talali' wona' pina-kapiraanerao i mëwete-weteng, ja ra'itja itjaera an tanu si

wewetengan dirior, ja ng kuaerao: „Tambisantao si ěsa? itia'tao re'e sia?”

Ra'itja tu'u maure-ure kuměsoto-mai an talun si tow ěsa. Kuměsoto-mai sia, ja ng kuaerao: „Wetengěm bo'o-mai se pongkor anio', ra'itja makailěk kami měwete-weteng.” Sumowato sia, ěng kuanao: „Indon-ai wo wetengěngku.” Metengo sia, ěng kuanao: „Nio' ko, nio' ka'itje' ko, iaku sia'i.”

Ja mangaja'ka'o-mai se mangalitow, am pa'pa'an isia tani'tu in tjarior nimakaweteng.

**122. Sisil an doro' e Rua Ninumawu', sinisil i
Johanis Regar, Kapoja.**

Kumi'it in sisil e makasisil, ja sapaka, kine, sera in dua ja Ambong. Ja a si wěngi makasa sera in dua lumaur wo měnawu-nawu'. Janta'an ipakandondo waja in tělu ěm pongkor niindoera. Awoja kamang i mandoo, ja sera marengo, sumuwa'o-mange a lawanan wo meso'o i londei. Makaweso'-mako i londei sera, ja itumpao se pongkor en sera ja metengo. Siituoka ja ng kuano i ěsa: „Litjo sia'i, iaku sia'i, ja si seio si anio'?” Ja ng kuano i ěsa: „Kěmune' wo sawělěn i meteng.” „Ja sama' tani'tu”, ěn sowat i ěsa. Metengo ka'i sia, ěng kuanao: „Litjo sia'i, iaku sia'i, si seio ka'i si anio'? O inde', tambisantao re'en i meteng sera, e měngao-ngaot(ě)kě' tani'tu.” Siituoka ja ng kuano i ěsa: „Ja iakupe' ka'itje' ě meteng.” Awoja numawu'o sia, aweangkě' ka'i tjaot. Kuanerao: „Kěmune' ka'i wo sawělěn i meteng.” Awoja pěngasa-ngasarěneraka tani'tu, akar i nimileio si ěndo. Ja ra'itja nimaure-ure sera ro'angano-mai i ěsa tow malawa-lawan. Sumumpako-mai sia, ja sia mui in tana'i: „O, masapa kamu?” Se rua sumowat, ěng kuaera: „Kami tjawoondope' wo měwete-weteng se pongkor anio', janta'an da'itja ma'ulit, am pa'pa' si ěsa ra'itja itjasoma an tow.” Ja měke'ke'o lěmbi si nirumo'ang-ai wo ng kuana: „Ra'itja wěndu ě meteng isera ja.” Kuano e rua: „Ja me'e ko e! wo ilěkěnami sa tu'u tambisanu i meteng.” Siituoka ja

indonao-mai se pongkor wo inawu'nao, ɛng kuana : „Tana'iɛn : sia'i iitjo, sia'i iitjo, sia'i iaku.” Siituoka ja rumɛgao-mai in tje'ke' wo ng kuano e rua : „Ɛrow aku e! sa ko nimai rior, ureo re'e wo'o nimareng kita.” Kuano i tow nirumo'ang-ai : „Sapa kua'a wo, maio, en tia' makawu'ul se pongkor.” Ja sia mawaja' mɛnge'ke-nge'ke' lɛmbi, am pa'pa' i mata'nei in tja-mang(ɛ)na. Tani'tu ɛn siniwakan i sisil iitu.

123. Sisil an doro' e tɛlu Mɛkarɛtuk.

Kaindo-indono-mai ja sapaka se tɛlu mekarɛtuk anio' mange nimɛnto' im pulintja' paru'umɛn e wio'o. Awoja wona' tu'u kasapao im bɛngi maio si wio'o wo rumu'um. Palinan-ako i mapɛndam i maru'umo si wio'o, ja mangenao polon se rua, en sera ja tuma'ano. Makata'an-ako sera ja mɛkɛwito, ɛng kuaera : „Si ɛsao ɛ mɛnto' am buruk, se ruao ɛ mange rumu'ndu'-mai, janta'an sa merot ambitu ɛng kamang, wo'o iwaja.” Awoja maindo-indo-mako ɛ nuwu'era, mangem tu'u se rua. Kamang i mangeerao aiseip-ai ɛm paru'uman i wio'o ja sera mangko'o; kaiangko'era-mai, ja si wio'o mapala'us nitumintjas, nimakatɛna-tɛna i niowaran im pukɛt wo rumumpak. Rumumpako si wio'o, nimakaroro' re'en im pompang, anae mɛla'u-la'us aitjalɛsɛk akar in da'io mero'-mai. Ja maio si nimɛna' am pukɛt, mɛla'u-la'us nitumura' janta'an da'itja si wio'o ɛn tinura'na, nitumura'kɛ' re'en in tana'. Maio se nirumu'ndu' ja mueio, ɛng kuaerao : „Awo koi, tambisaka?” Sumowato si mɛna' an tali, ɛng kuanao : „Tuama tu'u, pinakasa, ra'io nimɛngkut.” Mueio ka'i se rua : „Awoja, wangkɛr(ɛ)ka?” Ɛng kuano ka'i i ɛsa : „Sapa kua'a, asa-asarano-mai se ula.” Siituoka ja sera in tɛlu rumomeio-mio' an tana' wo mɛnge'ke-nge'ke' am pa'pa' in sale', wo ɛng kuano i ɛsa : „O wana tu'u mange ɛng kamang(ɛ)ta in tɛlu, intji? Wajape' kendo'o itjita in tɛlu ɛm bawean tu'us am paere-eren a se itjita in sangaro'ong, en si amangera aweano kawajo, ja ka'itje' si ito'era aweano membe', ja kami siow se kantong, lopa'oka ɛ litjur, janta'an tana'i : kita mɛwetengo ɛn tawoiɛn ja, eng kita ɛ numono; si ɛsa

mindó mata', si ěsa kumariso api, si ěsa ě mindo wangenan." Awoja mĕnuwu-nuwu'pe' in iitu sera, ja si wio'o mio' tumo'or-ai, mapala'us aitjawĕkar ěn am pukĕt wo tumintjas. Siituoka ja tumĕkuro-mio' se tĕlu, ra'io tare wana ě mĕngkut-ai, jawo sera lumĕpĕto in tali; malĕpĕt in tali sera mĕnuwu-nuwu', ěng kuaera: „O inde' tu'u weta' kita e! pinapaewe-eweo tu'u mako im bio'o, e kaariman! ra'itja kua'a ěndo'o re'e tinĕna, ja ipĕngua-nguamu im pinakasa." Tani'tuo' ě nuwu' e rua, ja sera marengo am bale ang karapi in tape ra'io ipakakua.

124. Kukua an doro' e Maporapat maĕnto' in tande paindon e wio'o, sinisil i A. Tĕwutow.

Awean ěsa tow lĕngei ra'itja wana kailĕkan sapa-sapa an doro' im porapat, tinowa e maporapat mange ang karapiera, mange mĕnto' in tande paindon e wio'o.

Jawoja kumi'it in tjanaramĕn, ja pawetengĕn se mange mawĕtitj. Ja n ipakanuwu'era ipasaunakĕ', siituo ě nimange-mai wo sa maporapat rumu'ndu'-mange ma'an-ai si wio'o, itjuaerakĕ' i mange mĕndam kaapa mĕtitj. Tani'tuo' ě nimamuali a si tow lĕngei in airu'ndu'era mange nimĕtitj. Mangem tu'u sia, ja sia nimalingakĕ' re'e in aitjua e mawali-wali i mange mĕtitj. Anae sia mangekĕ' nitjumĕre i mĕmĕti-mĕtitj in tande am paindoan e wio'o, akar se wio'o ra'io mĕnge nitjuman, am pa'pa' pinawaja-waja'anakĕ' i nimapĕtitj in tande. Masu'ut-ako sia mĕmĕti-mĕtitj in tande, ja sia itjasangkumo im batu. Siituoka sia marengo-mange a lawi niĕnto'anera, wo polona se mawali-wali, ěng kuanao: „Ja tumo'oro, tumo'oro, ěng kinapĕtitjangkuo." Siituoka tumo'oro-mai se mawali-wali ang karapi i makĕwi-tjĕwitoka, ore palingangkĕ' e wio'o. Jawo sera tumu'tulo im pukĕt, en sera mangeo tuma'an. Ta'an dirior wo sera mange tuma'an, ja tumĕkĕle'-mio' tojo'-wo. Tumo'or-ai sera, ja kuaerao: „Tumo'oro, tumo'oro, mandoo re'e." ěn iitu ipakuaera in salak in owak. Tumo'oro-mai sera, ja mindoo-mai im pukĕt wo mangeo tuma'an.

Makata'an-ako sera, ja iru'ndu'erao si tow lēngei isia mänge rumu'ndu'-mai si wio'o. Ja mangem sia i mēilē-ilēk(ē)kē'-mange kaju itjali si watu pinailēk(ē)na. Pakakalina-mako ēm batu, ja mangko'o-mai sia, ng kuana: „O, he! nimangem!” Palingano tu'u-mange e nimēnto' am pukēt, ja matalēintēngo-mai maroro'-mai im pukēt, akar i nirumumpak. Kairumpak(ē)na-mio' ja li'usano-mai e nimēnto' am pukēt in tumura', janta'an malē-pēt(ē)kē' ēm bēngkowera, wo si wio'o makilat(ē)kē' ēm parukin. Ja pailēkēnera ra'itja rumeso si wio'o ēm patura'an. Pakasere-serenerao, kasereanerao ja watukē' re'en. Siituoka iēna'erao i matura', ta'an waja im bēngkowera nimalewo'o waja.

Awoja si nimange rumu'ndu'-mai si wio'o ra'io nimareng-ai ang kara-karapiera.

125. An doro' e Mamorapat, slnisil i J. Regar, Kapoja.

A si makasa se pira-pira tow mange mēnto' im pulintja' paru'umēn e wio'o. Itjatēka'oka waja-mange a lawi sera, ja ng kuano i mawali-wali: „Sapaka kita ja mēweteng ē mange mapēndam. Anae si ēsa mangem, en do'nao kua'a matawi-mai sera. Sawo makili'o, mai molo mange sumawēl.” Siituoka tu'u mangem si ēsa, ja sia nimēla'u-la'us(ē)kē' mange an tu'ur i a'kēl mapulintja'. Itjatēka'-mange sia, sia tumo'tolo mēndamo im pulintja' an tana', ja ra'itja nimaure-ure luma'aro ng kama, anae pēwaliano im paki'tji'in e rongit ē litjur wo ng keitjei, o pasēpe'ena-mako ēn a litjur wo n ang keitjei, iaka-akar luma'aroka waja ēm pakasa in owak. Talali' sia ra'io maka'mbaja i luma'ar, ja sia manerono-mange a lawi, am pēnēkē-nēkēlan e kara-karapina. Itjatēka'-mange sia, ja ng kuanao: „E ina-ina'! ra'io maka'mbaja aku, mapela'o ēm pakorēmēn.” Siituoka mangaja'ka'o-mai se mēnēkē-nēkēl, ja ng kuanerao: „Awo ko, maru'umo?” Sumowato sia ng kuana: „Mēnuwu-nuwu'kē' kamu? ja wēnduo aku.” Kuanoka i ēsa: „Kua'a ko wai?” Sumowato ka'i sia: „Mēngato-mai, ra'io itjaēna' ēng kamaku, am pa'pa' luma'aroka waja ēm pakasa in owak.” Kuano ka'i e karapina: Kua'a ko wo luma'aroka waja n owak?” Sumowato ka'i sia:

„Lina'arano kua'a im pulintja'." Kuano ka'i e karapina: „Mangemu kua'a re'e tinambisa ěm pulintja'?" Ja ng kuanao: „Pinapëndam(ě)ku, aitjuamiow kua'a i mange mëndam im pulintja'." Siituoka rumĕgao-mai se a lawi, ěng kuanerao: „O inde' tu'u weta' re'e ko e, ra'itja kua'a wo'o mange pinĕki-pëndam im pulintja' ko, janta'an mange wo'o nima'an sa se wio'o maru'umo." Sumowato ka'i sia: „Ra'itja kua'a iparondorondoriow ě nuwu'! sa kua'a wo'o kinailĕkangku in tani'tu, ra'itja wo'o mange nimakĕmu-kĕmu im pulintja' aku."

126. An doro' e pira-pira Tow Longon, sinisil i J. Regar, Kapoja.

Kaindo-indono-mai sapaka, kine, si ěsa tuama ja nimange tuma'tak-ai mata'. Itjatĕka' tu'u re'e-mange an tu'ura in tambĕlang sia, ja sia makana-kanato sa si wisa ěn ta'takĕna. Pailĕkĕna tu'u re'e-mako se lo'or ta'takĕn, ja nio' kua'a tu'u sia ěn tuma'tako. Pakata'takĕna tu'u re'e-mako se wona' pira ngarondoran, ja meso'o wo'o sia ja. Meso'o re'e sia, isĕlĕt(ě)na-mio' am bĕngkal ěn sondang, janta'an aisomo-somoi(ě)na re'e-mako an somoi. Ja siituoka meso'o in tambĕlang tinongkeina sia. Pakaweso'ona-mako, ja sia kumulito-mio' in tata'apa wo mokolo. Ja siituoka mĕereo in sondang sia, ra'io re'e kapĕndamana in sapaka n sondang ja a litjur(ě)na, anae ěn sondang paere-erena a li'tjir in tu'ura in tambĕlang. Pangere-ngerena kine, a makali'tjir, ra'itja kaereana ěn sondang wo ku'kutĕnao, kine, in tjumimbo' ěn am baja im pinaawu' in tu'ura in tambĕlang, ta'an da'itja kaerean ěn sondang. Siituoka ka'i ja ko'atanao, kine, ě makali'tjir in tambĕlang, mainde' wo'o mako aisu-rip(ě)nao-mange an dukut ěn sondang, ta'an pailĕkĕna-mako in da'itja kaereana, ja paki'i-tji'itanao waja se pinawaja-waja'ana. Awoja tani'tu, kine, mĕmare-marengoka-mio', akar in tjato'orao si ěndo, ja sia mĕlimu-limu'utoka, kine. Awoja makĕpe re'e-mako sia, ja sia rumomeio-mio' an tana'. Rumoseioka-mio' sia, mio'o tumombol-ai i litjur(ě)na ěn tumbalan in sondang. Siituoka re'e ja ng kuanao: „Sapa kua'a re'e si nitumombol-ai i litjur(ě)ku? Pendamĕnaoka-mako tumbalan de'e in sondang.

Siituoka timboianao-mai, wo itu weso'onao-mai ən aisëlët am bēngkal. Awoja si ěmbow(ě)naka, kine, indonao-mai ən sondang wo itumpana i marak im batu ěng kuanao, kine: „Kěnu, ka'itje' ko! pinapakěpeanuo ka'itje' aku kawaliangku in da'io wana kětër ja i maere-ere iitjo, ja a litjur(ě)kuka re'e!” Anaë, sapaka, kine, si sondang iitu, ja nimaïndoo tanuoka re'dena ěm bërëna. Anaë, marengo-mange sia, ra'itja nimaali mata', ra'io kua'a wana ipo'ow, anaë itjatěka'o-mange am bale sia, ja sia pėere-ereano e am bale i mata' niangena-mai. Sumowatoka kine, sia ng kuanao: „Tio'o mēngěli-ngěli nuwu' kamu! la'leoka aku em pinapakěpeano-mako i sondang iitu. Anaë aitia'kuo ka'itje'-mai ən iitu.”

2. Awean ěsa tow sia ja nimio' am Benang, mio', kine, nitumělės-ai asin. Awoja, makatělės re'e-mako asin sera, ja sera maja'o-mitjo am bale e Sina. Ja m po'ot pinumpunaneramio' im balun pawewe-weweiëna. Pailěkěno re'e i Sina ja ng kuanao: „E, pai tua, apa itu dia, tolol?” Ja ng kuano, kine, i Matu'a: „O, kailě-ilěkangkka tu'u re'en e Sina si ra'amiow am bale; nio' kua'a e! pawueiënerao-mai si ra'amiow” (si makangaran i Olor). Kuano kine i Matu'a: „Maio, e makaito', wo kita tumuli-mange.” Ja muntěpo tu'u-mange am bale e Sina, ja ng kuano i Sina: „Tjali apa, pai tua?” Sumowato kine si Matu'a: „Sama-sama' kaitare ja si ra'amiow am bale.” Siituoka re'e si Matu'a mēnia-niao re'e se aroro' aisēmpe' ipawangker. Mēnia-niaoka re'e sia, maěmbowo si Sina, kuanao re'e: „Tjělaka ini pai tua beki koto balang, kanineakan!” Ja ng kuano, kine, weta' i Matu'a: „O, aitjuakuo tarepe' in sama-sama' kaitare si ra'amiow.” Kuano, kine, ka'i i Sina: „Apa ini pai tua bitjala-bitjala? kita ningada tau.” Ja si ěmbow(ě)ka re'en i Sina, parukinao si Matu'a. Parukin de'e i Sina sia, mēngua-nguakě', kine, in tana'i: „O wana kaitare mange ən upus i makaito' iaku! mawange'o kaitare ěm pēmuku-mukulěn angeno-mai i lělo.” Ja an somoioka-mai iitu, ja sera irintuko i Sina wo sera tu'u tumintjas.

3. A si makasa awean ěsa Tuam Balanda nilumangkoi an

Tumpaan wo tumuli am bale i Pamatu'an. Ja m bale i Pamatu'an wērupe' wo lo'or ēng kēema'. Awoja mēpa'a-pa'aroka si Tuam Balanda wo si Pamatu'an, ja ng kuano, kine, i Tuang: „Ja, Hukum-tua, ini rumah ada bagus, tantu akan ada baik sēkali kalau ini rumah tagantong tiga stolok dimuka, dan bagitu lagi di fores.” Ja sumowato, kine, si Pamatu'an: „Ulit e Tuang, waja in tjaju a si wale iasa ja kaju waja sama'; awean ēn tongke', awean ē makurung, pinaako-mai a mako n Sondakēn.” Ja pakapa'anēn de'e i Tjapala wewene, palina-nao ra'itja ndo'o masoma an ipakua i Tuang ēn ipasowat i Pamatu'an, en si Tjapala wewene makailēko i Mēlaju, e nima-murit(ē)-wo. Ja ng kuanao, kine, i makua-mitjo a si Pamatu'an: „Masea'kē' ko ja, ra'itja siitu n ipakua i Tuang an iitjo.” Siituoka ja ng kuano, kine, i Pamatu'an: „Tio'o mēnuwu-nuwu'-mai itjo, ra'itja itjo ē makailēk, ajo! pigi di dapur, ambitu ēn tawoiēnu!” Rumojor tu'u, kine, weta' si Tjapala wewene.

Merao ka'i re'e nuwu' si Tuang, mēwuei a si Pamatu'an in tana'i: „Hukum-tua, deri sini sampei di Amurang, bērapa paal?” Sumowato ka'i re'e si Pamatu'an, ēng kuanao: „Rata-rata, mēlopa-lopa', e Tuang; a mekonakē' im Pēntu' n soso-sosor tojo'.” Mueio ka'i re'e si Tuang, ēng kuanao: „Hukum tua, disini ada banjak nike?” Ja itjua ka'i re'e-mako i Pamatu'an mawuei rintjeng si Tuang, anae ng kuanao ka'i: „O kēkēlian, e Tuang, ro'naoka ka'i tanu pakēlē-kēlēwan im pinēondong sera in tarepe' n a meko ēm palēpon.” Ja siituoka tumowao ēsa a se tawang(ē)na si Pamatu'an, kuanao, kine: „Mērentek, mindo-mai in tetempang wo meko itempang-ai rintjeng, en si Tuang ja masale', kine, sumēra' rintjeng.” Maio, kine, ka'i tu'u weta' si Tjapala wewene, ng kuana: „O inde' tu'u weta' ko ē mēnea-ne'a'kē', ra'itja karu' rintjeng ēn ipakua i Tuang e, ta'an mawuei ru'ong.” Siituoka renderēno ka'i, kine, tu'u weta' i Pamatu'an si pēnana'ana, ēng kuana: „Ra'itja ka'itje' tu'u maeman si wewene anio', aitjuakuo in tio'o mai mamister am panuwu'unami si Tuang, mangeo-mai tjo e mēngēli-ngēlitjē' kendo'o ē nuwu'; iitjo saanu ē makailēk e aku, wai? pora

Setan si wewene iana!" Sumowato, kine, ka'i si Tjapala wewene, éng kuanao: „Me'eo re'e ja! en iitjo re'e makailék parondorén tare, ja ipasero'muké' aku!"

4. Awean, kine, ésa Tomu'ung nimio' am Benang, mio' nitumélès-ai solo, wo sia re'e mailék si ésa toja'ang mateinteinteng limpurong pinumpunan in onde-onde. Siituoka re'e ja sia piailén i tjara-karapina, ng kuanao, kine: „E ama' ung kénu en totor le'os ipénaném." Ja siituké' re'e pinalina i Matu'a, ja sia tumélésó wo itu saputéna. Pasaputénaoka n iitu, ja ng kuano, kine, ka'i i tjarapina: „Sawo sumaput in iana, ja tio'o itarépét é mémbër, oreoka malewo' ém batuna, wo ra'itja tumow en tia' mapaali-ali in dai'." Awoja itjatéka'o-mai an do'ong, ipéla'u-la'us(é)nao-mange i muséw a mange n uma. Maja'o, kine, wona' pira ngando, ja mangenao pailékén mainde' wo'o n iitu matowo; mangenaoka pailékén waja i niuséwana in onde-onde, nimaíndoo walena e sérém. Ko'korénao paerere-rena, ra'io ambitu si watuna aiuséw(é)na. Siituoka ja si Matu'a maio a si tjara-karapina nimio' am Benang(é)-wo, wo ng kuana: „Aitjalewo'ké' tu'u re'e aku é nimuséw si watuna tinélésangku-mai am Benang, e mangekuo pinéilék-ai winaleano waja e sérém é niuséwangku in iitu. Siituoka kumale'ke'o kine-mai si nimiai si Matu'a, ng kuanao: „Ra'itja kua'a tu'uman ipauséw én iitu, ta'an én iitu ja kukis, en iitu ja topong wo isaput i gula wo saputéne' ka'i im po'po' kinuris én am bawo, anae waja in iitu ja kakanén sama' e sérém." Sumowato, kine, weta' si Matu'a, ng kuanao: „Ja itjaupus-ai en aku m piniaimu, ja tio'o ipakua-kua a si sei-mange, oreka tu'u weta' aku pèngèrè-ngku-réngkutan e tow in iitu."

5. Awean ka'i ésa tow nimio' am Benang, mio' nimanélès-ai. Ja mailéko se pongkor tinémburan sia, ja sia tumélès-ai, ta'an sia nitumélès a se pongkor raíndang ém ba'mba'.

Maja'o re'e-mai sera, ja si pongkor aipumpunaké' an sompoi; ja n sompoi ra'itja re'e pinailék(é)na in aweano wo'so, anae mawaja'o re'e-mai sera, ra'io re'e kailékana-mai wo méra'mba-ra'mbas én tēnga' wo lalai. Makasosoroka, kine-mai an Ēmpung

sera, ja sera masəng. Məlukū-lukutoka sera ɛ məsə-əsəng, ja mindoo-mai in sompoi si Matu'a. Rumō'mbo in sompoi sia, pəpənda-pəndaməna ra'io wana ɛn təngə', tani'tu ɛ lalai. Siituoka māngaja'ka'o kine-mai si Matu'a, ng kuanao: „Aro ina teitei, reimo nde'e siapa! um bua' en deimo, tentu kangka si'i um bawali.” Ja siituoka wowoiənao-mai si pongkor; pailəkənao-mio' toka ɛnda' ɛn am ba'mba' i pongkor. Siituoka ja ng kuanao, kine: „O inde' ndo'o! pinakatəngə'o kua'a re'e i pongkor anio', nio' kua'a e lema'oka waja m ba'mba' i pongkor.” Siituoka, kine, si ɛmbow(ɛ)naka in da'io wana təngə'an, iwangkil(ɛ)nao-mange an dowar si pongkor ang karapi i nuwu' tana'i: „Nio' kua'a ko! iitjoo re'e si nitjumaapu im pətəngə'angku.” Awoja pailəkənoka e kara-karapina ɛn sompoi, ja ng kuane-rao: „E Ito', wo'sooka kua'a re'e ɛn sompoi! anae ambituo kua'a re'en ɛm pinakəsotan in təngə' wo lalai, ta'an da'itja re'en niilək sama' i Ito'. Ja nio' tare si pongkor aitia'o i Ito', anae kinaapuo e asu. A si Ito'o tu'u waja angen-ai, in da'itja nimilək en si Ito' ra'io tuməngə', ra'itja ka'i suməra'.”

127. Kukua poke'ke' an doro' e Rua Niməwətiti, sinisil i

A. Təwutow, Ləlləm.

Kaindo-indono-mai ja awean pira-pira tow niməporapat. Ja kinawetengano in se rua an isera ɛ mange mətiti. Awoja iru'ndu'o-mange sera, ja niməla'u-la'us(ɛ)kə'-mange an a'kəl pake'etan, wo sera sumosor-ange. Sapaka sera ɛ nisumosor-ange, ja niməntondongangkə' an ta'kəs. Ang kapəruaano sera, ja kua'a si a mangena ɛ məntut, ta'an da'itja tatenge, nitu-mana'itjə': „pəs”. Ang kəlingakə'-mange i a mio'na, ja serenaomange ang karapi i məwuei, ɛng kuanao: „Sapa itu?” Janta'an da'itja məngkut si pawueian. An sangkum iitu ja sia kinawowanomange i nimawuei, wo ng kuanao: „Ĕg, ɛg! niməntut re'e ko!”

Siituoka ja mərende-renderoka an ta'kəs sera in dua, pa'pa'an si a mio'na nimaəmbow i niəntutana akar se wio'o i

nitumintjas(ě)kě', wo tani'tu sera mareng-ange ra'itja wana ěng kinaakoan. Akar(ě)kě' iitu.

128. Kukua poke'ke' an doro' e rua Tare-tumow Měkarětuk.

Sapaka se rua mangalitow isera ja měkake'et. Kaindo-indono-mai a si makasa sera měnuwu-nuwu', ěng kuano i ěsa a si tjarětuk(ě)na: „E rětuk, sa ko masale', ja pamorapatěnta wawa'ando.” Sumowato si tjarětuk(ě)na: „Ja sama', itji'it-io' ambitu.”

Maio tu'u i mawawa'ando, ja sera mangem kume'et. Ja makake'et-ako sera, ja mėlěpo. Makaělěp-ako sera ja malinao-mange se wio'o i maru'umo im pulintja'. Siituoka kuano i ěsa: „Ja mangem kita, nange kua'a makano se wio'o.” Mangem tu'u sera mangeo tuma'an. Makata'an-ako sera, ja kuano i ěsa: „Iitjoo ě mange rumu'ndu'-mai, iaku ě měnto' am pukět.” Mangenao tu'u angko'an-ai wo si wio'o rumumpak, wo indonera sia. Awoja kamang i nimateo si pinorapatera, ja rakutěnerao an ěpal, wo sera marengo-mange am paělěpanera. Ambituoka sera ja ng kuano i ěsa ang karapi i masale-sale': „Ja aitjasama'ka tu'u kita.” Janta'an sia ě nitjumua-mange in tani'tu a si rětuk(ě)na, ja ang karapi i nisumondo' wo nitjumumbit. Ja kuano ka'itje' i ěsa: „Ja rondoro tu'u.” Ta'an ka'i sia nisumuli' a si tjarapina, niruměpěte'-mai. Wo sera mēnsonsondo'an wo mēngkungkumbitan, akarera i maěmbowo, wo mětokolo, wo mēmbamba'nutan, aka-akar sera in tjina-ěndoangkě' ambitu.

Am pa'pa' im běngio ure sera ra'io nimareng-ai am bale, ja mainde'o se matu'aera, akaranera i mēmbumbueian sa ambisa se toja'ang. Siituo ě nimange-mai wo woo-woondope' ja sera tondongano-mange e amangera. Ja itjatěka'o-mange am paělěpan sera, ja pailěkěnerao se rua ja mětoko-tokole' wo sera ra'io wana wu'uk, lakoianoka waja. Pailěkěnera-mako itu, ja ng kuanerao: „Kua'itu-itu kamu mětoko-tokol?” Ja sowatěno i ěsa a si amanga: „Jau piněnonondo-nondo'na

kua'a aku." Ja sowateno i esa ka'i: „Isia ka'i nimenonondo' wo nimenngumbi-ngumbit iaku, iaka-akar mengengengengengetoka waja in owa'ku." Siituoka sera ja mena'o-mio' e metoko-tokol, wo si wio'o tatarenerao wo wetengen. Makaweteng-ako sera ja kinaisaputano-mai im beteng, wo se mekaporapat nimalakoiano marengo karapi e amangera, wo ipengenge'ke-nge'ke' e tow palangkoienera.

**129. Kukua an doro' i Towo, sinisil i Thomas Dien, Sëndangan
wo si Hendrik Mangowal, Talitjuran, Sondér.**

1. Kaindo-indono-mai sapaka n an do'ong Rinondoran ja awean tow ambalesa, si tuama makangaran i Londa, si wewene Pa'ut.

Laleio endo sera n am pamalean, ja ra'itja makausui sawel. Siituoka sera menuwu-nuwu' in sama', eng kuanerao: „Tumambisa wo sapa wo'o n toro ema'anta wo kita ro'na makaere toja'ang maaru-arui wo suma'li an itjita sawo merot kita mamatu'a?" Numuwu'o si Londa, eng kuanao: „O memengku Pa'ut, sa wo'o itjasale'mu ja tana'i: sa wo'o ki'im i tuaritju Lonto' wo ko ka'i masale', ja maipe' maento' ang karapimu sia. Sa itu indonuka sama', ja ienet(é)ku-mange i mangilek; sa merot ang karapi in upus i Apo' wa'lan Kasuruan wo kamu kamangena-mai esa toja'ang, sa wo'o ro'na ipatowotake' wo'on in sapaka sia ja toja'ang ailua'ta in dua. Sa merot kamangen i Tjasuruan, ja si toja'ang kausuianiow ja ngaranangké tare-mio' in Towo." Sumowato si Pa'ut, eng kuanao: „O palolongku Londa, tani'tu kita in tow rerégésan; sawo lekép én atemu an doro' iitu, ja ro'na mamuali tanu im pangilekanu." Eng kuano i Londa: „O memengku, si ta'ar in ateku ja nimamuali am pakawalian i Apo' nimema' in tana' wo é langit. Isia si nimuka' in ateku, ningumanga im biwitju wo nimeru' i lila'ku, iaka-akar aku i numuwu' si pinalinga wo nienanu."

Iamboo tu'u a si Lonto' em basaera. Sumowato si Lonto',

ëng kuanao: „Sama', ta'an tio'o itu wo wowondas an iaku wo aku paten i tjaka'ku Londa.” Ëng kuano i Londa: „Muntuuntu karuru i Tjasuruan! tumeir an itjita an doro' e waja itu, tio'o kumënë-kënëng wo tio'o lumawi-lawi'. Lëkëpën ëm pangilëkangku, iaka-akar in tjamangën i Tjasuruan.”

Siituoka tu'u ito'tolo i Lonto' i lumëkep ëm pangilëkan i po'ow(ë)na. An sangkum e ëndo-ëndo itu si Londa ra'itja maoton ë mangilë-ngilëk a si Tjasuruan. Pauri-urina i mangilë-ngilëk sa wo'o ro'na kamangën-ai toja'ang tuama si Pa'ut. Maio n ëndo i Pa'ut i mitong toja'ang. Ang karapi i masale-sale' si Londa pa'pa'an ëm pinangilë-ngilëk(ë)na ja nimalëkëpo wo nitjumëli-mai witu, si toja'ang pinitong i Pa'ut sia ja tuama. Po'owëno ëm pusër i toja'ang, ëng kuano i Londa: „Sapaka ë ngaranu, e kalo, ja Towo.”

Makaawëso ëng kalo'mboi wo ng kawangko' i Towo, maio in tumo'tolo manuwu'. Ra'itja ure ja ra'io wana ën ipësusui an doro' i nunuwu'un a si toja'ang itu. Tumo'tolo ëng kaka'-kat wo ng kalewo' i Towo. Ra'io ipëngakaënto' sama' am bale, sama'oka i mëwëra-wëra' wo se katoja'ang(ë)na.

2. Nimamuali a si makasa mëwëra-wëra'o si Towo wo se katoja'ang(ë)na, sia mandet in oli-oli' i ësa karapina wo itintjas-(ë)na, iaka-akar si makaoli-oli' maame' rëpët wo sumumpak-ange a si inang wo amanga. Pëwueiënerao: „Kua'a ko maame'?” Ëng kuano i toja'ang: „Rinombito i Towo ën oli-oli'tju ja.” Palingan-ako i Amanga ën iitu, mio' mëmbung-ai ën atena wo sia mindo-mai im papangkur, ëng kuanao: „Tarepe' si Towo ja we'mbelëngku.” Siituoka sia me'e-mange am bale i Londa wo si Pa'ut. Sumumpak-ange sia, pailëkënao tu'u pëwëra-wëra'ano i Towo ën oli-oli'. Ëng kuanao i më'tëng-ange a si Towo: „Tarepe' ko em patengku! aitjatambi-tambisa ko wo nimandet im pawëra'an i ana'ku?” Ang karapi i mainde' sia masere-sere a makali'tjir; tanu aipatëna-tëna serena-mange si Tjolano, mawaja'-mai an dior im baleera. Itjaiserena-mange si Tjolano, mio' mapatawang-ai sia, ëng kuanao: „E Apo', pëpateno aku!” Tani'tu ëng kerior tumulio-mai ambitu si Tjo

lano. An tutuw iitu si amang i toja'ang makaoli-oli' in dinombit i Towo ja ra'ipe' makar ẽ mawẽ'tẽ-wẽ'tẽng a si Towo. Siituoka ng kuano i Tjolano a se malukar maki'i-tji'it isia: „Timboian si tow lewo' anio' wo iwali-mange am baleku.” Tani'tu ng krior sia tangka'an. Wueiano i Tjolano si Towo, ẽng kuanao: „E itow! ẽn so' si inangu wo si amangu?” Ẽng kuano i Towo: „Ra'itja ambia, nimange an umia.” Ẽnowẽno i Tjolano si Towo, ẽng kuanao: „O kalo! mẽnẽso, nao mẽngame-ngame', eng ko ja iwalitju am baleku, wo ko mangeku wean sẽra', tu'tu', karai wo oli-oli' lo'or nimangakar.” Mẽnẽso tu'u si Towo wo sia kumi'it-ange si Tjolano. Itjatẽka'-mange am bale, ẽng kuano i Tjolano a si ẽsa Wawu': „Ipangilẽk kanẽn a si mẽsiwo si toja'ang anio'.” Makakan-ako sia, weano i Tjolano karai. Makasawẽl-ako sia, ẽng kuano i Tjolano: „Kumi'it-ai iaku, e itow, wo angenta a si wale anu mange.” Si wale itu ja wale paputusan. Ambitu ka'i m binalian-ai si Amang i makaoli-oli' in dinombit i Towo.

Itjatẽka'-mange am bale iitu si Tjolano wo si Towo, wueiano si matu'a i makaoli-oli', ẽng kuano i Tjolano: „Sapa ẽng kawalian wo ko nimanginde-nginde' si Towo?” Sumowato sia ng kuanao: „Aitjawalitjẽ' an oli-oli' niandet(ẽ)na a si ana'ku.” Ẽng kuano i Tjolano: „Waja in tow lewo' ja iitjo! ro'naka re'en oli-oli' pateanu tow? Karua itu: si Towo ja wo'mbase', ko ja matu'ao; ro'naka re'en se matu'a wo kaseke' e toja'ang? Karẽngana ko en torungkun, siow ngando.” Tanu pinaindo-into sumumpak-ange si Amang i Towo mangusu-ngusui si ana'na. Ẽng kuano i Tjolano an isia: „Mawisa ko?” Sumowato sia: „Aku ja maere-ere si toja'ang.” Ẽng kuano i Tjolano: „Ambia'i sia ja!” Sisilẽno i Tjolano an isia, sapa ẽ nimamuali a si ana'na, wo karua itu, lupuan i Tjolano si Amang i Towo, ẽng kuanao: „Tei-teiran si ana'mu, tio'o ipawaja-waja, en sia ja toja'ang ka'kat.” Siituoka ja iwalio i Amanga si Towo, marengo-mange am baleẽta.

3. Awoja mẽngawẽ-ngawẽso ẽng kawangko' wo ng kaka'kat wo ng kalewo' i Towo, ra'io tu'u kasiwoan i Inang o Amanga;

tina'pe'angkë' im binean i Tjolano tu'tu', sëra', karai wo oli-oli', anaitu sia ra'io mareso-mange am bale i Tjolano, iaka-akar kaweano i lëlo wo n upus i Tjolano wo n ipakasa se tow ambitu; lëloanera si Towo, pa'pa'an sia ja ra'itja talawi', kopa'ar, kowuei in sapa si ra'ipe' katërangana. Ureo, tanuoka tow i Tjolano si Towo, pënuusu-nusuianera in tawoiën wo nu-nuwu'un; tani'tu si Towo ra'io wana ën itjakënnëng. A si makasa mënsosowatan si Towo wo se Wawu', ëng kuano e Wawu': „E Towo! sa tu'u ko paëmanëno i Apo' Kolano, ja me'e tu'u ko e! mange kumarai-mai in tjarai i Apo' Kolano ko, wo ko sumalu in tëmbëran.” Ëng kuano i Towo: „Sama', ta'an karëngana awean ën iwatarumiow an iaku.” Ëng kuano e Wawu': „Itjoo ë miara si Wulangkau', toja'ang i Tjolano, sa tu'u ko ra'itja itjaëmbow i Tjolano ëng kumarai in tjaraina.” Sumowato si Towo: „En, ta'an sa kami si Wulangkau' ra'itja mamuali, ja waja itjamu pakapelo-pelongëngku.” Ëng kuano e Wawu': „Sama'.” Siituoka sumosoro-mange am bale si Towo ang karapi i ngëngër muli-ulit, wo mange mindomai in tjarai aisangat i Tjolano, en si Tjolano ja nitumëkël. Karaiënao tu'u wo sia sumalu in tëmbëran, iaka-akar kali'usan-ai e tow ra'io itjakua ëng kakëli. Se tow anio' ra'io itjakua ëng karëga; se walina mëngangko-ngangko', se walina mënge'ke-nge'ke', ëng kuanerao: „E, milëk si Towo nitjumarai in tjarai i Apo' Kolano!” Am pa'pa' in tani'tu ëng karëga, ja mangaja'ka'o-mai si Tjolano ën am patëkëlan, ëng kuanao: „Sapa ën iparëga e tow?” Kumësoto-mai an seip si Tjolano, pailëkënao tu'u-mange si Towo nitjumarai in tjaraina, wo masalu-salu in tëmbëran. Rangatëno-mange i Tjolano si Towo, ëng kuanao: „E, mai wia'i ko, Towo!” Siituoka sumosoro-mange si Towo. Ëng kuano i Tjolano an isia: „Kua'a ko kawuaja nitjumarai in tjaraitju wo matimpë-timpëlar an tëmbëran?” Sumowato si Towo, ëng kuanao: „Ra'itja tu'u wo'o tani'tu-wo, e Papo', sa ra'itja niange-mai e Wawu'.” Ëng kuano i Tjolano: „Am pa'pa'an in sapa itu?” Sisilëno i Towo ëng kinato'tolan iaka-akar sia nitumawoi tani'tu. Ëng kuano

i Tjolano: „Sa re'e ko iru'ndu'era rumombit kumaapa mu'is ja memangkë' re'e-mange ko? Karëngana ko en torungkun.” Sumowato si Towo: „En, e Apo', ta'an tumambisa ë mumpun im palar in tjeitjei an torungku, en tëkek ëm bo'sona?” Ëng kuano i Tjolano: „Toka re'e ra'itja isusuitju.” Numuwu'o ka'i si Towo, ëng kuanao: „Sama', e Papo', sawo isusuimu, ta'an pëwueiëngku sa pira ngando aku ën isolong.” Ëng kuano i Tjolano: „Siow ngando.”

4. Siituoka mindo-mai im bëka' wo m pisow lambot si Tjolano wo ng kuanao: „Intao, e Towo, eng ko ja mangukuo isolong an torungku.” Mangem tu'u sera, itjatëka'-mange, ëng kuano i Towo: „Patambisan de'e ën ipakua in torungkun, en aitjua i Apo' in isusui?” Ëng kuano i Tjolano: „Pailëkënuo-mai ën ipakawuka' wo n ipakakusi' wo n ipakasolong in tjeitjei.” Ëng kuano i Towo: „Ja iëpe'mu e Apo', e!” Ëng kuano i Tjolano: „Patana'iën.” Siituoka kusi'an-io' i Towo ën torungku, ëng kuano i Towo: „A, paasarën de'e tani'tu, intji, e Apo'?” Ëng kuano i Tjolano: „Sapa kua'a.” Tumowoo si Towo, ëng kuanao: „Sa itjasale' i Apo' Kolano, tarepe' aku ambia, ta'an aku ja rumior(ë)pe' mange an sëndi.” Ëng kuano i Tjolano: „Wuka'ano-mai aku-wo, wo tare ko mange sumëndi.” Ta'an da'itja si Towo, karëpët i Tjolano i manuwu' karëpët(ë)na i mawaja'. Indonao-mai ëm bëka' i Tjolano wo m pisow, wo sia mange ka'i tjumarai-mai in tjarai i Tjolano wo mai mënto'-mio' am papalën im bale patorungkuan. Përanga-rangatën i Tjolano sia: „Ën so' ko e Towo! maio wuka'an aku.” Pasowatëngkë' i Towo in tana'i: „Ambia'i aku, e Kolano, kua'a itu wuka'ano wai? Masusuipe' an iaku si Apo'! ëpe'ano tu'u i Apo' ëng kanumanam im patorungkun.”

Talali' eta' i mawëngio pangusu-ngusuiënoka i pënana'ana si Tjolano. Itjua e malangkoi a si wale patorungkuan, kuaerao: „Nange kua'a si Tjolano makatindondor am pana'pa' im bale patorungkuan.” Siituoka mangem si pënana'an i Tjolano. Tajange' palinganao-mange si Tjolano mapatawa-tawang. Ma inde'o sia, ëng kuanao in ësa: „Ka'itu-itu tani'tu: si Tjolano ë

makanuwu' in iitu." Itjaiserena-mange im pana'pa' im patorungkuan, masale'o-mai sia wo ng kuanao: „E ra'itja re'e si Tjolano si maangko', nangekë' si Tjolano makatulung am pana'pa'." Itjaisumpak(ë)na-mange, pëtu'usënao-mange si makatulung am pana'pa', ëng kuanao: „Ëng karai, karai i Tjolano, ta'an ë gio, giokë' i Towo." Katu'usan-ako in sia ja si Towo, wueiëno i pënana'an i Tjolano: „Ën so' si Tjolano, e Towo?" Sumowato si Towo: „A, wënduo ulit si Apo' Kolano ë mësusu-susui an iaku, matambisa ë matorungku." Mangeo tu'u ilëkën i pënana'an i Tjolano. Sapaka ëng keitjei i Tjolano ja nisumëgao. Anaitu si pënana'an i Tjolano numuwu' ang karapi i maame', ng kuanao: „Sa itjasale' i Tjolano, ja ënowëngkë' tare si Towo wo sama' ko wuka'ana." Siituoka towano-mange i Tjolano si Towo, ëng kuanao: „Ën so' ko, e Towo?" Sumowato si Towo: „Ambia, e Apo'." Ëng kuano i Tjolano: „Sapa ën itjasale'mu, itu ja iwe'eku, asal aku wo wuka'ano-mai." Sumowato si Towo: „Ra'itja wana ën itjasale'ku walina a sia'i: se Wawu' karëngan en isawël a si Apo' isolong an torungku siow ngando, en iserao ë ni-muwak iaku, iaka-akar aku kumarai in tjarai i Apo' wo masalu-salu in tëmberan. Karua itu karëngan tanu in aiwataru e Wawu', in sapaka si Wulangkau' ja mamuali kasende'ku." Sumowato si Tjolano, ëng kuanao: „Ulit tani'tu, waja se Wawu' ën isawël an iaku an torungku, siow ngando, wo si Wulangkau' karëngan en do'na piaranu sa ko wo matërang an tawoiën e ngaran Kolano." Ëng kuano i Towo: „O ja karëngan aku en susuiian i Apo' am baja tumëna." Ëng kuano i Tjolano: „Sama', asal aku wo wuka'ano-mai." Siituoka wuka'ano i Towo si Tjolano. Ta'an waja tu'u se Wawu' ja aisawël a si Tjolano aipumpun an torungku.

5. Sapaka n a si ro'ong ësa, ja luku-lukutan i ësa mangalitow makangaran Towo, anak i malënge-lëngei. Jawoja si mangalitow isia ja pandei nimangakar, iaka-akar ra'itja wana ësa wo mëngakawolei isia ën a se kawëra'na.

Awoja kaindo-indono-mai a si makasa, si Towo ja pinatoroan e kawëra'na i nuwu' ëng kuaera: „E Towo, wataruanami tjo, mangemu ka'itje' tuengan-ai si Tjolano; jawoja sa tu'u sia ra'itja maëmbow, ja weanami ka'itje' mariwu pera ko.” Ëng kuano i Towo: „Sama' sa tani'tu.” Siituoka sia mange mapawilit si Inanga karai wo salana. Itjatëka'-mange a si Inanga sia, ja ng kuanao an isia: „O Ina', sa itjasale'mu, iwilit-io' karai wo salana aku, ta'an pënetëngkë'; ën ang kumi'it-io' in an tino'toka retean-io' kënop, ën am pë'nar wean-io' ësa kënop a se wangkër, eni?” Ëng kuao i Inanga: „Embai, kua'a ko masale' in tani'tu? e su'ut! itëmpumuo kita; tio'o, ore mapalawi-lawi'.” Ta'an kuanao: „Me'e weta'-wo, e Ina', awean kua'a torona ën iitu.” Siituoka kuao i Inanga: „Sama' re'e, e itow, sa awean torona.”

Wo iwilit i Inanga karai wo salana tanu in aitjuana. Jawoja pakawilitën-ako i Inanga ën iitu, ja indonao-mai wo isondol(ë)namio', wo sia mangeo malangko-langkoi-mio' an dior im bale i Tjolano. Malangko-langkoioka an dior im bale i Tjolano sia, ja kasereano-mange i Tjolano. Siituoka sia towanao-mange. Itjatëka'-mange sia, ëng kuao i Tjolano: „E Towo, si sei si nimilit in tjaraimu, rinetean in tjënop tani'tu in tjalo'or?” Ëng kuanao: „Iaku, e Kolano, ta'am baweane' kua'a ë nilumo'or-ai e, janta'an itjalawi'tjukë' tu'u in tumuru'.” Ëng kuao i Tjolano: „Tio'o lumawi-lawi' wo tio'o mainde-inde', ra'itja kua'a itjaëmbow(ë)ku.” Siituoka itueng(ë)nao-mange a si Tjolano ëm pë'nar(ë)na, ëng kuana: „Kua'a itu, e Kolano.”

Awoja sapaka n iitu ja pakaseren e kawataruna. Ipakaturu'na-mako a si Tjolano ëm baja in iitu, ja ipapawarengo i Tjolano sia; jawoja sia marengo nimëla'u-la'us(ë)kë'-mange a se kawataruna, wo pangilëkëna ën doit aiwataruera.

6. Awoja a si makasaoka ka'i pawataruanera ka'i si Towo, ëng kuaera: „E Towo, itji'it tu'u ko im buaja, ja mange sumosor am bale i Tjipu, en sia ra'itja kasosoran ëm bale, wajakë' si Tjolano ën do'na masosor ambitu, ra'itja itjaëmbow(ë)na. En sa ko sumosor(ë)ka, ja maiamioka ka'i wean doit.”

Siituoka kuao i Towo: „Sama'.” Tani'tu tu'u sia mangem. Itjateka'-mange sia, eng kuanao a si Tjipu: „E Tuang, aweam bo'o ē maitju itjua-mange an iitjo: masale' ko ēn tumēlēš im paser(ē)ku tanu po'po' eng kawangkēr?” Eng kuao i Tjipu: „Masale', ta'an muntēpo-mai-wo, eng kita kumane' wo mēlēp.” Wo tu'u sera kuman wo mēlēp. Makakan-ako sera, eng kuao i Tjipu: „Ja angenuo-mai em paser aitjuamu tanu po'po' eng kawangkēr.” Eng kuao i Towo: „Ow! mai tare wo'o mēwuei aku, sa wawean em paser tanu po'po' eng kawangkēr ēn a si Tuang Kipu pawu'unēn.” Siituoka paparojorēn i Tjipu sia. Tani'tu ka'i tu'u sia mangeo mangilēk in doit aiwataru an isia.

7. Awoja maja'o pira ngando ēn an somoi-mai iitu, ja rumombito si Towo, iaka-akar sia in aipakawali-mange a si Tjolano. Jawoja putusēn i Tjolano em pēpē'ndis(ē)na ja iwa'kēs an tu'ur in tjaju a si ro'na pakasere-seren e malangkoi. Jawoja ipakawa'kēs-ako ambitu sia, lumangkoi-mai an isia si ēsa Wo'ko, wo sia mawuei a si Towo, eng kuanao: „E, kua'a ko ipakawa'kēs ambana, sapa re'e ēn tinawoimu, embai?” Eng kuao i Towo: „Ow! sapaka aku-wo, ja wo'ko tanu iitjo, awoja am pa'pa' in da'itja wana ē makasiwo, kaapa makaluli', siituoka ja aku mai mēkiwa'kēs in owa'ku ambia'i; awoja kēnum ni-marondoro em bo'koku; anaitu, sa ko masale' ja mai engkasan aku, wo iitjope' ka'itje' ēn dondorēnta.” Eng kuao i Wo'ko: „Uli-ulit kua'a tani'tu, na?” Eng kuao i Towo: „Uli-ulit; ipēuwak(ē)kukē' ka'itare iitjo n iitu embai?” Eng kuao i Wo'ko: „Ja sama'.” Siituoka wuka'ano i Wo'ko si Towo; pakawuka'ana-mako sia, ja kuao i Towo: „Maio ka'itje' wo iwa'kēs(ē)kuo.” Jawoja ipakawa'kēs(ē)nape'-mio' si Wo'ko, ja mēngangko-ngangko'oka sia, eng kuana: „E, wuka'angkē'-mai aku, ra'itja makatang, ra'itja makalēsēn.” Ta'an kuao i Towo: „Ow! tio'o mēngangko-ngangko', ore ra'itja marondor.” Ipa-kawa'kēs(ē)na-mako si Wo'ko, ja tumintjaso sia. Awoja am pa'pa' si Wo'ko i mēngangko-ngangko'oka, ja mali'muro-mai se tow tani'tuo in tjakēli, wo kuaera: „E, Wo'ko, ka'itu-itu ko aiwa'kēs ambana?” Eng kuanao: „Aiwa'kēs i tuama aipa-

kawa'kēs ambia'i-wo, am pa'pa' aitjuana an iaku, sapaka, kine, sia-wo ja wo'ko tanu iaku, awoja nimarondoroka am pa'pa' sia in aiwa'kēs a si tjaju anio', anae niemangkukē' tu'u ěndo'o, ta'an piniaina tu'u ěndo'o re'e aku."

8. Siituoka pangusuiěnerao si Towo, iaka-akar in tjinausuiian. Awoja kausuiianera-mako sia, ja iwalio ka'i-mange a si Tjolano; putusěno i Tjolano: karěngana sia mangeo ilěpok am pĕtaan i laur. Siituoka ipĕkialero i Tjolano tow mange lumĕpok-ai isia a laur. Jawoja maaler-ako waja sera, ja isakeerao a londei si Towo. Awoja a londeioka, ja kuao i Towo an isera: „Naninta, eni? ta'an iaku ě matu'd, anaitu mĕnto'kē' an da'ter im bowuling aku. Awoja sa kita numanio ja masowat waja-mai, eni? Tana'i ěn ipakanani:

E, ilĕpoko si Towo, ilĕpoko!"

Tani'tuo tu'u sera moleo. Awoja ra'ipe' nimole-mange pulu' ngarĕpa sera ěn ang katana'an, ja lumĕpoko-mio' si Towo, wo tumintjaso-mange ang katana'an. Siituoka kuao i Wowuling: „E, ilumĕpoko si Towo!" Ta'an pasowatĕngkē' tare e karapina: „E, ilumĕpoko si Towo!" Jawoja nimĕngasa-ngasar-ange tani'tu sera, tumbal-ange in am pĕtaan i laur. A mangeoka mbitu sera, ja mĕnĕso tu'u waja, en ilĕpokerao wo'o si Towo. Janta'an kuao i Wowuling: „Awo, tambisaka tu'u rake kamu, ipakuaku tare-mai an itjamu, i nilumĕpoko si Towo." Siituoka mĕnuwu-nuwu'o sera sa tambisan ě mange kumua a si Tjolano. Jawoja putusĕnerao, ěng kuaera: „Tana'i, marengo kita, ta'an sa kita wueian i Tjolano, ja itjuatao tu'u-mange in ailĕpoko ja, ore kua'a kita itjaĕmbow i Tjolano." Tani'tu marengo tu'u sera; itjatĕka'-mange, ja wueiĕno i Tjolano an isera, ěng kuana: „Awo, ailĕpokiowo si Towo?" Ĕng kuaerao: „O, ailĕpokamio a mange m pĕtaan i laur, nae ro'nao pinakasĕra' e pongkor sia ja!" Tani'tu si Towo kailĕ-ilĕkano i Tjolano i nimalĕsĕmo.

9. Janta'an si Towo am balekē' i Inanga. Awoja sumigilo si Towo, ěng kuana: „Ja tumambisape' re'en aku ě mawaja-waja', en ore pailĕkĕn i Tjolano? O, ja tana'i, mueipe' re'e a si Ina' aku, mainde' kailĕkana ěng karai i Amang i Tjolano

si nimailango." Wo tu'u sia mui a si Inanga, eng kuana: „O Ina', kailėkanuka eng kinarai i Amang i Tjolano i nimate?" Eng kuao i Inanga: „Kailėkangku, itjamio ę nimawilit-wo." Siituoka eng kuao i Towo: „Ja iwilit kua'a re'e-mio' karai tani'tu aku, e Ina'." Eng kuao i Inanga: „Embai, ka'itu ko masale' makakarai in tani'tu?" Eng kuanao: „Me'e weta'-wo, e Ina', kailėkanuoka-sa, sa sapa ęn torona." Siituoka eng kuao i Inanga: „Sama'." Wo iwilit(ę)na tu'u. Jawoja pakawilitėn-ako i Inanga eng karai iitu, ja kumaraio-mai in iitu si Towo, wo sia mange malangko-langkoi-mio' an dior im bale i Tjolano. Jawoja malangko-langkoioka-mio' ambitu sia, pailėkėno-mange i Tjolano, iaka-akar nimangaja'ka' si Tjolano ę nimailėk-ange isia, wo sia towana-mange, ęng kuana: „E Towo, kua'a ko ambanakė', nimarengkė' re'e-mai tjo?" Eng kuanao: „Tana'i e Kolano: pareke-rekenėno wona' pulu'o ngarėpa eng kararėmana i nilėpokan iaku, ja mailėko in ęsa tėmbėram bangko' aku, jawoja mėmaja-maja'oka ambitu aku, ja mailėko in ęsa ro'om bangko' wo lo'or nimangakar. Awoja maunė-unėroka-mio' in do'ong iitu aku ja pailėkėno i Tjolano ambitu, wo aku pawueiana eng kuana: „Tow ambisa ko-wo?" Eng kuangkuo: „Aku ja tow a mange m bawo in tana'-wo." Siituoka aku pawueianao, eng kuana: „Ja sama'ka si Tjolano am bawo in tana'?" Eng kuangkuo: „Sama' ja." Siituoka ka'i eng kuanao an iaku: „Ja mange itjua-mange. an isia, sapaka aku ja mema' kasale-sale'an; jawoja itjasale'ku sia wo se kapala wo waja se aka-aka im banua karapi e pėnana'anera, ja mai waja lumo'or in tjasale-sale'angku iitu am pa'pa' sapaka si Tjolano am bawo in tana' ja ana'ku. Jawoja oreka ko ra'itja emanėna, nio' ęng karaitju, karaiėnuo-mange wo mangemu ituru' isia." Jawoja kėnum aku, e Kolano, nitjumaraio-mai in tjarai i Amangu."

Awoja palingan-ako waja i Tjolano ęn sisil i Towo, ja ng kuanao: „Sama', karėngana aku mio' ang kasale-sale'an i Amangku, karapi e kapala wo se aka-aka im banua, karapi e pėnana'anera." Jawoja maumung waja-mako mai sera, ja

pakata'uan i Tjolano, ɛng kuana: „Ma'a-pa'an-ange kamu im baja, sapaka si amangku, ja nimakolanokɛ' ka'i tu'u re'e an darɛm in tana'; jawoja sia in tarepe' mema' kasale-sale'an, ta'an itjasale'na, kine, kita im baja ja mio' a si tjasale-sale'an iitu. Anaitu, karɛngana kita im baja e makaio-io', en oreka kita pangimbuluana sa ra'itja mio'.”

Ipakakua waja-mako i Tjolano an isera ɛn iitu, ja ng kuanao ka'i a se kapala: „Karɛngana kamu im baja maler londei kɛli-tjɛlin, sakeanta i mange lumɛpok am pɛtaan i laur.” Wo ialerera tu'u. Maalerera waja-mako ɛn iitu, ja ng kuao i Tjolano: „Ja sumakeo kita.” Tani'tu sera sumakeo waja a londei wo mangeo lumɛpok am pɛtaan i laur. Jawoja makalɛpok waja-mako sera, ja ng kuao i Towo: „Ja iakuoka ka'itje' tu'u ng kolano, en si Tjolano wo se kapala wo se aka-aka im banua wo se ro'na mɛrenta ja nimalɛsɛmo waja.” Tani'tu si Towo nimakolanoo.

Si sei si akal wo pandei kaapa makailɛk masigi-sigil, ɛna' sia makausui tawoiɛn.

10. Sapaka si Towo anio', ja pandei nimangakar, mandeka si Tjolano ja patowoanakɛ'. Kailɛkan-ako i Tjolano in sapaka sia ja makapira-pirao wona' uwakɛn i Towo, ja kua'a ka'itje' si Tjolano ɛn tumo'tolo mere kawaliam bo ro'na si Towo katangka'ana kumaapa patena. Anaitu si Tjolano montol pira-pira tow wo ta'arana in tana'i: „Sapaka kamu sinisir(ɛ)ku maindo rumara'ndaku a si Towo. Itjasale'ku sa wo'o ro'na akar-ako in ainia kamu ja me'e reken tumoro-toro a si Towo, sapakɛ' ɛm pailɛkɛniow an isia, kumaapa tawoiɛna, karɛngana en ipakata'u an iaku.” Tani'tu tu'u nimamuali.

Maja'-mange pira ngando ja si Towo lumɛmur, akaro itu ɛn ipakua i lɛmur. Siituoka ipakata'uo a si Tjolano. Ipɛkitowao i Tjolano si Towo. Itjatɛka' tu'u-mai an dior i Tjolano si Towo, ja milɛk, ɛn sɛpun i Towo mɛno'so-no'so'oka-mio' am ba'mba'na. Anaitu si Towo ra'itja mɛna' ɛ mɛnindɛ-nindɛk in sɛpuna. Siituoka kuano i Tjolano: „E Towo, sapaka re'e ko

ja ra'ipe' makailëk in tumambisa ë masaru se wangko'. Anaitu karëngana ko em pë'disën. Tëlu ngando ko si ra'itja toro sumëpun kumaapa sumindëk in sëpun. Sa itu kaki'itanu ja ko tare iwëkar(ë)ku, ta'an sa lumawag ko ja patengku." Sowatëno i Towo ë nuwu' i Tjolano, ëng kuanao: „Sama', e Kolano." Ra'ipe' ure sia ë nilumukut-io' an saru-sarun i Tjolano, ja sia wënduoka masëng, am pa'pa' ë ngirung(ë)na ja wusëngo in sëpun rano-rano. Ëng kuano i Towo an atena: „Tumambisa wo'o aku wo ro'na sumëpun?" Makata'neio sia, kuanao in ësa: „Tia'pe', si Tjolano sisilangku." Siituoka ng kuanao a si Tjolano: „Masale' si Tjolano ë luminga ësa sisil?" Ëng kuano i Tjolano: „Masale' ulit." Ëng kuano i Towo: „Ja lumingao re'e mai: Kaawi'i i makasa aku ja nimëlutaw. Ra'ipe' ure aku ë nimaja'-mange, ja mailëko si rusa aku. Indongkuo-mai ë lutaw wo si rusa ira'ndaku-mange." Jawoja an tutuw(ë)na i maasar tambisa ëng këlutaw(ë)na si rusa, ja ngirung(ë)na ailaser(ë)na a lowas(ë)na, en itjaiasar(ë)na an tengena i lutaw ja ipëwalinao in sumëpun-io' a lowas(ë)na. Maëna'o-mai si Towo. Makasisil-ako si Towo, ja kumureseo-mai in do'kos si Tjolano am pa'pa' sia ja niuwako-ka'i i Towo. Ëng kuanao a si Towo: „Marengo e Towo; sapaka ëm pëpë'dis aitantuku an iitjo, ja nimakaapuo."

11. A si makasa si Tjolano nilumukut an seip im balena. An tutuw(ë)na i mëluku-lukut ra'itja walina ëm pëna'ne-na'neiën ta'an si Towokë' in ësa. Kuanao n an darëm in atena: „Ka'itu aku paasarën i Towo tani'tu." Su'utoka i Tjolano im banti' i Towo an isia, ja ipëkitowanao ka'i si Towo, en itjasale' ka'i i Tjolano sia ja pë'disën. Maio an dior i Tjolano si Towo. Ëng kuano i Tjolano: „Sapaka re'e ko ja ësa tow lewo'; pe'tare aku piaienukë', wo'ope' se kakelemu. Anae ka'i tjo pë'disëngkupe'. Tëlu ngando wo tëlu ngawëngi tjo ën da'itja toro kumaapa ën da'itja iwe'eku kumili'. Sa ko lumawag eng karëngana paten." Oreka si Towo kumili', ja wean i Tjolano tumeir an isia. Sangandoo wo sangawëngi sia ën da'io makili', ja mando-mai tumo'tolo si Towo ë mapërë-përëng akar in

itjakili'. Itjaisere-mange i Tjolano i nitumu'tuko in tjili' si Towo, sumale'o-mai si Tjolano, eng kuanao: „Ja pateno tu'u re'e ko, e Towo!” Sumowat si Towo, eng kuanao: „Embai, ka'itu aku paten.” Sowatën i Tjolano, eng kuana: „Am pa'pa' i nilumawago. Aitjuaku tēlu ngando ra'itja toro kumili'. Nio' karuaane' ngando ja nitjumili'o ko.” Eng kuano i Towo: „Sa itjasale' i Tjolano, pa'anēno-mange ē nuwu'ku-wo. Sapaka aku ja ra'itja' nitjumili', ta'an aku ja makakuru mēna'ne-na'nei in ta'i e membe', ēnto'o pēna'ne-na'neiengkū, mainde' tambisa ē muali in iitu, ta'an akar in tarepe' ra'itja makaere-mako wutul. Ra'itja kailēkangkū sapa ē nimange-mai in ta'iera wo walina muli-ulit a se tatamum balina, pa'pa'an itjapa'longera-mai ja toka niema' sama' waja purengkei, tjaupusēnoka!” Makasisilako itu sia, ja kume'ke'o-mai si Tjolano am pa'pa'an in tja-pandeian i Towo. Siituoka papawārengēno i Tjolano si Towo, ra'itja ka'i tjinapatean.

12. Kaindo-indonoka ka'i-mai a si makasa, an tutuw i Towo im pēpē'di-pē'disēn, sia rumapi-mange am bale paēnto'an e papē'disēn ēsa kērēwow nimakaanak wēru. A si makasa si tjērēwow tēkek, mangeoka tumēkēl karapi e kawajo i Tjolano. Eng kuano i Tjolano a se tow(ē)na: „Tei-teiran, oreka si tjērēwow tēkek tumintjas, sapaka sia ja kērēwow(ē)ku.” Mande in tjailē-ilēkan i Tjolano in sapaka sia ja kērēwow i Towo. Masale' ka'i si Tjolano ē ma'an mainde' sapa ēn itjua i Towo, sa sia itjua i Tjolano in tjērēwow(ē)na. Talali' eta' si tjērēwow tēkek nimarapi-rapioka se kawajo i Tjolano, ra'io iwe'e e tow i Tjolano mareng, ja si Towo maio sumaru si Tjolano wo sia numuwu', eng kuana: „Sapaka si tjērēwow tēkek anio' ja kērēwow(ē)ku, ta'an aitjakēmu re'e-mai se kawajo i Tjolano. Anaitu sa itjasale' i Tjolano, iwēkaro-mange a si inanga sia.” Sowatēno i Tjolano si Towo, eng kuanao: „E, kērēwow(ē)mu! mēsea'o ko; sapaka sia ja anak i tjawajoku.” Siituoka tumēkuro-mio' si Towo. Sapaka a si ēndo itu si Tjolano ja maja' an tawoiēna, mange a si ēsa ro'ong. Ja ēn iitu ja kailē-ilēkan i Towo. Anae sia mangilēk a si Tjolano eng kuana: „Sa itjasale' i Tjolano,

aku mangilék, mēkiupus, sa wo'o ro'na a si sangando anio' aku mareng'e am bale." Ēng kuano i Tjolano: „Sama'." Enan-ako sia, ja rumojoro-mio' wo mange am bale, mange-mai in tjarai kēmēsān. Siituoka sia mange kumēmēs a si ēsa rojongan, langkoiēn-ange i Tjolano i maange an tawoiēna. An tutuw(ē)na i makēmēs, kumēsoto-mai si Tjolano. Itjaisere-mio' i Tjolano si Towo, mangaja'ka'o-mai sia, ēng kuanao: „Siana re'e n aipangilék(ē)mu i mareng am bale?" Ēng kuano i Towo: „Siitu, e Kolano. Uanu kua'a, aku kawēngi rinu'du'an-ai tow mai nimakata'u in sapaka si amangku ja nimakaere toja'ang tuama." Mangaja'ka'o-mai si Tjolano, ēng kuanao: „Palela'an ko, e Towo! tuama ja makaere toja'ang? Ra'itja ro'na mamuali n iitu." Ēng kuano i Towo: „Uliti ē nuwu' i Tjolano, tanuka ka'i se kawajo ra'itja ro'na makaanak kērēwow." Makanuwu'-mako si Towo, ēng kuano i Tjolano: „Morako-mio' wo mange indon si tjērēwow(ē)mu. Aipangēpe'kukē' tu'uman de'en an iitjo." Tani'tu si tjērēwow kinaereano ka'i.

13. A si makasa si Towo nimakateir se nimindo wawi. Ēng kuano i Towo: „Sa itjasale'miow, itjaupuso-mai an iaku ēn ipus." Siituoka pokolēnera-mio' ēn ipus wo iwe'eera-mange si Towo. Marengo si Towo, itjatēka'-mange am baleera sia, indonao-mai ēn ipus i wawi wo wa'kēsēna im ba'kēs rintēk. Pakawa'kēsēna-mako itu, ja isēlēt(ē)nao-mio' an alarera, a si pawasa-wasan tanu in tjarangka' e wawi tjantong. Ēn ipus i wawi pinangilék(ē)na ja aitjēsot(ē)na-mai am pagēr in alar. Wo m ba'kēs aiwa'kēs in itu aipapalambot(ē)na-mange am bale. Wo ita'ar(ē)na a se tow am bale, ēng kuanao: „Sapaka aku ja mangerepe' se matēlēs wawi. Sa aku maio wo aku mawali-walio karapi, ja ta'ne-ta'neiēn pēmeso-meso'on-ange si wa'kēs anio'." Siituoka sia mangere se tow matēlēs wawi. Ra'itja ure sia ē nimaja'-mange nimakaereo. Mangem am bale i Towo sera. An tutuw i mawaja'-mange ja mēnuwu-nuwu'o im be'ena i wawi sera. Tajange' wo mange im bale, ja ipawe'eo-mange tu'us i Towo a se tow am baleera, in sa ro'na kēntolēn ēm ba'kēs. Kēntolēnerao tu'u. Tajange', iero'-mio' i Towo si mētēlēs

wo ituru'na-mange isia ěn ipus, ěng kuanao: „Awo, ra'itja emaněnu in tjantong si pěwu'uněngku an iitjo? Nange re'e n ipus, karangka' ng kiněsotan-ai. Anaitu iwe'eo-mai ěn dua ngapulu' pera.” Siituoka iwe'eo i nitumělěs ěn doit. Ipakawe'e-mako i nitumělěs ěn doit, ěng kuano i Towo: „Kěmbekěno-mio'-sa, en aku n awean pario-riorěn.” Siituoka tumintjaso si Towo. Pěkěmbekěno i nitumělěs si wawi, serena-mio' ra'itja re'e wana ěn an alar, wajakě' re'e in ipus. Siituoka sia mawěnduo-mai pa'pa'an sia ja piniaio ka'i re'en i Towo.

GROEP XI.

130a. Sisil an doro' i Wewene nimatuama wo nima'indo Kolano, sinsil i Servius Rawung.

Kaindo-indono-mai a si makasa ja wawean esa tuama lengei mange sinosoran si esa wewene malenge-lengeitje' ka'i. Awoja pirao wona' ngasërap ën an somoi-mai iitu, makaereø esa toja'am bewene si wewene isia, ta'an da'itja pira ngando n an somoi-mai in tjetow i toja'ang, ja mateo si tuama makapënana'an si wewene anio'. Ja mawangko'o-mai si toja'ang anio', ja sia mailëko in sapaka si inanga ja tow malenge-lengei re'e. Siituoka ng kuano i Toja'ang a si Inanga: „Ka'itu-itu kita malenge-lengeitje'? Ma'an de'e titjo'o, ja tawitje' ra'itja kapopoan sangando-sangando.”

Sumowato si Inanga, ng kuana: „Akarakë' in tanu iasa si Inangu, ang kato'tolampe' wo akar in tarepe'.” Kuano ka'i i Toja'ang: „Sa itjasale'mu, ja itëlës-ai indon karai aku.” Sumowato si Inanga: „Sama'.” Wo sia mangenao itëlës-ai rua ngakaraian a se wuring, wo itu iwe'ena isia. Awoja wëwangëno i Toja'ang ën iitu, ja aitji'it(ë)na ang karai ë suraro, anaitu esa salana wo esa karai. An somoi-mai iitu, ëng kuano ka'i i Toja'ang a si Inanga: „Sa itjasale'mu, kuntingën-ai ëm bu'uk(ë)ku.” Sowatëno i Inanga: „Sapa n torona in iitu? toka re'e ko ën anak e Walanda em pokolan ëm bu'uk!” Siituoka ng kuano ka'i i Toja'ang: „Pokolan-ai ëm bu'uk(ë)ku, sawo itjasale'mu!” Siituoka talali' nimasu'uto si Inanga ë mëlingalinga im pangilë-ngilëkan i ana'na, ja ki'itanao itu.

An somoi-mai iitu ja karaiëno-mai i Toja'ang si tjarai winilit(ë)na, wo sia maja'o-mange a si Tjolano. Awoja itjatëka'o-

mange am bale i Tjolano sia, ja ng kuanao i mēwuei: „Sawo itjasale' i Tjolano, ja aku masale' muntēp suraromu.” Sumowato si Tjolano, ēng kuana: „Sama', sa ko masale' muntēp suraroku.” Awoja sapaka si Tjolano anio' ja wawean ēsa anak wewene pinangakarano in tjalo'or, si tani'tuo in tjakēli se tow masale-sale' wo'o tumane an isia, ta'an da'itja wana n itjasale'na. Mamualioka a si makasa im boo-woondope' kumēsoto-mai se suraro wo ipalae-laes an dior im bale i Tjolano. Ja malae-laesoka sera, ja kasereano-mange i Wawu' si suraro wēru iitu. Siituoka ng kuanao a si Tjolano: „E Amangkū, sapaka aku in tarepe', ja masale'o taneān, ta'an da'itja wana walina n do'na tumane an iaku en si anu mangekē'.” Wo ituru'nao-mange si suraro wēru.

Awoja siitukē' m pinalinga i Tjolano, ja tani'tu in tjarior mangedo itjua a si suraro wēru, in sapaka sia ja karēngana en tumane a si Wawu', itji'ito in tjasale'an i Tjolano, wo kumēli-mai ang kasale'an i Wawu' in ēsa. Awoja tumane-mako sera, ja angkaiēno i Tjolano maindo mawali-wali si empona suraro wēru. Ja maja'o pira ngasērap an somoi-mai iitu, si Wawu' anio' mange am bale i Tjolano, wo sia mange sumisil sapa ē nimamuali am pamaleanera in ambalesa, ēng kuana a si Tjolano in ambalesa: „Sapaka tare aku m pēnana'an i suraro nitumane an iaku, ja ēna'kē'-mako, janta'an da'ipe' mako tanu makasa wo kami mēnturu'an in tjalēlo-lēloan in tow ambalesa.” Siituoka mawēnduo n deken i Tjolano, wo anaitu ipangusuinao lalan tambisa sia n do'na ruma'i im pamalean e ana'na. Awoja kasigilano i Tjolano sapaka n a mitjo m Paantangan i Ēndo ja wawean do'ong e tow sēra'-tow, iaka-akar si sei si mitjo ambitu, ja sia ra'io kawisa wo ro'na itjawareng-ai. Siituoka ja iru'ndu'o i Tjolano si makapēnana'an si ana'na karapi e pira-pira suraro mitjo-mai in doit wo n sangawotēl ēn dano matow am Paantangan i Ēndo.

Tani'tu sera tumi'iro-mitjo. Ang kasomoian-ai im pira ngando, ja sera itjatēka'o-mitjo. Awoja sumumpak-ange im bale i Tjolano a mitjo mbitu sia, ja sia ra'itja niindoera, ēnta'an pinasiri-

siri'eraké', pa'pa'an sia i makara-karai in 'tjarai tjakolanoan. Ja kamang sia wo se karapina i nimakakano wo nimakatu'tulo im paalin, ja tare sera maja'o-mai mareng a si Tjolano. Kaindo-indono-mai, ang kapëruaanoka i lalan, ja sera kaka-apuano im balun. Siituoka ng kuano i makaempo si Tjolano: „Sapaka kita, ja ra'io kumi'it si lalan sinaluta-mai, ta'an kita ja munëroka in dëkat.” Awoja mëmaja-maja'oka sera, ja itjasumpako-mai a lawi i maësa-ësa, ta'an si Maësa-ësa anio' ja ra'itja a lawi, nta'an maindo sende'en an unër in uma. Siituoka sera mënto'o a si lawi iitu. Ambituoka, sera mailëk in tu'tu' pëpe'enën i Maësa-ësa. Am pa'pa'an in da'itja ambitu si makalawi, ja n iitu rombitënerao, wo kanënera mario-rior. Kamang sera i nimakakano, ja tani'tu in tjarior sera tumintjaso menet im bawa'era. Awoja mangepe' muntëp-ange an sëndi sera, ja palinganerao-mange si Maësa-ësa ja maangko'o. Sapaka si Maësa-ësa ë nimangko', ja sia nimangawi-ngawit se rombit, ëng kuanao i nimaangko': „Kaawitane'-mange si nitjuman in tu'tu' pinësiwoku-wo! sawo sia tuama, karëngan maindope'-mange wewene-wo, wo sa sia wewene, ëng karëngana sia maindope'-mange tuama-wo.” Siituoka mainde'o se suraro pa'pa'an i makalinga-mange in aangko'on i Maësa-ësa. Ja am pa'pa' iitu, sera matëngo-tëngoo in owakera, ja pailëkëm bo katu'usanerao-mio', sapaka n aawitën i Maësa-ësa an isera ja nimamualitjè', pa'pa'am baja se suraro aitjawaluio nimaindoo wewene, wo tani'tu si paki'i-tji'itënera ja nimaindoo tuama. Ang karapi in tje'ke' wo mangaja'ka' sera ë meneto im bawa'era.

Awoja itjatëka'-mange am bale i Tjolano sera, ja iturukerao-mange a si Tjolano n doit wo n sangawotël ën dano matow, si niitjoera-mai a mitjo m Paantangan i Èndo. Siituoka mangaja'-ka'o-mai si Tjolano, am pa'pa' sia sumere im baja se airu'-ndu'na, ja ra'itja wana ësa wo ra'itja ambitu. A si tjapiraan ngando an somoi-mai iitu, ja mangem ka'i am bale i Tjolano si Wawu', wo sumisil ka'i a se kolano in ambalesa, ja in sapaka m pamaleanera in dua itu ja waweano kaaruian wo

kalëloan, em pa'pa'an si mënana' an isia ja nimatuamao tu'u. Siituoka ja masale'o si Tjolano, iaka-akar si an isia ja weanao ka'i tawoiëm bangko'. Awoja maio i mamatu'ao si Tjolano, ja sia mënana'o an tawoiëna, wo si a si ana'na angkaiënao maindo kolano a si ro'ong iitu sumawël an isia. Tani'tu si Anak Wewene i Maësa-ësa si nimatuamao ja maindo kolano. Tani'tukë'.

130%. Sisisilën an doro' i Wewene nimatuama.

Kaindo-indono-mai si Wewene anio' ja anak i Maësa-ësa. Sapaka sia ja mange nimuntëp suraro. Janta'an dirior(ë)na wo mange muntëp suraro, ja sia nimilit ësa lambung wo ësa salana, tanu in salana wo lambung e tuama. Jawoja mangem sia, nienan. Siituoka sia weano in tjarai e suraro.

A si makasa ja waja se suraro nimawowa' pënëngo-nëngon i Tjolano wo si ësa anak(ë)na wewene. Wo ng kuano i Anak i Tjolano in tumuru'-mio' si ësa suraro: „Si anu mio' ja isia ng karëngana mamuali pënana'angku.” Sapaka si suraro isia, ja isiao si Anak i Maësa-ësa. Jawoja tanuo tu'u sera i mëwali-walio maja' pira ngasërap si Anak i Tjolano mai a si Amanga, ng kuana: „Kua'itu-itu si pënana'angku wewenekë' wona' em pa'pa'an maja'o tani'tu ng kaure, ja ra'itja makaere anak. En sia ja matowo-towo tani'tu, ja sia karëngana iru'ndu'-mange mangilëk-ai i lësung passer a si Tjolanoea.” Ja iru'ndu'o tu'u-mange i Tjolano sia mange-mai i lësung passer. Maja'o sia winean ësa ata tuama kara-karapina mange. Itjatëka'-mange a si ro'ong iitu sera, ja sera mangem a si Tjolano. Mangem sera, pëwueiëno i Tjolano: „Mawisa kamu?” Sumowato sera: „Sapaka kami ja airu'ndu'-mai i Tjolanoeami, mai-mange i lësung passer.” Kuano i Tjolano: „Kua'a n iitu e, paalino.”

Siituoka sera marengo. Mëmaja-maja'oka sera, ja sera mailëk i lawi i wewene maësa-ësa, wo sera muntëp a lawi, ra'itja wana tow. Pailëkënera n ambitu wawean tu'tu', wo itu kanënera. Kaapunera-mako itu, ja sera tumintjaso. Maio si makalawi, ja pailëkënao n tu'tu' nirombito. Siituoka sia mangko', ng

kuana: „Si sei ẽ nirumombit in tu'tu', sa sia tuama, e mawewene, kaapa sa sia wewene, e matuamal" Malinga-makò in aipaangko' si ata, ja ng kuanao i mēwuei a si suraro: „Nimaweweneo ko na?" Sumowato si suraro: „Ra'itja." Janta'an sia ra'itja kailēkan i ata, sa sia wewene-wo. Anaitu si tuama-wo nimamualio wewene, ja si wewene-wo nimamualio tuama.

An somoi-mai iitu, sera marengo. Maio tu'u mapailēk si suraro-wo, in sia ja tuamaoka. Siituoka sia mēwali-walio wo si Anak i Tjolano. Ja ra'itja nimaja' pira ngasērap, ja sera makaereo tu'u anak.

131. Kukua an`doro' i Tuama wērupe' nitumane nimamongkor, sinisil i Jakobus Rintjap, Kinali.

Kaindo-indono-mai, wawean ẽsa ro'ong an tēmbir i lawanan, pēngēnto-ngēnto'an e ambalesa wērupe' nitumane. Nimamuali a si makasa, sapaka si Wewene itu masale' sumēra' pongkor, anaitu ng kuanao a si mēnana' an isia: „E anio', masale' wo'on aku n sumēra' pongkor, ta'an ko ja ra'itja tanu se tuama walina a si ro'ong anio' i mēngamongkor(ē)kē' n tawoiēnera; mande tani'tu ja ipangere-mai pongkor sēra'an aku." Siituoka m pinalinga i tuama itu, kua'a sia n tumu'tulo wo maja'o-mange kumi'it se tamponkorēn.

Awoja ra'ipe' ure sia ẽ nimange, ja kumēsoto-mai si ẽsa tuama kagiona, ra'itja nimēmbalinaam bo isia, maali-ali se pongkor. Am pa'pa'an in tani'tu, ja itjaisumpak(ē)na-mai am bale, pailēkēno-mange i Wewene itu sia, wo ng kuanao an isia: „O inde'! karior-ai tjo ẽ nimange nimamongkor." Siituoka ẽn sowatēna, ẽng kuana: „Ure re'e n ipakaere pongkor, ena? mande aku in da'itja tamponkorēn, tanu se tuama walina." Ja makanuwu'-makò in iitu sera, siwonerao se pongkor wo sēra'an.

Tēluo ngando si tuama iitu ẽ mēwali-wali wo si wewene itu, ja kumēsoto-mai si ulit mēnana' an isia, maali-ali tja'i-mai se pongkor, tanu si tuama nimai ririor. Mailēko-mange si tuama itu sia, ja mangaja'ka'o-mai sia, ra'io itjakua, wo

ng kuana: „O inde', si wisa ě mēnana' an iaku an itjamu in dua, em putekě' ě gio, ra'itja nimēmbalinaan, wo putekě' ka'i nimaali-mai pongkor an iaku?" Siituoka eta' m pinalinga i makapēnana'an ulit si Wewene itu, ja itendel(ě)nao-mio' se pongkor, wo tani'tu ng kerior kua'a sia ě mangem a si Tjolano a si ro'ong pēngēnto-ngēnto'anera. Itjatěka'-mange am bale i Tjolano sia, ja pēwueiēno i Tjolano in sa sapa m bawa'a'na. Sumowato sia, ěng kuana a si Tjolano: „Karapi in sisiri'an tani'tu ng kawangko' a si Tjolano, ja aku makata'u, sapaka a si tēlu ngando nilumangkoi aku airu'ndu' i pēnana'angku nimamongkor, en sia, kinē, masale' sumēra' pongkor. Kasomoian in tēlu ngando ja aku marengo-mai. Itjatěka'-mai am bale aku, ja si pēnana'angku mailěk iaku ang karapi i mangaja'ka' ulit, iaka-akar ěng kuana an iaku: „O inde', si wisa si makapēnana'an iaku an itjamu in dua, em putekě' ě gio wo putekě' ka'i nimali-ali-mai sēra' an iaku?" Anaitu wo aku nimai a si Tjolano, wo mēkiupus, sa roro'na putusēn i Tjolano n an dumoro' iitu." Siituoka ng kuano i Tjolano a si tuama iitu: „Sama'; woondo ja kamu in tēlu mai an iaku; iitjo wo si Wewene itu wo si Tuama a mange mbitu."

Mando-mai ipēkiumungo i Tjolano se maputus a si ro'ong iitu. Jawoja kamang in ambituo waja se maputus, ja kumēsotomai se putusēn. Itjatěka'-mai am paputusan sera in tēlu, ja sera putusēno e maputus, ta'an a si ěndo iitu ra'itja kinaputusanera, em pa'pa' ra'itja itjakua e maputus sa si wisa an isera in dua ě makapēnana'an si wewene itu, em putekě' ě gioera in dua. Pe'tare si Wewene itu ra'io makatu'us si mēnana' an isia. Siituoka ja sera papawarengēno e maputus, ěng kuaera: „Kamu marengē'-wo, woondooka ka'i m putusēn." Tani'tu ě nimamuali, mando-mai mangem ka'i se paputusēn; ta'an a si ěndo iitu ra'itja ka'i kinaputusan, iaka-akar nimēngulu-ngulur tani'tu a si pira-pirao wona' ngando. Awoja matawio in sanga-sērap sera m paputusēn, ja ra'ipe' kinaputusan-ako, iaka-akar makakēli-tjēli sera ra'io mawareng am bale wo makakēli-tjēli ra'io makan, puteoka i mēputu-putus. Sapaka n dumoro' e

mange an do'ong i Mopolo'. Ambituoka sia, ja sia maja' wo itjatëka'-mange an do'ong im Bangkai, niluma'us-ange am bale i Mëluku-lukutoka sia, ja têngonao-mio' si wewene ësa, makangaran i Ourensina, mateinte-teinteng i Siituoka mawueio sia a si makawale, ëng kuana: „Anak i sei si anu mange?” Sumowato si makawale: „O, anak kua'a i lëngei si toja'ang iana.” Ta'an si Pangerapan kumua a si atana in tana'i: „E Kaluasan, mangemu kua'a wueiën-ai sia, sa sia masale', ja isiao m pamajaku.”

Mangem si atana wo wueiënao tu'u tanu in aitjua i apo'na. Sumowatoka si Ourensina, ëng kuana: „O kawëlë-wëlës! Iakuo in anak i lëngei, se iparu'u-ru'uké' im bale e Wangkai, ja iaku ëm pamajan i Pangerapan, in Tombalanda?” Siituoka marengo-mange si ata, wo mange kumua a si Pangerapan: „Ja aitjuakuo ë nuwu', ta'an sia nitjumuakë'-mai in da'itja kine mamuali, e malawi'tjë' kine sia, en anak i lëngei.” Sumowatoka si Pangerapan, ëng kuana: „O ra'itja kua'a tumà'nei in iitu aku; marengë'-mange ko wo itjua-mange isia en aku ja maonge.”

Mangem si atana, paki'itën-ange i Pangerapan. Itjatëka'-mange am bale i amang wo si inang i Ourensina sia, ja itjuanao-mange an isera ë niaina. Makaapu-mako ë nuwu', ja kumuaomange an isera si Pangerapan, ëng kuana: „En aku n sumengkote', ja mëlur-ange im bale kamu wo ëm bale e mëro'ong, e la'usangku-mai im pamajaku.” Siituoka sumengkotomange an do'ong(ë)na si Pangerapan. Awoja itjatëka'-mange sia, ja sia kumua a si pënana'ana: „Mëlur-ange im bale, e la'usan-ai i tjarapimu.”

133. Sisil an doro' e tow rlor, si Angkol wo si Wala.

Sapaka in dior, ja awean dua Sondër mëkarëtuk. Jawoja n tawoiënera in dua mëngere-ngerekë' sëra', mëngëkiwio'o wo mëngëkiperet. Kaindo-indono-mai a si ëndo makasa sera in dua meko ang Kasuruan wo sera mio' an so'so'an i Nimanga, wo sera mailëk si ësa pëngëtétën ang këpal pauntëpan e peret.

Pailëkënera-mako ja im pauntëpan e peret këkëlian, ëng kuanerao: „Si sei si muntëp si pëngëtëtën anio', mange indon-ai se peret?" Kuano i ësa, tanuo-mai si Angkol: „Ja iaku." Kuano i Wala: „Ja sama'." Ta'an dirior wo si Angkol muntëp si pëngëtëtën iitu, ja sera tuma'tak pondos, am pa'pa'an kanaramën e mauntëp im pëngëtëtën, ja pawa'kësan im pondos ën dere'-enan, en tia' sia ra'io makailëk im barengana-mai.

Jawoja muntëpo tu'u-mange si Angkol, ja piniatjë' re'en i ang kësot, tanuo-mai si Wala, ra'itja re'en pinaenetana m pondos. Ra'itja kailëkan-ai i nimuntëp, in da'itja weta' re'en pinaenetana. Aiwëta'nakë' re'e-mange. Përeke-rekenën i Angkol ra'itja aiwëta'-mange i Wala, anae sia mëngange-ngangekë', wo tu'u sia itjatëka'-mange a si rangow wangkër kaapa a si limbo'mbo' niënto'ano e peret. Wo sepanao tu'u se peret. Pakasepanao-mako se peret ambitu, ja iero'nao wo'on ëm pondos. Sia mapakëntolo wo'o, kaapa mapaweso'o wo'on si pondos aiwa'kës an dere'-enan, ja ra'io weso'on. Wo, kine, sia maere-ere kësotan da'io pailëkëna si niuntëpana-mai. Jawoja mapënda-pëndamoka waja'an sia, ja makapëndam si ësa a'mut in tjaju, ëng kuanao: „Ja en aku re'e in da'io makaere im binaja'angku-mai, ja aku kumi'ito tare si a'muta anio'. Se wela re'en ën tu'ura in iana wo ra'itja am bawo in tana' wo mai." Tani'tu sia kumi'ito tu'u si a'mut iitu. Wo sia kumalio, se peret ja sinëwënao, wo sia mëngi'ingit si a'mut itu, pëngali-ngalina in sondang, iaka-akar maka-wangkër ën a'muta in tjaju. Sia makarë'ndëm ë makali, pa'pa'an sia mata'nei: „Wona' re'en tow(ë)pe' aku." Anae sia makarë'ndëm ë makali, wo makawangkër tu'u ën a'muta, iaka-akar tu'u sia mangem an tu'ur in tjaju, wo sia tu'u tumi'mboko-mange am bawo in tana'.

Sia ja nitjumësotoka-mange an Talaita'd, a lesar ambitu wo, iaka-akar se mawinson a lesar sera nimaëga, kaapa nimaintjar, pa'pa'an sera mainde' wo malintër ë mailëk si ësa tow mio' nitjumësot-ai an darëm in tana'. Itjuaera, sia ja ësa kasuruan, pa'pa'an si tow iitu nitjumulo'o tare. Pailëkënera-mako sia in

da'itja rumeso ambitu a mio'na kinēsotan-ai, ja ētētēnerao-mange i muei, wueiēnerao: „Tow ambisa ko wo mai?” Sumowato si Angkol, ēng kuanao: „Sapaka aku, ja Sondēr, ta'an aku piniai i tjarapitju i mēkiperet. Sapaka aku ja nimuntēp im pēngētētēn, aiwēta'kē' re'en i tjarapitju ēm pondos aiwa'kēs an dere'enangku, iaka-akar aku ja ra'io nimakaere im binaja'-angku-mio', wo aku nimio'oka nitjumi'it-ai si a'muta in tjaju anio'.” Wueiēno e Talaita'd: „Ēnto'o ko nimumpun am pēngētētēn?” Ēng kuanao: „Mausēw in tandē, aisawēl in da'ami-wo.” Mueio ka'itje' si Angkol: „Ja in tarepe'?” Ēng kuano e Talaita'd: „Maupu'o. Ja sangata'un de'e ko ēn an darēm in tana'.” Kuano i Angkol: „E, wutulo tani'tu.”

Anae sia n an darēm in tana' ja wutul sangata'un wo sia kumēsot an Talaita'd. Ja iwalio-mange a si tjpala sia, ja irajako i tjpala rajak lana nirano-ranooka. Jawoja rumunduko sia makatēlukē' lumēngku' wo sia tumēkēl. Maja' rua ngando, ja sia maro'nao-mai ēm pakanēn. Pira-piraoka ngando ēn akar-ai iitu, sia makapēndamo in ēnte'o n owak, ja sia mangilēko a si tjpala i marengo-mai an do'ong, an Sondēr. Tani'tu nienan i tjpala ja in sia marengo-mai. Wo sia tu'u mangeo, mareng-ai, maina pailēkēn ja tinaneano i nimiai isia am pēngētētēn si pēnana'ana.

Pailēkēn-ako i Angkol in sinosorano i Wala si pēnana'ana, ja ng kuanao: „Itjamuo in dua, sa re'em baweano toja'ang. Siitu re'e ng kawalianu nimiai iaku am pēngētētēn, am pa'-pa'an im paawo-awonu re'en i mandet si pēnana'angku. Ta'an itjamuo in dua. Ta'an kita mēngēnto-ngēnto'kē' mēkarētuk tanu in dior in aku in da'ipe' piniaimu, ra'itja kua'a maēmbow aku.” Kuano i Wala: „Sama', e kalo!” Tani'tu sera mēkarētuk(ē)kē'.

Maio a si ēndo makasa, kuano i Angkol: „Maio, e kalo, wo pēkake'etēnta.” Kuano i Wala: „Sama'.” Jawoja ēm pake'-etanera rua ngatu'ur ēn a'kel. Ja ambituoka ka'itje' ja akalēno i Angkol si Wala. Tumileng-ako si ēndo a si ēndo makasa an tutuwerao in dua i mēkake'et, ja mangem si Angkol ma-

ngenao su'upën ëm baja im ba'kës in salonsai im pe' i Wala. Ja tani'tu marengo-mai a lawi si Angkol wo mainao towan si Wala: „Mangeo kume'et kita, e kalo.” Kuano i Wala: „Ja mangem kita, e kalo.” Itjatëka' tu'u-mange am pake'etan, ja ng kuano i Angkol: „Ja si tjalo ë mange a si pake'etan anu mange, iaku sia'i.” Ra'itja ka'itje' kailëkan i Wala in tina'taso i Angkol ëm ba'kës in salonsai im pe', ke'etan i Wala. Jawoja tani'tu makasosor-ange si Wala, wo sia tumeako-mio' an salonsai, ta'an da'ipe' nirumëmbus ëm ba'kës, pa'pa'an ëng këta'tas i Angkol im ba'kës, ja pinatëla'uana tëkek, en tia' ra'ipe' nitumuas im pe' wo itjalëpok. Jawoja ëngkasëno tu'u i Wala ëm papa'ar, wo wuka'anao ën sampërut, ja mio'nao angkaiën-ai ën sintjom, ja sia itjarëmbuso-mio' lumëpok-io' an tana', nimëla'u-la'us nimate. Kuano i Angkol: „Awo! iitjoka tu'u ë nimakaindo? Awo! iakuka ë nimate am pëngëtëtën? Siitu ëm bawaer i Tjasuruan an iitjo i nimiäi iaku am pëngëtëtën, wo nimandet si pënana'angku.”

GROEP XII.

134. Palapən a si Nimate, sinisil i Johanis Regar, Kapoja.

1. O Ina', e Ina', e Ina'! sa wo'o tanupe' in dior, e Ina',
e Ina'!
2. I. nuwu'am bo'o-mai si ana'mu, I.
3. I. ra'io ure aku ě makainang, I.
4. I. ra'ipe' iasa aku ěm bĕndu, I.
5. I. sa aku mailĕk se makainange', I.
6. I. siitu weta' aku ja wĕndu.
O, Ina'!!! e Ina'!! e Ina'!
7. I. ěn ipakalili i Nina' iaku, I.
8. I. si Inangku nimĕwangko' iaku, I.
9. I. wajao in tjawĕnduan i ana'mu, I.
10. I. ra'itja kinawaerangku, I.
11. I. ra'itja kinawaerangku ěn ipakawangko-wangko' i Ina'
iaku, I.
12. I. ma'am bo'o malĕnge-lĕngei, I.
13. I. wo makasere wo'o-mange si Inangku, I.
14. I. endo'o si Tjasuruan i Ina', I.
15. I. ra'itja wo'o kumelong, I.
16. I. ta'an iĕnto' wo'o-mio' pira am bawo in tana', I.
17. I. kaariman tu'u si Inangku, I.
18. I. si Inangku pinopowangkĕ', I.
19. I. sinĕmpo' a se ana'mu, I.
20. I. ambisape' tu'u n ereangku si Ina', I.
21. I. lumi'tjir in tana' ambisa aku, I.

22. I. wo aku makaerepe' si Ina', I.
O Ina'!!! e Ina'!! e Ina'!
23. I. iwali wo'o a si lalam binaja'anu, I.
24. I. ra'ipe' iasa aku ěm bĕndu, I.
25. I. sa tu'u weta' aku mange mailĕk in uma, I.
26. I. sa tu'u aku mange mailĕk in tinanĕm i Inangku, I.
27. I. si ra'itja wana ěm pĕkurangĕn, I.
28. I. ěn uma kinaaruian i Inangku, I.
29. I. sa aku masalu-salu i lalan-sa, I.
30. I. nuwu'an-ai si ana'mu, I.
O Ina'!!! e Ina'!! e Ina'!
31. I. sa kita puteoka am bale, I.
32. I. itjuao i Ina', I.
33. I. mĕwali-walioka kita ěng kuman, I.
O Ina'!!! e Ina'!! e Ina'!
34. I. si seipe' tu'u ě mulur iaku tani'tu, I.
35. I. ěng kĕluat i Tjasuruangku an iaku, I.
36. I. ndo'o si Tjasuruan i Inangku, I.
37. I. sa pailĕkĕnu si pojo'mu, e Ina', I.
e Na'ku!!! o Na'ku!! e Na'ku!
38. I. tio'o pasele-selengan si ana'ku, I.
39. I. iakuo ěn itjalewo', I.
40. I. iakuo ě lewo' e Ina', en aitĕla'umuo, I.
41. I. ěn tĕrĕindĕm i Inangku, I.
42. I. aku ě mailĕk ěm pinatawo-tawoi i Inangku, I.
43. I. kumanat in tjontoian, I.
44. I. ěn sinĕmpean in tĕpe i Ina', I.
45. I. ěn sumere im bantang i Ina'! I.
O Ina'!!! e Ina'!! e Ina'!
46. I. si ra'io nitjumaipi am bene' pinawĕndu-wĕnduana.
47. I. kawalian i Ina', I.
48. I. sumakĭt si Ina', I.

49. I. mēnawo-nawoitjē' si Inangku, I.
O Ina'!!! e Ina'!! e Ina'!
50. I. itēkēlo i sakit iana ko, I.
51. I. siituo si Ina' ēn da'itja nitumawoi, I.
52. I. mēraŋga-rangat si Ina', I.
53. I. ra'io sumowat si Ina', I.
54. I. pangusuiēngkupe' si Ina', I.
55. I. wona' ka'i a meko mbia'i si Ina', I.
O Ina'!!! e Ina'!! e Ina'!
56. I. wona' ka'i nimeko a se ra'a si Ina', I.
57. I. ambana kua'a si Ina', I.
58. I. ra'io re'e tanu i mēndondo, I.
59. I. mangem kua'a karu' aku, I.
60. I. aiēnēpo tu'u a se ana'mu ko, I.
O Ina'!!! e Ina'!! e Ina'!
61. I. mangere-ngere si Inangku aku, I.
62. I. ambisape' ēm pangereangku si Inangku, I.
63. I. lumi'tjir in tana' ambisa aku, I.
64. I. wo aku makaere si Inangku, I.
O Ina'!!! e Ina'!! e Ina'!
65. I. ēng kinaerean i Inangku, I.
66. I. tumambisa aku ē lumupa si Inangku! I.
67. I. ē mēnere-nere in tjinaerean i Inangku, I.
68. I. iwalitjē'-mange aku, I.
69. I. wo aku mange wo'o mailēk si ana'ku pinalilitju, I.
70. I. ro'naoka kaupusēn si ana'ku, e Ina', e Na'ku!
71. O Na'ku! si ana'ku niētēto-mange i apo'mu, kaloinang!
O Na'ku! e Na'ku, e Na'ku!
72. Tio'o mawera-wera' a si apo'mu, e itow i nina'! kaloinang!
73. O Ina'! e Ina', e Ina'! palilin-ange si ana'ku, e Ina', e Ina'!
O Na'ku!!! e Na'ku!! e Na'ku!
74. O Ina', e Ina'! e Ina'! isia ē mange'et paēlēpēn i Ina',
e Ina', e Ina'!

- 75. I. si seipe' tu'u ěm patěla'uangku se ana'ku. I.
- 76. I. tanu rake wo'o i měndondo, I.
- 77. I. mange an uma aku, I.
- 78. I. ra'itja wana ěng kawěnduangku-mai i mata'nei, I.
- 79. I. katawo-tawoitju-mai, I.
- 80. I. si Inangkukě' ěm beang kawěnduan i ana'ku, I.
- 81. I. si seipe' ě mulur tani'tu iaku, I.

O Ina'!!! e Ina'!! e Ina'!

- 82. I. ra'ipe' iasa aku ěm běndu, I.
- 83. I. ta'an sa aku paere-ere'an e makaapo' iitjo, I.
- 84. I. ambitu weta' aku-sa, I.
- 85. I. mapoloo ka'i ě lěloku si Inangku, e Ina'!
- 86. I. siitu weta' aku ja mawěndu, I.
- 87. I. sa wo'o tanupe' i měndondo, I.
- 88. I. ja měwali tja'i wo'o kita ěn sumalu i lalan, I.
- 89. I. ta'an tu'u re'e aku in tarepe', I.
- 90. I. tumo'tolo tu'u aku, I.
- 91. I. iakuoka in ěsa ěn sumalu i lalan, I.
- 92. I. pawěrotěnoka waja i ana'mu, I.
- 93. I. ěm pinaasěnganta i měinang, I.
- 94. I. tanuoka serengkě'-mio' wia'i, I.

O Ina'!!! e Ina'!! e Ina'!

- 95. I. sa wo'o tanu in an towan, I.
- 96. I. masěngo wo'o ambia'i tjita i měinang, I.
- 97. I. me'e re'e pawěnduan i ana'mu, I.
- 98. I. maja'o wo'o kita, I.
- 99. I. maawoo in uma kita, I.
- 100. I. an doro'o in uma i ana'mu, I.
- 101. I. kuangkuo in tjumua a si Inangku, I.
- 102. I. tumulipe' a lawiami tjita-wo, I.
- 103. I. tumulipe' mělěp a lawi, I.
- 104. I. wo kita mange a lawi, I.
- 105. I. wo ng kuangkuo, I.
- 106. I. ra'ipe' toro mělěp, I.

107. I. isiwokupe' iëlëp' kita i mēinang, I.
 108. I. ja mëlëpo kita i mēinang, I.
 109. I. makaëlëp-ako si Ina', I.
 O Ina'!!! e Ina'!! e Ina'!
110. I. ja ng kuano i Ina', I.
 111. I. mitjom aku, e itjeinang, I.
 112. I. kuangkuo in tjumua, I.
 113. I. eng ko ë maitjom, I.
 114. I. ja wawa'ando-sa, I.
 115. I. rangka'pe' si ëndo-sa, mitjoo maja'-mai, I.
 116. I. tumuli-mai, I.
 117. I. maioka mëlëp ambia, I.
 118. I. wo kita mēwalioka-mako, I.
 119. I. kini'itangkë' tu'u i Ina', I.
 120. I. makaëlëp-ako kita i mēinang, I.
 121. I. makaëlëp-ako, I.
 122. I. ja kita mēwalio-mako, I.
 123. I. sa tu'u aku mërot se itu, I.
 124. I. mēngame-ngame' si ana'mu, I.
 125. I. sa tu'u aku ra'itja pinaki'i-tji'itanu, I.
 126. I. ra'itja tu'u wo'o tanu iasa, I.
 127. I. ëm pawërotën in ateku, I.
 128. I. sa tu'u aku mërot, I.
 129. I. an ipakaki'i-tji'it i Nina', I.
 O Ina'!!! e Ina'!! e Ina'!
130. I. ra'itja tanu iasa ëm pawërotën in ate i ana'mu, I.
 131. I. kura tu'u aku in tarepe', I.
 132. I. nimawës ang kawënduan i ana'mu, I.
 133. I. sa wo'o tanupe' i mëndondo, I.
 134. I. itjateka' wo'o-mai tanu iasa, I.
 135. I. ja mangereo wo'o si Ina' aku, I.
 O Ina'!!! e Ina'!! e Ina'!
136. I. tanu rake wo'o i mëndondo, I.

137. I. kaaiënëp a si ana'mu ko, I.
138. I pangënto-ngënto'ongku im pangipin si Ina', I.
139. I. tanuoka wo'o makainang aku, I.
140. I. sa rake wo'o mapaipi, I.
141. I. wo tanupe' wo'o makainang, I.

135. Weweletën.

1. Mai tjuman-ange, e wa'ilan Kasuruan, Apo' nimema' in tana'! pakalowirën-ai wo sosorane'-mai in doko' i tow ra'itja matete-tëlës.
2. Mai tjuman-ange, e wa'ilan Kasuruan! pakalowirën-ai wo pakasama'an-ai n owak wo ransakane'-mai im bene', isupu-supupe'-mai a se kasupu wo se ra'itja kasupu.
3. Mai tjuman-ange, e wa'ilan Kasuruan! pakasama'an-ai n owakami wo se toja'ang, se ko'ko' wo se wawi.
4. Mai tjuman-ange, e wa'ilan! wean-ai owak sama' ë mawaja-waja' wo wean-ai tjamang am pawaja-waja'am-bo.
5. Mai tjuman-ange, e wa'ilan Kasuruan! Apo' nimema' in tana'! Wue-wuen-ai ëm bene', pangënto-ngënto'ongkë' in ate i wawi tjantong am bale.
6. Mai tjuman-ange, e wa'ilan Kasuruan, se Tenteres wo se Lëngkokan.
7. Sumëra'-mange, e Kasuruan! nio' si Rorot wo se Kenta'-talun, ene-enetën-ai.
8. E wa'ilan! weane'-mai tjamang aku-wo ë mawaja-waja' an dowar, kumaapa an do'ong ambisa n angeangku.
9. Sumëra'-mange, e Rorot, ene-enetën-ai.
10. Nio' ko, e Rorot, wue-wuen-ai, wo itangka'pe'-mange se karapina, wo weane'-mai ang këmël-sa.
11. Nio' m betengiow, wewetengan ësa.
12. Sumëra'-mange kamu, e makatoro ambia, makati'isëne'-mai im pusu'-wo, wo tanupe' pamulu-mulut ë make'et.
13. Mëlëp-ange, e Kasuruan! kumëlipe'-mange si upe' anio'.
14. Mëlëp-ange, e wa'ilan Kasuruan! sama-sama'ane'-mai n owak wo pakalowirëne'-mai-wo.

15. Pakalakowēne'-mai-wo, e wa'ilan Kasuruan! wo pakatēlē-wēne'-mai m pisow.
16. E wa'ilan Kasuruan! wue-wuene'-mai makasakē' mupu'-mange wo nimawutao ng kama.
17. E wa'ilan! wue-wuen-ai!
18. E wa'ilan Kasuruan! wue-wuen-ai tanukē' i me'e-mio' an tangkupa in tēnga'.
19. E wa'ilan Kasuruan! wean-ai tjamang, tanukē' mange-mai in aiema'.
20. E wa'ilan Kasuruan! si To'ar wo si Ramangasin, makarusoruso'-mai-wo.
21. Seleng, sa rumē'mbao ja paalino-mai am bale, ta'an sa n iitu indom bale, ja a si ēndo iitu ra'io mareso-reso am bale si nimaali-mai.
22. E sira, kasama' n apēru e! inaniao re'e-mako ēng kalowir wo ng kasija', sosorēne'-mai in doko' i makaroko' ra'itja matete-tēlē.
23. E wa'ilan Kasuruan! pora-porakane'-mai in sumepē'd wo ia'mu-a'mute'-mio' si lisi'd anio' wo ra'itja mawo'se-wo'se akar in tjaure-ure.
24. Maali-mange roko' wo mange iwelet a se Kasuruan, wo roro'na kēli n indon.
25. E wa'ilan Kasuruan! lowi-lowirēn-ai si pojo'ami.
26. E wa'ilan Kasuruan! kama-kamangēne'-mai aku, tanupe' pailēkan-ange e pawaja-waja'an wua'na i lansot ēn ipawangker(ē)ku.
27. E na'ku, si ana'ku! lowi-lowirēne'-mai tjami-wo, mēamang wo mēinang, wo ilangko-langkoipe'-mange (ook: itjowakowa'pe'-mange-wo) a se rēnga-rēngan, wo se ra'itja rēngarēngam-bo, e wa'ilan Kasuruan.
28. E Wa'ilan! irojonge'-mako an sēndi in tana' ra'itja kailēkan ēn sakit-wo.
29. E Wa'ilan! irojong-ako an sēndi in tana' n sakit, sawēlan-ai owak sama'.
30. E Wa'ilan! irojong-ako an sēndi in tana' se sakit wo n

tambai wo sa sia masomo-somoi nuwu' an iaku, ja isalë'sëk-ange isia.

31. E Wa'ilan! sa iwe'epe' tow, ja porakano-mai ng kasakitan; sa an ukuro, ja indoano tare-mai in asëng.
32. E Wa'ilan! porakan-ai, ambitu n daragesan sa sia mema'.
33. Tambisanamipe' ko, an ukur(ë)muo! Tojo'pe' ng kalëloan? Ta'an tumambisa, lumangkoi si nimema' itjita?
34. Erow aku! kumaapa: e kaariman!
35. Tangkaran-io' n ia'li', wo ia'li'-mio' sama'.

**136. An doro' in tawoiën i Wallan in Uma wo si
Tona'as Wangko'.**

Ën tawoiën i Walian in Uma, katare: rumeindeng an uma i Tona'as Wangko', wo am balena, wo a lesar, wo ka'i an uma wo am bale a se tow. Kumi'it iitu sumero in uma karapi i Tona'as.

Wo matagei se patageiën, mëngawali se pësende'en, se toja'ang irojo, se me'e wuat, wo se rumojor in derentek an dano. Matowa i nimu'kur e sumakit, wo makarua mano'or api longi'na; manëwas im bëngi i nimëkitumbalan, melet ka'i i nimëtalitjuro se nimëkitumbalan. Mëngangilë-ngilëk këtër wo owak sama' e waja se tow, wo kasama'an im baja se kakanën e tow am bawo in tana'. Mëngakua i nuwu' i Wa'ilan sa sia mai a se maengket.

Sapaka n tanu susuli' tjaapa lawu paindona am pa'pa' in tawoiëna, ja wene' ala'mbak, mangku, kusi wo ng kawitën karapi in saroinsong, wo n sëra' mata' ipaki'it e mapëli'i.

Si Walian in Uma mareindeng, katare: an darëm im bale i Tona'as Wangko' a si ëndo i musëw. Sa si Tona'as ra'-itja wa'ilan, karëngana si Walian rumeindengkë' ang kësot in tuliran.

Kumarua: mareindeng am bale i Tona'as Wangko' a si ëndo im pakangënow.

Kumatëlu: mange rumeindeng an uma i Tona'as Wangko' i maja'o mange ang kaju.

Kumapat: mange rumeindeng a lesar a si ěndo i mapawua'. Ěn iitu ja tana'i: katara se tona'as mapĕli'i a lesar, mandq-mai sera ka'i mapĕli'i am baleera. Jawoja mando-mai im pakakandoan i tona'as, se tow mapawua'o. An iitu si Walian in Uma mange ka'i rumeindeng an uma i Tona'as Wangko' wo mera-mange a se tow walina.

Kumi'it siitu a si ěndo im pakanĕmpo' se tona'as mange mapĕli'i a lesar, ja a si ěndo iitu ka'i si Walian in Uma n dumeindeng ambitu.

Sapaka ng karai i Walian in Uma sa mareindeng, ja karĕngana raindang, ta'an ěm bujang sama'kĕ' ěn sarasa kulo', sama' ěn aroro' raindang. Ja sa mengket, kumaraitjĕ' in sole, wo mĕ'mbĕr in tjakĕra' wo ng kapas lĕme'; ěng kama wĕ'mbĕran in sengkawo n tangkul. Ěm bujang paloeng wo pe'etĕn in tjapas lĕme' wo n sawit. Ěm biwin, paku' wo ng kelana wo n sinair. Ěn do'kos wĕ'mbĕran in tjelana, wo tĕndĕkan in agam bulu'kun, wo kumo'kot in sinĕrap.

Sapaka ng karĕngana pĕngaali-alina tanu tu'us in tawoiĕna, ja tindung, patoka, tulus, wiwin wo n tawa'ang. Ěm patimboiĕn i Walian in Uma tatawoi i leleongĕn, ja tawa'ang. A si ěndo in tjĕusĕw, sumintjom im bulinga', wo ka'i sa se mapĕli'i nimindo pĕli'i. Ja sa tumagei, sumintjom im batu, pinangilĕk a si Tjumendong a langit, sapaka m bulinga' ja pinangilĕk a si Moko'ndeng ang Kolongan.

An doro' i Tona'as Wangko', sapaka n ta'as, ja ra'itja pĕngaali-alin i Tona'as kaapa i Sumasainsang, em pa'pa' itu ja karĕnganakĕ' iusĕw an da'ter i lalan im paasun a si ěndoo i mange kĕindo-mai in iitu, a niloindong-io' im binean si pĕnguma. Wo sapaka si ta'as iitu, ra'itja eema'an sapa-sapa kaapa ra'itja tambisan, wajakĕ' i niusĕw an da'ter i lalan im paasun.

Sapaka m beweletĕn i Tona'as Wangko'a si ěndo in dumu'ndu' se paru'ndu'an mange-mai wara', ja tana'i:

Towo si tjo'ko' i Mamarimbing, sa ra'itja lumua' in tjalowiran e tow wo se waja-waja papiaran, wo lumua' im bene' wo n doko', wo waja in tjamang e waja Kolongan!

Sawo marengo se paru'ndu'an, nimakaereo si wara' pina-ngusuiera, ja tana'i n ipakawelet:

Ja wineano ka'i tu'u-mai in tjëtër si ro'ong iasa wo in tjalowiran wo waja in tjamang, karapi im bene' wo n doko'; rondoro ka'i tu'u re'e pali'u-li'usan-ai e tow matëlës kanën wo roko':

Ēm beweletën a si ëndo i mangënow, ja tana'i: Ja am palingan i Tjasuruan Mamarimbing, kami mangilëk nuwu' sama' e ko'ko'mu am pangilëkanami in tjalowiran e tow wo m baja se patamun wo m pangilë-ngilëkan am baja-waja, an tu'tu' wo n sendo'an.

A si Tjasuruam Bangko':

Ja maio kuman-ange (mëlëp-ange), e wa'ilan Kasuruan, si Apo' nimema' i langit wo n tana' wo m baja se tow. Iitjo n do'na pangilëkanami këtër, wo owak sama' am baja se tow, wo se anak wo se pojo'.

A si Tjumokomba' a langit:

Ja Kumokomba'! itjomba'-mange ang kalowiran wo ng kamam bangko' wo ilalo-lalo-mange a se rënga-rëngan wo se ra'i rënga-rëngan. Kami ja ra'itja nimindo in tjawasa mange mauulu-ulur am pëli'imiow in Tjasuruan, se aisusui e apo'ami.

A si Tamatular, a si Miojo' wo a si Tantumoitow, tana'i: Tantumoitow! mangepe' itoitow-ange ang kalowiran wo ang kasija'an, e Apo' pasawëlan!

A si Pasiowan:

Pasiowan! tona'as e kokomba'an nisumusui a se tona'as e rërëgësan!

A si Lampasejow:

Lampasejow, masainsang i Pasiowan, nitumuru' se masainsang!

A si Tumiwa':

Tumiwa'! maloiindong se mëngetiwa'; ja Tumiwa', pira n tanu iitjo sumakei-mai se mëngetiwa' an dërëgësan. Wo makalesar-ange lesar wawangkëran wo ra'itja kano'oan ëndo e wëngi.

A si Muntu-untu:

Muntu-untu! paapo'on e mangaëmpung wo se rërëgësan, ja

mai tjuman-ange am pasil, wo wean-aí kětër wo owak sama' kami in an do'ong anio'!

A si Lumintang, Masinambow, Tumila'ar wo si Talumëpa':
Kamu nimakaindo im pëpata, kamu anio' mapo' se apo'ami,
nitumawoi im pëli'i wangko'.

A si Makawotur:

Ko nimakaindo im pëli'i wangko', ko anio' mapo' se apo'ami,
nitumawoi im pëli'i wangko'.

A si Maroaja:

Maroaja, niindo walian e tona'as wo walian im posam bangko'!
Ra'itja wana n tow lumawag ang kawa'ilanau, am pa'pa' iitjoo
nirumeindeng in tana'.

A si Tjirai ang Keleian:

Ēmpung Kirai, ko niindo matondong tow! Aku tinu'ul i
Nimema' se tow; sa kekelangan, da'itja rarangkangan, da'itja
rorompangan, ěn aitantu an iaku, ja tondong tow!

A si Tjalangi' an Talitjuran:

Ja mai tjuman-ange si Tjalangi'! iitjo ě nitumo'tol im pëli'i
im bene' wo isusui-mai a se apo'ami; ra'itja niina'an ěn aisusui
a se inang wo amangami!

A si Makarende a Lu'uk:

Ja kuman-ange si Makarende, makako'ko' se kawok (peret).

Ang Kinaaliran:

Ja mai tjuman-ange kamu, e Kasuruan ang Kinaaliran, se
A'lir-La'indong!

A si Manarinsing, an Timu:

Mai tjuman-ange, si Manarinsing, Lumambukow wo Luma-
luindung!

A si Maengkong, an Dëmbokën:

Ja mai tjuman-ange, si Maengkong, wo tio'o ipasawu-sawur-ai
se ko'ko'mu, en tia' malewo' waja n tatanëmën e tow!

A si Worotitjan:

Ja mai tjuman-ange, si Worotitjan, ko makako'ko' si rondor
(si ipënguma).

A si Toporundeng an darëm in tana':

Ja mai tjuman-ange, si Toporundeng an darëm in tana',
wo si Mengke, mai tjuman-ange! sa iengkemu ën tana', tio'o
papeso-pesolën in tombol(ë)na, iitjo makawawi si malisu-lisu
an tombol in tana'!

A si Makaliwe, am pakësotan in awa'at:

O Makaliwe, ko niindo-mai i Tjasuruam bangko' pakësotan
in dëgës; sa wuka'anu, isua-suut, oreka ng kakanën e tow
mara'itja kaapa mapira.

A si Tjumaimboto, Ma'inturin:

Kamu aitantu-mai mateir am Pinëwetengan, jawoja m baja
se am bawo in tana' ja pinëweteng a meko mbana.

A si Tjawatu:

Ja mai tjuman-ange, si Tjawatu, si nisumakei se rombit
(se Tondano).

A si Rorinse'pang:

Si Rorinse'pang, ko makataisi taisi pinëse'er aipasakeimu
se lalowa'ilan wo se nimindo pëli'i, se mawangker, se magirot,
wo se tulus, e Wa'ilan!

A si Leleko an Dëmbokën:

Si Leleko Kasuruan e Rëmbokën.

A si Lumangka' an Tondano:

Mai tjuman-ange, si Lumangka' in dondor i lour!

Wo a si ëndo in tjumawit i ninono:

Ja mai tjuman-ange kamu, e Kasuruan! kami ja winean i
Mamarimbing wara' sama', irëngkei tande wo wene' wo lowir
se wawi wo se waja pënamun mëngawë-ngawës.

Wo a si ëndo „maja'-mange ang kaju" tanu a si ëndo i
mangënow ëm beweletën.

Sapaka n api niange-mai e tow am bale i Tona'as Wangko',
ja karëngana ritjëtën a lawi wëru an uma wëru, kaapa sa si
sei n dumatjët api am bale wëru, karëngana mange-mai api
a si Tona'as Wangko' ë nila'usan-ai im baja im bara'. Anaitu,
a si Tona'as ëm patu'u-tu'uran im baja-waja.

Sapaka n api niange-mai am bale i Tona'as Wangko', ja
karëngana paalin-ange a lawi wëru, kaapa wale wëru. Sawo

se tow rumitjêto api a lawi wëru, kaapa am bale wëru, ja an iitu se tow mange-mai api am bale i Tona'as Wangko'.

Jawoja, sapaka n tanu susuli' kaapa lawu am pa'pa' in tawoiëna, ja sangawantang wo ala'mbak ëm bene', wo waja se paindon e paru'ndu'ana, sawo sia sumero in uma, wo makatëlu angean in tow ën sangata'un, makasa angean i makëlor, makasa i maawut, wo makasa i maupu'.

Sapaka n tanu lawu paindon i Sumasainsang, ja ala'mbak ëm bene' (kakele i Mauwa' wo si Walian in uma), wo waja se paindon e paru'ndu'ana, sa se tona-tona'as sumero in uma e tow. Sapaka se tow, ja karëngana mange matawoi an uma i Tona'as Wangko'. Ën se tow mange tumawoi an uma i Tona'as, ja i makëlor makasa, i maawut makasa, wo i maupu' makasa; kasusur i mange, ja sumangando m baja se tow karapi i tjapala wo se pamatu'an. Se tow ja ra'itja mai mindo wene' kaapa tëwi' a si Tona'as Wangko', wajakë' sa se paru'ndu'an nimarengo nimangusui wara' wo nimakausuio wara' sama', ja karëngana sera wurasën i Tona'as in tëwi', wo ka'i sa se nimëkitumbalan nimarengo-mai, sera wurasën.

Sapaka si Tona'as n isë'sëk, ja siow ngando ng kaure.

Sapaka se lumelempar ipakua e tow in ipawëta', ja se tangkuitj, tuwil wo sonsoliat. Se sonsoliat ja ipëngawëkar i nimakaupu'o im bene'; se tangkuitj ipëngawëta' in tawio kumëlor, ja se tuwil ipëngawëta' in an tutuw e tow i maawut am bene'. Se kawok ja ra'itja pëngasitjopën.

137. Bereindengën e Walian si Apo' Nimema' in tana', tanu in ipëngareindeng i Rusung, Walian ang Kawangko'an.

Wojo-wojo'pe' ën tana', kaja-kaja'pe' ë langit, sitjo-sitjo'pe' ën ta'sitj.

Se anak i Apo Nimema' in tana' ja makarua siow.

Wo sera wetengëna, aiwuku in tana', airundeng i langit.

Wo sia meteng im baja-waja kakanën: mariwu si pakanën, mariwu si ra'itja pakanën.

Tani'tu ka'i se sēsēra'an: mariwu si pasēra'an, mariwu si ra'itja pasēra'an.

Wo tani'tu ka'i se waja-waja iparuruk: mariwu si iparuruk, mariwu si ra'itja iparuruk.

Jawo sia ngumaran a se waja niema'na.

Wo m balena siow karondoron, siow kaengkolan.

Si ra'itja kapalēnan, si ra'itja kawintjian.

Si sosoran ěndo e wēngi se mange mapakomba-komba'.

Pa'pa'an si wale itu kinawu-kawu'an se sangalēwu' wo n sangalēwu'.

Se sangalēwu' makulintang, se sangalēwu' matamor.

Se sangalēwu' masurupeta, se sangalēwu' matamor.

Se sangalēwu' mareindeng, se sangalēwu' maorai.

Se sangalēwu' maema', se sangalēwu' marano im paser wo m pera.

Se sangalēwu' maema' in tjelana, se sangalēwu' matawoi in tjaju.

Se sangalēwu' mawangker, se sangalēwu' manani.

Se sangalēwu' mawasa, se sangalēwu' marojor in derentek.

Ĕ ngara-ngaran e anak i Nimema' in tana' ja katare si Tjumokomba', karua si Tjopero.

Katēlu si Matimbang, kaēpat si Manalinja.

Kalima si Manembo, kaēnēm si Magirot.

Kapitu si Mawangker, kauwalu si Talimpongo.

Kasiow si Makawulur, kapulu' si Panambunan.

Kapulu' wo ěsa si Wawonsinjal, kapulu' wo rua si Tinawēng.

Kumapulu' wo tēlu si Tombilim-bene', kumapulu' wo ěpat si Tontoriei.

Kumapulu' wo lima si Lawajambene', kumapulu' wo ěnēm si Tenembulan.

Kumapulu' wo pitu si Laiwene', kumapulu' wo uwalu si Maroaja.

138. Nananin e Tontemboan, aipanani i Martina Rompas, Wuwuk.

1. Si ěndooka tu'u, pēngēsungkulan im bēērēnta, oo rojor e!

2. Pëngësungkulan im bërënta sa marawoioo genang, oo rojor e!
3. Si ëndo mange wisa, n angkatangku n am bawoo in tana'?
4. Këiangkat(ë)ku mange-sa, Lalei, iaku ng kinaluupaan.
5. Na'oka kura-mako, si po'ow(ë)ku n a niroondoran.
6. Ore' weta' e po'ow, rawoi aku n am panaangkeian.
7. Ra'itja rawoi in sapa, rawoitjè' magenang iitjamu.
8. Me'eké' re'e lewo', mëtuari nimëntaajangan.
9. Kalewo'an n iitu, wineanu pagenaanganku.
10. Wineanu pagenanganku wo ra'itja kaluupaan.
11. Mëngaru-ngarupe'-wo, ing kita n am bawope' in tana'.
12. Mangeoka wurin-ai, n aaruiën sa lumangkooio?
13. Tjuamu e Susi ja, rawoi aku n aitjakooro'mu?
14. Tondongan-ai im bërën, sa aku rawoi n aitjakooro'mu.
15. Tojo'kë' tare genang, si tërang maparawoo-rawoi.
16. Maparawo-rawoitjè', se makoro' i niroondoran.
17. Ra'itja wana ng karawoiangku n aku n aitjakooro'mu.
18. Aruitjè' tare sama', genangku n aitjakooro'mu.
19. Si ëndo mange wisa, si po'ow(ë)ku wo maweerenan?
20. Sa wo'o i genangku, ra'io Lalei wo maweerenan.
21. Tjuao i Lalei e, lensonape' m pasiaa-angku.
22. Lensooka i Wëru Laleio wo pasiaa-angku.
23. Manëšël ësa djarum, ta'an aku manëšël itjo.
24. Itjuamu aku rawoi, eng ko merao tow waalina.
25. Aruitjè' tare sama' aku, eng ko mera waalina.
26. Makaangepe' n arui, aku tare mënto' maalojan.
27. Mangeo itjua-mange, tërus in da'io maweerenan.
28. Na'oka mawerenan, sa mësungkul a lalaam bangko'.
29. Mapaira-irang-sa aku manëšël in dëtuukiow.
30. Sa ko tanu marawoi, tumemboo in tandaa mata.
31. Tani'tu ka'i-mai aku, tumemboo in tandaa mata.
32. Intao wo, e Susi, lumampang milë-ilëëk-ange.
33. Lumampang milë-ilëk, a si lalam bo kaleewo'an.
34. Sa (i)tjasale' i Susi, selapan-ai ë lampaanganku.
35. Selapan-ai ë lampanganku, en tia' lalëindëngan.

**139. Pira-pira n Iintjo'on, sinisir a se ipéngaintjo'
e Tontemboan (e Sondér).**

1. Kaintjo-intjo'ongku-mange si tow isia, ja sapaka si Tontalun ja tumane a si Tonta'mbe.

Tutulapén: Sapaka n iitu, ja pondos wo atép, papa'an ém pondos ja iparaum in atép.

2. Kaintjo-intjo'ongku-mange si tow isia, ja sapaka sia, litjur(ě)kě' ipawaja'.

Tut. Sapaka itu, ja londei, pa'pa'an ě londei ém ba'mba'na am bawo, wo si lolojona an dano.

3. Kaintjo-intjo'ongku-mange si tow isia, ja mande sia makěwit(ě)kě' an Uwuran, ěn ipanuwu'na ja palinan e ang Kema.

T. Sapaka itu, ja surat, pa'pa'an ěn surat patitjén an Uwuran ipěmėnė-mėnėš, ipapaali ang Kema wo pawasan e Kema.

4. Kaintjo-intjo'ongku-mange si tow isia, ja ěsa tow, sapaka ěn atena ang kěsot(ě)kě'.

T. Sapaka itu, ja wuajaki, pa'pa'an ém batuna ang kěsot(ě)kě'.

5. Kaintjo-intjo'ongku-mange si tow isia, ja ěsa tow, sapaka ěn owa'na ja kusi, sama'nana ja pera, sinaput in tjarėtas sina, tina'ina ja paser(ě)kě'.

T. Sapaka itu, ja wulinga', pa'pa'an ém bulinga' ěng kuli'na tanu kusi, ěng kulo'na sinaput(ě)kě' i lu'luwa, wo ěn an darėm(ě)na kuni'na.

6. Kaintjo-intjo'ongku-mange si tow isia, ja ěsa tow, sapaka ěn tina'ina, ja a litjur(ě)kě'.

T. Sapaka itu, ja tetelewan, pa'pa'an ěn tina'ina ja an darėm(ě)kě'-mio' in tjėkėlėw in tetelew.

7. Kaintjo-intjo'ongku-mange si tow isia, ja ěsa tow, sa sia tumenge, ja an tina'itjė'.

T. Sapaka itu, ja rie-rie, am pa'pa'an se rie-rie an tina'itjė' ém patengean.

8. Kaintjo-intjo'ongku-mange si tow isia, ja ěsa tow, sapaka ěm bĕrĕna ja tĕlu.

T. Sapaka itu, ja po'po', pa'pa'an itu ja tĕlu ěn tu'us pa-wu'mbu'an kumaapa: tĕlu ěm bĕrĕna.

9. Kaintjo-intjo'ongku-mange si tow isia, ja ěsa tow, sa sia paten, ja ane'an.

T. Sapaka itu, ja peret, pa'pa'an sa tumangka' peret, ka-retĕngkĕ' an do'kos sa paten.

10. Kaintjo-intjo'ongku-mange si tow isia, ja ěsa tow, sa kauranĕn kumĕmĕl, sa kasĕndangĕn, lumĕntut ěn du'i.

T. Sapaka itu, ja rojongan in dano, pa'pa'an ěn dojongan in dano sa muran, mĕlĕwu, sa sumĕndang, pailĕkĕnoka ěm batu.

11. Kaintjo-intjo'ongku-mange si tow isia, ja ěsa tow, sa sia wean kanĕn, mĕngangko-ngangko'kĕ'.

T. Sapaka itu, ja kukurisan, pa'pa'an sa sia wo kurisan po'po', ja sia mĕrangko-rangko'kot (of: mĕrangkĕ-rangkĕ'kĕt).

12. Kaintjo-intjo'ongku-mange se tow isera, ja pitu ě mĕtuari, si ěsa talos itjau-kaupusera, am pa'pa'an sa sia ane'an, ja ipĕngangko-ngangko'kĕ' e ěnĕm.

T. Sapaka itu, ja susulingĕn, pa'pa'an ěn susulingĕn pitu ěm bu'mbu'na, sĕngon a si ěsa, se ěnĕm matenge.

13. Kaintjo-intjo'ongku-mange si tow isia, ja ěsa tow, nga'nga'an ra'itja toro, lo'motĕn ro'na.

T. Sapaka itu, ja rano, pa'pa'an ěn dano nga'nga'an ra'itja toro, lo'motĕn roro'na.

14. Kaintjo-intjo'ongku-mange si tow isia, ja ěsa tow, sapaka ěn tina'ina an do'kos(ĕ)kĕ'.

T. Sapaka itu, ja ulang, pa'pa'an se ulang ěn tina'iera an do'kos(ĕ)kĕ'.

15. Kaintjo-intjo'ongku-mange si tow isia, ja ěsa tow, ja maja'-mange, malĕn, maja'-mange, malĕn.

T. Sapaka itu, ja tambĕlang, am pa'pa'an sa sia matow, mawe'e wuku.

16. Kaintjo-intjo'ongku-mange si tow isia, sapaka sia, ja so'kelēn a mio'na, lumēpok an tēmpok.

T. Sapaka itu, ja tima'as, pa'pa'an ra'itja toro indon sia, sa ra'itja io'on-ai an tu'ura im bu'uk, pirotēn-ai akar in tēmpoka.

17. Kaintjo-intjo'ongku-mange si tow isia, sapaka sia, ja maja'-mange mēngkal, maja'-mange mēngkal.

T. Sapaka itu, ja tambēlang, pa'pa'an ēn tambēlang susur in sangalawas me'e tata'apa.

18. Kaintjo-intjo'ongku-mange si tow isia, sapaka sia, ja ane'an i apo'na, mapatawang.

T. Sapaka itu, ja sēsēmbungēn, am pa'pa'an sa itu pēnga-sēmbungan, ja matowa se tow.

19. Kaintjo-intjo'ongku-mange si tow isia, sapaka sia, ja maweso-weso'kē' in tina'i.

T. Sapaka itu, ja wiwilit, en sa sia iwilit, maweso-weso'kē' in titjoina.

20. Kaintjo-intjo'ongku-mange si tow isia, sapaka sia, sa si inang(ē)na tēpian i anak(ē)na, tarepe' sia mapatawang.

T. Sapaka itu, ja patintingan, pa'pa'an ēn titintingan, sa patengkorēn in titinting, ja mēnenge-nenge.

21. Kaintjo-intjo'ongku-mange si tow isia, sapaka sia, ja ailowēng a si lowēng mēno-now, ta'an ang katēluan ngando ja sia ilua'na.

T. Sapaka sia, ja si Junus, en sia linomo i pongkor, ta'an ang katēluan ngando sia ilua'na sumawēl.

22. Kaintjo-intjo'ongku-mange si tow isia, sapaka sia, ja kalewo', ta'an paawo-awongkē';

kaapa :

sapaka sia, ja ēsa tow taēmbow, ta'an palēlon.

T. Sapaka itu, ja marisa, rara, ta'an ipanumanam in tjakanēn, kaapa in titjo'on.

23. Kaintjo-intjo'ongku-mange si tow isia, si ēsa londei, ja an dior(ē)kē' si wowuling.

T. Sapaka itu, ja kawajo, pa'pa'an an dior(ë)kë' ëm paatoran si tjawajo mawaja', tanu in tom, aiwe'e am ba'mba', këntolën a mekona, ja sia meko.

24. Kaintjo-intjo'ongku-mange si tow isia, si ësa wale wangkër, ja si wale itu këkëlian ëm buni, ësa a se wuni itu, ja awean mariwu ën Tompapua.

T. Sapaka itu, ja temo', en itu këkëlian ëm bulura, sangawulur mawuta-wuta im batuna in temo'.

25. Kaintjo-intjo'ongku-mange se tow isera, sangapulu' se mëtuari, ja a se sangapulu' anio', ja rua tampëmu'is.

T. Sapaka itu, ja wua'na in tjama, am pa'pa'an se wangko' rua (of: se rua wawangko') aitjua in tampëmu'is, se itukë' ën do'na ipëse' se kutu.

26. Kaintjo-intjo'ongku-mange si tow isia, ësa anu, iera ro'na, ta'an sa angkaiën, ra'itja toro.

T. Sapaka itu, ja lalan; lalan ja ra'itja toro angkaiën, ta'an itu ro'nakë' iera.

27. Kaintjo-intjo'ongku-mange si tow isia, si ësa talun, pangumaan e sangapulu' ën tow.

T. Sapaka itu, ja ro'kos, pa'pa'an ëm bua'na in tjama sangapulu' mawungkas se kutu an do'kos.

28. Kaintjo-intjo'ongku-mange se tow isera, rua mëtuari nimewalitjë' nitumow, ta'an sera ra'itja mëmënserean, am pa'pa'an kinawu'an i ësa kuntung.

T. Sapaka itu, ja wërën, pa'pa'an ëm bërën i tow ësa ra'itja toro mënserean, kinawu'angkë' i ngirung.

29. Kaintjo-intjo'ongku-mange si tow isia, sa sia pangkurën in tjëte, sia ra'itja maangko', sa sia pasutën i lëme', sia mapatawa-tawang.

T. Sapaka itu, ja momongan, pa'pa'an ë momongan sa pangkurën in tjaju in ësa (in tjëte) ra'itja tumenge, ta'an sa ën iitu pangkurën in tjaju sinaput in' aroro' (i lëme') ja ën iitu tumenge.

30. Kaintjo-intjo'ongku-mange se tow isera, sapaka sera épat mētuari muntép-ange sera ang kota, kuměsot-ai, ésaoka.

T. Sapaka itu, ja tiněnga', pa'pa'an tiněnga' épat pėwali-walin, se épat itu: těnga', lalai, apu wo towaku'. Sa itu těnga'an, ilua'-mai, ésaoka.

31. Kaintjo-intjo'ongku-mange 'si tow isia, sapaka sia, ma-ěmbowo re'e, ta'an měnge'ke-nge'ke'kě'.

T. Sapaka itu, ja asu, pa'pa'an si asu, sa sia mětokol, makangingitjě'.

32. Kaintjo-intjo'ongku-mange se tow isera, ja sangaro'ong, mėsapeokě' waja, toja'ang wo matu'a; sa mai si tjolano, ja muka' waja in sapeo sera.

T. Sapaka itu, ja tarate, pa'pa'an itu, sa rėgěsan-ai, mawuka' waja lalaina, nitjuměpěl an dano.

33. Kaintjo-intjo'ongku-mange si tow isia, sapaka sia, tumarepe'kě'-mai malambot ěng katowana, wo tumarepe'kě'-mai ro'na makolěk.

T. Sapaka itu, ja se makendong im buna'kěl, ra'itja ure ěng kėrerot-ange im buna'kěl, ra'itja ka'i ure isintju.

34. Kaintjo-intjo'ongku-mange si tow isia, ésa tu'ura in tjaju wangkěr, sa itu me'e a'muta, ja ra'itja me'e lalaina; sa itu me'e lalaina, ja ra'itja me'e a'muta.

T. Sapaka itu, ja kapal, pa'pa'an ěng kapal, sa sia luměpok ěn sau, ja ěn sengkot lėpėtěn, sawo angkaiěn ěn sau, owa-rěn ěn sesengkot.

35. Kaintjo-intjo'ongku-mange si tow isia, ja ésa tow, mande im pakariwu-riwuan i marak, ja ra'itja kapela'an.

T. Sapaka itu, ja rano, pa'pa'an ěn dano parakěn, ra'itja katu'usan.

36. Kaintjo-intjo'ongku-mange si tow isia, ja solo, mande mariwu ngata'un, ra'itja kakaapuan.

T. Sapaka itu, si sërap, pa'pa'an si sërap akar in tjaure-ure mêngasa-ngasar(ë)kë' tani'tu ëng kasëndot, kaapa ëng kasulu'.

37. Kaintjo-intjo'ongku-mange se tow isera ëm Balandakë' waja mëtuari, ra'itja wana ësa wo wuring, waja se tow sinongkom i langit ja isera ëng këli.

T. Sapaka itu, ja se sumëndot, pa'pa'an se sumëndot, sëndot(ë)kë' waja, ra'itja wana ë makaindo in tjakëliera.

38. Kaintjo-intjo'ongku-mange si tow isia, ja sia nitumëkël an Uwuran; mapolooka ang Kema.

T. Sapaka itu, si ëndo, pa'pa'an si ëndo muntëp a mako wo kumësotoka a mitjo.

39. Kaintjo-intjo'ongku-mange si tow isia, sapaka sia wuaja nimangakar, ra'itja kasusutan, ta'an mailëk-ange si tjarender(ë)na, sia ja maame' akar(ë)na i nimate.

T. Sapaka itu, ja api, pa'pa'an ën api ja ra'itja toro timboian, ta'an sa ën iitu lësënan, lumalisitjë'-mai akar i nimate.

40. K. Sapaka sia, ju rua ëng kaka'is wo ësa ën dara'as.

T. Sapaka itu, ja si tjo'ko', am pa'pa'an se ko'ko', rua ëng kaka'kas, wo ësa ën totongko', kaapa: keitjei rua ën ipaka'kas, wo pakulatën in totongko'.

41. K. Sapaka sia mange mawaja'-mai pailëkën wewene, marengoka-mange in somoi sia tuama re'e.

T. Sapaka itu, ëng ko'ko' kinawiri, pa'pa'an se kinawiri tēkekoka ëm poporong, tanu se ko'ko' siwei, ta'an ën ipusera tanu laka'.

42. K. Sapaka sia, ja mailëk-ange si apo'na, mëniri-niri'tjë' im barena sia.

T. Sapaka sia, ja asu, pa'pa'an se asu mailëk-ange se apo'era, mēmendo-mendo'kë' ën ipus.

43. K. ja susur im boondo wo m bawa'ando morong in tjulo'.

T. Sapaka itu, ja upe', pa'pa'an susur im boondo wo ëm bawa'ando malëwa', kaapa: ën sintjom malëwa' ën am ba'mba'na.

44. K. Sapaka sia, ja rua ěn do'kos.

T. Sapaka itu, ja si wěwěngkalěn, pa'pa'an sia sumpal(ě)kě' waja, ra'itja wana ipus; sa sia pangkurěn an do'kos, si an somoi siituoka an dior ipawaja'.

45. K. Sapaka sia, tělu měruru ě gogorit a litjur.

T. Sapaka itu, ja sawurang, pa'pa'an se sawurang tělu měruru ěn dundengan, nitjumi'itoka a litjur.

46. K. Sumangalěwu' sia mapailěk im baja in owa'na, sumangalěwu' sangapěruakě' ěn ipapailěk(ě)na.

T. Sapaka itu, si sěrap, pa'pa'an si sěrap, sa tumuke paikailě-ilěkěn, ta'an sa iantang, ja nitjumoko'kot(ě)kě' pailěkěn.

47. K. Sapaka sia, sa sia tumo'oro, sumėrar se tow.

T. Sapaka itu, si ěndo, pa'pa'an sa sia nimantango, sumėraro se tow, tumawoio in tawoiěnera in ěsa;

47a. kaapa:

K. Sawo sia makawěrěn, ja se tow masėra-sėrar, sawo sia kumili', ja se tow mali'u-li'us.

T. Sapaka sia, ja si ěndo, em pa'pa' sawo ěndo, ja se tow masėra-sėrar, ta'an sawo wěngi, ja se tow mali'u-li'us.

48. K. Sa sia su'upan, en tumow, sa ra'io su'upan, e mateo.

T. Sapaka itu, ja pusu' in a'kěl, am pa'pa' sa ěm pusu' su'upan, ja sumėring, ta'an sa ra'io su'upan, ja mapėra.

49. K. Sa ipěkitowa, isia an dior itjatěka'-mänge e si ni-mange-mai.

T. Sapaka itu, ja po'po', am pa'pa' sa mindo im po'po', laputěn; an dangka'pe' si tow, aira'mbas(ě)na-mio' ěm po'po'.

50. K. Sapaka sia, sangalěwu' sia ipalea-leak, wo sangalěwu' sia ipaupu-upus i apo'na.

T. Sapaka itu, ja wene', pa'pa'an ěm bene' sa pisin ipalea-leak, sa pinakapisio, samo'on wo ipumpun am bantang, wo iema' sumama-sama'.

51. K. Sapaka sia, ja ra'itja wana ipakela.

T. Sapaka itu, ja a'kël, pa'pa'an ën a'muta akar i lalaina, waweam baja torona.

Torona in a'muta, ja paindon tolu; ëm bai'na paindon to-tongka' wo wai', wo pa'sitj wo pilatu, wo pinupus wo ëm bëka'; ja ëm pusëra paindon towang, wo ën tëmpona, sa roware', patale'en; ja ë luluna paindon atëp wo palintjunan wo paparundakan wo sarajar; ë lalaina paema'an tërung wo ëpal, wo ën derena kulo' paindon kaka'is, wo ën derena wuring paindon korëng, wo ipëngala'b, wo pëngaindon ëla'd, wo lëntu'; wo ëm pala'pana paindon karap, wo ën du'ina im pala'pa pae-ma'an sori wo paema'an oli-oli'; wo ëm pusu' pawëmbelën wo paindoan pe'; wo ëm pulintja', sa roware', pakanën, sa itu matu'ao, pakanën e wio'o wo se wawi; wo ëng kilaput paindoan api wo ipawusëng im bo'so a londei; wo ëm bawangala paindoan irup wo wuna'kël. Sapaka ëm buna'kël ja pakendongëm ba'kës, paema'an pukët, paema'am balangow wo sësëmpean wo ipëngatutuw am buwungan im bale wo lawi wo ipëngasaput in tinanëm paalirën, wo ipëngaatep wo ipëngaraum, wo pae-ma'an kaka'is im bale, wo paema'an papisian an to'tolan in daran wo ipaëmpar am pawean im bene'.

52. Intjo-intjo'onu-mange: ësa lour ra'itja parëgësën.

T. Sapaka itu, ja ëm po'po', am pa'pa' ranona im po'po' tanu ësa lour ra'itja parëgësën, pa'pa'an sinaput(ë)kë' im bono'ot wo ën takoina.

53. Intjo-intjo'onu-mange: ra'itja wana keitjei, ra'itja wana tetelew, ta'an sia lumi'tjir in tana'.

T. Sapaka itu, ja ëng kambung am pa'pa' ra'itja wana keitjei, wo ra'itja wana tetelew, ta'an sa itu wo itelewo in dëgës, ja ro'na lumi'tjir in tana'.

54. I. Ësa tow mamuali am bawo in tana'; këtow(ë)nape'-mai, ja sia mangilëk a si inanga, kuana: „A ina', ilowëng-(ë)kë' aku!” Sowatëno i inanga: „Sapaka kua'a re'e ko, ra'itja ilowëng(ë)kë'?”

T. Sapaka itu, ja watata', am pa'pa'an ëm batata' muwio

sia, ja mio'kě' an darēm in tana', kaapa: ma'muto sia, ja rumarēm(ě)kě' an darēm in tana' ěn uwina.

55. K. si tow isia, maja'-mange, mailong, maja'-mange, mailong.

T. Sapaka itu, ja uwi in tjan im bawi, pa'pa'an sa itu wo aiusěw, lumojon-ange ja itu me'e uwi.

56. I. Si nimatepe' tare ěn do'na ta'an si mēnoinow.

T. Sapaka itu, ja pěsi pina'anan si pilěk nimate, ta'an ro'-kětěno i pilěk mēnoinow sia, indono im pěsi si nirumo'kět.

57. Tělangěngku-moko si tow iana: kasusud i lumangkoi ěsa kuntung, kumeret. Tulapěniow ěn iitu sa sapa.

T. Rano an aasu, am pa'pa'an sawo ituas kaapa iwareng ěn dano, kasusud i lumangkoi im buku, kumalo'ko' ěn dano.

58. Sumere waja-mai ambia'i, e kakele toja'ang, aku mintjo'-pe' an itjamu: awean dua tow masule-sule si ěsa tow lěme', maio se karender(ě)na, tokokě' i tow lěme'. Sapa n iitu?,

Tetempang.

Si sei si nitjumua in tetempang, sia in tuměna (ě nituměna).

59. S. awean ěsa kuntung, tinowan im berot. Sapa n iitu? Ro'kos tinowan im bu'uk.

Sei si nitjumua in do'kos, enz.

60. S. sa sia pokolan an do'kos tarepe', woondo sia tumow-oka. Sapa n iitu?

Nanamur.

Sei si nitjumua, enz.

61. S. awean ěsa tow, in těkek(ě)pe' sia tampěngi'tji', makamatu'ao, ra'io maki'tji'. Sapa n iitu?

Lana.

Sei si nitjumua i lana, enz.

62. S. sa sia toja'ange', kělian ěnda', makamatu'ao, piraoka ěn ěnda'. Sapa n iitu?

Po'po' kěmbal.

Sei si nitjumua, enz.

63. S. awean ěsa tow, in toja'ange' sia ra'ipe' towan pela' i molo, maio sia mamatu'ao, towan ěm pela' i molo. Sapa n iitu.

Kaju wělěsi'.

Sei si nitjumua in tjaju, enz.

64. Kaintjo-intjo'ongku-mange si tow isia, sapaka sia tumow im boondo, ilowěng im bawa'ando.

T. Sapaka sia, ja si ěndo, ěm pa'pa' sawo sia mantango-mai im boondo, ja tanu tumowe'-mai, sawo sia muntěpo im bawa'ando, ja tanu ilowěngo.

65. K. Sapaka sia, ja ra'itja toro seren in tow ěn amona; sawo sumere isia, ja pangarimběimběngěn.

T. Sapaka sia, ja si ěndo, em pa'pa' sawo se tow tumarěi-ntěng isia, ja pangarimběimběngěn.

66. K. Sawo sia ra'ipe' nisumere im baja se am bawo in tana', ja ra'ipe' ki'im(ě)na kumili'.

T. Sapaka sia, ja si ěndo, em pa'pa' sawo ěn am pakasa in am bawo in tana' ra'ipe' nilangkoina, wo siněndot(ě)na, wo pinaso'na, ja sia ra'ipe' muntěp.

66a. Sangali sia nisumereo im baja se am bawo in tana', ja tare ki'im(ě)na kumili'.

Sapaka sia, ja si ěndo, em pa'pa' sangali ěn am pakasa in am bawo in tana' pinailěk(ě)nao, ja tare sia muntěp.

67. K. Sawo sia ilowěng, ja waja se tow eng kumili', ta'an sawo sia tumow, ja waja se tow e mapolo.

T. Sapaka sia, ja si ěndo, em pa'pa' sawo sia muntěp, ja se tow tuměkěl wo kumili', sawo sia mantang, ja waja se tow e mapolo.

68. K. Si ěsa tu'ur, kambutěn ang Kema wo iusěw an Uwuran.

T. Sapaka sia, ja si ěndo, pa'pa'an sia ja měngaantang a mitjo ng Kema, wo měngauntěp a mako n Uwuran.

69. K. Si tow isia, sapaka sia ja nitumow ang Kema, wo ailowëng an Uwuran.

70. K. Sapaka sia, ja po'po' sangapërua makasëlët an atëp.

T. Sapaka itu, ja si sëräp, am pa'pa'an si sëräp ja tanuoka po'po' sangapërua ëm pakaseren a langit.

71. K. Sapaka sia, ja kolano, sawo sia kumësot, karëngana se surarona eng kumësot a makali'tjir isia.

T. Sapaka sia, ja si sëräp, em pa'pa' sawo sia pailëkën, ja pakali'tjirën e sumëndot.

72. K. Sapaka sia, e mapengkor-ako, e mapurengkei.

T. Sapaka sia, ja si sëräp, em pa'pa' sawo sia makaantange'-mai, kaapa sawo tawio makaapu, ja sia pengkor nitjumoko'kot, ja sawo tumukeo, ja sia mapurengkeioka.

73. K. Sapaka sera, ja sawo ëndo ja sera mënëp, ta'an sa wëngi, ja sera mapaturu'.

T. Sapaka sera, ja se sumëndot, am pa'pa' se sumëndot ja wëngitjé' ëm pëngailëkën, am pa'pa' sa ëndo, ja n sëndotera patutuwangkë' in selap i ëndo.

74. K. Sapaka sia, ja tateron ulit, ra'itja kinapi'pitan ja ra'io wia.

T. Sapaka sia, ja wiru', pa'pa'an se wiru' ja tatintjas muli-ulit.

75. K. Sapaka sera, ja tëlu mëtuari, ra'itja nimëpute ë gio wo ra'itja mëndesoan. Sawo mauran dëpët, kaapa katë'tël i ëndo, ra'itja ki'imera mapailëk; sangalitjé' mangimbala', siitu sera makakëli-tjéli mapailëk.

T. Sapaka itu, ja limbawa, am pa'pa' ë limbawa ja tëlu gio, ën iitu ja kulo', o'lei wo laka mëngëwali-wali, wo itu pëngailëkëngkë' sawo mangimbala'.

76. K. Sapaka sia, ja kasusur(ë)na i maja' poririoran in solo.

T. Sapaka ën iitu, ja ërut, em pa'pa' kasusur i mërut ja poririoran in tjilat.

77. K. Si tow isia, sapaka ěng kasusur(ě)na i mapatawang, ja soloano-wo.

T. Sapaka ěn iitu, ja ěrut, em pa'pa' kasusur i měrut, ja kumilato-wo.

78. K. Si tow isia, sapaka ěng kasusur(ě)na i lumutaw, ja ipakata'u-wo i tuarina walanda.

T. Sapaka ěn iitu, ja ěrut, em pa'pa' kasusur i měrut, ja nimaja'o ng kilat-wo.

79. K. Sapaka sera, ja rua mětuari, ra'itja měngěndesoan; sa sera maja', ja si ěsa ě makepe an dior, wo si ěsa ě ma-ki'it in somoi měluta-lutaw.

T. Sapaka sera, ja kilat wo n ěrut, em pa'pa' kasusur in tjumilat ja měrut; ěng kilat marior tanu makepe, em pa'pa' nisumelap; ang kasomoian iitu ki'itěn in ěrut, siitu n tanu měluta-lutaw.

80. K. Sawo sia maja', ja waja se tow ěng kumili'tjě', en sia ja ra'itja toro seren.

T. Sapaka itu, ja kilat, em pa'pa' kasusur in tjumilat, ja waja se tow ěng kumili' ěm běrěn.

81. K. Sapaka sia, ja kasusur(ě)na i maja', ja lutawan ěn an somoina.

T. Sapaka n iitu, ja kilat, em pa'pa' kasusur in tjumilat ja somoian in ěrut.

82. K. Sapaka sia, ja ěsa Walanda kulo' nimangakar, ra'itja toro seren, ja marae katateron, iaka-akar makasakě' mi'pit, ja sia nilumangkoio.

T. Sapaka ěn iitu, ja kilat, am pa'pa' ěng kilat ja kulo' wo ra'itja toro seren, wo ka'i ra'itja kinapi'pitan im běrěn, nilumangkoio.

83. K. Sapaka sia, ja pisow, ra'itja pisow; api, ra'itja api; janta'an sawo waja'ana, ja mangaposok ěn a'kěl wo manga-ěmbung ěm buna'kěl.

T. Sapaka ěn iitu, ja kilat, am pa'pa' sawo ng kilat tuměna in a'kěl, ja n a'kěl itu maposok wo měmbung ěm buna'kěl.

84. K. Sapaka sia, ja ěsa sosoloan, sawo sia engketan, ja waja se tow ěng kumili'tjě'.

T. Sapaka n iitu, ja kilat, am pa'pa' sawo kumilat, ja masěndot, ta'an waja se tow ěng kumili'tjě'.

85. K. Sapaka sia, sawo sia mero', ja mero' waja se am bawo in tana'.

T. Sapaka ěn iitu, ja mangero', em pa'pa' sawo n tana' mangero', ja mangaero' ka'i waja se am bawo in tana'.

86. K. Sapaka sia, sawo sia mai, ja waja se tow karěngana měnto'.

T. Sapaka ěn iitu, ja wěngi, am pa'pa' sa wěngio, ja waja se tow ě měnto'.

87. K. Ja wawean dua ko'ko', wuring wo ng kulo'; si wuring měngali'us se ana'na, janta'an si tjulo' měngasěrar se ana'na.

T. Sapaka ěn iitu, ja wěngi wo n ěndo; am pa'pa' ěm běngi ja měngali'us se tow, wo n ěndo ja měngasěrar se tow.

88. K. Awean ěsa wale, ěn an untěp(ě)na ja pěngaěnto'an e sakei, ja n ang kěsot(ě)na si makawale.

T. Sapaka n iitu, ja sěrěmin, pa'pa'an sawo si tow tuměngo ambitu, ja ě giona pailěkěn an untěp, janta'an si makatěngo ja ang kěsot.

89. K. Sapaka sera, ja Walanda, janta'an sa sera ja rumojoro, ja niměkěmuo ě gioera: ambitu se Papua, ambitu se Sina wo ambituka ka'i se Walanda.

T. Sapaka n iitu, ja wulinga', am pa'pa'an ěm bulinga' ja kulo', janta'an sawo itu piněte'o, ja kuměsoto-mai se sisi: awean ěm buring, wo waweang kuni' wo waweang ka'i ěng kulo'.

90. K. Sapaka sia, sawo wuka'an, ja ra'itja ki'im(ë)na kumësot, janta'an sawo këtépën, ja tare ro'na sia kumësot.

T. Sapaka n iitu, ja rura', am pa'pa'an ra'itja toro rumura' sa makawuka'kë' ëm ba'mba', janta'an sawo rumura', ja këtépën ëm ba'mba'.

91. K. Sapaka sera, ja tëlu mëtuari, kulo' si ësa, o'lei se walina, wo ang kasomoian iitu ja sera ësaoka wo raindangoka ka'i.

T. Sapaka ën iitu, ja apu, wo n tënga' wo ë lalai, pa'pa'an sa n iitu wo tinënga'o, ja ësakë' wo raindangoka ka'i.

92. K. Si tow isia pailëkën, janta'an da'itja toro timboian.

T. Sapaka ën iitu, ja tëmbur, pa'pa'an ën tëmbur ja pailëkën, janta'an da'itja toro timboian.

93. K. Si tow isia sawo nitjumano, ja ra'io itjawaja'.

T. Sapaka sia, ja si tumotongko', pa'pa'an ën ipëngakakan era ja palomongkë', mande wawangkëran, anaitu sawo ra'ipe' nimawuruk si nilomonera, ja sera ra'ipe' toro itjawaja'.

94. K. Sapaka sia, ja makasa ili'tjir, wo makasa ipopo.

T. Sapaka ën iitu, ja lawën, pa'pa'an se lumawën, ja katarë-tare si tëmpok sangawiwi i lawën itu ja itjë'kër an dere'enan, wo si tëmpok sangawiwi itu ja mio'o isampuat-ai am pë'nar-wo, wo tare si tëmpok sangawiwi itjë'kër an dere'enan wo pulësën an somoi.

95. K. Sapaka sera, ja mawilit se an darëm, maorai se am bawo.

T. Sapaka ën iitu, ja ku'ung, pa'pa'an ëng ku'ung, ja ën a'muta mawaja', ë lalaina maorai.

96. K. Sapaka sia, ja ra'itja toro maja', sa ra'itja waweam bëka' wo ra'itja kumakan ë maja'.

T. Sapaka ën iitu, ja to'ngaw, pa'pa'an ën to'ngaw ja ra'itja toro kumë'kër, sa ra'itja itjakan wo nienetan.

97. K. Sapaka sia, ja ero'on-ange, maame'.

T. Sapaka ən iitu, ja kapaja, pa'pa'an sa ən iitu wo ɛro'on kumaapa wangkilən, ja suməring.

98. K. Sapaka sia, in toja'ange', ja roa, sawo nimawangköro, ja pair.

T. Sapaka ən iitu, ja simbəl, pa'pa'an ən iitu sa ra'ipe' nimaowar ja lulun, gio-gio i roa in talume'me' wo nilumambot, ta'an sawo nimaowaro, ja simbəloka, gio-gio i pair i ləmpar wo purengkei.

99. K. Sapaka sia, ja wangkər wa'mba', wo wərəngkə' waja n a makali'tjir.

T. Sapaka n iitu, ja walintjo'ko', am pa'pa'an ɛm ba'mba'na, ɛm pauntəpan se ko'ko', ja niməotop in tjalambotana, wo n ipakasa im balintjo'ko' winərənangkə' waja.

100. K. Sapaka sia, ja ipəngua'ngua im pitu, ta'am bajakə' re'en in ɛsa (of: te'mbena ja ɛsakə').

T. Sapaka n iitu, ja kapitu, am pa'pa'an mande in iitu im patu'ulən kapitu, ja n iitu ra'itja pitu, ta'am bajakə' in ɛsa.

101. Kaintjo-intjo'ku-mange: awean ɛpat mətuari mənəinte-neinteng im bantang. Sapa n iitu?

T. Sapaka itu, ja meja, am pa'pa'an ɛpat ɛng keitjeina, niunsunan im papan.

102. K. Awean ɛsa lour, si lour itu awean ɛsa kosei, sa wəngi sia məlila-lila', mando-mai pailəkəno mamari'o kuma-apa mapirao ən dano a lour. Sapa n iitu?

T. Sapaka itu, ja sosoloan, am pa'pa'an sa wəngi, engketan ən sosoloan wo mənğəmbu-ngəmbung, mando-mai pailəkəno piraoka ən solo.

103. K. Kambutən ɛm bo'so, mənto' ən ari'i.

T. Sapaka itu, ja sisim, am pa'pa'an ən sisim ja wo'so, kambutən ən sisim, mənto'o ɛm bua'na in tjama.

104. K. Se Walanda makakan, se Arab maka'mbiri, papo'-owəngkə' e Sina.

T. Sapaka itu ja aitji'it an ipakapatitj, makakan se Walanda, maka'mbiri se Arab, janta'an se Sina ito'tolerakě' an dangka' wo ipapěros.

105. K. Awean ěsa wale tětěngoangkě' waja.

T. Sapaka n iitu, ja walintjo'ko', am pa'pa'an ēm balintjo'ko' ja wo'sokě' waja.

106. K. Awean ěsa talun pěngali'u-li'usan e lumelempar makasa-kasa, se lumelempar walina maali-mai paro'kětěn, se walina maitjě' rumo'kět-ange wo mareng.

T. Sapaka itu, ja pasar, am pa'pa'an pěngěsungku-sungkulan e tow kěli, se walina maali-mai ipawangker, se walina mai tumělěs wo mareng.

107. K. Wa'kěs, ra'itja wa'kěs, ari'i, ra'itja ari'i.

T. Sapaka itu, ja uran, am pa'pa'an pailěkěn toka wo'o wa'kěs, kaapa wo'o ari'i in sapa-sapa, ta'an da'itja.

108. K. Makakěli-tjěli sia matamor, karapi in an somoi ja mēngero-ngero' ēm barena.

T. Sapaka itu ja asu, am pa'pa'an sa sia mangko' karapi in upus mēngero-ngero', ja tanuoka sia matamor wo mēngero-ngero' im barena.

109. K. Sa sia maja', mawarengkě' in somoi, litjur iparior, tina'i an somoi.

T. Sapaka itu, ja ti'is, am pa'pa'an ěn an somoi tanuo tina'i, an dior tanu litjur.

110. K. Sa sia kuman, makakětěp ēm ba'mba', sa sia ra'-itja kuman, makanganga ēm ba'mba'.

T. Sapaka n iitu, ja kokopit, am pa'pa'an sa sia itjopit, kumětěp, sa sia ra'itja itjopit, makanganga.

111. K. Ěm balangow mawaja', si tjawajo makaěnto'kě'. Sapa n iitu?

T. Sapaka n iitu, ja kapitu, am pa'pa'an ěn dondora mēngěnte-ngěnte, ēm bua'na makaěnto'kě'.

140. Sasaunan.

I. Sasaunan im pëli'i.

- | | |
|--|---|
| 1. An ta'un im bëre'. Woondo. | Mapëli'i am bawi. |
| 2. Mangere pusu'. Mangere si wurin. | 7. Indoo-mio' si tjo'ko' kelang. Indoo-mio' wulinga'. |
| 3. Kinakawokano. Nimakaereo si wurin. | 8. Sumëra'pe' wëris rumerei- ndeng. Pareindengan, mareindeng, |
| 4. Si tjëli wu'uk. Si tjawok. | 9. Tumëwase' kami. Manëwase' kami. |
| 5. Si tjo'ko' e katana'. Si wawiami. | 10. Tawa'. Asin. |
| 6. Utër ëm përeke-rekenën. | |

II. Sasaunan e mamukët.

- | | |
|--|---|
| 1. Mangusui mata'na. Mëngat im bëru. | Iindo-mai laseran. |
| 2. Se pira. Se këli. | 11. Wa'mbakëno. Wetengëno. |
| 3. Iindo-mai paëlëpën. Ëpal. | 12. Indono n tengkor. Indono n sala'sak. |
| 4. Litjurëno. Wiono. | 13. Ëm ba'bak e kapate. Ëm beteng e asu. |
| 5. Indono ng kinan(ë)na. Indono n tina'i. | 14. Sa'ona. Ënda'. |
| 6. Indono m pësitjan. Indono n ate. | 15. Roroma'na. Lila'na. |
| 7. Indono ë lumële'na. Indono n tali'si'na. | 16. Kaka'kas(ë)na. Keitjei. |
| 8. Indono m pake'etan. Indono m pusu'. | 17. Këtena. Ro'kos. |
| 9. Tomakëno. Tatarëno. | 18. Kekela in tana'. Sëmur. |
| 10. Indono-mai rëtekan. | 19. Mindoo im buruk. Mindoo im pukët. |

20. Ěm paěnte-ěnte'an.
Ěm běngkow.

21. Se kapate.
Se asu.

III. Sasaunan e mamorapat.

1. Mangeo wětijtjēn-ai.
Mangeo pa'anēn-ai.
2. Kili'angke'-mio'.
Molo-polo.
3. Musěng i luntěng.

- Ma'a-pa'an.
4. Matěpěso.
Makano.
5. Salak in owak.
Wena.

IV. Sasaunan e mangasin.

1. Mako mėlėp-ai ta'asitj.
Mako mangasin.
2. Wawean tow ěn ambia.
Waweam bara' n ambia.
3. Se toja'ang mēwěra-wěra'.
Ke'ke'.
4. Těnga' wowos.
Kėte.
5. Mangeo-mai lintjunan.
Mangeo-mai lulun.
6. Ore walulangěn.

- Ore kese'en.
7. Mema'o im pawulinga'an e
ko'ko'.
Mema'o in sori.
8. Kumure'o.
Kumosongo.
9. Sumuwa'o-mai.
Mapěrao-mai.
10. Sumaru.
Marengo.

V. Sasaunan e manurat.

1. Mindo kėkėmės.
Mindo surat.
2. Mě'mbėro in tjėkėmės.
Mě'mbėro in surat.
3. Rumě'ndě-rě'ndēm, eng kė-
lian dukut.
Rumě'ndě-rě'ndēm, eng kė-
lian pongkor.

4. Wawean lalaina in tale'.
Waweam pair.
5. Sumere-sere, wawean de'e
kumin.
Sumere-sere, wawean de'e
kundera.

IV. Sasaunan e maupu'.

1. Si Tompasos'.
Si tona'as.

2. Nume'e papi'asěn.
Nume'e paalin am bale.

- | | |
|---|---|
| 3. Nio' em papi'asenu. Nio' em paalinu. 4. Meroro kita. Maja'o kita. 5. Tio'o iparo'ang. Tio'o ipatia'. 6. Pera'. Wene' kaapa tu'tu'. 7. Mera'o kita. Kumano kita. | 8. Ro'ang. Rano. 9. Mangeo iakir-ai. Mangeo itje'et-ai. 10. Mange ipese'-mai tjanen kita. Mange ira'as-ai tjanen kita. 11. Nume'e-ne'e. Mora-porak. |
|---|---|

VII. Sasaunan.

- | | |
|---|--|
| 1. Kinokopitan. Tu'a. 2. Mio' irojong-ai ng kolo- mbuang. Mio' ita'an-ai ng kolo- mbuang. 3. Mange sumelēt-ai in tjo- lombuang. Mange tuma'an-ai in tjo- lombuang. 4. Ra'itja itjakélēw ēng kure'. Ra'itja kapo'owan in sakei. 5. Lambot kama. Rombit. 6. Lambot lila'. Pērakēn. 7. Lino'oroka im balakana. Lino'oroka i gio. 8. Toka nilumeak am bale e sērēm. Ra'itja itjaēna'. 9. Rumeso, en sērēm ēn am- bia. | Rumeso, em bara' lewo' n ambia. 10. Pangusuiēno wawa'ando. Sintjomēno wawa'ando. 11. Maupu' in sumēndot ko. Ra'io kua'a kaindoanu itu. 12. Sa aitjatēndēko n do'kos, aitjato'oro ng keitjei, ra'io itjato'or wo ra'itja makaambo i langit wo ra'itja makaambo in sitju. Ja ra'io ki'intju, arana ai- ra'io, ja ro'nao aku. 13. Maloe re'e ko. Masorowak(ē)kē'-mai ng kētēr. 14. Wuaja mindo kosong ka- apa kowēr, taka ma- ngindo pusu'. Te'es mindo im paēlēpan; taka mawe'mbel. 15. Mesek-itjo in tuintung, me- sek-io' in tina'i. |
|---|--|

- Wanu kita sa ja tanuoka
mesek-itjo in tuintung ən
tina'i.
16. Tete pilas.
Pinaongan.
17. Mange itjela si wawiami.
Mange kawirin si wawiami.
18. Iange-mai tjuku lambot.
Iange-mai tjuei.
19. Iange-mai tjarowa rangka'.
Iange-mai tjapaja.
20. Səndang tua'na.
Uran.
21. Toka re'e tanu i marisa en
dumarakə'-mai in tarepe'
Susuli' am baja kaməsea'an
i tow ra'itja tumarepe'kə'-
mai.
22. Mongondow ka'itje' ja.
Po'ow(ə)kə' ja.
23. Lumewo' in tawa'ang.
24. Indon-ai n tu'tu' kulo'.
Indon-ai n towang.
25. Kaju pəra.
Ata.
26. Linoindong im pəra.
Suru e ata.
27. Linoindong im bə'təs.
Po'ow e mapərenta.
28. Mindoo kaju rondor.
Mindoo kaju pəra.
29. Masəpun.
Mati'is.
30. Sa mailək-ako i londei,
tio'o kanuwu-nuwu'.
- Sa mailəko si sərəp, tio'o
tumu'u-tu'ul.
31. Iindo-mai ro'ang.
Iindo-mai api.
32. Sa malinja se kalendean
' i makitj, ja siitu n do'na
mangko'.
- Sa malinja se asu i maintuk,
' ja siitu n do'na mangko'.
33. Rəpət ən tawang.
Rəpət ən dəgəs.
34. Makatəmbur in tjeməl.
35. Makasompoi im bo'so.
36. Makaporong in daindang.
37. Teteanoka in sərəm, ra'io
tumumpa ən sərəm.
38. Ambisa n awean kawok,
aweand ka'i ula' n ambitu.
39. Maworokek re'e ko.
40. Talo mangindo sintjom, wu-
aja mangindo kosong.
41. Kulitan əm pawe'mbelən.
Te'tekən.
42. Kinulitano əm pawe'mbe-
lən.
Tine'teko.
43. Kama im bolai.
44. Winaja'ano i laku.
Pineras.
45. Nitumondong a li'us.
46. Awəse' ng kume'et ra'itja
wana pagi', en tumia'
in tjorəng ra'itja wana
pa'an.
47. Si lalangun ra'itja kawisa

- | | |
|--|--|
| <p>wo mate in de'om, sawo sia makateir im pe' am binalu'.</p> <p>48. Sa n a'kël kinatitiano, ja rumongkoro m pulintja'.</p> <p>49. Itjare'e im pe', itjasale' in sende'en.</p> <p>50. Ra'itja wana n sêngit wo ra'itja mawow.</p> <p>51. Si nimusëw in tjamësi ma- kakëli-tjêli ra'itja mupu' im bua'na.</p> <p>52. Kawok wo meong ra'itja kawisa wo mëkatëkël.</p> <p>53. Sa ra'itja marëgës, ra'itja</p> | <p>mero'-mai ë lalaina in tjaju.</p> <p>54. Mantango si lolourën, ma- inde'o se rombit.</p> <p>55. Tata'nei si tolalan, tamburi si tji'tjir.</p> <p>56. Itjasale' e ulang sa awean ta'i n an do'kos.</p> <p>57. Sumende' im pinëla'ar awë- se' n am bawo i lalaina in sa'ut en am bawo i loto.</p> <p>58. Sawo makalëlon, angeno se wio'o maindo in tande.</p> |
|--|--|

**141. An doro' in te'tek, sinisil i Lumëmpow Lumanaw,
Kiawa, wo si Mokalu' Piring, Kuntung.**

In dior waja se tuama ja pëngate'tekën. Ën iitu ra'itja am pa'pa'an in tjaenet im paapo'an, ta'an itu nimamualitjê' an doro' in seke', am pa'pa'an ën te'tekën makawuajan in tow am pëseke'an, wo itu pëngatimboiën ka'i e rior tanu polë'nas se tuama. Awoja se te'tekën ra'itja toja'ange', ta'an se mëngake'eto, se ro'nao mange am pëseke'an, se ro'nao tumane.

Anae sa si mangalitow ësa ipëta'up e matu-matu'a, ja wueian in tana'i sia: „Tine'teko ko?” Ja sa itu sowatëna in da'ipe', ja ng kuano i matu'a: „Ja wawean seke' angenta, anaitu woondo i mamoono ko mange am pëngëlëpangku, wo ko mangeku te'tekën ambitu.” Sumowat sia: „Itji'it a siitu”, ja ta'arano i matu'a sia, ëng kuana: „Ta'an sa ko mange wo malinja wara' wëwëra'an e toja'ang, tia'pe' lumo'o-lo'ok-ange-wo, ang kandoanoka. Ta'an sa ko wo mange, ja tumuli an dano wo lumële'-mange sama'.”

Sapaka si mangalitow peron in tia'pe' lumo'o-lo'ok-ange-wo,

pa'pa'an sa sia kinawara'an im bēwēra'an e toja'ang wo lumo'ok(ē)kē'-mange wo te'tekēn, si pela' iitu ja kumawar(ē)kē'.

Ja itjalalitjo-mange am pēngēlēpan si mangalitow, ja si matu'a mindoo-mai tjaju wo itu ēpatēna sama', ka'i maler tētēwa'. Makaaler-ako tētēwa' sia, kumaapa makasangir-ako im pagi', ja masuo rano sia wo maja' kēkēmēs. Kumawus itu ja isondolo an tēmpok im pate' ēng kaju niēpat, wo ng kuli'na rē'tēngēna wo pēle'lo-le'lotēna ang karapi im pēni'i-ni'isan dano, aka-akaran itu i nimanimpiso ulit wo tina'oka, ra'io wana ēnda'. Siituoka ririsēnao-mio' ēng kuli'na ilaser a si tjaju aisondol. Makate'tek-ako si matu'a numuwu'o a si tine'tek(ē)na, ēng kuana: „E Tuama! mande ko muntēp am pēseke'an, ra'io wana kainde'en sapa-sapa, am pa'pa' ko tēla'uoka im pisow.”

Ja si nitume'tek(ē)ka wo kumēmēs am pela' akar itu i mapali' wo tani'tu ēng kuli'na itu mēngēlē-ngēlēš iaka-akar ē lusit im pailēkēnoka. Awoja si tine'tek ja sepē'dēn ra'ipe' maēlēp upe', pa'pa'an sa sia wo mēlēp upe', ja ngumē'ngēt ēn sakit im pela'; wo ka'i an doro' in tjakanēn si tine'tek ra'itja ro'na sumēra' im binean in tjomantes, pa'pa'an sa sia sumēra' im binean in tjomantes ja lumēnta' ēm pela'.

An somoi-ai in tjinēmēsano ēm pela', ja lawēnano i nitume'tek si tare-tumow, ja an dior-ange in sia in da'ipe' tine'tek ra'itja tanu makasa wo sia lawēnan. En sa sia wo pailēkēn i linawēnano, kailēkano e mēro'ong in si tare-tumow isia ja tine'teko.

Awoja an tutuw in seke' e Tondano ja pinatawoie' ēn iitu. An somoi-ai itu ra'io wana ēm pēngate'tekēn, am pa'pa'an nimēnto'o n seke' tumbal-ai in tarepe'.

Awoja itji'it in aitjua ka'i e matu-matu'a in dior sapaka si tjanaramēn iitu ja patimboiēn e rior ka'i tanu polē'nas se tuama, en itjaritja-ritjakē' e wewene se tuama ra'itja tine'tek. Anaitu an tutuw i mangalitow in do'nao tumane, ja sia te'tekēno-wo; kaurena in da'ipe' tine'tek ra'ipe' toro tumane sia.

Jambo n ēsa, sa si tine'teko wo tumane wo makaere toja'ang ja waja se toja'ang itu lowir waja.

AANVULLINGEN EN VERBETERINGEN.

- bl. 4, r. 2 v. o. staat: Woloi, lees: Wolai.
- bl. 27, r. 5 v. o. „ : ro'kos wo keitjei, lees: ro'kos, kama wo keitjei.
- bl. 30, r. 13 staat: sapa m pangilëk(ě)mu, lees: sapa im pangilëk(ě)mu.
- „ „ r. 15 v. o. staat: aitaan, lees: aita'an.
- bl. 32, r. 1 v. o. „ : alëro, „ : alero.
- bl. 40, r. 16 staat: Penana'an, „ : Pënana'an.
- bl. 41, r. 12, als boven.
- bl. 43, r. 15 v. o. staat: Pé'tare, lees: Pe'tare.
- bl. 44, r. 3 staat: maja, lees: maja'.
- „ „ r. 4, als boven.
- „ „ r. 15 v. o. staat: Pokal, lees: Pokol.
- bl. 46, r. 11 v. o. „ : wengitjë', lees: wëngitjë'.
- bl. 48, r. 7 v. o. „ : penana'ana, lees: pënana'ana.
- bl. 49, r. 2 v. o. „ : eng, lees: ëng.
- bl. 50, r. 18 staat: kaerangkupe', lees: kaereangkupe'.
- bl. 52, r. 4 „ : lengei, lees: lëngei.
- bl. 61, r. 6 „ : menoi-, „ : mënoi-.
- bl. 63, r. 5 „ : peputembo, lees: pëputem bo.
- bl. 64, r. 6 v. o. staat: Menga-, „ : Mënga-.
- bl. 80, r. 1 staat: airu'ndu'ke', „ : airu'ndu'kë'.
- bl. 93, r. 1 v. o. staat: Mengkat, lees: i Mengkat.
- bl. 113, r. 8 staat: aitja-, lees: itja-.
- bl. 133, r. 5 v. o. staat: kë'këpen, lees: kë'këpën.
- bl. 139, r. 10 staat: Mawëngio-mai', „ : Mawëngio-mai.
- bl. 143, r. 10 'en 14 staat: patu'ulen, lees: patu'ulën.
- bl. 145, r. 11 v. o. „ : Tjoitob, „ : Tjoitjob.
- bl. 154, r. 11 v. o. „ : paki'it-tji'itën, lees: paki'i-tji'itën.
- bl. 158, r. 11 staat: mëngali-mëngali, lees: mëngali-ngali.
- bl. 161, r. 14 v. o. staat: Ramapoli'i, „ : Ramopoli'i.
- bl. 189, r. 3 v. o. „ : meta'upo-, „ : mëta'upo-.
- bl. 198, r. 12 staat: patu'ulen, lees: patu'ulën.
- „ „ r. 15 „ : van Kawangko'an, lees: Kawangko'an.
- bl. 217, r. 13 „ : Kumokombo', lees: Kumokomba'.

bl. 224, r. 7 v. o. staat: pinailek, lees: pinailĕk.
bl. 230, r. 17 staat: mawangkar, „ : mawangker.
bl. 233, r. 17 „ : paawunta „ : paawu'unta.
bl. 237, r. 8 v. o. staat: Numuwuo'o, lees: Numuwu'o.
bl. 255, r. 4 staat: am tĕmbir, lees: an tĕmbir.
„ „ r. 13 v. o. staat: paĕntoan, lees: paĕnto'an.
bl. 268, r. 9 staat: mekarĕtuk, lees: mĕkarĕtuk.
bl. 272, r. 13, 8, 5 v. o. staat: kaitare, lees: ka'itare.
bl. 302, r. 3 v. o. staat: a'kel, lees: a'kĕl.
bl. 305, r. 8 v. o. „ : ĕm, „ : im.
bl. 319, r. 5 staat: papa'an, „ : pa'pa'an.
bl. 324, r. 17 „ : ju, lees: ja.
bl. 328, r. 1 „ : towan pela', lees: towan im 'pela'.
„ „ r. 2 „ : towan ĕm pela', lees: towan im pela'.

